




1394



L. ANNÆI
SENECAE
PHILOSOPHI
OPERA
AD OPTIMAS EDITIONES COLLATA
PRAEMITTITUR NOTITIA LITERARIA
STUDIIS SOCIETATIS BIPONTINAE



Seneca

EDITION ACCURATA
BIPONTI
EX TYPOGRAPHIA SOCIETATIS
CICICCLXXXII

PA
6661
A2
1782
V.1



L. ANNAEI SENECAE
O P E R A.

L. ANNAEI SENECAE

V I T A.

Natus est Cordubae (ea vetus florensque in Hispania Baetica colonia est) e gente Annaea, cui omnis causa ab annis videtur nomen fœnum, respondetque cognomen Senecæ, item omnis boni; est enim a Senex Senecis. Patrem habuit Marcum Annaeum Senecam, quem Declamatoris nomine a filio fere distinguunt: matrem Helviam, item Hispanam, aut Hispaniensem, magni animi atque ingenii feminam. Pater Augusti temporibus Romam migravit, cum coniuge & liberis, cumque ipso hoc Seneca nostro adhuc tenello. Ibi in optimis artibus optimum ingenium adolevit. Eloquentiam a patre, ut videtur, didicit. Ipse vero non contentus domestica hac facultate, Philosophiae simul animum adiecit, & insignes ac serios eius aevi Philosophos affidius audivit: nominatim Attalum Stoicum, Sotionem eiusdem sectæ, itemque Papyrium Fabianum. Sed & Demetrium Cynicum admiratus est & coluit. A Philosophis ad Rempublicam tractandam accessit, ac Quæsturam primo gessit, Praeturam statim ab exilio, Agripina faciente: nam sub Claudio, primo imperii eius anno, cum Iulia Germanici accusata adulterii esset, & ipsa extorris est acta, & quasi inter adulteros Seneca in Corsicam relegatus. Consulatu etiam functum putat Lipsius, sed extra ordinem. At perpetuus ille eius ho-

nos, *Principis Doctorem moderatoremque fuisse*, optimi sane, quamdiu huius consiliis monitisque se dedit. *Opum & ante aulam largus fuit*. Nam pater eas reliquerat. *Ac in aula ipsa ingentes opes acquisivit*, ac paene regias, sive potius venientes ultro admisit: plerasque enim ex *Principis munificentia* habuit. Atque haec partim naturae, partim melioris ingenii culturae, partim denique fortunae bona fuerunt. Nunc quid de moribus & virtutibus eius dicam, quarum tantum in eo vis apparuit, ut nec *Magistratus splendor* in tumorem dederit, nec *aula ad familiare & cognatum* paene vitium adulationem, flexerit, nec opes ad luxum provocarint? Quam nihili & prope contemptum has res haberet, satis ostendit, cum apud Neronem calumniis varie vellicatus, animosa oratione principem accessit, comitatum petens, & opes suas refundens, referente Tacito. In vietu mira frugalitas: ipse morum vitaeque suae censor & exactor rigidissimus. Ob has eminentes virtutes etiam illo aevo ingens de eo opinio, & vel imperio destinabatur. Sicut autem puram eius mentem non erexerunt prosperioris fortunae blandimenta, sic nec deiecerunt adversae terriculamenta. Vixit in exilio annos circiter octo fortiter, immo, ut ipse ait, feliciter vixit, optimis studiis meditationibusque intentus. Morem quantopere non extimuerit, hinc discere licet. Cum Praefectus Neronis necessitatem ultimam denunciaret, nulla favoris signa edidit, nihil triste in verbis eius aut vultu deprehensum. Flentes ami-

cos, modo sermone, modo intentior, in modum coercentis, ad firmitudinem revocavit. Et novissimo quoque momento, suppeditante eloquentia, advocatis scriptoribus, praecclare multa differuit, quae in vulgus edita sunt. En dignam Philosopho, & quidem Stoico, mortem. In ipsis sapientiae praeceptis vocem simul & spiritum extreum reddidit.

NOTITIA LITERARIA

DE

L. ANNAEO SENECA

Ex Io. Alb. Fabricii Bibliotheca Latina a Io. Aug.
Ernesti auctius edita Tom. II, cap. 9.

L. ANNÆI SENECAE aetas.

L. ANNAEUS SENECA, M. Annaei filius, una cum Afranio Burro Rector Imperatoriae iuventae, postquam Senatoria dignitate, quaestura præturaque, & aliis honoribus functus esset, & Stoicis, licet neget,¹ addictus, inter Philosophos magnum sibi nomen comparasset, ab eodem Nerone, quem instituerat, vita excedere iussus, ferro sibi ipse venas exsolvit, balneumque ingressus obiit anno C. 65. Neronis 12. triennio post Burri mortem, *Morum vitiorumque publicorum sui temporis descrip- tor verissimus & accusator accerrimus*, Lactantio V, 9. *Optimus excultor morum, mentisque colonus*, ut bene vocatur ab Alano lib. 1 Anti-Claudiani. Mores ipsius & vitam dogmatibus haud respondisse, innuit Dio lib. LXI, p. 694. qui magis audiendus est lib. LIX, p. 655. ubi Senecam ait omnes sui temporis Romanos multosque alios sapientia antecep- sisse: ὁ Σενέκας ὁ Ἀννίος Λούκιος, ὁ πάντας μὲν τοὺς καθ' ἑαυτὸν Ρωμαῖος, πολλοὺς δὲ καὶ ἄλλους σορίᾳ ὑπεράρεις. Nam ut Tacitus, severus & ipse morum censor XIV, 52. tradit, criminationes illae fuerunt invido-

¹ Epist. 45, & de vita beata cap. 3.

ruin, post Burri mortem ad deteriores inclinante Nero-ne, & bona Senecae consilia non amplius audiente, Senecam adorientum. Eius vitam praeter Lipsium & Andr. Schottum non indiligerent persecutus est M. Antonius Delrio, qui librum secundum prolegomenon ad *Syntagma tragœdiae latīnae* vitae Senecae describendae impendit. A Petrarcha scriptam Senecae vitam memorat Thomasinus in Petrarcha redivivo p. 25. Nicolaus Antonius lib. 1. Bibl. veteris Hispanae cap. 7 seq. qui Io. Paulum Martyrem & Iannotium Mannetum de vita Senecae memorat: e recentioribus praeter citatos *Io. Shildius*¹ in exercitationibus ad Taciti Anna! lib. XV. ubi extrema Senecae describuntur, Lugd. Bat. 1645, 12. *Franciscus Salvator Florentinus*² in libro edito Romæ 1674, 12. *il filosofo cortegiano*, overo *la vita di Seneca*, Venet. 1675, 12. Aliis Christianus plane Theologus visus fuit Seneca, ³ Atheus aliis, ita ut nimias alii laudes in eum congerendo, alii conviciis onerando & maledictis⁴ modum utrinque excesserint, vitio solenni ingenii humani, & fato haud infrequenti magnorum virorum, qui per encomiorum & obtestationum sese mutuo confientium certamina famam ingentem ad posteros propagant.

¹ Nic. Heinsii poemata p. 263.

² Giornale de' letterati di Roma a. 1674. p. 137. Journal des Sav. 1675. p. 271. Iulii Nigroni istoria de' scrittori Fiorentini p. 218.

³ Criminaciones variorum in Senecam Philosophum collegit Io. Henr. Meibomius in vita Maecenatis c. 22. p. 332. sq. Consule etiam Sam.

Basnagium ad A. C. LVIII. num 4. les pensées du Comte d'Oxenstierna T. 2. p. 41 sq.

⁴ Vide L. Annaeum Senecam ab Amando Fabio atheum proclamatum & a Jacobo Petro Huntero defensum. Ratisbonae 1651. 4. & quos de religione Senecae laudo infra §. IX.

VIII NOTITIA LITERARIA

Ut vero & doctrinae copia, & scribendi elegantia
longe multumque omnibus obtestatoribus suis praef-
stittiſſe Senecam, vere mihi videtur affirmasse Mure-
tus: ita non magis Atheum fuisse illum persuadeo mihi
quam Christianum, nec magis contaminatum omni-
bus sceleribus hypocritam, quam ex Sanctis aliquem
aut Angelum: sed non malae indolis, nec absurdii
iudicij hominem, qui ex philosophia Stoica tantum
profecerit, ut in se descendere, & Providentiae Di-
vinæ consideratione sustinere animum, tum vani-
tatem ambitionis, avaritiaeque & voluptatis stulti-
tiam agnoscere potuerit, etiam in affluentia omnium
rerum, in negotiorum mole, & aulae maxima luxu
& magnificientia: qui denique res secundas non
minus, quam adversas & mortem ipsam didicerit
ferre fortiter, quod non verbis, sed factis demon-
stravit; facile etiam praemii loco laturus vitae &
honorum propagationem, si eam obsequio qualicun-
que in Neronis effrenes cupidines, & funesta Reipu-
blicae consilia redimere voluisseſſet. Iustus Lipsius Cen-
tur. 1. ad Belgas Epist. 22. *Senecam commentari in-*
cepi: pergo ſedulo, & in ipſo labore fructum eius ca-
pio, formari & emendari. Semper ille mihi magnus
vir apparuit: sed ut ſolent vere magna, magis ma-
gisque inspectus & tractatus ſe approbat, & crebro.
Post ſacras literas nihil in ullo orbe, in ulla lingua
ſcriptum utilius meliusque. Deus mihi det absolvere.
Hoc ſaltem brevi & operoſo commentariolo, (ita con-
ſido) affequar, ut quivis legere Senecam, & capere,
qui modo Latinae linguae ruditis non ſit, & ex illo
campo meſſem legere poſſit ad vitae ſuae & morum
tutelam. Me aut meām ambitionem hic non ſpecto &c.

SCRIPTA eius quae exſtant.

Exſtant eius 1. de *Ira libri III. ad Novatum fra-*

trem sub Caligula scripti. Hoc opus non integrum ad nos pervenisse ex eo colligas, quod Laetantius in Lib. de *ira Dei* ex eo profert definitiones irac, quas frustra quaeres in his libris. Prodierunt separatim ex recensione Henr. Ernstii, Sorae. 1652, 12. Petrus Alcyonius de *exilio* lib. 2, p. 200. *Seneca*, si quid auctor iste ad rem pertinet, suorum Stoicorum duritiam secutus, damnat in Aristotele irae laudationem, & affectionis eiusmodi patrocinium, quae tamen utiliter a natura data nobis videtur, modo praescriptio & moderatio ea retineatur, quam idem ipse Philosophus retinendam censet, hoc est, ut irascamur pro quibus debemus, & ut oportet, & cum debemus, & quam diu: sin minus, fatui & stupidi essemus, qui & sensu & dolore videremur carere. Germanica versione bona & eleganti donati hi libri sunt a M. Christiano Friderico Weiffso, Dresdae 1732, 8, qui & Senecae vitam praemisit. Gallice prodierunt 1585, 8.

2. *Ad Helviam Matrem*, de *Consolatione liber*, scriptus, cum instinctu Messalinae in Corsicam insulam a Claudio Imperatore relegatus esset. Huic libro (qui seorsim prodiit ex recensione Augusti Buchneri Viteb. 1655, 8.) Iustus Lipsius XII. *Epigrammata* praefixit, quae sub Senecae nomine invent. MSS. occurrunt. Sed Petro Scrivenerio iudice rectius inscribuntur *Epigrammata super Exilio L. Annaei Senecae*, quam, ut in Schedis Pithoeanis, *L. Annaei Senecae Epigrammata super exilio*. Apud lacubum Magnum, auctorem Sophologii, pro *consolationibus ad Helviam* ridicule laudatur Seneca in *comellationibus ad Elivam*, ut notavit Nicol. Antonius. In Codice MS. Iacobi Durantii Casellii hic li-

¹ Albina haec dicitur in
cuiusdam editionibus, ut
in illa quae ex Lipsii recen-

sione prodiit separatim Lo-
van. 1602, 4.

bro titulus praefixus: *L. Annæi Senecæ liber ad Helbiam matrem suam de consolatione filii sui.* Vide eius Varias Lect. lib. 1, c. 17. Gallice verius 1584, 8.

3. *Liber de Consolatione ad Polybium*, Claudi, cui a studiis fuit, libertum, & fratri morte affictum, scriptus anno circiter exsiliī tertio, sed hodie magna sui parte ab initio mutilus. In hoc libro huic Claudiī Imp. liberto, fratri morte afficto, ac per illum Imperatori blanditur. Unde Dio in excerptis Peiresc. pag. 685. scripsit, Senecam Claudi libertis adulatum, ὥστε καὶ βιβλίον ἐκ τῆς γῆς πέμψαι, ἐπανοῦς αὐτῶν ἔχον, ut librum refertum eorum laudibus ex insula (in qua exsulabat) iis mitteret, quem tamen pudore postea duc̄tus stylo verso delevit. Eodem spectat quod in Epitome Xiphilini pag. 694 legas, quod Seneca τοὺς ἔξελευθέρους ἀθώπεις, καὶ τινῶν καὶ ἑγενέμενα συνετίθει.

4. *Liber de Consolatione ad Marciam*, A. Cremutii Cordi a Seiano circumventi filiam, nati sui Metiliī obitum lugentem. Editus & illustratus est a Davide Chytraeo, Rostoch. 1571, 8. cum S. Cypriani libro de mortalitate. Italice MS. fuit in Bibliotheca Rostgaardiana pag. 545.

5. *De Providentia liber*¹ extrema, ut videtur, parte mutilus, ad Lucilium procuratorem Siciliae. Integer libri titulus fuisse videtur, qualis assertur a Laetantio V, 22. quare bonis viris multa mala accidant, cum sit providentia. Scriptus est Claudio Imp. iam defuncto. Prodiit separatim Germanice redditus a Iac. Stolterfotho animadversionibusque illustratus, Lubec. 1642, 8. cum Mureti Oratione, & notis Lipsii ac Io. Frid. Gronovii, curante Io. Henr. Ac-

1 Confer Mureti Volum.
2. Orat. 3. & Eduardi Sherburne librum Anglice editum

hoc titulo: *Answer to Lucilius his Quaere: Why good men suffer misfortunes?*

kero, ¹ Rudolstadii 1711, 8. a I. F. Maio, Lips. 1729, 8. & a Io. Georg. Fabro Bipontino 1782. cum notis. Gallice interprete Angelo Capello, Paris. 1578. & Italice Florent. 1714, 4.

6. *De animi tranquillitate ad praefectum vigilum Neronis*, Annaeum ² Serenum. In hunc librum notae *Ioannis Chokierii* viderunt lucem Leodii 1607, & 1653, 8. Petri Mulleri, Consiliarii tunc Stolbergensis, Ienae 1671, 12. cum Epistolis Senecae ad Paulum, excusus Lipsiae 1499, 4. Italice versum a *Thoma Segni*, Florentino, laudatur in Dictionario Academiae della Crusca. Germ. prodiit Berol. 1768.

7. *De Constantia sapientis sive quod in sapientem non cadit iniuria*, ad eundem Serenum. In hunc librum exstant dissertationes morales *Iusti Reiffenbergii*, e Lipsio magnam partem collectae, ut notatum Iocobo Thomasio τῷ μαναγίτῃ. Germanica versio elegans M. Io. Frid. Maii lucem vedit Lips. 1729, 8.

8. *De Clementia*, ad Neronem libros tres scripsisse videtur Seneca, ex quibus non exstat nisi *primus* & *pars secundi*. Libris integris videtur usus esse Hildebertus Cenomanensis, qui eos laudat lib. 1. Ep. 3. Gallice ea, quae ex illis libris supersunt, prius vertit *Angelus Capellus* Paris. 1578. Io. Calvinus commentarius cum vita Senecae primum vedit lucem Paris. a. 1532, 4. Praefationem exhibet Maetarius T. 2. annalium typographicor. p. 770.

9. *De brevitate vitae ad Paulinum*, Uxoris fortasse suae Paulinae fratrem, ut contendit Lipsius. Socerum Muretus mavult. Sed ad hunc non scripsisset c. XIX. *Nunc dum calet sanguis, vigentibus ad meliora eundum est*. Eum non diu post Caligulae necem com-

¹ Acta Erud. 1711. p. 430. nus ad Plinii XXII, T. 4.

² De hoc Sereno Hardui- p. 209.

XII NOTITIA LITERARIA

posuisse se innuit ipse cap. 18. Prodiit separatim a. 1498, 4. ut videtur, Lipsiae : & Lugd. B. 1602. 4. Germ. Hamb. 8. 1754.

10. *De Vita beata ad fratrem Gallionem sive Novatum.* Liber in fine mutilus. *De vita beata ad Senecae exemplum* scripsit etiam S. Ambrosius libris duobus, in quorum prioris capitibus duobus, maxime postremis, docet, ea quae de beatitate sapientis disputant Stoici, verius dici posse de homine Christiano. Vide T. 1. edit. Benedictinor. p. 454 seq. *Renati Cartesii animadversiones ad Senecam de Vita beata leguntur* parte prima eius Epistolarum.

11. Pars libri *de otio aut secessu sapientis*, male olim annexa superiori libro.

12. *De Beneficiis libri VII.* ad Aebutium Libalem, Lugduniensem, cuius mentio Epist. 91. In quibusdam editionibus *Eburtius* dicitur, ab auctore libri de vitis Philosophorum *Eusebius*. Videtur illud opus respicere Seneca Epist. 81. Epitomen eius latine concinnavit *Iacobus Sorgerus* Ien. 1611, 8. In gratiam Eleonorae, Cosini I. Medicei coniugis Italice vertit *Benedictus Varchius* Florent. 1554, 4. repetita saepe verlio est Venet. 1561, 12. Florent. 1574, 8. 1584, 4. Gallice post *Salverium Accuratulum* (*Saulveur Accurat*) Narbonensem Paris. 1561, 8. *Franciscus Malherbius*, inter cuius opuscula saepius prodierunt, ut Augustobonae Tricassum 1635, 8. quae tertia iam est editio. Librum primum etiam vertit Gallice *Angelus Capellus*, Paris. 1580. In codice quodam manu exarato Seculi XI. hi libri non absurde inscribuntur *de dandis & accipiendois beneficiis*. Vide Henrici Pomposiano in Monasterio Cletrici Epist. ad Stephanum, datam a. 1093. quam edidit Bernhardus Montfaucon in Diario Italico p. 86. *Federici Morelli Scholia* in hos libros existant in

editionibus Senecae Parif. 1619. 1628. fol. cum Variorum notis.

13. *Epistolae CXXIV.* ad Lucilium¹ Siciliae procuratorem, cui ex illis immortalitatem pollicetur Ep. 21. Codex harum longe veterimus in publica civitatis Argentinensis servatur Bibliotheca, vocibus ut plurimum inter se cohaerentibus exaratus, teste Nic. Heinsio Epist. ad Io. Frid. Gronovium T. III. sylloges Burmannianae p. 461. *Ramantini Florentini Ord. Praed. commentaria in Senecae Epistolas circa a. C. 1350.* iussu Clementis VI. composita memorat Iulius Niger in historia scriptorum Florentinorum p. 480. sicut *Lucae Mantinelli* ex eodem Ordine eademque patria circa a. 1364. p. 384. *Dom. Peccioli Pisani* circa a. 1420. commentarium cuim prologo apologeticō, Iacobus Echardus T. I. Bibl. scriptorum Dominicanorum p. 771. Eas olim per libros distinctas fuisse constat ex Geilio, qui librum² 22. *Epistolarum moralium*

¹ Lucillum Balbum vocat auctor libri de vitis Philosopherum, Parthenopenis forte fuit. Vide Lipsium ad Epist. 53. Epicuri sectam secutum colligas ex Epistola 23. & aliis. Scriptorum Lucilii elegantiam celebrat Epist. 19. & 46. Sed ex Lucilii huius scriptis nihil ad nos pervenit.

² In Veneta a. 1492. & aliis antiquis Operum Senecae editionibus Epistolae eius CXXIV. distinguuntur in libros viginti duos, hoc pacto, ut liber I. complectatur Epistolae primores 13. Liber

II, 14-19. III, 20-28. IV. 29-35. V. 36-44. VI. 45-50. VII. 51-57. VIII. 58-66. IX. 67-70. X. 71-73. XI. 74-82. XII. 83-85. XIII. 86-88. XIV. 89-94. XV. 95. XVI. 96-100. XVII. 101-103. XVIII. 104-107. XIX. 108-112. XX. 113. 114. XXI. 115-119. XXII. 120-124. Sed videtur haec distinctio facta a quodam recentiore, qui vigesimum secundum librum a Gellio laudari videbat. Sane quae Gellius ex Epistolis Senecae illo in loco adducit, in editis philosophi Epistolis non extant.

Senecae citat lib. 12. cap. 2. unde etiam colliges, non paucas huius philosophi Epistolas periisse. In MS. Codice, qui in Rhedigeriana Bibliotheca Vratislaviae asservatur, distinctae sunt in libros XX. ut notatur in Ephemeridibus literariis Lipsiensibus Germanice editis a. 1710. sect. IX. pag. 895. sed non additur, duo postremi libri desiderentur, an vero diversa sit divisio ab antiquis editionibus, quae Epistolas Senecae distinguunt in libros XXII. In editione Lips. 1497, 4. sunt Epistolae tantum LXXXIX. Epistolam XLVIII. editiones quaedam dividunt in binas, ut Mureto notatum & H. Stephano. Epist. LXXXVIII. quae in quibusdam editionibus & in MSS. ut in Quedlinburgensi Codice, de quo Tobias Eccartus in notitia illius Bibliothecae p. 18. fertur sub titulo *libri de studiis liberalibus vel de VII artibus liberalibus ad Liberalem*. Hispanice pridem iussu Ioannis II. Castellae regis veram refert Nic. Antonius, lib. 1. Bibliothecae vet. Hispanae §. 148. Gall. vertit Fr. Malherbe.

14. *Naturalium Quaestionum* ad eundem Luciliūm, quem *Virorum optimum, & III, 36. carissimum* appellat, *libri VII.* qui magnam partem versantur circa Meteorologica, illustrati primum emendatique a Matthaeo Fortunato Pannónio, Venet. apud Al-

Haud praetereundum quoque, in iisdem antiquis editionibus Senecae Epistolam duodenagesimam inferius occurrere sub titulo: *Liber de studiis liberalibus ad Liberalem*. In Actis Eruditorum a. 1725., p. 429. memorari videas editionem *Epistolarum per veterem, si non principem, quae ex nomine MSS. anteferri pos-*

set, quod integras περιοπὰς, oppido elegantes, habet, quae in nullis editionibus occurunt, a nemine etiam eorum, qui MSS. traclarunt, indicatae sunt. Optandum erat, ut pericopae illae productae in medium vel saltim aliquae earundem speciminis loco communicarentur cum viris doctis.

dum anno 1522, 8. Lipsius, cum vix in primum caput libri primi Scholia confecisset, morbo impeditus a scribendo abstinuit, & hoc opus una cum sequente aliis illustrandum reliquit.

15. ἀποκλονύτωσις, sive ludus¹ in Clodium Imp. Satyra lepidissima² Menippea, notis illustrata a B. Rhenano, Adr. Iunio, Iano Grutero, Nic. Fabro, Liberto Fromondo, Casp. Barthio, Io. Frid. Gronovio &c. Mihi Caesar is unus propemodum Senecae pluris est, quam cuncti Caesares ipsius Caesaris Iuliani, inquit Vavassor p. 246. de ludicra dictione. Primus in Germania³ reperit, ediditque & scholiis illustravit Beatus Rhenanus inter Senecae opera ab Erasmo recensita Basil. a. 1515. fol. & cum Synesii laude calvitiei, Io. Phrea interprete, Erasmi laude Moriae, Gerhardi Lystrii illustrata notis, atque praeclara eiusdem Eraimi Epistola apologetica ad Martinum Dorpium, Basil. 1519, 4. & separatim 1521, & 1551, 8. Dan. Heinsii dissertatio ad hunc libellum legitur post eius Orationes Lugd. Bat. 1627,

¹ Ludus, i. e. satyra, v.
Dan. Heinsium in libro de Satyra Horatiana.

² Satyram Menippeam vocamus, quo genere scribendi primum inter Latinos usus est Terentius Varro, cum prosa oratio Satyrica passim versibus brevibusque velut carminibus tanquam gemmulis distinguitur. Porro titulus Satyrae ἀποκλονύτωσις exponitur a Dione lib. 6o extr. innuitque ἀποθέωσιν Claudio partam per esum boleti sive κολοκύντου, in quo cibi genere venenum is-

aceperat, unde boletos Deorum cibum Graeco proverbio collaudare solitum Neronem refert Suetonius c. 33. v. de titulo Satyrae Iunium Animadv. 1, 17. Librum de morte Claudi vocat Guilielmus Malmesburiensis IV. de gestis Pontificum Anglorum p. 283. ubi ex Seneca refert Barbaros in Britannia & in honorem eius civitatem acidificasse Glocestriam.

³ Vide Erasmus in adagio L, 3, 1. aut regem aut fatum nasci oportere.

8. p. 608 seqq. Illustravit hunc Senecae librum etiam *Io. Scheferus* in *Miscellaneis suis*, sive libro *Academicarum lectionum*. Emendationes nonnullae *Christophori Augusti Heumannii*, exhibentur in *Actis Erud.* T. 6. supplementi p. 296 seq. Novissime cum notis G. C. B. prodiit hic libellus Lipsiae 1720, 8.¹ addito Lipsii somnio, & Sardis venalibus Petri Cunaei. Nova *Gallica* versio² elegans lucem vedit Paris. 1726, 8. in continuatione *Memoriarum literarum* a Sallengrio pridem valgatarum T. 1. parte 2. p. 253 seq. ab auctore eruditio, qui notas etiam, vitamque & iconem Imp. Claudii promisit. Cum versione *Germanica*³ non incomta *Frid. Christoph. Neubur*, brevibusque notis Lipsiae 1729. 8.

VERSIOS.

Senecae versionem *Gallicam* ab *Antonio Verderio* compositam excudi Lugduni a. 1584. scribit in sua *Bibl. Gallica Crucimanus*, qui pag. 287. etiam memorat *Laurentii Primi* (le Prémier) Paris. a. 1500. aliam dedit *Claudius Seyffelius* Lugd. 1556. & *Guilelmus de la Teyssoniere*, Sebusianus. Epistolas plerasque vertit *Godfredus de la Chassagne*, Rothomag. 1574, 12. Paris. 1582. Recentiores versiones Gallicae operum Senecae existant auctore *Matthia de Chalvet*, Paris. 1607. 1638. 1647. fol. & *Petro Ryero*, Paris. 1659. fol. duobus Voll. & 1665, 12. XIV. Voll. Epp. Gallice vertit *Fr. Malherbe*. Seneca *Germanice*, *Michaele Herr* interprete, Argentor. 1540. 1545. fol. & *Francof.* 8. à *Conr. Fuchsine*. Anglice per *Thom. Logde*, Lond. 1614. 1620. fol. Epistolae de vita

¹ *Acta Erud.* T. 7. supplementi p. 521.

² *Bibl. Françoise* a. 1726. Septembre p. 135. *Journal*

des Sav. 1727. p. 147.

³ *Acta Eruditor.* an. 1729. pag. 229.

beata, de septem artibus liberalibus (sive Epist. 88.) de providentia & de moribus Hispanice iussu Ioannis II. Castellae Regis, Hispali 1491. & Antv. 1551. 8. de providentia, de vita beata, de tranquillitate animi, de constantia sapientis, de brevitate vitae, & consolatio ad Polybium ac de paupertate, interprete, Petro Diaz Navarrate, Ferdinando Hispaniae Infanti & Isabellae Reginae a secretis. Minnos etiam vertit, & paraphrasi sive glossis explanavit iussu Ioannis II. Petrus Diaz Toletanus: libros de clementia *Alphonsus de Rebenga*, eques Alcantarae: libros de beneficiis Gaspar Ruiz Montianus, Benedictinus Monachus. Italice libros de beneficiis vertit Benedictus Varchi, Florent. 1554, 4. libros de *ira*, additis notis, Franciscus Lesdonatus, Patav. 1559. & *Sanctus Conti della Rocca Contrada Rom.* 1659. ad Carolum Emanuelem II. Sabaudiae Ducem: *Epistolae Io. Baptista Donus Florentinus*, Venet. 1549, 4. In Bibliotheca Veneta, Thomasino de Bibliothecis Venetis pag. 13. teste, MSS. visuntur Epistolae Senecae, Etrusco idiomate eleganter scriptae, nec non in Medicea, tribus exemplaribus, ut Nic. Antonio notatum. Hanc versionem una cum aliis Hetruscae elegantiae & puritatis monumentis in Dictionario magno Academiae della Crusca laudatis publicare instituerunt Florentini. Denique Epistolae cum libro de providentia excusae Italice, ' Florentiae a. 1717, 4. volgarizzamento dell' Epistole di Seneca, e del trattato della Provvidenza di Dio. Danice Seneca lucem vidi Sorae 1658. fol. auctore Brigitta Trottia, femina erudita, de qua vide, ubi lubebit, Albertum Thura in Gynaeco Daniae literato pag. 116 seq. Diem obiit Sorae a. 1662.

1 Journal littéraire Tom. IX. p. 468.

FALSO tributa Senecae.

Suppositi Senecae sunt liber de virtutibus cardinalibus, alias de moribus, & tertius de paupertate, qui sub eius nomine cum *Epistola de assentatione vitanda ad Lucilium*, prodierunt Colon. 1529, 8. & alibi, Senecae etiam adscripti a Vincentio Bellovacensi libro IX. Spec. Historialis cap. 102 seq. Haec opuscula excerpta sunt ex Senecae & aliorum scriptis, cuius generis etiam esse puta, quae sub nomine *Proverbiorum*¹ & auctoritatum Senecae aliquoties vulgata sunt, non diu post repartam typographiam. Lipsius quoque in calce suae editionis duplicita Excerpta subiicit, quorum priora illa ipsa sunt, quae edita diximus sub titulo libri de paupertate: posterioribus remedia in omni genere afflictionum ex Senecae Philosophia de promta continentur, quae in editione Veneta Operum Senecae a. 1492. fol. 64. leguntur sub hac inscriptione: *Seneca ad Gallionem de remediis fortuitorum. Est oratio per dialogum sensus & rationis.* Prodiit etiam Lipsiae a. 1500, 4. Libellus de quatuor virtutibus cardinalibus prodiit & Daventriae 1512, 4. cum libro de moribus, & Lipsiae a. 1515, 4. cum commentariis latinis, & rhythmis metaphrasticis Germanicis, & sine illis Venet. 1586, 12. & in variis Codd. MS. sub Senecae nomine obvius est, sed verum auctorem ha-

¹ Proverbia Senecae verbis redditæ sunt ab Eberhardo Bethuniensi circa a. C. 1120. Sed quae in editiōnibus antiquis feruntur sub proverbiorum Senecae titulo, parum differunt a Publīi Syri mimis sive sententiis. Othlonus Monachus Sanc-

temmeramensis in prologo ad suum Proverbiorum librum: *Cum nuper illa quae dicuntur Senecae proverbia per alphabeti ordinem distincta legiſsem, primo quidem mirabantur tam cuiquam infidelium prudentiam inesse potuisse &c.*

bet *Martinum Abbatem Dumiensem*, & hinc Episcopum *Braccarensem*, qui circa a. C. 560. claruit. Vide Isidorum Hispalensem cap. 22. de scriptoribus Eccles. & Vincentii Placcii catalogum Pseudonymorum p. 256. Sub huius Martini nomine prodiit in Bibliotheca PP. T. X. pag. 382. & Helmstadii 1691, 8. cum Dominici Mancini libello de quatuor virtutibus cardinalibus, edente V. C. Hermanno ab Hardt, ubi inscribitur *formula honestae vitae*. Praefationem ad Mironem Suevorum Regem, quam huic libro Martinus praefixerat, edidit Lucas Dacherius T. X. Spicilegii, ante eum Boxhornius ad Ammianum p. 863. Doctissimus vero Baluzius ad Epist. 154. Lupi Ferrariensis existimabat, librum de quatuor virtutibus Seneca auctore scriptum, sed a Martino abbreviatum esse. Germanicam Metaphrasin scriptam in membrana servabat Noribergae V. C. Godfridus Thomasius. Impressa Lipsiae, incipit sic:

*Vier sind der Angel Tugent
Domit getzert wirt die Iugene
Die uns vil naturlicher Leuthe
In uren Spruchen bedeuthen.*

Gallice vertit *Angelus Capellus*, Paris. 1582. Ceterum apud Clariss. Montefalconum pag. 86 seq. Diarii Italici pro verbis: *a quodam Martyrio Episcopo ad Mitonem Regem*, legendum: *a quodam Martino Episcopo ad Mironem Regem*. Libellum de moribus vitae humanae separatum editum Lips. 1499, 4. Trithemius vocat *de morum institutione*. Incipit: *Omne peccatum actio est*, atque eundem Martinum habet auctorem. Existat & in Bibl. PP. T. X. edit. Lugd. pag. 385. Hunc & alterum de paupertate ex Epistolis Senecae excerptum illustravit *Leodegarius a Quercu*, Paris. 1556, 4. Liber de artibus sive de

studiis liberalibus ad Liberalem haud diversus est ab Epistola 88. ut iam supra notatum. Quid vero scripti sit *Senecae de Cavalleria*, Ferdinando Mexiae apud Nic. Antonium lib. 1. Bibl. vet. Hispan. p. 32. allegatus, alius dicet, non ego.

His adde *Epistolas octo ad Paulum Apostolum*, quae non minus quam sex Pauli ad Senecam, spuria sunt, etsi non heri vel nudius tertius, sed ante multa secula¹ sunt confitae, cum earum iam meminerit B. Augustinus & Hieronymus, ut Pseudo-Linum, commentariumque Dextrum, & Ioh. Sarisber. iam omittamus. Editae sunt cum aliis Sen. script. Neap. 1484, f. Venet. 1492, f. & in edit. Erasmi Basil. 1529, fol. sed praemissa censura, qua Paulo & Seneca indignae pronuntiantur; praeterea cum libro de IV. virtutibus cardinalibus Lugd. 1523, 4, Venet. 1588, 8. & cum reliquis Pauli Epistolis, etiam Iacobi Fabri Stapulensis observationibus illu-

1 Occasionem eas fingendi videntur dedisse verba Philipp. 4, 22. Vide Dan. Heinssium ad h. l. & quae notavi in Codice Apocrypho Novi Test. ubi has Epistolas integras exhibui adiunctis meis animadversionibus. Ad Veterum loca ipsi praemissa addes haec Honorii Augustod. de luminaribus Eccles. *Lucius Annaeus Seneca Cordubensis Fotini* (leg. ex Hieronymo Sotionis) Stoici discipulus & patruus Lucani Poetae scripsit quasdam Epistolas ad Paulum Apostolum & Apostolus quasdam rescripsit. Censuris adiungenda sunt, quae habet Angelus Decem-

brius de Politia literar. lib. 1. p. 57. lib. 2. p. 121. Mottanus Vayerus de virtute paganorum T. 1. Opp. p. 660. seq. in fol. & Thom. Crenius ad T. 3. Methodor. de studiis instituendis p. 415. seq. Hinc porro Seneca querundam iudicio audacter annumeratus Christianis, cui rei probandae miror homines adeo nafatos non produxisse haec Tertulliani cap. 3. Apologet. *Ego Lucium sapientem virum repente factum Christianum defero.* Sed fabulam de Seneca Christiano expludit Franciscus Modius Lect. novantiqu. Epist. 21.

stratae Parif. 1512. 1515, fol. Leguntur quoque in Bibl. Sancta Sixti Senensis lib. 2. sub titulo *Paulus*, in Mich. Waltheri officina Bibl. in B. Iosuae Arndii Lexico Antiquitatum Eccles. in locis communibus sententiarum Senecae ab *Huberto Schutteputaeo* digestis, Autverp. 1623, 12. in D. Georgii Henr. Goezii Schediasmate de suppositiis & deperditis Pauli scriptis, ubi & Fabri observationes exhibentur Viteberg. 1688, 4. *Stephanus Praetorius* Germanica versione donavit, cumque ea edidit Hamb. 1595, 4. & cum Epistola Paulo supposita ad Laodicenses Latine & Germanice recusae sunt Bremae 1692, 4. Denique latine recudendas dedit D. Io. Georgius Prius in introductione ad N. T. In iisdem Epistolis Pseudo Seneca ait, se ad Paulum mittere librum de copia verborum. Et Thomasinus de Bibliothecis Patavinis. p. 58 testatur in Bibl. monasterii S. Antonii urbis Patavinae exstare manu exaratum L. Annaei Senecae Cordubensis Stoici discipuli librum de copia verborum ad B. Paulum. Nugae, nugae, inquit Nic. Antonius haec narrans T. 1. Bibl. Vet. Hispanae lib. 1, cap. 8. pag. 31. Ceterum hae Epistolae ad Paulum, non modo cum Senecae scriptis saepius prodiere, ut Venet. 1503, fol. Basil. 1515, fol. &c. sed & iunctae scriptis Apocryphis Clementis, Martialis Lemovicensis, & aliorum, Augustae Vindel. 1529, 8. Sed nolo de illis Epistolis iam verbum addere, cum satis de illis dixerim in Codice Apocrypho Novi Test. Senecae de fortuitis remediiis ad Gallionem libri II. scripti in Bibl. Uffenbachii fuere, illi opinor, qui prodierunt Lips. 1500. 1503, 4. Librum Senecae de matrimonio, quem memorat Trithemius, non vidi ipse, ut puto, sed ex Hieronymi I. in Iovinianum nominavit. De iactato praeter rem huius

xxii NOTITIA LITERARIA

Philosophi Christianismo exstat diatriba D. Aegidii Strauchii, Viteb. 1668. 1706, 8. quanquam multa sunt in Senecae scriptis, quae hominem Christianum haud dedeceant, quorum partem collegerunt Iosephus Hallus, & Io. Baptista Schellemburchius Iesuita in *Seneca Christiano*, & M. Iustus Siberus in *Seneca divinis oraculis quodammodo consono*, Dresdae 1675, 12. quibus iungendi praeter Nic. Hardschmidii diss. de Senecae notitia Dei naturali, Io. Andr. Schmidius, diss. de Seneca eiusque Theologia len. 1668, 4. & Io. Janus Svaningius in Theologia naturali contemplativa ex Senecae scriptis in locos communes digesta, Hafniae 1710, 4. ¹ cuin praefat. erudita D. Severini Lintrupii: Io. Philippus Apinus diss. de religione Senecae Viteb. 1692, 4. Io. Henr. von Seelen, in diss. de scriptoribus gentilibus falso in Christianorum ordinem relatis, & de frustra quaesitis in Virgilio rebus divinioribus, Flensburg. 1714, 4. Io. Gottlieb Heineciuss de Philosophis semichristianis, Halae Sax. 1714, 4. Iacobus Henricus Lochnerus in schediasmate de scriptoribus nonnullis, qui aliis pagani, aliis Christiani audiunt, Brem. 1716, 4. & ante hos D. Christianus Kortholtus in diss. de Philippi Arabis, Alexandri, Mammaeae, Plinii iunioris & Senecae Christianismo, Kil. 1666, 4. tum auctor libelli, *der Christliche Seneca*, oder Richtschnur eines tugendhaften Lebens aus denen Episteln L. Annaei Senecae gezogen, Lips. 1712, forma minore.

Moralis Philosophiae collectanea digesta per titulos, & ex Senecae scriptis selecta a Lud. Granatenfi, existant in huius operibus iunctim Latine excusis Andrea Schotto curante tribus Volumini-

¹ Acta Erudit. T. VI. supplem. p. 335.

bus in fol. Colon: 1628. Tom. 1. pag. 643 seqq. Non pauca etiam ad verbum e Seneca repetita in *Ioannis Bonae manuductione ad Coelum*, quam ipse profitetur medullam continere Sanctorum Patrum, & veterum Philosophorum. *Petri Brinch admiranda Senecae Ethica, & Politica* in locos communes ordine literarum digesta, & summaris ac notis illustrata, necedum lucem viderunt, quod sciam, et si iam ad praeluen parata memorantur in Novis literariis maris Balthici & Sept. a. 1703, p. 134. *Dionysii Gothofredi Loci Communes* e Seneca, qui eius Coniecturis & V. L. in Senecae libros subiecti sunt, ut supra indicavimus, hoc ordine sunt digesti: 1. Theologica, sive de Deo & rebus Divinis, 2. Iuridica ad ordinem Pandectarum, 3. Ethica, 4. Oeconomica, 5. Politica, 6. Grammatica, Rhetorica, Historica, 7. Dialectica, 8. Physica, Medica, & Mathematica, 9. Similium librum, & 10. Nomenclatorem adagiorum, & nominum priorum per varias classes digestorum. *L. Annaeo Seneca* illustrando en blasfenes politicos y morales por *Iuan Bannos de Velasco*, Madrit 1670, 4. prodiere.

DE PERDITA Senecae scripta.

Deperdita Senecae scripta a veteribus memorantur haec, notante praeter alios Lipsio¹ in vita Senecae cap. 10. cuius observatis nonnulla adiunxi. Liber, s. dialogus, *de superstitione*, Tertull. cap. 12.

1 De scriptis Senecae deperditis differit etiam M. Ant. Delrio prolegom. ad Senecae Tragoedias libro 2. qui est de vita Senecae cap. ult. & Nic. Antonius Bibl. vet. Hispanae §. 117. seq.

nam plurima composuerat, atque ut Quintil. X, 1. tractaverat omnem ferme studiorum materiam, nam & orationes eius. & poemata & Epistolae & Dialogi feruntur.

Apologet. Laetant. V, 9. & Augustin. VI, 10. de C. D. memoratur etiam a Diomede Grammatico lib. 1. Idem eodem libro praeterea Senecam *de officiis* laudat. *Epistolarum ad Novatum fratrem liber X.* allegatur a Prisciano lib. 1. de ponderibus & mensuris. *Epistolae ad Maximum Caesonium* Martial. VII, 44. niti de aliis libris Caesonio inscriptis intelligendus. *De fortuitis sive remediis fortuitorum ad Gallionem fratrem* Tertull. Apologet. *De providentia*, maius opus scribenduni suscepisse se innuit Seneca cap. 1. libri, qui de hoc argumento exstat. *De terrae motu* lib. 6. natural. quaest. c. 4. *De immatura morte*, Laetant. III, 2. & auctor Sophologii Iacobus Magnus III, 1. & VII, 7. *De natura rerum* idem Sophologii auctor, nisi libros naturalium quaestionum respexit. *Exhortationum* libri Laet. lib. I, c. 4 & 7. III, 15. IV, 24 & 27. *Moralium libri*, quibus de omni materia ad Philosophiam morum spectante susius disputaverat, ut innuit ipse Epist. 106. 108 & 109. Vide & Laetant. lib. I, c. 16. II, 2. VI, 17. *De matrimonio*, Hieron. adversus Iovinian. lib. 1. *Liber de India*, Plin. VI, 17. & Serv. in IX. Aeneid. *Liber de situ & sacris Aegyptiorum*, ex quo nonnulla depromisit Lucanus. Vide Grotium ad Lucani X, 313. *Salmasium* ad Solin. &c. Memorat idem opus Servius in VI. Aeneid. *Liber de forma mundi*, Boeth. 2. Geometr. p. 15. 37. & Cassiodor. memoratur etiam a Rabano Mauro III, 25. de institutione Clericorum Tom. 6. Opp. p. 44. Guil. Malmesburiensis lib. 1. de gestis Anglorum p. 23. *pulcherrime* Seneca in libro de causis *commemorat*, Catonem *Oratoris officium definientem dixisse*: Orator est vir bonus dicendi peritus. Intelligendum forte opus quaestionum naturalium.

E Laetantii VII, 15. colligit Lipsius, Historian

quoque, sive Historiae Rom. compendium, a Seneca scriptum fuisse. Sed hoc non firmiore tibicine nititur, quam quod alii ex eodem loco colligere voluerunt, auctorem compendii Hist. Romanae, quod sub Flori nomine habemus, non esse Florum, sed Senecam. Nam uti hanc opinionem recte confutavit Vossius lib. I. de Hist. lat. cap. 30. ita non necesse est singulare opus Historicum Senecae comminisci, quoniam potuit sane Seneca obiter in quodam scripto vel epistola Romani populi tempora distribuere in quatuor aetates, cuius divisionem partim imitatus est, partim immutavit, aut forte haud inspecto Seneca simile quid & ipse cogitavit Florus. Dio lib. LXI, pag. 690. auctor est, Senecam scripsisse, ¹ quae Nero Imp. diceret ad milites, & in Senatu recitaret: quo pertinet epistola ad Senatum, qua Agrippinae necem defendit, cuius summa tradit Tacit. XIV, 11. Annal. quaedam ex ea laudat Quintilian. VIII, 5. 18. Atque haec Senatui aliquando tanti visa, ut decerneret, eam columna argentea insculpi, & quotannis, cum novi COSS. Magistratum inirent, legi. Omitto quod idem Dio p. 694. refert, Senecam non modo reginis & libertis adulatum, sed & encomia quorundam composuisse, & Tacitus XIV, 52. Annal. inducit obiciuentes, eloquentiae laudem uni sibi adsciscere, & carmina crebrius factuare, postquam Neroni amor eorum venisset. Idem Tacit. XV, 63. de Seneca moriente: & novissimo quoque momento suppeditante eloquentia, advocatis scriptoribus, pleraque tradidit, quae in vul-

¹ Confer quae de Orationibus eiusmodi, quas Imperatores ab aliis sibi facientes curarunt, & ipsi in Se-

natu vel alio loco solenniter recitarunt, annotavit Baellius in Lexico ubi de Hadriano Imp. agit nota F.

gus edita eius verbis, invertere supersedeo. At Dio p. 713. D. nihil de Seneca, sed Paulina: οὐ μέντος πρότερον εἴατης ἥψατο, πρὶν τὸ τε βίβλιον, ὃ συνέγραψεν, ἐπανορθῶσαι, καὶ τὰλλα (ἐνδεδίει γὰς μὴ καὶ τὸν Νέρωνα ἐπέντα φθαρῇ) παρακαταδέσσαι τισι. modo famus sit locus, & non potius legendum fuerit αὐτὸς, ut intelligatur Seneca, & quae ipse scripsit. Quintilianus quoque X, 1. Inst. ubi pulcherrimum de Seneca & eius ineptis imitatoribus fert iudicium, testatur omnem fere studiorum materiam a Seneca pertractatam. *Nam & Orationes eius, inquit, & Poemata, & Epistolae, & Dialogi feruntur.*

DE Stilo eius & Philosophia.

De Senecae scriptis non male Menagius Tom. 2. Menagianor. sub. init. *Il-y-a dans les ouvrages de Seneque des choses admirables, mais il perd beaucoup, quand on le manie, & quand on l'approfondit. Il est meilleur à citer dans la chaleur de la conversation, qu'à lire dans le silence du cabinet. Il veut briller, quelque sujet qu'il traite. C'est ce qu'il est fort souvent faux. Cependant le Pere Malebranche¹ à mon gré a dit trop de mal de lui. On ne sauroit contester à Seneque d'avoir eu de l'esprit infiniment. Quintilien dit un bon mot là dessus: Velles eum suo ingenio dixisse, alieno iudicio. Le Cardinal Pallavicin dit aussi admirablement bien de Seneque: Profuma i suoi concetti con ambra, e con un Zibetto, che a longe andare danno in testa. C'est dans ses considérations sur le style. Senecae elegantiam, interdum frivole ut ait Gellius argutam, cum prae-*

¹ Malebranche de inquiringenda Veritate lib. II. cap. 4. Confer si placet Opuscula varia Evremontiana p. 32. seq.

clara Ciceronis eloquentia conferunt *Gedoyni* praef.
ad Gallicam Quintiliani versionem , & Io. Antonius
Bernardus singulari diff. Consule memorias Tre-
voltinas a 1717. pag. 1898. Journal des Savans
1728. Octob. pag. 451 seq. Dominicum Bohur-
sium in libro , la maniere de bien penser , dialog.
3. p. 226.

I N D E X
E D I T I O N U M
L. A N N A E I S E N E C A E
A U C T I O R F A B R I C I A N O
E T I N T R E S A E T A T E S D I G E S T U S.

A E T A S I. N A T A L I S.

Auctores habu't Blasium *Romerum*, monachum, & Matthiam *Moravum* typographum Neapolitanum.

1475 *Editio princeps.* Senecae philosophi opera moralia, ac epistolae; & Rhetoris Declamationes sub Domino Blasio *Romero* Monacho Populeti; philosopho ac Theologo celebri: per Matthiam Moravum est impressum hoc opus in civitate Neapolis, Anno M. LXXV. (*omissis centenariis*) divo Ferdinando regnante. fol. Haec editio quaedam Senecae opera continet, quae exstant in Bibl. Regis Galliarum & in Barberina. (vid. Labbeus Bibl. nova MSS. p. 338. & Mich. Maettarius p. 115. Annal. typograph.) *Matthiam Moravum*, qui hanc editionem excudit, Gabriel Carcharus Mediolanensis hoc decoravit hexasticho:

*Iam paene abstulerat Senecae monumenta vetustas,
Vixque erat h:ec ullus cui bene nota forent
Tam bona: sed docti Mattheiae scripta Moravi
Artificis non est passa perire manus.
Huic igitur meritas grates studiosa iuventus
Pro tam sublimi munere semper habe.*

Senecae Epistolae. Initio comparent *Epp. Senecae ad Paulum*, & *Pauli ad Senecam* cum Ieronimi prologo; deinde *Senecae ad Lucilum*. Finiunt: *Praefens haec Epistolarum Senecae ad Lucilum impressio in alma Urbe Roma in domo nobilis Viri Petri de Maximis. 1475. fol.* Fuit liber quondam inter cimelia viri humanitate praestantis Ioach. Christ. Nemeitzii, principum Pa-

NOT. LIT. DE L. ANNAEO SENECA. XXIX

latinorum Christiani IV & Friderici iuvenum ephori.

Senecae epistolae: impressae *Paris*. Has servat Biblioth. Mazariniana, & memorat Chevillerius p. 56. His adiectae etiam Epistolae ad Paulum Apostolum.

- 1478 *Tarvisii* fol. Hoc volumine continentur infra scripti libri Senecae. Primum Liber unus de moribus. Liber unus de formula honestae vitae: vel de quatuor virtutibus cardinalibus. Liber unus ad Gallionem de remediis fortuitorum. Libri decem declamationum. Libri duo de clementia ad Neronem. Libri septem de beneficiis ad Thiburtium Liberalem. Libri tres de Ira ad Novatum. Liber unus de mundi gubernatione, divina providentia & quare multa mala bonis viris accident. Liber unus de beata vita ad Gallionem. Liber unus de consolatione ad Albinam matrem suam. Liber unus de tranquillitate vitae ad Serenum. Liber unus quomodo in sapientem non cadit iniuria. Liber unus de brevitate vitae ad Paulinum: cui continuatur liber unus de consolatione fratri ad Polybium sine inscriptione & intervallo ex incuria famuli componentis: qui incipit, Nostra compares firmas sunt. Proverbia Senecae. Ultimo eiusdem epistolae ad Lucilium centumvigintiquinque. *Impressum Tarvisii per Bernardum de Colonia, Anno domini 1478.* fol. Hanc editionem vidit Io. Frid. Gronovius.

- 1484 *Neapolitanna II.* f. Hanc habet Bibliotheca Barberina.

- 1492 *Veneta I.* Senecae opera omnia. *Venetiis impressa. Die ultima octobris. Per Bernhardinum de Coris de Cremona.* fol. Hac editione continentur Senecae Epistolae ad Paulum & Pauli ad Sen. Epistolar. lib. XXII. De paupertate. De moribus. Vita Senecae. De formulâ honestae vitae. De remediis fortuitorum. Declamationum libri X. De clementia libri II. De beneficiis libri VII. De ira lib. III. De providentia. De beata vita. De consolatione ad Marciam; ad Albinam. De tranquillitate vitae. Quomodo in sapientem non cadit iniuria. De brevitate vitae, cui continuatur liber de consolatione ad Polybium. De studiis liberalibus. Proverbia. Quaestionum naturalium liber VII. Suasoriarum & controversiarum lib. VI. Et hanc editionem vidit Io. Frid. Gronovius.

1503 Venet. II. fol.

... -- in morte Claudi Caesaris ludus nuper repertus.
(Edente C. *Sylvano*, Germanico,) sine indicio anni & loci impressionis. 4. Epistola, qua Sylvanus hanc editionem Principi Carp. Alberto Pio, dedicavit, scripta est Romae 1513.

— Florentiae 8. apud Iuntam.

AETAS II. ERASMIANA.

Eius princeps fuit *Erasmus*. Comites se adiunxere Beatus *Rhenanus*, Matthaeus *Fortunatus*, Ferdin. *Pintianus*, & qui in primis de Seneca bene meritus est, M. Ant. *Muretus*. Agmen claudit Dion. *Gothofredus*.

1515 *Erasmi I.* fol. Sen. lucubratt. omnes, additis etiam nonnullis, *Erasmi Roterod.* cura, si non ab omnibus certe ab innumeris mendis repurgatae. In inclita Germaniae Basilea, Io. Froben. fol. Dicavit hanc editionem Erasmus Thomae Ruthallo Episcopo Dunelmensi, testatus se usum duobus Codicibus MSS. licet non optimis, & ad quatuor millia menderum sustulisse. Praefatio Erasmi in Senecam legitur inter eius Epistolas 28, 12. Scriptorum Senecae suppositorum quaedam ad calcem reperiuntur. *Ludus in Claudium*, in Germania primum inventus, in hac editione cum notis Beati Rhenani primum impressus est. Prodiit idem libellus iunctim cum aliis eodem anno.

1518 Sen. ludus de morte Claudi Caesaris, nuper in Germania repertus cum scholiis Beati Rhenani. *Synesius Cyrenensis* de laudibus Calvitii, *Ioanne Phrex* Britanno interprete, cum scholiis Beati Rhenani. *Erasmi Roterodami* moriae encomium, cum comm. *Gerhardi Lissrii*. Baf. ap. Io. Froben. mense Martio. In dedicatione, Rhenani ad Thom. Rapp. haec leguntur: Hoc Senecae fragmentum nuper in Germania repertum, velut antiquitatis gemmam quandam, scholiis ex Suetonio & Tacito tumultuanter adnotatis, illustravimus, quo magis ad se lectorem --- invitet. Ingenue tamen fatemur, esse loca quaedam, ubi coniecturis tantum usi sumus, nullam historicorum auctoritatem secuti. --- Ad haec

ut in Graecis nonnulla divinando restituimus, sic quaedam non nisi melioris archetypi subsidio reponenda transire coacti sumus, quod nostrum exemplar, Graecorum characterum, ne ulla quidem quantumvis exilia vestigia haberet.

- 1522 Vener. III. seu Aldina I. apud Aldum. 4. ubi naturalium quaestionum libri a Matthaeo Fortunato, Pannonio castigati, & ἀπονολογύντωσις a Beato Rhenano a. 1515. illustrata, qui, eodem Matthaeo iudice, primus aliquam lucem in Senecam aperuit, sponque dedit posse illum emendari.
- 1529 Erasmi II. Basil. apud Froben. fol. ex secunda & accuratiore Erasmi recognitione, fol. cum Rudolphi Agricolae & Sigismundi Gelenii castigatt. & Senecae vita, scripta a Francisco Petrarcha. Illum enim auctorem esse, ex MS. Codice, qui fuit Pignorii, alioque penes se existente Io. Philippus Thomasinus in Bibliothecis Patavinis MSS. pag. 86. & 138. affirmat. Incipit: *Cum permulta sint vel ad mores vel ad institutionem vitae &c.* Fallitur Rich. Simon, qui hanc Erasmi editionem primam esse putat T. 2. Bibl. select. p. 151. quod repetunt Memoriae Trevoltinae 1714. p. 1135. In fronte dicitur *sic emendata, ut priorem editionem, ipso absente peractam, nolit (Erasmus) haberi pro sua.*
- 1530 Venet. IV. fol. Senecae omnia Opera. In fine habet: *Impressum Venetiis per Bartholomaeum de Zanis.* Editio rara & nitida.
- 1536 Venet. V. ex officina Io. Augusti a Burgo Franci, cum castigatt. Ferdinandi Pintiani, qui codd. quindecim usus, ad quinques mille maculas eluisse se dicit.
- 1537 Erasmi III. Basil. cum scholiis Erasmi Roterodami & Beati Rhenani. fol.
- 1540 Sen. naturalium libri septem, a Matthaeo Fortunato, Erasmo, & Lodoico Strebæo diligentissime recogniti. Paris: ex offic. Mich. Vascofani, 4. Hanc editionem curavit Strebæus, quae præelectionibus suis serviret.
- 1551 Basil. Froben. in mortem Claudii Caef. Ludus cum scholiis Beati Rhénani. 8.
- 1555 Sen. opp. omnia, Lugd. B. ap. Gryph. 2. Voll. 8.
- 1557 Sen. opera, quae extant, omnia, Cœlii Secundi

XXXII NOTITIA LITERARIA

Curionis vigilantissima cura castigata , & in novam prorsus faciem , nimirum propriam & suam , mutata. Basil. Io. Hervag. Bern. Brand. fol. *Ferd. Pintiani* luculento de Seneca testimonio , *Vita Senecae* , a *Xiccone Polentono* ex Tacito & Suetonio d̄ecerpta , & Rodolphi Agricolae in controversias Senecae Rhetoris commentario. Sed H. Stephano iudice , Coelius Secundus Curio , castigare professus , multis foedissimis mendis Senecam conspurcavit. Basis est partim Erasmica II. partim Pintiana , ex quibus etiam quaedam annotatt. adiectae sunt. in margine variae lectt. & coniecturae reperiuntur. Scripta etiam supposita Sen. rhetoris subiecta sunt. Ludus in Senecam hic cum Rhen. Curion. Hadr. Iunii & Chauci annotatt. appetet.

1559 *Sen. Opera.* Basil. fol.

1565 *Seneca Fabri.* Lipf. 8.

1585 Romae , typis Barthol. Gorassii , cum notis *M. Antonii Mureti* , & indice Iulii Rosci Hortini , curante post Mureti , eodem anno prid. Non. Iun. defuncti , obitum , Francisco Bencio S. I. Quanquam vero praeclarae sunt Mureti in Senecam observationes , tamen non ab re illi vitio vertit Henricus Stephanus proodopoeia * ad Senecae lectionem , edita a. 1586. 8. quod Erasmi operam Senecae impensam contemnit , & Pintiani vix bis meminit , cum utriusque saepe emendationibus usus fuerit. Vide interim , quae pro Mureto reponit Rich. Simon T. I. Bibl. selectae cap. 13. Ita Senecae editio manu Iosephi Scaligeri notata exstat in Bibliotheca Academiae Leidenis.

* Adiectae sunt Epistolae diorthoricae quorundam Senecae locorum ad Iacobum Dalecampium.

— Parif. fol. apud Iacob. du Puis.

1587 *Sen. opera Parif. Mureti , Nic. Fabri , Pintiani &c.* notis illustrata , fol. ap. Dupuys.

1590 apud Episcopium , 8. Basil. cura Dionys. Gothofredi , c. eiusd. coniecturis , variis lectt. locis communibus , & nomenclatore.

1593 *Coloniae ap. Ioannem Gymnicum.* 8. cum *Dionysii Gothofredi* coniecturis , Variis Lectt. & locis communibus in utrumque Senecam , quae subiunctae etiam editioni Senecae Genevensi a. 1628. 1638. fol.

DE L. ANNAEO SENECA. xxxiii

Responsio autem Gothofredi adversus Gruteri suspicionum libros, edita separatim Francof. 1591. 8. cui Gruterus * eodem anno opposuit confirmationem suarum suspicionum.

* Dehortatur Gruterum ab illa litigatione lust. Lipsius Centur. ad Germanos Epist. 6. *quid opus in Liberum (Dionysium) tam libere? Ego pro amico suadeo*, desiste.

AETAS III. GRUTERO-LIPSIANA

Post Muretum a Duumviris, *Grutero & Lipsio*, constituta; quibus se adiunxere Franc. *Iuretus*, Iac. *Dalechampius*, & Io. Frid. *Gronovius*.

1594 *Commeliniana I.* Heidelbergae fol. apud Comme- lin. cum notis *Mureti* & *Iani Gruteri* castigatt. qui MSS. Codices Palatinos consuluit, addiditque disputationem a Mureto habitam, cum Senecae de providentia librum Romiae interpretaretur, tum *Nic. Fabri* in apocolocyntofin & Marci Senecae Rhetoris libros eruditas notas.

— Basil. fol. 2 voll. a M. Ant. Mureto correcta & notis illustr. Acc. I. Gruteri Animadv. & Nic. Fabri Annott.

1595 Lugd. Bat. 8. repet. ed. 1594. Heidelb.

1596 L. Ann. Senecae Epistolae CXXIII. M. Ant. Mu- reti Notis & emendatt. illustratae. Accedunt nunc primum Animadversiones Iani Gruteri studio concinnatae: in quibus, praeter omnes omnium huius superiorisque aetatis doctorum virorum emendatt. interpretationesque, infinita loca supplentur, confirmantur, illustrantur, ope MSS. Bibl. Palatinae. (Lugduni.) Sumptibus Io. le Preux. 8. L. Ann. Sen. operum Tom. II. c. emendatt. & notis M. Ant. Mureti. Accedunt Animadversi. Iani Gruteri studio concinnatae: in quibus, praeter omnes omnium huius superiorisque aetatis doctor. viror. emendatt. infinita loca supplentur, confirmantur, illustrantur, ope etiam MSS. Bibl. Palat. Sumptibus Io. le Preux. M. D. XCIV. Huic vol. adiecta sunt opera Sen. Rhetoris.

1602 *Parisina I.* ap. Mich. Sonnium, fol. cum notis *Erasmi*, M. Antonii *Mureti*, ingenio subinde plusculum

L. Ann. Seneca. Vol. I.

- indulgentis, & Ferdinandi *Pintiani*, bonis MSS. usi, & cum collectaneis notisque *Io. Obsopaei*, & in ἀποκολούθωσιν *B. Rhenani* & *A. Junii*, in Senecam vero Rhetorem *Nic. Fabri*, & in utrumque Senecam animadversionibus excerptis *I. Gruteri* & castigatt. *Franc. Iureti*. Editio, teste Fabricio, praestantissimis annumeranda.
-
- Lugd. Bat. Rapheleng. De brevitate vitac 4.
- 1603 Flores ex *L. Annaei Seneca* Opp. selecti. Colon. Agripp. 12.
- 1604 *Commeliniana II.* *M. Annaei Seneca* rhetoris Suaforiae, Controversiae, Declamatione inque Excerpta: Ab *Andrea Schotto* ad veterum exemplarium fidem castigata, Graecis etiam hiatibus expletis, notis curisque secundis explicata; Item Annotationibus *Io. Petreii*: & coniecturis *Iusti Lipsii*. *L. Annaei Seneca* *M. F. philosophi* opera a *M. Antonio Mureto* correcta & notis eius illustrata. Accedunt seorsim Animadversiones *Iani Gruteri*, *Nic. Fabri*, *Franc. Iureti*, *Florentis Christiani*. In quibus, praeter omnes paucum omnium huius superiorisque aetatis doctor. hominum emendationes interpretationesque infinita loca supplentur, confirmantur, illustrantur. Adiectae & Notae Romanorum veterum, (* quae veteribus ταχυγράφοις apud Romanos in usu fuerunt) vulgo *Senecae* & *Tyronis* nomine insignitae; nunquam antehac editae. In Bibliopolio Commeliniano, fol. Has ** non mediocri labore ex MSS. eruit, primusque in lucem e *Ioan. Trithemii* maxime codice emisit *Ianus Gruterus*, subiectas etiam vasto & luculento inscriptionum veterum operi, quod circa eadem tempora vulgatum, & anno 1707. perquam nitide cum *Gudii Graeviique* notis in Belgio recusum est.

* Post *Ennium*, qui vulgares notas 1100. inventit, auctore *Isidoro*, figlas istas, quarum mirabili compendio verba dicentis pari celeritate excipere, vel quaevis alia citissime in literas mittere poterant notarii, *Tullium Tironem Ciceronis libertum* primum reperisse narrat *Eusebius* in *Chronicis*. Hoc liberti sui invento usus *Cicero*, *Catullis Uticensis orationem* in *Caesarem* a no-

tariis excipi iussit, auctore Plutarcho in Catonis vita. Inde forte inductus Trithemius lib. 6. polygraphiae p. 599. affirmavit Ciceronem volumen de notis edidisse, filioque suo inscripsisse. Tironem deinde alii sunt infecuti, in his Aquila libertus Maecenatis, unde Dio lib. 55. Maecenatem *γράμματα πρὸς τάχος* five siglas quasdam primum invenisse refert; & Persanius Philargyrus, ut legere est apud Isidorum Hispal. lib. I. Originum cap. 21. Confer. Sam. Petitum lib. I. Obs. cap. 1. pag. 158. seq. Idem Isidorus addit, *Senecam*, contracto omnium digestoque numero & aucto, ad quinque millia notarum collegisse. At verisimile est, quae Lips. lib. I. Epist. 27. ad Belgas est suspicio, Senecam ab Isidoro innui non philosophum, sed M. Annaeum patrem. Etsi Philosophum malit Bernardus a Mallinkrot cap. 24. de natura & usu literarum. Inter illas Senecæ & Tironis notas exstant etiam *cifrae* five notae numerorum, quas Arabibus vulgo imputant; sed longe antiquiorem earum usum fuisse ex his ipsis Senecæ ac Tironis notis & Boethii Geometricis observat If. Vossius pag. 64. seq. ad Melam. Interiecto tempore *Caecilius Cyprius* Carthaginiensis Episcopus notas tachygraphicæ vōcum Christianorum usibus necessiarum adiecit, ut idem Trithemius narrat; quas licet etiam inter illas a Grutero editas cognoscere. Quanquam non me fugit esse, qui cum Raynaldo putent, illas Cypriano vitiose supponi, & ab editoribus Pamelio, Rigaltio, Ioh. Fello &c. iure ne quidem inter quisquilias Cypriani admissas esse iudicant. Porro Hygini poeticon Astronomicum talibus siglis scriptum vidisse se testatur P. Bembus in Epist. 8. lib. 5. ad Iulium II. Pontificem, qua eum hortatur, ut Ciceronianam illam, ut appellat, per notas scribendi rationem restituat. Etiam totum Psalterium eiusmodi notis conceptum insperxit post Trithemium Ios. Scaliger, ut refert Epistola 418. Tamen a Codicibus legum aboendas sanxit Iustinianus Imp. praefatione Digestorum tit. 1. §. 13. adde Isidorum lib. I. Orig. cap.

23. & plura de siglis hisce sive notis tradentes, Lipsium Centur. 1. ad Belgas Epist. 27. Iul. Caefarem Bulengerium lib. IV. de Imperio Romano cap. 3. & 5. Sam. Petitum lib. 2. Observ. cap. 1. p. 159. & Wowerium cap. 5. Polymath. Iulianum Floridum ad Ausonii Epigramma 146. sive ultimum p. 80. Hermannum Hugonem de prima scribendi origine cap. 19. Lambecium Tom. I. Biblioth. Vindob. pag. 18. Boeclerum de rebus sec. IX & X. pag. 346. Bartholin. de libris legendis. diss. 6. Balth. Frid. Saltzmannum diss. 2. de antiquae scriptiorum origine &c. Ancilla notarum perita memoratur apud Ammianum XVIII, 3. Nostra aetate simile scribendi compendium apud Anglos excogitarunt Ioannes Willis, Ioannes Wilkius, Ieremias Rich. & Thomas Shelton, qui etiam omnes Novi instrumenti libros Psalmosque siglis a se repetitis exscriptos publicae luci exposuit. Libellus autem, quo artem suam tradit, inscribitur *Zeiglographia or a new art of Short writing.* Lond. 1672. 8. Huic adde Tacheographiam Caroli Aloysii Ramsay, quem Sheltoni ut appareat vestigiis insistens, Germanis nostris utendum obtulit Lips. 1679. 8. Fundamenta huius artis breviter indicat Wagenseilius in pera librorum iuvenilium loculamento 2. pag. 50. & in libro Germanice edito de educatione Principis adolescentis, qui a studiis literarum abhorret pag. 44. Notae sive siglae σημειογράφων (ut vocat Plutarch. in Catoonis vita p. 770.) quae huic editioni adiunctae sunt, & quibus multa a junioribus addita esse notavit Voss. IV, 2. de vitiis sermonis latini, existant etiam ad calcem thesauri Inscriptionum Grueteri, nuper nitide recusi Amst. 1707. f. Explicationes quasdam illarum siglarum non infelicititer emendavit in Codice suo Marquardus Gadius, quas eius observationes in Amstelodamensi editione omissas excerptis amicus noster Christophorus Wolterckius, inferique curavit Actis Erud. Lipsiens. Tom. V. supplem. p. 31. sq. Liber Petri Diaconi, Monachi Casinensis, qui notas Tironianas ante annos amplius quingentos explicavit ad Conra-

dum Imp. iam typis mandatus fuit antequam Gruterus ipsas proferret in lucem, ut notat Mabillo-nius de re diplomatica lib. I. c. XI. §. 18. p. 52. De tachygraphis vide etiam Cangii glostiar. in *cursores, notae, siglae.* & Montefalconii palaeo-graphiam Graecam lib. V, p. 351. seq. ubi de siglis Graecorum tachygraphorum; Io. Chokierium Centur. I. facis artium cap. 93. Guil. Pan-cirollum lib. I. Var. lect. cap. 30. & deperditor. tit. 14. atque ibi Henr. Salmuthum: Bernhardi Reinholdi observatt. ad Io. Merceri conciliato-rem iuris Civilis p. 24. seq. Gaufridus in poetria nova, vulgata nuper a Polycarpo Leyfero in Hist. poematum medii aevi p. 973.

*Tradit imaginibus peregrinis Tullius artem
Quam meminisse decet. Sed se docet & sibi soli
Subtilis subtile suum quasi solus adoret.*

Negligentiam excipientium in quaestum notario-rum arguit Quintil. VII, 2. p. 603.

** Salmasius p. 101. Epist. illam siglarum col-lectionem qualis in praesenti exstat, factam esse coniicit ab homine Christiano circa tempora Gre-gorii Magni.

1604 L. Ann. Sen. philos. & M. Ann. Sen. Rhetoris opera, ex recens. Gruteri, 12. ap. Commelinum, additis Syri mimi sententiis, ope codicum Palatinorum & Frisingensis auctioribus.

1605 Lipsii I. Antverp. ap. Moretum cum notis Justi Lip-sii. fol. Lipsius optimus Senecae interpres est.

1607 Parisina II. Parif. fol. cum Mureti, Lippii, Iureti, Gru-teri, aliorumque notis & observatt. Editio optima.

1609 Lugd. Bat. ex off. Plantin. Rapheleng. 12. sine notis.

1613 Parisina III. Parif. 1613. fol. ap. Hadr. Perier. M. Annaei Senecae rhetoris quae exstant, opera; ad veterum exemplarium fidem castigata; Graecis la-cunis, quibus superiores edd. scatebant, expletis: ac illustrata commentariis selectioribus & locis com-munibus ex utroque Seneca factis. Secunda Editio, recusa & aucta scholiis Fed. Morelli.

Genev. cum castigatt. Andr. Schotti in Senecam Rhe-torem. Colon. Allobr. 8.

XXXVIII NOTITIA LITERARIA

- 1614 *Genev.* L. Annaei Senecae Philosophi & M. Annaei Senecae rhetoris Opera quae existant omnia. Col. Allobr. ap. Sam. Crispinum. 12.
 ——— *Lipsii II.* * Antverp. fol.
 * Pauli V. Pontificis Epistola qua Lipsio pro Seneca, quem ipsi dedicaverat, perfolvit gratias, legitur tomo secundo sylloges Burmannianae p. 175. data 1606.
- 1615 Sen. opera omnia, cum notis Lipsii Antv. fol.
- 1619 *Parisina IV.* Parif. fol.
 ——— Amstel. & Lugd. Bat. Ianslon. 8. 2 Voll. praemissa Dan. Heinsii oratione de Stoica Philosophia & ad Senecam Philosophum additis notis Mureti, Lipsii, Petri Scriverii, Io. Is. Pontani, & Jo. Piscatoris obervationum spicilegio, inque apocolocytosin notis Rhenani, Nic. Fabri, & Hadr. Junii, ad Rhetorem Senecam vero notis Andr. Schotti, & Io. Is. Pontani.
- 1620 L. A. & M. A. Sen. opp. c. n. varr. & D. Heinsii T. II. Amst. ap. Iansf. 2 Voll. 8.
 1621 cum notis variorum Lugd. Bat. 8.
- 1626 c. notis Iusti Lipsii aliorumque, & var. Comm. Parif. Genev. fol. Annaei Senecae tum Rhetoris, tura philoſophi Opera omnia ab Andréa Schotto ad veterum exemplarium fidem caſtigata, Graecis etiam hiatibus expletis. ap. Petrum Chouet. tomii 2. 8.
 ——— *Parisina V.* Parif. fol. In hac editione acceſſerunt Flor Christiani, Lud. Dorleans, P. Scriverii, Pontani &c. notae.
- 1623 Señecarum, L. Ann. & M. Ann. opera, c. omnibus comm. editoribus Io. Dalechampio & Th. de Juges. Genev. fol.
 ——— Amstelod. ap. Caesium 3. voll. 12.
- 1632 *Lipsii III.* L. Annaei Senecae phil. Opera a Iusto Lipsio emendata & scholiis illustrata. Aucta Lib. Fromondi scholiis ad quaestiones naturales & Ludum de morte Claudi Caesaris. Antverp. fol. cf. Plaecii Theatr. Anon. & Pseudon. n. 2487.
- 1633 cum notis Farnabii, Amstelod. 8.
- 1634 Sen. opp. omnia ex ultima Lipsii emendatione Amſt. ap. Guil. Blaeu. 12.
1637. *Lipsii IV.* Antverp. fol.
 ——— Parif. ap. Vitray. 12. 3. voll.

- 1640 *Elzeviriana I.* Lugd. Bat. 3. voll. 12. Senecae phil. & Sen. Rhetoris opera omnia ex ultima A. Schotti recensione. Parif. 12.
- 1642 L. A. Senecae flores per Erasmus Roterod. Amst. 12.
- 1649 *Elzeviriana II.* Lugd. Bat. 12. 4. voll. L. A. Sen. Opp. & M. A. Sen. Rhet. quae extant. cum notis Io. Frid. Gronovii, separato volumine excusis.
- 1652 *Lippii V.* Annaei Senecae opera, quae extant, omnia: a Iulio Lipsio emendata & scholiis illustrata. Editio quarta, atque ab ultima *Lippii* manu; Aucta *Liberti Fromondi* scholiis ad quaestiones naturales, & Iudum de morte Claudii: quibus in hac editione accedunt eiusdem *Liberti Fromondi* ad Quaestiones naturales excursus novi. Antverp. ex offic. Plantin. Balth. Moreti, fol. max. Ed. rara & nitida.
- 1658 *Elzeviriana III.* Amitel. 12. typis nitidis. 4. Voll. rep. ed. 1649. 12.
- Venet. 12. 3. Voll.
- 1665 Genev. Sen. Rhet. & Sen. philos. Opera omnia ab And. Schotto ad MSS. fidem castigata. Col. Allobr. 2. tom. 8.
- 1672 M. & L. Annaei Senecae opera c. n. Varr. Amst. D.
- & 1673 Elsevir. 8. interior titulus hic est: *L. Annaei Senecae opera, quae extant, integris Iulii Lipsii, I. Fr. Gronovii & selectis variorum commentariis illustrata.* Accedunt *Liberti Fromondi* in Quaestionum naturalium libros & ἀποκολοκυντωσιν notae & emendationes. To. I. II. Amst. D. Elsevir. 1673.
- M. Annaei Senecae rhetoris opera, quae extant, integris Nic. Fabri, Andr. Schotti, Io. Fr. Gronovii, & selectis variorum commentariis illustrata, & praeterea indice accuratissimo aucta. Accedunt Ioannis Schultingii in eundem notae & emendationes, hactenus ineditae. Tom. III. ib. 1672.
- Multis in hac editione MSS. usus est Gronovius. Rhetoris opera in editione Antverp. desunt.
- 1695 Venet. 12. 3 voll. repetitio Elzevirianae ultimae.
- 1696 Genev. edit. Andreae Schotti. 2. tom. 8.
- 1702 L. Ann. Sen. philos. opera omnia. Accessit a viris doctis ad Senecam annotatorum delectus. To. I. II. Lips. ap. Thom. Fritsch, 8.

XL NOT. LIT. DE L. ANN. SENECA.

- Basis est H. Gronoviana. Annotationes sunt Lipsii, Gronovii & Fromondi.
- 1708 L. Annaei Senecae & Publpii Syri Mimi & aliorum sententiae singulares ex Codd. auctae & correctae cura Iani Gruteri atque cum versione Graeca Ios. Scaligeri. Lugd. Bat. 8.
- 1711 Heinpii, Lugd. Bat. 8.
- 1741 c. virr. doctiss. Annotatt. Lips. 2. T. 8.
- 1762 L. Ann. Sen. opera philosophica. 12. Halae.
- 1770 L. Ann. Ser. Philosophi opera omnia. Accessit a viris doctis ad Senecam annotatorum delectus. ed. emendatior. Lips. ap. haer. Weidmanni & Reichenium. 8 mai. additur *rerum & verborum memorabilium index certissimus*. Textum quidem sequitur edit. Elzeviriana 1649. sed menda perquam multa admisit correctoris opera.
- 1780 L. Ann. Sen. Flores, ex operibus illius selecti. Ad exemplar I. Lipsii & Gronovii accuravit M. F. Schafferus. 8. Vratislaviae.

Dionysii Gothofredi Coniecturae, Variae Lectio-
nies, & Loci Comunes, sive libri aureorum in Se-
neca, cum Nomenclatore vocum notabilium, no-
minumque priorum, seorsim prodiere Basil. 1590.


8. * *Andr. Peccii Eugubini scriptus circa an. 1433.* in Epistolas Senecae commentarius, & in easdem Commentaria *Casparini Bergomensis* servantur inedita in Bibl. Vaticana inter libros Ducis Urbini Cod. 1022 & 1026. Seneca cum aliis scriptoribus Ethico-Politicis collatus a *Zach. Lundio* fuit MS. Hafniae in Bibl. Io. Moth, Potentiss. Regis Daniae a Consiliis. Taciti vero & Senecae atque Epistolar. Plinii editiones, quas cum notis Variorum parabat Io. Andr. *Bofius*, viri doctissimi fato constat interceptas esse.

* Super hoc libro lites Gothofredo intercessere cum Grutero, qui Viteb. a. 1591. illi librum suspicionum extraordiniarum opposuit, & eodem anno Francof. vulgavit confirmationem suspicionum extraordiniarum contra Dionys. Gothofredi coniecturas & Varr. Lectt. in Senecam Philosophum.

L. ANNAEI SENECAE
D E I R A
A D N O V A T U M
L I B R I I I L.

L. Ann. Seneca. Vol. I.

A



L. ANNAEI SENECAE
 DE IRA
 AD NOVATUM
 LIBER PRIMUS.

Argumentum & Ordo.

Libri De Ira scripti inter Philosophiae primos videntur, certe inter eos quos habemus. Suspicamur ex verbis Senec. lib. IIII cap. xviii. Modo C. Caesar Sex. Papinium, cui pater erat consularis, Beliendum Bassum Quaestorem suum flagellis cecidit. Ait, modo: iam nunc recenti factio. Immo ipso Caligula vivo, e Cap. sequenti: Quod tanto opere admiraris, isti beluae cottidianum est: ad hoc vivit, ad hoc vigilat, ad hoc lucubrat. Sane haec omnia de homine qui est, non fuit. Scripta tunc igitur: sed non edidit, (in melior illi mens,) etsi statim, opinor, ab eius morte.

Argumentum est, quod titulus praefert: *De Ira nescenda, & deinde fugienda.* Primus liber habet itaque descriptionem eius, & foedum habitum iratorum ac faciem. tum definitiones; tum quaestiones, An in solum hominem cadat? afferit. An secundum naturam sit? negat, cum Stoicis. An utilis sit, praesertim temperata? id quoque negat, & contra Peripateticos varie disputat, non acui animum ab ea aut robur: ne malis quidem irascendum esse, nec in caede patris, raptu matris: tuendum tamen, & vindicandum. Denique non magni, sed imbecillis animi hanc notam esse. Libri in partibus pulchri & eminentes sunt, in toto parum distincti, & repetitionibus aut digestione confusi.

I. **E**XEGISTI a me, Novate, ut scriberem quemadmodum posset ira leniri: nec immerito mihi vide-

ris hunc praecipue affectum pertinuisse, maxime ex omnibus taetrum ac rabidum. Ceteris enim aliquid quieti placidique inest; hic totus concitatus, et in impetu doloris est: armorum, sanguinis, suppliciorum, minime humana fervens cupiditate: dum alteri noceat, sui negligens, in ipsa irruens tela, et ultionis secum ultorem tractrae avidus. Quidam itaque e sapientibus viris iram dixerunt brevem insaniam. aequae enim impotens sui est, decoris obliterata, necessitudinum immemor, in quod coepit, pertinax et intenta, rationi consiliisque praeclusa, vanis agitata causis, ad dispe&ctum aequi verique inhabilis, ruinis simillima, quae super id, quod oppressere, franguntur. Ut autem scias, non esse sanos, quos ira possedit, ipsum illorum habitum intuere. Nam ut furentium certa indicia sunt, audax et minax vultus, tristis frons, torva facies, citatus gradus, inquietae manus, color versus, crebra, et vehementius acta suspiria: ita irascentium eadem signa sunt. Flagrant, et micant oculi, multus ore toto rubor, exaestuante ab imis praecordiis sanguine; labia quatuntur, dentes comprimuntur, horrent ac subriguntur capilli, spiritus coactus ac stridens, articulorum se ipsos torquentium sonus, gemitus, mugitusque, et parum explanatis vocibus sermo praeruptus, et complosae saepius manus, et pulsata humus pedibus, et totum concitum corpus, magnasque minas agens, foeda visu et horrenda facies depravantium se, atque intumescentium. Nescias, utrum magis detestabile vitium sit, an deformis. Cetera licet abscondere, et in abdito aleare: Ira se profert, et in faciem exit: quantoque ma-

ior est, hoc effervescit manifestius. Non vides, ut omnium animalium, simul ad nocendum inturrexerunt, procurant notae, ac tota corpora solitum quietumque egrediantur habitum, et feritatem suam exasperent? Spumant apries ora, dentes acuuntur attritus taurorum cornua iactantur in vacuum, et arena pulsus pedum spargitur: leones fremunt, inflantur irritatis colla serpentibus, rabidarum canum tristis aspectus est. Nullum est animal tam horrendum, tamque perniciosum natura, ut non appareat in illo, simul ira invasit, nova feritatis accessio. Nec ignoro, certos quoque affectus vix occultari; libidinem, metumque, et audaciam dare sui signa, et posse prae-nosci. neque enim ulla vehementior intra cogitatio est, quae nihil moveat in vultu. Quid ergo interest? Quod alii affectus apparent, hic eminet.

II. Iam vero si effectus eius damnaque intueri velis, nulla pestis humano generi pluris stetit. Videbis caedes ac venena, et reorum mutuas sordes, et urbium clades, et totarum exitia gentium, et principium sub civili hasta capita venalia, et subiectas tec-tis faces, nec intra moenia coërcitos ignes, sed ingentia spatia regionum hostili flamma reluentia. Aspice nobilissimarum civitatum fundamenta vix notabilia: has ira deiecit. aspice solitudines per multa milia sine habitatione desertas: has ira exhaustit. aspice tot memoriae proditos duces, mali exempla fati. alium ira in cubili suo confudit; alium inter sacra mensae ira percussit; alium inter leges celebrisque spectaculum fori lancingavit; alijum filii parricidio dare sanguinem iussit; alium servili manu regalem aperire iu-

gulum; alium in cruces membra dividere. Et adhuc singulorum supplicia narro. quid? tibi si libuerit, reliquis in quos ira viritim exarsit, aspicere caesas gladio conciones, et plebem immisso milite contrucidatam, et in perniciem promiscuam totos populos capitatis damna passos ***

*** tanquam aut curam nostram deferentibus, aut auctoritatem contemnentibus. Quid? gladiatoribus quare populus irascitur, et tam inique, ut iniuriam putet, quod non libenter pereunt? contemni se iudicat, et vultu, gestu, ardore, de spectatore in adversarium vertitur. Quidquid est, certe non est ira, sed quasi ira: sicut puerorum, qui si ceciderunt, terram verberari volunt, et saepe ne sciunt quidem, cui irascantur, sed tantum irascuntur sine causa et sine iniuria, non tamen sine aliqua iniuriae specie, nec sine aliqua poenae cupiditate. Deluduntur itaque imitatione plagarum, et simulatis deprecantium lacrimis placantur, et falsa ultione falsus dolor tollitur.

III. Irascimur, inquit, saepe non illis qui laeserunt, sed his qui laesuri sunt: ut scias iram non tantum ex iniuria nasci. Verum est, irasci nos laesuris: sed ipsa cogitatione nos laedunt, et iniuriam qui facturus est, iam facit. Ut scias, inquit, non esse iram poenae cupiditatem, infirmissimi saepe potentissimis irascuntur: nec poenam concupiscunt, quam non sperant. Primum diximus, cupiditatem esse poenae exigendae, non facultatem: concupiscunt autem homines et quae non possunt. Deinde nemo tam humilis est, qui poenam vel summi hominis sperare non possit. ad no-

cendum potentes sumus. Aristotelis finitio non multum a nostra abest. ait enim, Iram esse cupiditatem doloris reponendi. Quid inter nostram et hanc finitionem intersit, exsequi longum est. contra utramque dicitur, feras irasci, nec iniuria irritatas, nec poenae dolorisve alieni causa. Nam etiam si hoc efficiunt, non hoc petunt. Sed dicendum est, feras ira carere, et omnia praeter hominem. Nam cum sit inimica rationi, nusquam tamen nascitur, nisi ubi rationi locus est. Impetus habent ferae, rabiem, feritatem, incursum: iram quidem non magis, quam luxuriam. Et in quasdam voluptates intemperantiores homine sunt. Non est quod credas illi qui dicit:

*Non aper irasci meminit, non fidere cursu
Cerva, nec armentis incurrere fortibus urſi.*

Irasci dicit, incitari, impingi. Irasci quidem non magis sciunt, quam ignoscere. Muta animalia humanis affectibus carent: habent autem similes illis quosdam impulsus. Alioqui si amor in illis esset, et odium esset; si amicitia, et similitas; si dissensio, et concordia; quorum aliqua in illis quoque exstant vestigia: ceterum humanorum pectorum propria bona malaque sunt. Nulli nisi homini concessa providentia est, diligentia, cogitatio: nec tantum virtutibus humanis animalia, sed etiam vitiis prohibita sunt. Tota illorum ut extra, ita intra, forma humanae dissimilis est. Regium illud et principale aliter dictum, ut vox est quidem, sed non explanabilis, et perturbata, et verborum inefficax: ut lingua, sed devincta, nec in motus varios soluta; ita ipsum principale parum subtile,

parum exactum. Capit ergo visus speciesque rerum; quibus ad impetus evocetur, sed turbidas et confusas. Ex eo procursus illarum tumultusque vehementes sunt: metus autem, solicitudinesque, et tristitia, et ira non sunt; sed his quaedam similia. Ideo cito cadunt, mutantur in contrarium, et cum acerrime faevierunt, expaveruntque, pascuntur: et ex fremitu discursuque vaefano statim quies soporque sequitur.

IV. Quid esset Ira, satis explicatum est: quo distet ab iracundia, apparet; quo ebrius ab ebrioso, et timens a timido. Iratus potest non esse iracundus: iracundus potest aliquando iratus non esse. Cetera, quae pluribus apud Graecos nominibus in species iram distinguunt, quia apud nos vocabula sua non habent, praeteribo: etiamsi amarum nos acerbumque dicimus, nec minus stomachosum, rabiosum, clamosum, difficilem, asperum: quae omnia irarum differentiae sunt. Inter hos morosum ponas licet, delicatum iracundiae genus. Quaedam enim sunt irae, quae intra clamorem confidant; quaedam non minus pertinaces, quam frequentes; quaedam faevae manu, verbis parciores; quaedam in verborum maledictorumque amaritudinem effusae; quaedam ultra querelas et aversationes non exeunt: quaedam altae gravesque sunt, et introrsus versae. Mille aliae species sunt mali multiplicis.

V. Quid esset Ira, quaesitum est: an in ullum aliud animal, quam in hominem caderet: quo ab iracundia distaret, et quae eius species sint. nunc quaeramus, an Ira secundum naturam sit, et an utilis, atque

ex aliqua parte retinenda. An secundum naturam sit , manifestum erit , si hominem inspexerimus : quo quid est mitius , dum in recto animi habitu est ? quid autem ira crudelius est ? Hominem quid aliorum amantius ? quid ira infestius ? Homo in adiutorium mutuum generatus est : ira in exitium. Hic congregari vult , illa discedere : hic prodesse , illa nocere : hic etiam ignotis succurrere , illa etiam carissimos petere : hic aliorum commodis vel impendere se paratus est , ira in periculum , dummodo deducat , descendere. Quis ergo magis naturam rerum ignorat , quam qui optimo eius operi , et emendatissimo , hoc ferum ac perniciosum vitium assignat ? Ira , ut diximus , avida poenae est : cuius cupidinem inesse pacatissimo hominis pectori , minime secundum eius naturam est. Beneficiis enim humana vita consistit , et concordia : nec terrore , sed mutuo amore , in foedus auxiliumque commune constringitur. Quid ergo ? non aliquando castigatio necessaria est ? Quidni ? sed haec sincera , cum ratione . non enim nocet , sed medetur specie nocendi. Quemadmodum quedam hastilia detorta , ut corrigamus , adurimus , et adactis cuneis , non ut frangamus , sed ut expliceamus , elidimus : sic ingenia vitio prava , dolore corporis animique corrigimus. Nempe medicus primo in levibus vitiis tentat non multum ex quotidiana consuetudine infletere , et cibis , potionibus , exercitationibus ordinem ponere , ac valetudinem tantum mutata vitae dispositione firmare : proximum est , ut modus proficiat. si modus et ordo non proficit ; subducit aliqua , et circumcidit. si ne adhuc quidem re-

spondet, interdicit cibis, et abstinentia corpus exonerat. si frustra molliora cesserunt; ferit venam, membrisque, si adhaerentia nocent, et morbum diffundunt, manus affert: nec illa dura videtur curatio, cuius salutaris effectus est. Ita legum praefidem, civitatisque rectorem decet, quamdiu potest verbis, et his mollioribus, ingenia curare, ut facienda suadeat, cupiditatemque honesti et aequi conciliet animis, faciatque vitiorum odium, pretium virtutum: transseat deinde ad tristiorum orationem, qua moneat adhuc et exprobret: novissime ad poenas, et has adhuc leves et revocabiles decurrat: ultima supplicia sceleribus ultimis ponat, ut nemo pereat, nisi quem perire etiam pereuntis intersit.

VI. Hoc uno medentibus erit dissimilis, quod illi, quibus vitam non potuerunt largiri, facilem exitum praestant: hic damnatum cum dedecore et traductione vita exigit: non quia delebetur ullius poena (procul est enim a sapiente tam inhumana feritas) sed ut documentum omnium sint; et qui vivi noluerunt prodesse, morte certe eorum respublica utatur. Non est ergo natura hominis poenae appetens: et ideo nec ira quidem secundum naturam hominis, quia poenae appetens est. Et Platonis argumentum afferam: quid enim prohibet alienis uti, ex parte qua nostra sunt? Vir bonus, inquit, non laedit. poena laedit. bono ergo poena non convenit: ob hoc nec ira: quia poena irae convenit. Si vir bonus poena non gaudet; non gaudebit nec eo quidem affectu, cui poena voluptati est: ergo non est naturalis ira.

VII. Numquid, quamvis non sit naturalis ira, assu-

menda est, quia utilis saepe fuit? Extollit animos, et incitat: nec quidquam sine illa magnificentum in bello fortitudo gerit, nisi hinc flamma subdita est, et hic stimulus peragitavit, misitque in pericula audaces. Optimum itaque quidam putant, temperare iram, non tollere: eoque detraecto quod exundat, ad salutarem modum cogere: id vero retinere, sine quo languebit actio, et vis ac vigor animi resolvetur. Primum, facilius est excludere perniciofa, quam rege-re: et non admittere, quam admissa moderari. Nam cum se in possessione posuerunt, potentiora rectore sunt, nec recidi se minuive patiuntur. Deinde ratio ipsa, cui fraeni traduntur, tamdiu potens est, quamdiu diducta est ab affectibus: si miscuit se illis, et inquinavit, non potest continere quos submove-re potuisset. Commota enim semel et concussa mens ei servit, a quo impellitur. Quarundam rerum initia in nostra potestate sunt: ulteriora nos sua vi rapiunt, nec regressum relinquunt. Ut in praeceps datis cor-poribus nullum sui arbitrium est, nec resistere mora-ri ve deiecta potuerunt, sed consilium omne et poenitentiam irrevocabilis praecipitatio abscedit, et non licet eo non pervenire, quo non ire licuisset: ita ani-mus si in iram, amorem, aliosque se proiecit affec-tus, non permittitur reprimere impetum. rapiat illum oportet, et ad imum agat suum pondus, et vitiorum natura proclivis.

VIII. Optimum est primum irritamentum irae pro-tinus spernere, ipsisque repugnare seminibus, et dare operam ne incidamus in iram. Nam si cooperit ferre transversos, difficilis ad salutem recursus est. Quo-

niam nihil rationis est, ubi semel affectus inductus est, iusque illi aliquod voluntate nostra datum est. Faciet de cetero quantum volet, non quantum permiseris. In primis, inquam, finibus hostis arcendus est. nam cum intravit, et portis se intulit, modum a captivis non accipit. Neque enim sepositus est animus, et extrinsecus speculatur affectus, ut illos non patiatur ultra quam oportet procedere, sed in affectam ipse mutatur: ideoque non potest utilem illam vim et salutarem, proditam iam infirmatamque, revocare. Non enim, ut dixi, separatas ista sedes suas diductasque habent: sed affectus et ratio in melius peiusque mutatio animi est. Quomodo ergo ratio occupata et oppressa vitiis resurget, quae irae cessit? aut quemadmodum a confusione se liberabit, in qua peiorum mixtura praevaluuit? Sed quidam, inquit, in ira se continent. Utrum ergo ita, nihil ut faciant eorum quae ira dictat, an ut aliquid? Si nihil faciunt, apparet non esse ad actiones rerum necessariam iram: quam vos, quasi fortius aliquid ratione haberet, advocabatis. Denique interrogo, valentior est quam ratio, an infirmior? Si valentior: quomodo illi modum ratio poterit imponere, cum parere nisi imbecilliora non soleant? Si infirmior est: sine hac per se ad rerum effectus sufficit ratio, nec desiderat imbecilloris auxilium. At irati quidam constant sibi, et se continent. Quomodo? cum iam ira evanescit, et sua sponte decedit, non cum in ipso fervore est: tunc enim potentior est. Quid ergo? non aliquando in ira quoque et dimittunt incolumes intactosque quos oderunt, et a nocendo abstinent? faciunt. Quomo-

do? cum affectus repercuttis affectum, et aut metus, aut cupiditas aliquid impetravit. non rationis tunc beneficio quievit, sed affectuum infida et mala pace.

IX. Denique nihil habet in se utile, nec acuit animum ad res bellicas. Nunquam enim virtus vitio adiuvanda est, se contenta. Quoties impetu opus est, non irascitur, sed exsurgit, et in quantum putavit opus esse, concitatur remittiturque: non aliter, quam quae tormentis exprimuntur tela, in potestate mittentis sunt, in quantum torqueantur. Ira, inquit Aristoteles, necessaria est: nec quidquam sine illa expugnari potest, nisi illa impleat animum, et spiritum accendat. Utendum autem illa est; non ut duce, sed ut milite. quod est falsum. Nam si exaudit rationem, et sequitur qua dicitur, iam non est ira: cuius proprium est contumacia. Si vero repugnat, et non ubi iussa est quiescit, sed libidine ferociaque provehitur: tam inutilis animi minister est, quam miles, qui signum receptui negligit. Itaque si modum adhibere sibi patitur, alio nomine appellanda est: definit ira esse, quam effraenatam indomitamque intelligo. si non patitur; perniciosa est, nec inter auxilia numeranda. Ita aut ira non est, aut inutilis est. Nam si quis poemam exigit, non ipsius poenae avidus, sed quia oportet; non est annumerandus iratis. Hic erit utilis miles, qui scit parere consilio. Affectus quidem tam mali ministri, quam duces sunt. Ideo nunquam assumet ratio in adiutorium improvidos et violentos impetus, apud quos nihil ipsa auctoritatis habeat: quos nunquam comprimere possit, nisi pares illis similesque oppo-

fuerit : ut irae metum , inertiae iram , timori cupiditatem.

X. Absit hoc a virtute malum , ut unquam ratio ad vitia configiat. Non potest hic animus fidele otium capere : quatiatur necesse est , fluctueturque , qui malis suis tutus est , qui fortis esse , nisi irascitur , non potest; industrius , nisi cupit ; quietus , nisi timet : in tyrannide illi vivendum est , in alicuius affectus venienti servitutem. Non pudet virtutes in clientelam vitorum demittere? Deinde desinit quidquam ratio posse , si nihil potest sine affectu , et incipit par illi similisque esse. Quid enim interest , si aequa affectus inconsulta res est sine ratione , quam ratio sine affectu inefficax? par utrumque est , ubi esse alterum sine altero non potest. Quis autem sustineat affectum exaequari rationi ? Ira , inquit , utilis affectus est , si modicus est. Immo si natura utilis est. sed si impatiens imperii rationisque est , hoc dumtaxat moderatione consequetur , ut quo minor fuerit , minus noceat. Ergo modicus affectus nihil aliud quam malum modicum est.

XI. Sed adversus hostes , inquit , necessaria est ira. Nusquam minus : ubi non effusos esse oportet impetus , sed temperatos et obedientes. Quid enim est aliud , quod Barbaros tanto robustiores corporibus , tanto patientiores laborum comminuat , nisi ira infestissima sibi ? Gladiatores quoque ars tuetur , ira denudat. Deinde quid opus est ira , cum idem perficiat ratio? An tu putas venatorem irasci scris? Atqui et venientes excipit , et fugientes persequitur : et omnia illa sine ira facit ratio. Quid Cimbrorum , Teutonorumque tot millia superfusa Alpibus ita sustulit , ut tantae cla-

dis notitiam ad suos non nuntius, sed fama pertulerit, nisi quod erat illis ira pro virtute? quae ut aliquando perculit stravitque obvia, ita saepius sibi exitio est. Germanis quid est animosius? quid ad incursum acrius? quid armorum cupidius? quibus innascuntur innutriunturque: quorum unica illis cura est, in alia negligentibus. Quid induratus ad omnem patientiam: ut quibus magna ex parte non tegumenta corporum provisa sunt, non suffugia adversus perpetuum coeli rigorem. Hos tamen Hispani Gallique, et Asiae Syriaeque molles bello viri, antequam legio visatur, caedunt: ob nullam rem aliam opportunos, quam ob iracundiam. Agedum, illis corporibus, illis animis delicias, luxum, opes ignorantibus, da rationem, da disciplinam: ut nihil amplius dicam, necesse erit nobis certe mores Romanos repetere. Quo alio Fabius affectas imperii vires recreavit, quam quod cunctari, et trahere, et morari scivit, quae omnia irati nesciunt? Perierat imperium, quod tunc in extremo stabat, si Fabius tantum ausus esset, quantum Ira suadebat. Habuit in consilio fortunam publicam; et aestimatis viribus, ex quibus iam perire nihil sine universo poterat, dolorem ultionemque seposuit: in unam utilitatem occasionis intentus, iram ante vicit, quam Hannibalem. Quid Scipio? nonne reliquo Hannibale, Punico exercitu, omnibusque quibus irascendum erat, bellum in Africam transtulit, tam lentus, ut opinionem luxuriaegnaciaeque malignis daret? Quid alter Scipio? non circa Numantiam multum diuque sedet, et hunc suum publicumque dolorem aequo animo tulit, diutius Numantium quam Carthaginem vinci?

dum circumvallat , et includit hostem , eo compulit , ut ferro ipsi suo caderent.

XII. Non est itaque utilis , nec in proeliis quidem aut in bellis Ira. In temeritatem enim prona est , et pericula dum inferre vult , non cavet. Illa certissima est virtus , quae se diu multumque circumspexit , et texit ; et ex lento ac destinato provexit. Quid ergo ? inquit , vir bonus non irascetur , si caedi patrem suum viderit , si rapi matrem ? Non irascetur , sed vindicabit , sed tuebitur. Quid autem times , ne parum illi magnus stimulus , etiam sine ira , pietas sit ? Aut dic eodem modo : Quid ergo ? cum viderit secari patrem suum , filiumve , vir bonus non flebit , nec linquetur animo ? quae accidere feminis videmus , quoties illas levis periculi suspicio perculit. Officia sua vir bonus exsequitur inconsitus , intrepidus : et sic bono viro digna faciet , ut nihil faciat viro indignum. Pater caedetur ? defendam . caesus est ? exsequar : quia oportet , non quia dolet. Cum hoc dicis , Theophraste , quaeris invidiam praeceptis fortioribus , et , relicto iudice , ad coronam venis. quia unusquisque in eiusmodi suorum casu irascitur , putas iudicaturos homines id fieri debere , quod faciunt. Fere enim iustum quisque affectionum iudicat , quem agnoscit. Irascuntur boni viri pro suorum iniuriis : sed idem faciunt , si calda non bene praebetur , si vitreum fractum est , si calceus luto sparitus est. Non pietas illam iram , sed infirmitas movet : sicut pueri , qui tam parentibus amissis flebunt , quam nucibus. Irasci pro suis , non est pii animi , sed infirmi. Illud pulchrum dignumque parentibus , liberis , amicis , civibus prodire defensorem , ipso officio ducen-

te : volentem , iudicantem , providentem , non impulsum et rabidum. Nullus enim affectus vindicandi cupidior est , quam ira : et ob id ipsum ad vindicandum inhabilis , praerapida et amens : ut omnis fere cupiditas ipsa sibi in id , in quod properat , opponitur. Itaque nec in pace , nec in bello , unquam bona fuit. Pacem enim similem belli efficit : in armis vero obliviscitur Martem esse communem , venitque in alienam potestatem , dum in sua non est. Deinde non ideo vitia in usum recipienda sunt , quia aliquando aliquid boni effecerunt. nam et febres quaedam genera valedudinis levant : nec ideo non ex toto illis caruisse melius est. Abominandum remedii genus est , sanitatem debere morbo. Simili modo ira , etiamsi aliquando , ut venenum , et praecipitatio , et naufragium , ex inopinato prosuit , non ideo salutaris omnino iudicanda est. saepe enim saluti fuere pestifera.

XIII. Deinde quae habenda sunt in bonis , quo maiora , eo meliora et optabiliora sunt. Si iustitia bonum est , nemo dicet meliorem futuram , si quid detractum ex ea fuerit : si fortitudo bonum est , nemo illam desiderabit ex aliqua parte diminui : ergo et ira quo maior , hoc melior. quis enim ullius boni accessionem recusaverit ? atqui augeri illam inutile est : ergo et esse. Non est bonum , quod incremento malum fit. Utilis , inquit , ira est , quia pugnaciores facit. Isto modo et ebrietas. Facit enim protertos et audaces : multique meliores ad ferrum fuere male sobrii. Isto modo dic et phrenesim et insaniam viribus necessariam : quia saepe validiores furor reddit. Quid ? non aliquoties metus e contrario fecit audacem ? et mor-

ris timor etiam inertissimos excitavit in proelium? Sed ira, ebrietas, timor, aliaque eiusmodi, foeda et caduca irritamenta sunt: nec virtutem instruunt, quae nihil vitiis eget, sed segnem aliquando animum et ignavum paululum allevant. Nemo irascendo fit fortior, nisi qui fortis sine ira non esset. Ita non in adiutorium virtutis venit, sed in vicem. Quid quod, si bonum esset ira, perfectissimum quemque sequeretur? atqui iracundissimi, infantes, senesque, et aegri sunt; et invalidum omne natura querulum est.

XIV. Non potest, inquit Theophrastus, fieri, ut bonus vir non irascatur malis. Isto modo, quo melior quisque, hoc iracundior erit? Vide ne contra placidior, solutusque affectibus, et cui nemo odio sit. Peccantes vero quid habet cur oderit, cum error illos in huiusmodi delicta compellat? non est autem prudentis, errantes odisse: alioquin ipse sibi odio erit. Cogiter quam multa contra bonum morem faciat, quam multa ex his quae egit, veniam desiderent. Iam irascetur etiam sibi. Neque enim aequus iudex aliam de sua, aliam de aliena causa, sententiam fert. Nemo, inquam, invenitur, qui se possit absolvere: et innocentem quisque se dicit, respiciens testem, non conscientiam. Quanto humanius, mitem et patrium animum praestare peccantibus, et illos non persequi, sed revocare? Errantem per agros ignorantia viae, melius est ad rectum iter admovere, quam expellere. Corrigendus est itaque qui peccat, et admonitione, et vi, et molliter, et aspere: meliorque tam sibi quam aliis faciendus, non sine castigatione, sed sine ira. Quis enim cui medetur, irascitur?

XV. At corrigi nequeunt, nihilque in illis leve aut spei bonae capax est. Tollantur e coetu mortalium, facturi peiora quae contingunt: et quo uno modo possunt, definant mali esse: sed hoc sine odio. Quid enim est cur oderim eum, cui tum maxime profum, cum illum sibi eripio? Num quis membra sua odit, tunc cum abscedit? non est illa ira, sed misera curatio. Rabidos effligimus canes, trucem atque immansuetum bovem caedimus, et morbidis pecoribus, ne gregem polluant, ferrum demittimus, portentosos foetus extinguimus, liberos quoque, si debiles monstrosique editi sunt, mergimus. Non ira, sed ratio est, a sanis inutilia secernere. Nil minus quam irasci punientem decet: cum eo magis ad emendationem poena proficiat, si iudicio lata est. Inde est, quod Socrates servo ait: Caederem te, nisi irascerer. Admonitionem servi in tempus fanius distulit, illo tempore se admonuit. Cuius erit temperatus affectus, cum Socrates non sit ausus se irae committere? Ergo ad coercitionem errantium scelerorumque irato castigatore non opus est. Nam cum ira delictum animi sit, non oportet peccata corriger peccantem.

XVI. Quid ergo? non irascar latroni? non irascar venefico? Non. Neque enim mihi irascor, cum sanguinem mitto. Omne poenae genus, remedii loco admoveo. Tu adhuc in prima parte versaris errorum, nec graviter laberis, sed frequenter. Obiurgatio te primum secreta, deinde publica emendare tentabit. Tu longius iam processisti, quam ut possis verbis sanari: ignominia contineberis. Tibi fortius aliquid et quod sentias, inurendum est: in exsiliū, et loca

ignota mitteris. In te duriora remedia iam solida nequitia desiderat : et vincula publica , et carcer adhibebitur. Tibi insanabilis animus est , et sceleribus scelerata contexens : et iam non causis , quae nunquam malo defuturae sunt, impelleris, sed satis tibi est magna ad peccandum causa, peccare. Perbibisti nequitiam , et ita visceribus immiscuisti , ut nisi cum ipsis exire non possit. Olim miser mori quaeris. bene de te merebimur : auferemus tibi istam , qua vexaris , insaniam ; et per tua alienaque volutato supplicia, id, quod unum bonum tibi supereft , repraesentabimus , mortem. Quare irascer , cui cum maxime prosum ? Interim optimum misericordiae genus est, occidere. Si intrasse valetudinarium exercitatus et sciens, aut domum divitis , non idem imperasse omnibus, per diversa aegrotantibus. Varia in tot animis vitia video, et civitati curandae adhibitus sum : pro cuiusque morbo medicina quaeratur. Hunc sanet verecundia , hunc peregrinatio , hunc dolor , hunc egestas , hunc ferrum. Itaque etsi perversa induenda magistratui vestis , et convocanda classico concio est : procedam in tribunal, non furens , nec infestus, sed vultu legis : et illa solennia verba , leni magis gravique , quam rabida voce concipiam , et agi iubebo non iratus, sed severus. Et cum cervicem noxio praecidi imperabo , et cum parricidam insuam culleo , et cum mittam in supplicium militare, et cum Tarpeio proditorem hostemve publicum imponam ; sine ira , eo vultu animoque ero , quo serpentes et animalia venenata percutio. Iracundia opus est ad puniendum. Quid ? tibi videtur lex irasci his quos non novit, quos non vidit,

quos non futuros sperat? Illius itaque sumendus est animus, quae non irascitur, sed constituit. Nam si bono viro ob mala facinora irasci convenit, et ob secundas res malorum hominum invidere conveniet. Quid enim est indignius, quam florere quosdam, et eos indulgentia fortunae abuti, quibus nulla potest satis mala inveniri fortuna? Sed tam commoda illorum sine invidia videbit, quam scelera sine ira. Bonus iudex damnat improbanda; non odit. Quid ergo? non, cum eiusmodi aliquid sapiens habebit in manibus, tangetur animus eius, eritque solito commotior? Fateor. Sentiet levem quendam, tenuemque motum. Nam, ut dixit Zeno, in sapientis quoque animo, etiam cum vulnus sanatum est, cicatrix manet. Sentiet itaque suspiciones quasdam et umbras affectuum: ipsis quidem carebit. Aristoteles ait, affectus quosdam, si quis illis bene utatur, pro armis esse. Quod verum foret, si velut bellica instrumenta sumi dependentique possent induentis arbitrio. Haec arma, quae Aristoteles virtuti dat, ipsa per se pugnant, non exspectant manum. habent, et non habentur. Nil aliis instrumentis opus est: satis nos instruxit ratione natura. Haec dedit telum, firmum, perpetuum, obsequens, nec anceps, nec quod in dominum remitti posset. Non ad providendum tantum, sed ad res gerendas satis est per se ipsa ratio. Etenim quid est stultius, quam hanc ab iracundia petere praesidium: rem stabilem ab incerta, fidelem ab infida, sanam ab aegra? Quid, quod ad actiones quoque, in quibus solis opera iracundiae videtur necessaria, multo per se ratio fortior est? Nam cum iudicavit aliquid faciendum,

in eo perseverat. nihil enim melius inventura est se ipsa, quo mutetur: ideo stat semel constitutis. Iram saepe misericordia retro egit. habet enim non solidum robur, sed vanum tumorem: violentisque principiis utitur, non aliter quam qui a terra venti fargunt, et fluminibus paludibusque concepti, sine pertinacia vehementes sunt. Incipit magno impetu, deinde deficit ante tempus fatigata: et quae nihil aliud quam crudelitatem ac nova genera poenarum versaverat, cum animadvertissum est, iam infrausta lenisque est. Affectus cito cadit: aequalis est ratio. Ceterum etiam ubi perseveraverit ira, nonnunquam si plures sunt, qui perire meruerunt, post duorum triumve sanguinem, occidere definit. Primi eius iecus acres sunt, sicut serpentium venena a cubili repentium nocent: innoxii dentes sunt, cum illos frequens morsus exhausit. Ergo non paria patiuntur, qui paria commiserant: et saepe qui minus commisit, plus patitur; quia recentiori irae obiectus est, et in totum inaequalis est. modo ultra quam opertet, excurrit; modo citerius debito resistit. Sibi enim indulget, ex libidine iudicat, et audire non vult, et patrocinio non relinquit locum, et ea tenet quae invasit, et eripi sibi iudicium suum, etiam si pravum est, non sinit. Ratio utrique parti locum dat, et tempus dat. Deinde advocationem etiam sibi petit, ut excutiendae spatium veritati habeat: ira festinat. Ratio id iudicari vult, quod aequum est. ira id aequum videri vult, quod iudicavit. Ratio nihil praeter ipsum, de quo agitur, spectat: ira vanis et extra causam obversantibus commovet. Vultus illam securior, vox clarior,

fermo liberior , cultus delicatior , advocatio ambitio-
fior , favor popularis exasperat. Saepe infesta patro-
no , reum damnat : etiam si ingeritur oculis veritas ,
amat et tuetur errorem : coargui non vult : et in male
coepitis , honestior illi pertinacia videtur , quam poe-
nitentia. Cn. Piso fuit memoria nostra , vir a multis
vitiis integer , sed pravus , et cui placebat pro con-
stantia rigor. Is cum iratus duci iussisset eum , qui ex
commeatu sine commilitone redierat , quasi interse-
cisset quem non exhibebat , roganti tempus aliquod
ad conquirendum , non dedit. damnatus extra vallum
ductus est , et iam cervicem porrigebat , cum subito
apparuit ille commilito , qui occisus videbatur. Tunc
centurio suppicio praepositus , condere gladium
speculatorum iubet : damnatum ad Pisonem reducit ,
redditurus Pisoni innocentiam. nam militi fortuna-
reddiderat. Ingenti concursu deducuntur , complexi
alter alterum , cum magno gaudio castrorum , com-
militones. Conscendit tribunal furens Piso , ac iuber-
duci utrumque , et eum militem qui non occide-
rat , et eum qui non perierat. Quid hoc indignius ?
quia unus innocens apparuerat , duo peribant. Piso
adiecit et tertium. Nam ipsum centurionem , qui
damnatum reduxerat , duci iussit. Constituti sunt
in eodem loco perituri tres , ob unius innocentiam.
O quam solers est iracundia , ad fingendas causas:
furoris ! Te , inquit , duci iubeo , quia damnatus
es : te , quia causa damnationis commilitoni fuisti :
te , quia iussus occidere , imperatori non paruisti.
Excogitavit quemadmodum tria crimina faceret ,
quia nullum invenerat. Habet , inquam , iracun-

dia hoc mali, non vult regi. Irascitur veritati ipsi ; si contra voluntatem suam apparuerit : clamore , et tumultu , et totius corporis iactatione , quos destinavit , insequitur , adiectis conviciis maledictisque. Hoc non facit ratio : sed si ita opus est , filens quietaque , totas domos funditus tollit , et familias reipublicae pestilentes cum coniugibus ac liberis perdit , tecta ipsa diruit , et solo exaequat ; et inimica libertati nomina extirpat. Haec non frendens , nec caput quassans , nec quidquam indecorum iudici faciens , cuius tum maxime placidus esse debet et in statu vultus , cum magna pronuntiat. Quid opus est , inquit Hieronymus , cum velis caedere aliquem , prius tua labia mordere ? Quid si ille vidisset , desilientem de tribunali proconsulem , et fasces lictori auferentem , et sua vestimenta scindentem , quia tardius scindebantur aliena ? Quid opus est mensam evertere ? quid pocula affligere ? quid se in columnas impingere ? quid capillos evellere ? femur pectusque percutere ? Quantam iram putas , quae quia non tam cito in alium quam vult , erumpit , in se revertitur ? Tenetur itaque a proximis , et rogatur , ut ipse sibi placetur : quorum nihil facit , quisquis vacuus ira ; meritam cuique poenam iniungit. Dimitit saepe eum , cuius peccatum deprehendit ; si poenitentia facti spem bonam pollicetur ; si intelligit , non ex alto venire nequitiam , sed summo , quod aiunt , animo inhaerere. Dabit impunitatem , nec accipientibus nocitaram , nec dantibus. Nonnunquam magna sclera levius , quam minora compescet : si illa lapsu , non crudelitate commissa sunt ; his inept latens et opera , et inve-

terata calliditas. Idem delictum in duobus non eodem malo afficiet, si alter per negligentiam admisit, alter curavit ut nocens esset. Hoc semper in omni animadversione servabit, ut sciat, alteram adhiberi, ut emendet malos: alteram, ut tollat. In utroque non praeterita, sed futura intuebitur. Nam, ut Plato ait, Nemo prudens punit, quia peccatum est, sed ne peccetur. Revocari enim praeterita non possunt: futura prohibentur. et quos volet néquitiae male cedentis exempla fieri, palam occidet: non tantum ut pereant ipsi, sed ut alios pereundo deterreant. Haec cui expendenda, aestimandaque sunt; vides quam beat omni perturbatione liber accedere ad rem summa diligentia tractandam, potestatem vitae necisque. Male irato ferrum committitur. Ne illud quidem iudicandum est, aliquid iram ad magnitudinem animi conferre. Non est enim illa magnitudo; tumor est: nec corporibus copia vitiosi humoris intensis, morbus incrementum est, sed pestilens abundantia. Omnes quos vaecors animus supra cogitationes extollit humanas, altum quiddam et sublime spirare se credunt: ceterum nihil solidi subest, sed in ruinam prona sunt, quae sine fundamentis creyere. Non habet ira cui insistat. non ex firmo mansuroque oritur, sed ventosa et inanis est: tantumque abest a magnitudine animi, quantum a fortitudine audacia, a fiducia insolentia, ab austерitate tristitia, a severitate crudelitas. Multum, inquam, interest inter sublimem animum, et superbium. Iracundia nihil amplum decorumque molitur. Contra, mihi videtur veterosi et infelici animi, imbecillitatis sibi consci, saepe indolescere. Ut exulce-

rata et aegra corpora , ad tactus levissimos gemunt ; ita ira muliebre maxime et puerile vitium est. At incidit et in viros . nam viris quoque puerilia ac muliebria ingenia sunt. Quid ergo ? non aliquae voces ab iratis emituntur , quae magno emissae videantur animo , veram ignorantibus magnitudinem ? qualis illa dira et abominanda : Oderint , dum metuant. Sullano scias seculo scriptam. Nescio utrum sibi peius optaverit , ut odio esset , an ut timori. Oderint. Occurrit illi , futurum , ut execrentur , insidentur , opprimant. Quid adiicit ? Dii illi male faciant , adeo reperit dignum odio remedium. Oderint. Quid ? dum pareant ? non. Dum probent ? non. Quid ergo ? dum timeant. Sic nec amari quidem vellem. Magno hoc dictum spiritu putas ? falleris. nec enim magnitudo ista est , sed immanitas. Non est quod credas irascentium verbis : quorum strepitus magni , minaces sunt , intus mens pavidissima. Non est quod existimes verum esse , quod apud disertissimum virum Livium dicitur : Vir ingenii magni magis quam boni. Non potest illud separari : aut et bonum erit , aut nec magnum. quia magnitudinem animi inconcussam intelligo , et introrsus solidam , ab imo parem firmamque , qualis inesse malis ingenii non potest. Terribilia enim esse , et tumultuosa , et exitiosa possunt : magnitudinem quidem , cuius firmamentum roburque bonitas est , non habebunt. ceterum sermone , conatu , et omni extra paratu facient magnitudinis fidem. Eloquentur aliquid , quod tu magni putas , sicut C. Caesar , qui iratus coelo quod obstreperet pantomimis , quos imitabatur studiosius quam spectabat , quodque comes fa-

tio sua fulminibus terreretur , prorsus parum certis , ad pugnam vocavit Iovem , et quidem sine missione , Homericum illum exclamans versum , ή μ' ἀνάστη , η ἔγω σε . Quanta dementia fuit ! putavit , aut sibi noceri ne a Iove quidem posse , aut se nocere etiam Iovi posse . Non puto parum momenti hanc eius vocem ad incitandas coniuratorum mentes addidisse . ultimae enim patientiae visum est , eum ferre , qui Iovem non ferret . Nihil ergo in ira , ne cum videtur quidem vehementis , deos hominesque despiciens , magnum , nihil nobile est : aut si videtur alicui magnum animum ira producere , videatur et luxuria . Ebore sustineri vult , purpura vestiri , auro tegi , terras transferre , maria concludere , flumina praecipitare , nemora suspendere . Videatur et avaritia magni animi . acervis auri argenteique incubat , et provinciarum nominibus agros colit , et sub singulis villicis latiores habet fines , quam quos Consules fortiebantur . Videatur et libido magni animi . transnatat freta , puerorum greges castrat , sub gladium mariti venit uxor , morte contemta . Videatur et ambitio magni animi . non est contenta honoribus annuis : si fieri potest , uno nomine occupare fastos vult , per omnem orbem titulos disponere . Omnia ista non refert in quantum procedant extendantque se : angusta sunt , misera , depressa . Sola sublimis et excelsa virtus est : nec quidquam magnum est , nisi quod simul et placidum .

L. ANNAEI SENECAE
 DE IRA
 AD NOVATUM
 LIBER II.

Argumentum & Ordo.

Duas partes habet. prior, Quæstiunculas de Ira, altera adversus hanc Remedia. Prior quæstio, An ira a solo impetu sit? negat, & animum iudiciumque mox accedere. Itaque rationem audit, & coerceri potest: non futurum, si ab illo solo, & natura, esset. Discriminat obiter Stoice Motus, & Affectionis. Haec usque ad Cap. IV inclusum. Quæstio deinde altera, An crudelitas & saevitia sit ab Ira? negat, & alium Affectionem esse: initium tamen aut alimentum a crebra Ira saepe habere. Cap. deinde VI, An vir bonus peccatis aut peccantibus irascatur? abnuit, & toto affectioni isto liberat sapientem, usque ad Cap. XI. Ab eo querit, An utilis sit ira, quia a Contenui vindicat, & malos terret? Non admittit, & timeri fatetur: quod non est bonum aut optabile bono. Nam & ferae, & morbi timentur. Haec ad Cap. XIII. In eo fatetur, simulari a sapiente Iram posse, non tamen usurpari. Neque simplicis aut generosi eam animi esse, quia liberae & indomitae gentes habent: immo ferocis, & a doctrina aut ratione inculti. Denique Cap. XVIII utiliter ad Remedia Irae transit. Duo ea porrigit, Ne irascamur: & ne in ira peccemus. Ne' incidamus, Educatio talis & talis iuvat: deinde pugna contra primas irae causas, & advocatione semper ac tempore uti. Tum suspiciones pellendæ. Luxus vitandus. Tum rebus sine sensu, hominibus exiguo sensu, iis quae natura, vel bono nostro fiunt, non irasci. Culpas nostras videre & agnoscere, aequiores ita alienis futuros. Non temere credere; & credita, examinare ab animo facientis. Praecipue Fastus ponendus, &

aestimatio sui : quae irascundos & vindices facit. Pati potius , aut dissimulare : & a foedo affectu absinere , cuius deformitas in animo ac vultu expressa. Haec utilia , legantur , imbibantur.

I. **P**RIMUS liber, Novate, benignorem habuit materiam. facilis enim in procliva vitiorum decursus est. nunc ad exilia veniendum est. Quaerimus enim, utrum ira iudicio, an impetu incipiat: id est, utrum sua sponte moveatur, an quemadmodum pleraque, quae intra nos insciis nobis oriuntur. Debet autem in haec se demittere disputatio, ut ad illa quoque altiora possit exsurgere. Nam et in corpore nostra ossa, nervique et articuli, firmamenta totius, et vitalia, minime speciosa visu, prius ordinantur: deinde haec, ex quibus omnis in faciem aspectumque decor est: post haec omnia, qui maxime oculos rapit color, ultimus perfecto iam corpore affunditur. Iram quin species oblata iniuriae moveat, non est dubium: sed utrum speciem ipsam statim sequatur, et non accidente animo excurrat, an illo assentiente moveatur, quaerimus. Nobis placet, nil ipsam per se audere, sed animo approbante. Nam speciem capere acceptae iniuriae, et ultionem eius concupiscere, et utrumque coniungere, nec laedi se debuisse, et vindicari debere, non est eius impetus, qui sine voluntate nostra concitat. Ille simplex est: hic compositus, et plura continens. Intellexit aliquid, indignatus est, damnavit, ulciscitur. haec non possunt fieri, nisi animus eis, quibus tangebatur, assensus est.

II. Quorsus, inquis, haec quaestio pertinet? Ut sciamus, quid sit ira. Nam si invitis nobis nascitur,

nunquam rationi succumbet. Omnes enim motus, qui non voluntate nostra fiunt, invicti et inevitabiles sunt: ut horror frigida aspergis, ad quosdam tactus aspernatio, ad peiores nuntios subriguntur pili, et rubor ad improba verba suffunditur, sequiturque vertigo praerupta cernentes. Quorum quia nihil in nostra potestate est, nulla, quo minus fiant, ratio persuadet. Ita praeceptis fugatur. Est enim voluntarium animi vitium, non ex his quae conditione quadam humanae fortis eveniunt; ideoque etiam sapientissimis accidunt. Inter quae et primus ille iectus animi ponendus est, qui nos post opinionem iniuriae movet. Hic subit etiam inter ludicra scenae spectacula, et lectiones rerum vetustarum. saepe Clodio Ciceronem expellenti, et Antonio occidenti, videmur irasci. Quis non contra Marii arma, et contra Sullae proscriptionem concitatur? Quis non Theodoto, et Achillae, et ipsi puero, non puerile auro facinus, infestus est? Cantus nos nonnunquam et concitata modulatio instigat. Martius quoque ille tubarum sonus movet mentes, et atrox pictura et iustissimorum suppliciorum tristis aspectus. Inde est quod arridemus ridentibus, et contristat nos turba moerentium, et effervescamus ad aliena certamina: quae non sunt irae, non magis quam tristitia est, quae ad conspectum mimici naufragii contrahit frontem: non magis quam timor, qui Hannibale post Cannas moenia circumfidente, lectoris percutit animum: sed omnia ista motus sunt animorum moveri nolentium, nec affectus, sed principia praeludentia affectibus. Sic enim militaris viri, in media pace iam' togati aures tuba susci-

tat, equosque castrenses erigit crepitus armorum. Alexandrum aiunt, Xenophanto canente, manum ad arma misisse.

III. Nihil ex his quae animum fortuitu impellunt, affectus vocari debet. ista, ut ita dicam, patitur magis animus, quam facit. Ergo affectus est, non ad oblatas rerum species moveri, sed permittere se illis: et hunc fortuitum motum persequi. Nam si quis pallorem, et lacrimas procidentes, et irritationem humoris obscoeni, altumve suspirium, et oculos subito acriores, aut quid his simile, indicium affectus, animique signum putat; fallitur, nec intelligit, hos corporis esse pulsus. Itaque et fortissimus plerumque vir, dum armatur, expalluit: et signo pugnae dato, ferocissimo militi paululum genua tremuerunt: et magno imperatori, antequam inter se acies arietarent, cor exsiluit: et oratori eloquentissimo, dum ad dicendum componitur, summa riguerunt. Ira non moveri tantum, sed excurrere debet. est enim impetus. nunquam autem impetus sine assensu mentis est: neque enim fieri potest, ut de ultione et poena agatur, animo nesciente. Putavit se aliquis laesum, voluit ulcisci: dissuadente aliqua causa, statim resedit. Hanc, iram non voco, sed motum animi, rationi parentem. Illa est ira, quae rationem transilit, quae secum rapit. Ergo illa prima agitatio animi, quam species iniuriae incussit, non magis ira est, quam ipsa iniuriae species; sed ille sequens impetus, qui speciem iniuriae non tantum accepit, sed approbavit. Ira est concitatio animi, ad ultionem voluntate et iudicio pergentis. Numquid dubium est, quin timor

fugam habeat , ira impetum ? Vide ergo an putas aliquid sine assensu mentis aut peti posse , aut caveri.

IV. Et ut scias , quemadmodum incipient affectus , aut crescant , aut efferantur , est primus motus non voluntarius quasi praeparatio affectus , et quaedam commutatio . alter cum voluntate non contumaci , tanquam oporteat me vindicari , cum laesus sim : aut oporteat hunc poenas dare , cum scelus fecerit . tertius motus est iam impotens , qui non , si oportet , ulcisci vult : sed utique , qui rationem evicit . Primum illum animi ictum effugere ratione non possumus : sicut ne illa quidem , quae diximus accidere corporibus , ne nos oscitatio aliena sollicitet , ne oculi ad intentionem subitam digitorum comprimantur . Ista non potest ratio vincere : consuetudo fortasse , et assidua observatio extenuat . Alter ille motus , qui iudicio nascitur , iudicio tollitur .

V. Illud etiamnum quaerendum est . Hi qui vulgo saeviunt , et sanguine humano gaudent , an irascantur , cum eos occidunt , a quibus nec acceperunt iniuriam , nec accepisse se existimant : qualis fuit Apollodorus aut Phalaris . Haec non est ira : feritas est . non enim quia accepit iniuriam , nocet : sed parata est , dum noceat , vel accipere . nec illi verbera lacerationesque in ultionem petuntur , sed in voluptatem . Quid ergo ? Origo huius mali ab ira est : quae ubi frequenti exercitatione et satietate in oblivionem clementiae venit , et omne foedus humanum eiecit animo , novissime in crudelitatem transit . Rident itaque , gaudentque , et voluptate multa perfruuntur , plurimumque ab irato rum vultu absunt , per otium saevi . Hannibalem aiunt

dixisse, cum fossam sanguine humano plenam vidisset: O formosum spectaculum! Quanto pulchrius illi visum esset, si flumen aliquod lacumque compleisset? Quid mirum, si hoc maxime spectaculo caperis, innatus sanguini, et ab infante caedibus admotus? sequetur te fortuna crudelitatis tuae per viginti annos secunda, dabitque oculis tuis gratum ubique spectaculum. videbis istud et circa Trasimenum, et circa Cannas, et novissime circa Carthaginem tuam. Volesus nuper sub divo Augusto proconsul Asiae, cum trecentos una die securi percussisset, incedens inter cadavera vultu superbo, quasi magnificum quiddam confaciendumque fecisset, Graece proclamavit: O rem regiam! Quid hic rex fecisset? Non fuit haec ira, sed maius malum, et insanabile.

VI. Virtus, inquit, ut honestis rebus propitia est, ita turpibus irata esse debet. Quid si dicatur, virtutem et humilem et magnam esse debere? at qui haec dicit, illam extolli vult, et deprimi. quoniam laetitia, ob recte factum, clara magnificaque est; ira, ob alienum peccatum, sordida et angusti pectoris est: nec unquam committet virtus, ut vitia, dum compescit, imitetur. ipsam iram castigandam habet, quae nihilo melior est, saepe etiam peior his delictis, quibus irascitur. Gaudere laetarique, proprium et naturale virtutis est: irasci non est ex dignitate eius, non magis quam moerere. Atque iracundiae tristitia comes est: et in hanc omnis ira vel post poenitentiam, vel post repulsam revolvitur. Et si sapientis est, peccatis irasci, magis irascetur maioribus, et saepe irascetur. sequitur, ut non tantum iratus sit sapiens,

sed iracundus. Atqui si nec magnam iram, nec frequentem, in animo sapientis locum habere credimus: quid est, quare non ex toto, hoc affectu illum liberemus? modus, inquam, esse non potest, si profacto cuiusque irascendum est. Nam aut iniquus erit, si aequaliter irascetur delictis inaequalibus: aut iracundissimus, si toties excanduerit, quoties iram scelera meruerint. Et quid indignius, quam sapientis affectum ex aliena pendere nequitia? definet ille Socrates posse eundem vultum domum referre, quem domo extulerat.

VII. Atqui si irasci sapiens debet turpiter factis, et concitari trifstarique ob scelera, nihil est aerumnosius sapiente. omnis illi per iracundiam moeroremque vita transibit. Quod enim momentum erit, quo non improbanda videat? quoties processerit domo, per sceleratos illi, avarosque, et prodigos, et impudentes, et ob ista felices, incedendum erit: nusquam oculi eius flectentur, ut non quod indignentur, inveniant. Deficiet, si toties a se iram, quoties causa posceret, exegerit. Haec tot millia ad forum prima luce properantia, quam turpes lites, quanto turpiores advocates habent? Alius iudicia patris accusat, quae mereri satius fuit: alius cum matre consistit: alius delator venit eius criminis, cuius manifestior reus est. et iudex damnaturus quae fecit, eligitur: et corona pro mala causa, bona patroni voce corrupta. Quid singula persequor? cum videris forum multitudine refertum, et Septa concursu omnis frequentiae plena, et illum Circum, in quo maximam sui partem populus ostendit: hoc scito, istic tantundem esse vitio-

rum, quantum hominum. Inter istos quos togatos vides, nulla pax est: alter in alterius exitium leví compendio ducitur.

VIII. Nulli nisi ex alterius damno quaestus est: felicem oderunt, infelicem contemnunt: maiore gravantur, minori graves sunt: diversis stimulantur cupiditatibus: omnia perdita ob levem voluptatem praedamque cupiunt. Non alia quam in ludo gladiatorio vita est, cum iisdem viventium pugnantiumque. Ferarum iste conventus est: nisi quod illae inter se placidae sunt, morsuque similium abstinent, hi mutua laceratione satiantur. Hoc uno ab animalibus mutis differunt: quod illa mansuescunt alentibus, horum rabies ipsos, a quibus est nutrita, depascitur. Nunquam irasci desinet sapiens, si semel coepérit. omnia sceleribus ac vitiis plena sunt, plus committitur, quam quod possit coercitione sanari. Certatur ingenti quodam nequitiae certamine: maior quotidie peccandi cupiditas, minor verecundia est. Expulso melioris aequiorisque respectu, quo cunque visum est, libido se impingit. nec furtiva iam sclera sunt: praeter oculos eunt. adeoque in publicum missa nequitia est, et in omnium pectoribus evaluit, ut innocentia non rara, sed nulla sit. Numquid enim singuli aut pauci rupere legem? undique, velut signo dato, ad fas nefasque miscendum coorti sunt.

— *Non hospes ab hospite tutus,*
Non sacer a genero. fratrum quoque gratia rara est.
Imminet exitio vir coniugis, illa mariti.
Lurida terribiles miscent aconita novercae.
Filius ante diem patrios inquirit in annos.

Et quia pars ista scelerum est? non descripsit castra ex una parte contraria, parentum liberorumque sacramenta diversa, subiectam patriae civis manu flammam, et agmina infestorum equitum ad conquirendas proscriptorum latebras circumvolitantia, et violatos fontes venenis, et pestilentiam manu factam, et praeduictam obsessis parentibus fossam, plenos carceres, et incendia totas urbes concremantia, dominationesque funestas, et regnum publicorumque exitiorum clandestina consilia: et pro gloria habita, quae quamdiu opprimi possunt, scelerata sunt: raptus ac stupra, et ne os quidem libidini exceptum.

IX. Adde nunc publica periuria gentium, et rupta foedera, et in praedam validioris quidquid non resistebat, abductum; circumscriptiones, furta, fraudes, initiationes, quibus tria non sufficiunt foras. Si tantum irasci vis sapientem, quantum scelerum indignitas exigit: non irascendum illi, sed insanendum est. Illud potius cogitabis, non esse irascendum erroribus. quid enim si quis irascatur in tenebris parum vestigia certa ponentibus? quid si quis surdis, imperia non exaudientibus? quid si pueris, quod neglecto dispectu officiorum, ad lusus et ineptos aequalium iocos spectent? quid si illis irasci velis, qui aegrotant, senescunt, fatigantur? Inter cetera mortalitatis incommoda, et haec est caligo mentium: nec tantum necessitas errandi, sed errorum amor. Ne singulis irascaris, universis ignoscendum: generi humano venia tribuenda est. Si irasceris iuvenibus senibusque, quod peccant: irascere infantibus, quod

peccaturi sunt. Num quis irascitur pueris, quorum aetas nondum novit rerum discrimina? maior est excusatio et iustior, hominem esse, quam puerum. Hac conditione nati sumus, animalia obnoxia non paucioribus animi, quam corporis morbis: non quidem obtusa nec tarda, sed acumine nostro male utentia, alter alteri vitiorum exempla. Quisque sequitur priores, male iter ingressos. quidni habeant excusationem cum publica via erraverint?

X. In singulos severitas imperatoris distinguitur: at necessaria venia est, ubi totus deseruit exercitus. Quid tollit iram sapientis? turba peccantium. Intellegit quam et iniquum sit et periculosum, irasci publico vitio. Heraclitus quoties prodierat, et tantum circa se male viventium, immo male pereuntium viderat, flebat, miserebatur omnium, qui sibi laeti felicesque occurribant, miti animo, sed nimis imbecillo: et ipse inter deplorandos erat. Democritum contra, aiunt, nunquam sine risu in publico fuisse. adeo nihil illi videbatur serium eorum, quae serio gerebantur. Ubi istic irae locus est? aut ridenda omnia, aut flenda sunt. Non irascetur sapiens peccantibus. Quare? quia scit neminem nasci sapientem, sed fieri. scit paucissimos omni aevo sapientes evadere, quia conditionem humanae vitae perspectam habet: nemo autem naturae sanus irascitur. Quid enim si mirari velit, non in silvestribus dumis poma pendere? quid si miretur spineta sentesque non utili aliqua fruge compleri? nemo irascitur, ubi vitium natura defendit. Placidus itaque sapiens et aequus erroribus, non hostis, sed correptor peccantium, hoc quotidie

procedit animo : Multi mihi occurrent vino dediti , multi libidinosi , multi ingrati , multi avari , multi furiis ambitionis agitati . Omnia ista tam propitius aspiciet , quam aegros suos medicus . Numquid ille , cuius navigium multam , undique laxatis compagibus , aquam trahit , nautis ipsique navigio irascitur ? occurrit potius , et aliam excludit undam , aliam egerit , manifesta foramina paecludit , latentibus et ex occulto sentinam ducentibus labore continuo resistit : nec ideo intermittit , quia quantum exhaustum est , subnascitur . Lento adiutorio opus est , contra mala continua et foecunda , non ut desinant , sed ne vincant .

XI. Utilis est , inquit , ira : quia contemptum effugit , quia malos terret . Primum , ira si quantum minatur , valet ; ob hoc ipsum quod terribilis est , et invisa est . Periculosius est autem timeri , quam despici . Si vero sine viribus est , magis exposita contemtui est , et derisum non effugit . quid enim est iracundia in supervacuum tumultuante frigidius ? Deinde non ideo quaedam , quia terribilia , potiora sunt : nec hoc sapientis dici velim , quod ferae quoque tellum est , timeri . Quid ? non timetur febris , podagra , hulcus malum ? numquid ideo quidquam in ipsis boni est ? an contra , omnia despelta , et foeda , et turpia , ipso quo timentur , sunt ? Ira per se deformis est , et minime metuenda : at timetur a pluribus , sicut deformis persona ab infantibus . Quid , quod semper in auctores redundat timor , nec quisquam metuitur , ipse securus ? Occurrat hoc loco tibi Laberianus ille versus , qui medio civili bello in theatro dictus , to-

tum in se populum non aliter convertit, quam si missa esset vox publici affectus:

Necessus est multos timeat, quem multi timent.

Ita natura constituit, ut quod alieno metu magnum est, a suo non vacet. Leoni quam pavida sunt ad levissimos strepitus pectora: acerrimas feras umbra, vox, et odor insolitus exagitat. quidquid terret, et trepidat. Non est ergo quare concupiscat quisquam sapiens timeri.

XII. Nec ideo iram magnum quisquam putet, quia formidini est: quoniam quaedam etiam contemptissima timentur: venena, et offa mortifera, et mortis. Nec est mirum, cum maximos ferarum greges linea pennis distincta contineat, et in infidias agat: ab ipso effectu dicta formido. Vanis enim vanae terrori sunt. Curriculi motus, rotarumque versata facies, leones redigit in caveam: elephantes porcina vox terret. Sic itaque ira metuitur, quomodo umbra ab infantibus, a feris rubens pinna. non ipsa in se quidquam habet firimum aut forte, sed vanos animos movet. Nequitia, inquit, de rerum natura tollenda est, si velis iram tollere: neutrum autem potest fieri. Primum, potest aliquis non algere, quamvis ex rerum natura hiems sit: et non aestuare, quamvis menses aestivi sint. aut loci beneficio adversis intemperie anni tutus est, aut patientia corporis sensum utriusque per vincit. Deinde verte istud. necessus est prius virtutem ex animo tollas, quam iracundiam recipias: quoniam cum virtutibus vitia non coëunt. Nec magis quisquam eodem tempore et iratus potest esse, et vir bonus,

quam aeger et sanus. Non potest, inquit, omnis ex animo ira tolli: nec hoc hominis natura patitur. Atque nihil est tam difficile et arduum, quod non humana mens vincat, et in familiaritatem perducat assidua meditatio: nullique sunt tam feri et sui iuris affectus, ut non disciplina perdomentur. Quodcunque sibi imperavit animus, obtinuit. Quidam ne unquam riderent, consecuti sunt: vino quidam, alii Venere, quidam omni humore interdixere corporibus. Alius contentus brevi somno, vigiliam indefatigabilem extendit: didicerunt tenuissimis et adversis funibus currere, et ingentia, vixque humanis toleranda viribus onera portare, et in immensam altitudinem mergi, ac sine ulla respirandi vice perpeti maria.

XII. Mille sunt alia, in quibus pertinacia impedimentum omne transcendit, ostenditque nihil esse difficile, cuius sibi ipsa mens patientiam indiceret. Iitis, quos paulo ante retuli, aut nulla tam pertinacis studii, aut non digna merces fuit. Quid enim magnificum consequitur ille, qui meditatus est per intensos funes ire? qui sarcinae ingenti cervices supponere? qui somno non submittere oculos? qui penetrare in imum mare? et tamen ad finem operis, non magno auctoramento, labor pervenit: Nos non advocabimus patientiam, quos tantum praemium exspectat, felicis animi immota tranquillitas? Quantum est effugere maximum malum iram, et cum illa rabiem, saevitiam, crudelitatem, suorem, et alias comites eius affectus? Non est quod patrocinium nobis quaeramus, et excusatam licentiam, dicentes, aut utile id esse, aut inevitabile. cui enim tandem vitio advoca-

tus defuit? non est quod dicas, excidi non posse. sanabilibus aegrotamus malis: ipsaque nos in reatum genitos natura, si emendari velimus, iuvat. Nec, ut quibusdam dictum est, arduum in virtutes et asperum iter est: plano adeuntur. Non vanae vobis auctor rei venio. facilis est ad beatam vitam via: inito modo bonis auspiciis, ipsisque diis bene iuvantibus. Multo difficilius est, facere ista quae facitis. quid enim quiete otiosius animi? quid ira laboriosius? quid clementia remissius? quid crudelitate negotiosius? Vacat pudicitia, libido occupatissima est. omnium denique virtutum tutela facilior est: vitia magno coluntur. Debet ira removeri? hoc ex parte fatentur etiam, qui dicunt esse minuendam. Tota dimittatur: nihil profutura est. sine illa facilius rectiusque scelera tollentur: mali punientur, et traducentur in melius.

XIV. Omnia, quae debet sapiens, sine ullius malae rei ministerio efficiet: nihilque admiscebit, cuius modum sollicitus observet. Nunquam itaque iracundia admittenda est: aliquando simulanda, si segnes audientium animi concitandi sunt. sicut tarde consurgentes ad cursum equos stimulis, facibusque subditis, excitamus. Aliquando incutiendus est his metus, apud quos ratio non proficit. Iraisci quidem non magis utile est, quam moerere, quam metuere. Quid ergo? non incident causae, quae iram lacestant? Sed tunc maxime illi opponendae manus sunt: nec est difficile, vincere animum: cum athletae quoque in vilissima sui parte occupati, tamen ictus doloresque patiantur, ut vires caedentis exhaustant; nec cum

ira suadet, feriunt, sed cum occasio. Pyrrhum maximum praceptorum certaminis gymnici, solitum aiunt his, quos exercebat, praecipere, ne irascerentur. Ira enim perturbat artem: et qua noceat tantum, non qua caveat, aspicit. Saepe itaque ratio patientiam suadet, ira vindictam: et qui primis defungi malis potuimus, in maiora devolvimur. Quosdam unius verbi contumelia, non aequo animo lata, in exsilio proiecit: et qui levem iniuriam silentio ferre noluerant, gravissimis malis obruti sunt, indignaque aliquid ex plenissima libertate deminui, servile in se attarixerunt iugum.

XV. Ut scias, inquit, iram habere in se generosi aliquid, liberas videbis gentes quae iracundissimae sunt: ut Germanos et Scythes. Quod evenit, quia fortiora solidaque natura ingenia, antequam disciplina mollientur, prona in iram sunt. Quaedam enim non nisi melioribus innascuntur ingeniis. sicut valida arbusta et laeta, quamvis neglecta tellus creat: alia foecundi soli silva est. Itaque et ingenia natura fortia iracundiam ferunt, nihilque tenue et exile capiunt, ignea et fervida: sed imperfectus ille vigor est, ut omnibus quae sine arte, ipsius tantum naturae bono, exsurgunt. sed nisi cito domita sunt, quae fortitudini apta erant, audaciae temeritatique consuescunt. Quid? non mitioribus animis vitia leniora coniuncta sunt? ut misericordia, amor, et verecundia. Itaque tibi saepe bonam indolem malis quoque suis ostendam. sed non ideo vitia non sunt, si naturae melioris indica sunt. Deinde omnes istae feritate liberae gentes, leonum luporumque ritu, ut servire non possunt,

ita nec imperare. Non enim humani vim ingenii, sed feri et intractabilis habent. nemo autem regere potest, nisi qui et regi.

XVI. Fere itaque imperia penes eos fuere populos, qui mitiore coelo utuntur: in frigora Septentrionemque vergentibus immansueta ingenia sunt, ut ait poëta,

— *suoque simillima coelo.*

Animalia, inquit, generosissima habentur, quibus multum inest irae. Errat, qui ea in exemplum hominis adducit, quibus pro ratione est impetus: homini pro impetu, ratio est. Sed nec illis quidem omnibus idem prodest. Iracundia leones adiuvat, pavor cervos, accipitrem impetus, columbam fuga. Quid, quod ne illud quidem verum est, optima animalia esse iracundissima? Feras putem, quibus ex raptu alimenta sunt, meliores, quo iratores: patientiam laudaverim boum, et equorum fraenos sequentium. Quid autem est, cur hominem ad tam infelia exempla revoces, cum habeas mundum, Deumque, quem ex omnibus animalibus, ut solus imitetur, solus intelligit? Simplicissimi, inquit, omnium habentur iracundi. Fraudulentis enim et versutis comparantur: et simplices videntur, quia expositi sunt. quos quidem non simplices dixerim, sed incautos. Stultis, luxuriosis, nepotibusque hoc nomen imponimus, et omnibus vitiis parum callidis.

XVII. Orator, inquit, iratus aliquando melior est. Immo imitatus iratum. nam et histriones iu pronuntiando non irati populum movent, sed iratum bene

agentes. Et apud iudices itaque , et in concione , et
ubicunque alieni animi ad nostrum arbitrium agendi
sunt , modo iram , modo metum , modo misericor-
diam , ut aliis incutiamus , ipsi simulabimus : et saepe
id quod veri affectus non effecissent , effecit imitatio
affectuum. Languidus , inquit , animus est , qui ira
caret. Verum est , si nihil habet ira valentius. Nec la-
tronem oportet esse , nec praedam ; nec misericor-
dem , nec crudelem. Illius nimis mollis animus , huius
nimis durus est. Temperatus sit sapiens : et ad res
fortius agendas non iram , sed vim adhibeat.

XVIII. Quoniam quae de ira quaeruntur , tra-
vimus , accedamus ad remedia eius. Duo autem , ut
opinor , sunt : ne incidamus in iram , et ne in ira
peccemus. Ut in corporum cura , alia de tuenda va-
letudine , alia de restituenda , praecepta sunt : ita ali-
ter iram debemus repellere , aliter compescere , ut
vincamus. Quaedam ad universam vitam pertinentia
praecipientur : ea in educationem , et in sequentia
tempora dividentur. Educatio maximam diligentiam ,
plurimumque profuturam desiderat. facile est enim ,
teneros adhuc animos componere : difficulter reci-
duntur vitia , quae nobiscum creverunt. Opportu-
nissima ad iracundiam fervidi animi natura est . nam
cum elementa sint quatuor , ignis , aqua , aë , et ter-
ra : potestates pares his sunt , frigida , fervida , arida ,
atque humida. Et locorum itaque , et animalium , et
corporum , et morum varietates , mixtura elemento-
rum facit , et proinde in aliquos magis incumbunt
ingenia , prout alicuius elementi maior vis abunda-
vit. Inde quasdam humidas vocamus , aridasque re-

giones, et calidas, et frigidas. Eadem animalium et hominum discrimina sunt.

XIX. Refert quantum quisque humidi in se calidique contineat. cuius in illo elementi portio praevalabit, inde mores erunt. Iracundos fervidi mistura faciet : est enim actuosus et pertinax ignis. Frigidi mistura timidos facit : pigrum est enim contractumque frigus. Volunt itaque quidam ex nostris iram in pectore moveri, effervescente circa cor sanguine. Causa cur hic potissimum assignetur irae locus, non alia est, quam quod in toto corpore calidissimum pectus est. quibus humidi plus inest, eorum paulatim crescit ira : quia non est paratus illis calor, sed motu acquiritur. Itaque puerorum feminarumque irae acres magis, quam graves sunt, levioresque dum incipiunt : siccis aetatibus vehemens robustaque ira est, sed sine incremento, non multum sibi adiiciens : quia inclinatum calorem frigus insequitur. Senes difficiles et queruli sunt, ut aegri et convalescentes, et quorum aut lassitudine, aut detractione sanguinis exhaustus est calor. In eadem causa sunt siti fameque rabidi, et quibus exsangue corpus est, maligneque alitur et deficit. Vinum incendit iram : quia calorem auget pro cuiusque natura.

XX. Quidam ebrii effervescent, quidam siccii. Neque ulla alia causa est, cur iracundissimi sint flavi rubentesque : quibus talis natura color est, qualis fieri ceteris inter iram sclet. mobilis enim illis agitatusque sanguis est. Sed quemadmodum natura quosdam proclives in iram facit : ita multae incident causae, quae idem possint quod natura. Alios morbus aut

iniuria corporum in hoc perduxit, alios labor, et continua pervigilia, noctesque sollicitae, et desideria, amoresque: et quidquid aliud aut corpori nocuit aut animo, aegram mentem in querelas parat. Sed ista omnia initia causaeque sunt, plurimumque potest consuetudo, quae, si gravis est, alit vitium. Naturam quidem mutare, difficile est: nec licet semel mixta nascentium elementa convertere. Sed in hoc nosse profuit, ut calentibus ingenii subtrahas vinum, quod pueris Plato negandum putat, et ignem vetat igne incitari. Nec cibis quidem implendi sunt, distendentur enim corpora, et animi cum corpore tumescunt. Labor illos citra lassitudinem exerceat: ut minuatur, non ut consumatur calor, nimiusque ille fervor despumet. Lusus quoque proderunt. modica enim voluptas laxat animos, et temperat. Humidioribus, siccioribus et frigidis non est ab ira periculum: sed maiora vitia metuenda sunt, pavor, difficultas, et desperatio, et suspiciones.

XXI. Mollienda itaque, fovendaque talia ingenia, et in laetitiam evocanda sunt. Et quia aliis contra iram, aliis contra tristitiam remediis utendum est, nec dissimilibus tantum ista, sed contrariis curanda sunt, semper ei occurremus, quod increverit. Plurimum, inquam, proderit pueros statim salubriter institui. Difficile autem regimen est: quia dare debemus operam, ne aut iram in illis nutriamus, aut indolem retundamus. Diligenti observatione res indiget. Utrumque enim et quod extollendum, et quod deprimendum est, similibus alitur. facile autem etiam attendantem similia decipiunt. Crescit licentia spiri-

tus, servitute comminuitur. assurgit, si laudatur, et in spem sui bonam adducitur : sed eadem ista insolentiam et iracundiam generant. Sic itaque inter utrumque regendus est, ut modo fraenis utamur , modo stimulis : nihil humile , nihil servile patiatur. Nunquam illi necesse sit rogare suppliciter : nec proposit rogasse. potius causae suae , et prioribus factis , et bonis in futurum promissis donetur. In certaminibus aequalium nec vinci illum patiamur, nec irasci. demus operam , ut familiaris sit his , cum quibus contendere solet : ut in certamine affuescat non nocere velle , sed vincere. Quoties superaverit, et dignum aliquid laude fecerit , attolli , non gestire patiamur. gaudium enim exsultatio , exsultationem tumor , et nimia aestimatio sui sequitur. Dabimus aliquod laxamentum : in desidiam vero otiumque non resolvemus , et procul a contactu deliciarum retinebimus. Nihil enim magis facit iracundos, quam educatio mollis et blanda. ideo unicis quo plus indulgetur , pupillisque quo plus licet , corruptior animus est. Non resistet offendis , cui nihil unquam negatum est , cui lacrimas solicita semper mater abstergit, cui de paedagogo satisfactum est. Non vides , ut maiorem quamque fortunam maior ira comitetur ? In divitibus nobilibusque et magistratibus praecipue apparet , cum quidquid leve et inane in animo erat , secunda se aura sustulit. Felicitas iracundiam nutrit , ubi aures superbas assentatorum turba circumstetit. Tibi enim respondeat , Non profastigio te tuo metiris : ipse te proiicis: et alia, quibus vix fanae , et ab initio bene fundatae mentes restiterint. Longe itaque ab assentatione pueritia re-

movenda est. audiat verum , et timeat interim , vereatur semper , maioribus assurgat , nihil per iracundiam exoret. Quod flenti negatum fuerat , quieto offeratur : et divitias parentum in conspectu habeat , non in usu. Exprobrentur illi perperam facta.

XXII. Pertinebit ad rem , praceptores paedagogosque pueris placidos dari. Proximis applicatur omne quod tenerum est , et in eorum similitudinem crescit. nutricum et paedagogorum retulere mox in adolescentiam mores. Apud Platonem educatus puer , cum ad parentes relatus , vociferantem videret patrem , Nunquam , inquit , hoc apud Platonem vidi. Non dubito , quin citius patrem imitatus sit , quam Platonem. Tenuis ante omnia vietus , et non pretiosa vestis : et similis cultus cum aequalibus. Non irascetur aliquem sibi comparari , quem ab initio multis parem feceris. Sed haec ad liberos nostros pertinent. In nobis siquidem fors nascendi et educatio nec vitii locum , nec iam praecepti habet : sequentia ordinanda sunt. Contra primas itaque causas pugnare debemus. causa iracundiae , opinio iniuriae est ; cui non facile credendum est , nec apertis quidem manifestisque statim accedendum. Quaedam enim falsa , veri speciem ferunt. Dandum semper est tempus : veritatem dies aperit. Ne sint aures criminibus faciles. hoc humanae naturae vitium suipetuum , notumque nobis sit , quod quae inviti audimus , libenter credimus : et antequam iudicemus , irascimur.

XXIII. Quid , quod non criminibus tantum , sed suspicionibus impellimur , et ex vultu risuque alieno peiora interpretati , innocentibus irascimur ?

Itaque agenda est contra se causa absentis, et in suspenso ira retinenda. Potest enim poena dilata exigi, non potest exacta revocari. Notus est ille tyrannicida, qui imperfecto opere comprehensus, et ab Hippia tortus, ut consciens indicaret, circumstantes amicos tyranni nominavit, quibus quam maxime caram salutem eius sciebat. Et cum ille singulos, ut nominati erant, occidi iussisset, interrogavit, Ecquis superefset? Tu, inquit, solus: neminem enim alium, cui carus es, reliqui. Effecit ira, ut tyrannus tyrannicidae manus commodaret, et praefidia sua gladio suo caederet. Quanto animosius Alexander? qui cum legisset epistolam matris, qua admonebatur, ut a veneno Philippi medici caveret, acceptam potionem non deterritus biberat. Plus sibi de amico suo credidit. dignus fuit qui innocentem haberet, dignus qui faceret. Hoc eo magis in Alexandro laudo, quia nemo tam obnoxius irae fuit. quo rarer autem moderatio in regibus, hoc laudanda magis est. Fecit hoc et C. Caesar, ille qui victoria civili clementissime usus est. cum scrinia deprehendisset epistolarum ad Pompeium missarum ab iis, qui videbantur aut in diversis, aut in neutris suis partibus, combussit: quamvis moderate soleret irasci, maluit tamen non posse. Gratissimum putavit genus veniae, nescire quid quisque peccasset. Plurimum mali credulitas facit. saepe ne audiendum quidem est, quoniam in quibusdam rebus satius est decipi, quam diffidere.

XXIV. Tollenda ex animo suspicio et conjectura, fallacissima irritamenta. Ille me parum humane salutavit, ille osculo meo non adhaesit, ille inchoa-

tum sermonem cito abrupit, ille ad coenam non vocavit, illius vultus aversior visus est. Non deerit suspicionei argumentatio: simplicitate opus est, et benigna rerum aestimatione. Nihil nisi quod in oculos incurret, manifestumque erit, credamus: et quoties suspicio nostra vana apparuerit, obiurgemus credulitatem. Haec enim castigatio confuetudinem efficiet non facile credendi.

XXV. Inde et illud sequitur, ut minimis sordidis que rebus non exacerbemur. Parum agilis est puer, aut tepidior aqua potui, aut turbatus torus, aut mensa negligentius posita. Ad ista concitari, insania est. aeger et infelicitus yaletudinis est, quem levis aura contraxit: affecti oculi, quos candida vestis obturbat: dissolutus deliciis, cuius latus alieno labore condoluit. Mindyridem aiunt fuisse ex Sybaritarum civitate: qui cum vidisset fodientem, et altius rastrum allevantem, lassum se fieri questus, vetuit illum opus in conspectu suo facere. idem saepius questus est, quod foliis rosae duplicatis incubuisset. Ubi animum simul et corpus voluptates corrupere, nihil tolerabile videtur: non quia dura, sed quia molles patimur. Quid enim est cur tussis alicuius, aut sternutamentum, aut musca parum curiose fugata, nos in rabiem agat, aut obversatus canis, aut clavis negligentis servi manibus elapsa? Feret iste aequo animo civile convicium, et ingesta in concione curiave maledicta, cuius aures tracti subsellii stridor offendit? Perpetietur hic famem, et aestivae expeditionis simus, qui puero male diluenti nivem, irascitur?

XXVI. Nulla itaque res magis iracundiam alit,

quam luxuria intemperans et impatiens. Dure tractandus animus est, ut ictum non sentiat, nisi gravem. Irascimur aut his, a quibus nec accipere iniuriam potuimus, aut his a quibus accipere potuimus. Ex prioribus quaedam sine sensu sunt: ut librum, quem minutioribus literis scriptum saepe proiecimus, et mendosum laceravimus: ut vestimenta, quae, quia displicebant, scidimus. His irasci quam stultum est: quae iram nostram nec meruerunt, nec sentiunt? Sed nos offendunt videlicet, qui illa fecerunt. Primum, saepe antequam hoc apud nos distinguamus, irascimur: deinde fortasse ipsi quoque artifices excusationes iustas afferent. Alius non potuit melius facere, quam fecit: nec ad tuam contumeliam parum didicit. alius non in hoc, ut te offenderet, fecit. Ad ultimum, quid est dementius, quam bilem in homines collectam, in res effundere? Atqui ut his irasci dementis est, quae anima carent, sic mutis animalibus; quia nulla est iniuria, nisi a consilio profecta. Nocere itaque nobis possunt, ut ferrum, aut lapis; iniuriam quidem facere non possunt. Atqui contemni se quidam putant, ubi equi iidem obsequentes alteri equiti, alteri contumaces sunt: tanquam iudicio, non consuetudine, et arte tractandi, quaedam quibusdam subiectiora sint.

XXVII. Atqui ut his irasci stultum est, ita pueris, et non multum a puerorum prudentia distantibus. Omnia enim ista peccata, apud aequum iudicem, pro innocentia habent imprudentiam. Quaedam sunt, quae nocere non possunt, nullamque vim nisi beneficam et salutarem habent: ut dili immortales, qui

nec volunt obesse , nec possunt. Natura enim illis
mitis et placida est , tam longe remota ab aliena iniuria , quam a sua. Dementes itaque et ignari veritatis , illis imputant saevitiam maris , immodosim im-
bres , pertinaciam hiemis : cum interim nihil horum ,
quae nobis nocent profundve , ad nos proprie dirigatur. Non enim nos causa mundo sumus , hiemem
aestatemque referendi. suas ista leges habent , quibus
divina exercentur. Nimis nos suspicimus , si digni
nobis videmur , propter quos tanta moveantur. Nihil
ergo horum in nostram iniuriam fit : immo contra ,
nihil non ad salutem. Quaedam esse diximus , quae
nocere non possunt : quaedam , quae nolunt. In his
erunt boni magistratus , parentesque , et praeceptores ; et iudices : quorum castigatio sic accipienda est ,
quomodo scalpellum , et abstinentia , et alia quae
profutura torquent. Affecti sumus poena ? succurrat ,
non tantum quid patiamur , sed quid fecerimus : in
consilium de vita nostra mittamur. Si verum ipsi dicere nobis voluerimus , pluris litem nostram aestimabimus. Si volumus aequi omnium rerum iudices esse ,
hoc primum nobis suadeamus , neminem nostrum
esse sine culpa. Hinc enim maxima indignatio oritur.
Nihil peccavi , nihil feci : immo nihil fateris. Indignamur aliqua admonitione aut coercitione nos castigatos : cum illo ipso tempore peccemus , quo adiicimus malefactis arrogantiam et contumaciam. Quis est iste , qui se profitetur omnibus legibus innocentem ? Ut hoc ita sit , quam angusta innocentia est , ad legem
bonum esse ? quanto latius officiorum patet , quam
uris regula ? quam multa pietas , humanitas , libera-

litas , iustitia , fides exigunt : quae omnia extra publicas tabulas sunt ?

XXVIII. Sed ne ad illam quidem arctissimam innocentiae formulam praestare nos possumus. Alia fecimus , alia cogitavimus : alia optavimus , aliis favimus : in quibusdam innocentes sumus , quia non successit. Hoc cogitantes , aequiores sumus delinquentibus , cedamus obiurgantibus : utique nobis ne irascamur , (cui enim non , si nobis quoque ?) minime diis. Non enim illorum , sed lege mortalitatis patimur , quidquid incommodi accedit. At morbi doloresque incurunt. Utique aliqua fugiendum est , domicilium pufre sortitis. Dicetur aliquis male de te locutus . cogita an prior feceris , cogita de quam multis loquaris. Cogitemus , inquam , alios non facere iniuriam , sed reponere : alios pronos facere , alios coactos facere , alios ignorantes : etiam eos qui volentes scientesque faciunt , ex iniuria nostra non ipsam iniuriam petere. Aut dulcedine urbanitatis prolapsus est , aut fecit aliquid , non ut nobis obesset , sed quia consequi ipse non poterat , nisi nos repulisset. Saepe adulatio , dum blanditur , offendit. Quisquis ad se retulerit , quotiens ipse in suspicionem falsam inciderit , quam multis officiis suis fortuna speciem iniuriae induerit , quam multos post odium amare cooperit , poterit non statim irasci : utique si sibi tacitus ad singula quibus offenditur , dixerit : Haec et ipse commisi. Sed ubi tam aequum iudicem invenies ? Is qui nullius non uxorem concupiscit , et satis iustum causam putat amandi , quod aliena est , idem uxorem suam aspici non vult : et fidei acerrimus exactor , est perfe-

dus : et mendacia persequitur , ipse periurus : et litem sibi inferri aegerrime calumniator patitur. Pudicitiam servulorum suorum attentari non vult , qui non percit suae. Alienæ vitia in oculis habemus : a tergo nostra sunt. Inde est , quod tempestiva filii convivia pater deterior filio castigat. Nihil alienæ luxuriae ignoscit , qui nihil suae negavit : et homicidae tyran-nus irascitur : et punit furta sacrilegus. Magna pars hominum est , quae non peccatis irascitur , sed peccantibus. Faciet nos moderatores respectus nostri , si consuluerimus nos : Numquid et ipsi aliquid tale commisimus ? Numquid sic erravimus ? Expedite nobis ista damnari ? Maximum remedium est irae , mora. Nec ab illa pete initio , ut ignoscat , sed ut iudicet. definet , si exspectat : nec universam illam tentaveris tollere , graves habet impetus primos. tota vincetur , dum partibus carpitur.

XXIX. Ex his quae nos offendunt , alia renuntiantur nobis , alia ipsi audimus aut videmus. His quae narrata sunt , non debemus cito credere. Multi ementiuntur , ut decipient : multi , quia decepti sunt. Alius criminacione gratiam captat , et fingit iniuriam , ut videatur doluisse factam. Est aliquis malignus , et qui amicitias cohaerentes diducere velit : est suspicax , et qui spectare ludos cupiat , ut ex longinquo tutoque speculetur , quos collisit. De parvula summa iudicaturo , tibi res sine teste non probaretur ; testis , sine iure iurando non valeret : utrique parti dares advectionem , dares tempus , nec semel audires . magis enim veritas elucet , quo saepius ad manum venit. Amicum condemnas de praefentibus , antequam

audias , antequam interroges? illi , antequam aut accusatorem suum nosse liceat , aut crimen , irasceris? Iam verum , iam quid utrinque diceretur , audisti. Hic ipse qui ad te detulit , desinet dicere , si probare debuerit. Non est , inquit , quod me protrahas. ego productus negabo. Alioqui nihil unquam tibi dicam. Eodem tempore et infligat , et ipse se certamini et pugnae subtrahit. Qui dicere tibi nisi clam non vult , paene non dicit. Quid est iniquius , quam secreto credere , palam irasci ?

XXX. Quorundam ipsi testes sumus. In his natu-
ram excutiemus , voluntatemque facientium. Puer est?
aetati douetur : nescit , an peccet. Pater est? aut tan-
tum profuit , ut illi etiam iniuriae ius sit : aut fortassis
ipsum hoc meritum eius est , quo offendimur. Mu-
lier est? errat. Iussus est? necessitati quis , nisi ini-
quus , succenset? Laesus est? non est iniuria , pati
quod prior feceris. Iudex est? plus illius credas sen-
tentiae , quam tuae. Rex est? si nocentem punit ,
cede iustitiae : si innocentem , cede fortunae. Mutum
animal est , aut simile muto? imitaris illud , si irasce-
ris. Morbus est , aut calamitas? levius transfiliet susti-
nentem. Deus est? tam perdis operam cum illi ira-
sceris , quam cum illum alteri precaris iratum. Bonus
vir est , qui iniuriam fecit? noli credere. Malus? noli
mirari. dabit poenas alteri , quas debet tibi : et iam
sibi dedit , qui peccavit. Duo sunt , ut dixi , quae ira-
cuendam concitant. primum , si iniuriam videmur
accepisse : de hoc satis dictum est. deinde , si inique
accepisse : de hoc dicendum est. Iniqua quaedam iu-
dicant homines , quia pati non debuerint : quaedam ,

quia non speraverint. Indigna putamus, quae inopinata sunt. Itaque maxime commovent, quae contra spem exspectationemque evenerunt. Nec aliud est quare in domesticis minima offendant: in amicis, iniuriam vocemus negligentiam.

XXXI. Quomodo ergo, inquit, inimicorum nos iniuriae movent? quia non exspectavimus illas, aut certe non tantas. Hoc efficit amor nostri nimius: inviolatos nos etiam inimicis iudicamus esse debere. Regis quisque intra se animum habet, ut licentiam sibi dari velit, in se nolit. Aut ignorantia nos itaque rerum, aut insolentia iracundos facit. Ignorantia. quid enim mirum est, malos mala facinora edere? Quid novi est, si inimicus nocet, amicus offendit, filius labitur, servus peccat? Turpissimam aiebat Fabius imperatori excusationem esse, Non putavi: ego turpissimam homini puto. Omnia puta, exspecta. etiam in bonis moribus aliquid existet asperius. Fert humana natura insidiosos amicos, fert ingratos, fert cupidos, fert impios. Cum de moribus unius iudicabis, de publicis cogita. ubi maxime gaudebis, maxime metues. ubi tranquilla tibi omnia videntur, ibi nocitura non desunt, sed quiescunt. semper futurum aliquid, quod te offendat, existima. Gubernator nunquam ita totos sinus explicit securus, ut non expedita ad contrahendum armamenta disponeret. Illud ante omnia cogita, foedam esse et execrabilem vim nocendi, et alienissimam homini, cuius beneficio etiam faeva mansuescunt. Aspice elephantorum iugo colla submissa, taurorum pueris pariter ac feminis persultantibus terga impune calcata, et repentes inter

pocula sinusque innoxio lapsu dracones, et intra domum ursorum leonumque ora placida tractantibus, adulantesque dominum feras: pudebit cum animalibus permutasse mores. Nefas est nocere patriae: ergo civi quoque. nam hic pars patriae est. Sanctae partes sunt, si universum venerabile est. Ergo et homini. nam hic in maiore tibi urbe civis est. Quid si nocere velint manus pedibus? manibus oculi? Ut omnia inter se membra consentiunt, quia singula servari, totius interest; ita homines singulis parcent, quia ad coetum geniti sumus. salva autem esse societas nisi amore et custodia partium non potest. Ne viperas quidem et natrices, et si qua mortu aut iuctu nocent, effligeremus, si ut reliqua mansuefacere possemus, aut efficere, ne nobis aliisve periculo essent. Ergo ne homini quidem nocebimus, quia peccavit, sed ne peccet: nec unquam ad praeteritum, sed ad futurum poena referetur. non enim irascitur, sed cavet. Nam si puniendus est, cuicunque pravum maleficumque ingenium est, poena neminem excipiet.

XXXII. At enim ira habet aliquam voluptatem: et dulce est, dolorem reddere. Minime. non enim ut in beneficiis honestum est, merita meritis repensare: ita iniurias iniuriis. illic, vinci turpe est: hic, vincere. Inhumanum verbum est, ut quidem pro iusto receptum, Ultio: et a contumelia non differt nisi ordine. Qui dolorem regerit, tantum excusatius peccat. M. Catonem in balneo quidam percussit imprudens. quis enim illi sciens faceret iniuriam? postea satisfaciens Cato, Non memini, inquit, percussum me. Melius putavit, non agnoscere, quam vindicare.

Nihil, inquis, post tantam petulantiam mali factum est? Immo multum boni. coepit Catonem nosse. Magni animi est, iniurias despicere. ultionis contumeliosissimum genus est, non esse visum dignum, ex quo peteretur ultiō. Multi leves iniurias altius sibi demisere, dum vindicant: ille magnus et nobilis est, qui, more magnae feræ, latratus minutorum canum securus exaudit. Minus, inquit, contemnemur, si vindicaverimus iniuriam. Si tanquam ad remedium venimus, sine ira veniamus: non quasi dulce sit vindicari, sed quasi utile. Saepe autem satius fuit dissimulare, quam ulcisci.

XXXIII. Potentiorum iniuriae hilari vultu, non patienter tantum ferendæ sunt. Facient iterum, si se fecisse crediderint. Hoc habent pessimum animi magna fortuna insolentes, quos laeserunt, et oderunt. Notissima vox est eius, qui in cultu regum consenuerat. Cum illum quidam interrogaret, Quomodo rarissimam rem in aula consecutus esset, senectutem? Iniurias, inquit, accipiendo, et gratias agendo. Saepe adeo iniuria.m· vindicari non expedit, ut ne fateri quidem expediāt. C. Caesar Pastoris splendidi equitis Romani filium cum in custodia habuisset, munditiis eius et cultioribus capillis offensus, rogante patre, ut salutem sibi filii concederet, quasi de supplicio eius admonitus, duci protinus iussit. Ne tamen omnia inhumane faceret adversum patrem, ad coenam illum invitavit eo die. venit Pastor, nihil vultu exprobraente. Propinavit illi Caesar heminam: et posuit illi custodem. perduravit miser, non aliter quam si filii sanguinem biberet. Unguentum et coronas misit, et

observare iussit an sumeret. sumfisit. Eo die , quo filium extulerat , immo quo non extulerat , iacebat conviva centesimus , et potionis vix honestas natalibus liberorum , podagricus senex hauriebat : cum interim non lacrimas emisit , non dolorem aliquo signo erumpere passus est. Coenavit , tanquam pro filio exorasset. Quaeris , quare ? habebat akerum. Quid ille Priamus ? non dissimulavit iram , et regis genua complexus est ? funestam perfusamque cruento filii manum ad os suum retulit , et coenavit ? sed tam en sine unguento , sine coronis : et illum hostis saevissimus multis solatiis , ut cibum caperet , hortatus est , non ut pocula ingentia , super caput posito custode , siccaret. Contemisset Romanus pater , si sibi timuisset : nunc iram compescuit pietas. Dignus fuit , cui permitteret a convivio ad ossa filii legenda discedere. Ne hoc quidem permisit : benignus interim et comis adolescens propinicationibus senem crebris , ut cura leniretur , admonens lacestebat : contra ille se laetum , et oblitum quid eo esset aetum die , praefixit. Perierat alter filius , si carnifci conviva non placuisset.

XXXIV. Ergo ira abstinentum est , sive par est qui laceſſendus est , sive superior , sive inferior. Cum pare contendere , anceps est : cum superiore , furiosum : cum inferiore , folidum. Pusilli hominis et miseri est , repetere mordentem. mures et formicae , qua manum admoveris , ora convertunt : imbecillia se laedi putant , si tanguntur. Faciet nos mitiores , si cogitaverimus , quid aliquando nobis profuerit ille , qui irascimur , et meritis offensa redimetur. Illud

quoque occurrat , quantum commendationis nobis allatura sit clementiae fama , et quam multos venia amicos utiles fecerit. Ne irascamur inimicorum et hostium liberis. Inter Syllanae crudelitatis exempla est , quod a republica liberos proscriptorum subinovit. Nihil est iniquius , quam aliquem heredem paterni odii fieri. Cogitemus , quoties ad ignoscendum difficiles erimus , an expeditat omnes nobis inexorabiles esse. Quam saepe veniam qui negavit , petit ? quam saepe pedibus eius advolutus est , quem a suis reputat ? Quid est glorioius , quam iram amicitia mutare ? Quos Populus Romanus fideliores habet socios , quam quos habuit pertinacissimos hostes ? Quod hodie esset imperium , nisi salubris providentia victos permis- cuisset victoribus ? Irascetur aliquis ? tu contra beneficiis provoca. Cadit statim similitas , ab altera parte deserta , nisi pariter , non pugnant. Si utrinque concurritur , ille est melior , qui prior pedem retulit : victus est qui vicit. Percussit te ? recede. referiendo enim , et occasionem saepius feriendi dabis , et excusationem . non poteris revelli , cum voles. Numquid velit quisquam tam graviter hostem ferire , ut relinquit manum in vulnera , et se ab ictu revocare non possit ? atqui tale ira telum est ; vix retrahitur.

XXXV. Arma nobis expedita prospicimus , gladium commodum et habilem : non vitabimus impetus animi , his graves magis , furiosos et irrevocabiles ? Ea demum velocitas placet , quae ubi iussa est , vestigium sifit , nec ultra destinata procurrit ; et quae flecti , et a cursu ad gradum reduci potest. Aegros scimus nervos esse , ubi invitis nobis inveniuntur.

Senex , aut infirmi corporis est , qui cum ambulare vult , currit. Animi motus eos putemus sanissimos validissimosque , qui nostro arbitrio ibunt , non suo ferentur. Nihil tamen aequa profuerit , quam primum intueri deformitatem rei , deinde periculum. Non est ullius affectus facies turbatior. pulcherrima ora foedavit , torvos vultus ex tranquillissimis reddidit. Linguit decor omnis iratos : et sive amictus illius compositus est ad legem , trahent vestem ; omnemque curam sui effundent ; si capillorum natura vel arte iacentium non informis est habitus , cum animo inhorrescunt : tumescunt venae , concutitur crebro spiritu pectus , rabida vocis eruptio colla distendit. tunc artus trepidi , inquietae manus , totius corporis fluctuatio. Qualem intus putas esse animum , cuius extra imago tam foeda est ? quanto illi intra pectus terribilior vultus , acrior spiritus est , intensior impetus , rupturus se nisi eruperit ? Quales sunt hostium , vel ferarum caede madentium , aut ad caedem euntium aspectus ; qualia poëtae inferna monstra finxere , succincta serpentibus , et igneo flatu ; quales ad bella excitanda , discordiamque in populos dividendam , pacemque lacerandam , tetriciae inferum exeunt Furiae : talem nobis iram figuremus , flamma lumina ardentia , sibilo mugituque et gemitu et stridore , et si qua his invisiō vox est , perstrepentem , tela manu utraque quatientem . neque enim illi , tegere se , cura est : torvam , cruentamque , et cicatricosam , et verberibus suis lividam , incessibus vesanis , offusam multa caligine , incursitantem , vastantem , fugantemque : et omnium odio laborantem , sui maxime :

si aliter nocere non possit, terras, maria, coelum
ruere cupientem, infestam pariter, invisamque. Vel,
si videtur, sit qualis apud vates nostros est,

*Sanguineum quaiens dextra Bellona flagellum,
Aut scissa gaudens vadit Discordia palla.*

aut si qua magis dira facies excogitari diri affectus
potest.

XXXVI. Quibusdam, ut ait Sextius, iratis pro-
fuit aspexisse speculum. perturbavit illos tanta mu-
tatio sui: velut in rem praesentem adducti non agno-
verunt se, et quantulum ex vera deformitate imago
illa speculo repercussa reddebat? animus si ostendi-
et si in ulla materia perlucere posset, intuentes nos
confunderet, ater maculosusque, aestuans, et distor-
tus, et tumidus. Nunc quoque tanta deformitas eius
est per ossa carnesque, et tot impedimenta, effluen-
tis: quid si nudus ostenderetur? Speculo equidem
neminem deterritum ab ira credo. quid ergo? qui
ad speculum venerat, ut se mutaret, iam mutaverat.
Iratis quidem nulla est formosior effigies, quam atrox
et horrida, qualesque esse, etiam videri volunt. Ma-
gis illud videndum est, quam multis ira per se no-
cuerit. Alii nimio fervore rupere venas, et sanguinem
supra vires elatus clamor egestus, et luminum
suffudit aciem in oculos vehementius humor egestus,
et in morbos aegri recidere. nulla celerior ad insa-
niam via est. Multi itaque continuaverunt irae furo-
rem; nec quam expulerant mentem, unquam rece-
perunt. Aiacem in mortem egit furor, in furem
ira. Mortem liberis, egestatem sibi, ruinam domui

imprecantur: et irasci sé negant, non minus quam insanire, furiosi. Amicissimis hostes, vitandique carissimis: legum, nisi qua nocent, immemores, ad minima mobiles. non sermone, non officio, aditu faciles. Omnia per vim gerunt, gladiis et pugnare parati, et incumbere. Maximum enim malum illos cepit, et omnia exsuperans vitia. Alia paulatim intrant: repentina et universa vis huius est: omnes denique alios affectus sibi subiicit: amorem ardentissimum vincit. Transfoderunt itaque amata corpora, et in eorum quos occiderant, iacuere complexibus. Avaritiam durissimum malum, minimumque flexible ira calcavit; adacta opes suas spargere, et domui, rebusque in unum collatis iniicere ignem. Quid? non ambitiosus magno aestimata proiecit insignia, honoremque delatum repulit? nullus affectus est, in quem non ira dominetur.

L. ANNAEI SENECAE
 DE IRA
 AD NOVATUM
 LIBER III.

Argumentum & Ordo.

Exsequitur alteram partem Remedii, priore medio libro positam, sed dilatam, Ne ira peccemus: id est, refraenemus eam & cohibeamus. Id varie fit: sed semper statimque faciendum in Affectu praecepiti & incitato. Quem Aristoteles excusat: sed ipse eum accusat, & foeditatem iterum irae ostendit. Haec ad Cap. usque IV. Tum partitur, tria se dicturum, primum, Quemadmodum non irascamur; deinde, Quemadmodum ab ira liberemur; tertio, Quemadmodum alium irascentem sistamus placemusque. Haec, et si alibi cum repetitione priorum, tamen pulcherrime & utilissime ad finem libri exsequitur: & aureæ five aetherea habebis monita & dicta.

I. **Q**UOD maxime desiderasti, Novate, nunc facere tentabimus, iram excidere animis, aut certe refraenare, et impetus eius inhibere. Id aliquando palam aperteque faciendum est, ubi minor vis mali patitur: aliquando ex occulto; ubi nimium ardet, omniq[ue] impedimento exasperatur et crescit. Refert, quantas vires, quamque integras habeat: utrumne verberanda et agenda retro sit, an cedere ei debeamus, dum tempestas prima desaevit, ne remedia ipsa secum ferat: consilium pro moribus cuiusque

capiendum erit. Quosdam enim preces vincunt : quidam insultant, instantque submissis. Quosdam terrendo placabimus : alios obiurgatio, alios confessio, alios pudor coepto deiecit : alios mora, lentum praeципitis mali remedium, ad quod novissime descendendum est. Ceteri enim affectus dilationem recipiunt, et curari tardius possunt : huius incitata, et se ipsam rapiens violentia, non paulatim procedit, sed dum incipit, tota est. Nec aliorum more vitiorum sollicitat animos, sed abducit : et impotentes sui, cupidosque vel communis mali, exagitat : nec in eantum, in quae destinavit, sed in occurrentia obiter furit. Cetera vitia impellunt animos : ira praecipitat. Ceteris etiamsi resistere contra affectus suos non licet, at certe affectibus ipsis licet stare : haec non secus quam fulmina procellaeque, et si qua alia irrevocabilia sunt, quia non eunt, sed cadunt, vim suam magis ac magis tendit. Alia vitia a ratione, haec a sanitate desciscit. alia accessus lenes habent, et incrementa fallentia : in iram deiectus animorum est. Nulla itaque res urget magis attonita, et in vires suas prona; et sive successit, superba ; sive frustratur, insana : ne repulsa quidem in taedium acta, ubi adversarium fortuna subduxit, in se ipsam morsus suos vertit : nec refert, quantum sit ex quo surrexerit. Ex levissimis enim in maxima evadit.

II. Nullam transit aetatem : nullum hominum genus excipit. Quaedam gentes beneficio egestatis non novere luxuriam. quaedam, quia exercitae et vagae sunt, effugere pigritiam. quibus incolitas mos, agrestis vita est, circumscriptio ignota est, et fraus, et

quocunque in foro malum nascitur. Nulla gens est, quam non ira instiget, tam inter Graios quam barbaros potens: non minus perniciosa leges metuentibus, quam quibus iura distinguit modus virium. Denique cetera singulos corripiunt: hic unus affectus est, qui interdum publice concipitur. Nunquam universus populus feminae amore flagravit: nec in pecuniam aut lucrum tota civitas spem suam misit. Ambitio viritim singulos occupat. Impotentia non est malum publicum: saepe in iram uno agmine itum est. viri, feminae, senes, pueri, principes, vulgusque consensere: et tota multitudo paucissimis verbis concitata, ipsum concitatem antecessit. Ad arma protinus ignesque discursum est, et indicta finitimiis bella, aut gesta cum civibus. Totae cum stirpe omni crematae domus: et modo eloquio favorabilis habitus, in multo honore, iram suae concionis exceptit: in imperatorem suum legiones pila torserunt. Dissegit plebs tota cum patribus: publicum consilium, senatus, non exspectatis dilectibus, nec nominato imperatore, subitos irae suae duces legit: ac perfecta urbis nobiles consecutatus viros, supplicium manu sumvit. Violavit legationes rupto iure gentium, rabiesque infanda civitatem tulit: nec datum tempus, quo resideret tumor publicus: sed deductae protinus classes, et oneratae tumultuario milite. Sine more, sine auspiciis, populus ductu irae suae egressus, fortuita raptaque pro armis gessit: deinde magna clade temeritatem audacis irae luit.

III. Hic barbaris forte ruentibus in bella exitus est. cum mobiles animos species iniuriae perculit,

aguntur statim : et qua dolor traxit , ruinae modo re-gionibus incident incompesiti , interrifi , incauti , pericula appetentes sua : gaudent feriri , et instare ferro , et tela corpore urgere , et per suum vulnus exire. Non est , inquis , dubium , quin magna ista et pestifera sit vis : ideo quemadmodum sanari debeat , monstra. Atqui ; ut in prioribus libris dixi , stat Aristoteles defensor irae , et vetat illam nobis exsecari. Cal-car ait esse virtutis : hac erepta , inermem animum et ad conatus magnos pigrum , inertemque fieri. Nec-cessarium est itaque foeditatem eius ac feritatem co-arguere , et ante oculos ponere , quantum monstri sit , homo in hominem furens ; quantoque impetu ruat , non sine pernicie sua perniciosus , et ea deprimens , quae mergi nisi cum mergente non possunt. Quid ergo ? sanum hunc aliquis vocat , qui velut tem-pe-state correptus , non it , sed agitur , et furenti malo servit ? nec mandat ultionem suam , sed ipse eius ex-actor , animo simul ac manu saevit , carissimorum , eorumque quae mox amissa sleturus est , carnifex ? Hunc aliquis affectum virtuti adiutorem comitem-que dat , consilia , sine quibus virtus gerit nihil , ob-turbantem ? Caducae sinistraeque sunt vires , et in malum suum validae , in quas aegrum morbus et accessio erexit. Non est ergo , quod me putas tempus in supervacuis consumere , quod iram , quasi dubiae apud homines opinionis sit , infamem : cum aliquis sit , et quidem de illustribus philosophis , qui illi indi-cat operas , et tanquam utilem ac spiritus submini-strantem in proelia , in actus rerum , ad omne quod-cunque calore aliquo gerendum est , vocet. Ne quem

fallat , tanquam aliquo tempore , aliquo loco profutura , ostendenda est rabies eius effraenata et attonita : apparatusque illi reddendus est suus , eculei , et fidiculae , et ergastula , et cruces , et circumdati defossis corporibus ignes , et cadavera quoque trahens uncus , varia vinculum gener , varia poenarum , lacerationes membrorum , inscriptions frontis , et bestiarum immanium caveae . Inter haec instrumenta collocetur ira , dirum quiddam atque horridum stridens , omnibus per quae furit taetior .

IV. Ut de ceteris dubium sit , nulli certe affectui peior est vultus , quem in prioribus libris descripsimus , asperum et acrem , et nunc subito retrorsum sanguine fugato , pallentem , nunc in os omni calore ac spiritu verso , subrubicundum , et similem cruento , venis tumentibus , oculis nunc trepidis et exslientibus , nunc in uno obtutu defixis et haerentibus . Adiice dentium inter se arietatorum , et aliquem esse cupientium , non alium sonum , quam est apris , tela sua attritu acuentibus . Adiice articulorum crepitum , cum se ipsae manus frangunt , et pulsatum saepius pectus , anhelitus crebros , tractosque altius gemitus , instabile corpus , incerta verba subitis exclamacionibus , trementia labra , interdumque compressa , et dirum quiddam exsibilantia . Ferarum , mehercules , sive illas fames exagitat , sive infixum visceribus ferrum , minus taetra facies est , etiam cum venatorem suum semianimes morsi ultimo petunt , quam hominis ira flagrantis . Age , si exaudire voces ac minas vacet , qualia excarnificati animi verba sunt ? nonne revocare se quisque ab ira volet , cum intellexerit illam a

suo primum malo incipere? Non vis ergo admoneam eos qui iram in summa potentia exercent, et argumentum virium existimant, et in magnis magna fortunae bonis ponunt paratam ultionem, quam non sit potens, immo nec liber quidem dici possit, irae suae captus? Non vis admoneam, quo diligentior quisque sit, et ipse se circumspiciat: alia animi mala ad pessimos quosque pertinere, iracundiam etiam eruditis hominibus, et in alia sanis, irreperere? adeo ut quidam simplicitatis indicium iracundiam dicant, et vulgo credatur facillimus quisque huic obnoxius.

V. Quorsus, inquis, hoc pertinet? Ut nemo se iudicet tutum ab illa: cum lentos quoque natura, et placidos, in saevitiam ac violentiam evocet. Quemadmodum adversus pestilentiam nihil prodest firmitas corporis, et diligens valetudinis cura: promiscue enim imbecilla robustaque invadit: ita ab ira tam inquietis moribus periculum est, quam compositis et remissis; quibus eo turpior ac periculosior est, quo plus in illis mutat. Sed cum primum sit, non irasci; secundum, retinere; tertium, alienae irae mederi: dicam primum, quemadmodum in iram non incidamus; deinde, quemadmodum nos ab illa liberemus; novissime, quemadmodum irascentem retineamus placemusque, et ad sanitatem reducamus. Ne irascamur praestabimus, si omnia vitia irae nobis subinde proposuerimus, et illam bene aestimaverimus. Accusanda est apud nos, damnanda: perscrutanda eius mala, et in medium protrahenda sunt: ut qualis sit apparent, comparanda cum pessimis est. Avaritia acquirit et contrahit, quo aliquis melior

utatur : ira impendit : paucis gratuita est. Iracundus dominus quosdam in fugam servos egit , quosdam in mortem : quanto plus irascendo , quam id erat propter quod irascebatur , amisit ? Ira patri luctum , marito divortium attulit , magistratui odium , candidato repulsam. Peior est etiam , quam luxuria : quoniam illa sua voluptate fruitur , haec alieno dolore. Vincit malignitatem et invidiam. illae enim infelicem fieri volunt , haec facere. illae fortuitis malis delectantur : haec non potest exspectare fortunam : nocere ei quem odit , non noceri vult. Nihil est simultibus gravius : has ira conciliat . nihil est bello funestius : in hoc potentium ira prorumpit. ceterum etiam illa plebeia ira et privata , inerme , et sine viribus bellum est. Praeterea ira , ut seponamus quae mox fecitura sunt damna , insidias , perpetuam ex certaminibus mutuis sollicitudinem , dat poenas dum exigit : naturam hominis eiurat. Illa in amorem hortatur , haec in odium : illa prodesse iubet , haec nocere. Adiice , quod cum indignatio eius a nimio sui suspectu veniat , et animosa videatur , pusilla est et angusta. nemo enim non eo , a quo se contemtum iudicat , minor est. At ille ingens animus , et verus aestimator sui , non vindicat iniuriam , quia non sentit. Ut tela a duro resiliunt , et cum dolore caendentis solida feriuntur : ita nulla magnum animum iniuria ad sensum sui adducit , fragilior eo quod petit. Quanto pulchrius est , velut nulli penetrabilem telo , omnes iniurias contumeliasque respuere ? Ultio , doloris confessio est. non est magnus animus , quem incurvat iniuria. Aut potentior te , aut imbecillior

laesit. si imbecillior, parce illi : si potentior, tibi.

VI. Nullum est argumentum magnitudinis certius quam nihil posse, quo instigeris, accidere. Pars superior mundi et ordinatior, ac propinqua sideribus, nec in nubem cogitur, nec in tempestatem impellitur, nec versatur in turbinem : omni tumultu caret. inferiora fulminant. Eodem modo sublimis animus, quietus semper, et in statione tranquilla collocatus, intra se premens, quibus ira contrahitur, modestus et venerabilis est et dispositus : quorum nihil invenies in irato. Quis enim traditus dolori et furens, non primam reiecit verecundiam ? quis impetu turbidus, et in aliquem ruens, non quidquid in se verecundi habuit, abiecit ? cui officiorum numerus aut ordo constitit incitato ? quis linguae temperavit ? quis ullam partem corporis tenuit ? quis se regere potuit immisum ? Proderit nobis illud Democriti salutare praeceptum, quo monstratur tranquillitas, si neque privatim, neque publice multa, aut maiora viribus nostris egerimus. Nunquam tam feliciter in multa discurrenti negotia dies transit, ut non aut ex homine, aut ex re offensa nascatur, quae animum in iras paret. Quemadmodum per frequentia urbis loca prooperanti in multos incursitandum est, et alicubi labi necesse est, alicubi retineri, alicubi respergi : ita in hoc vitae actu dissipato et vago, multa impedimenta, multae querelae incident. Alius spem nostram fefellit, aliis distulit, alius intercepit : non ex destinato proposita fluxerunt. nulli fortuna tam dedita est, ut multa tentanti ubique respondeat. sequitur ergo, ut is, cui contra quam proposuerat, aliqua cesserunt, impa-

tiens hominum rerumque sit : ex levissimis causis irascatur nunc personae , nunc negotio , nunc loco , nunc fortunae , nunc sibi. Itaque ut quietus possit esse animus , non est iactandus , nec multarum , ut dixi , rerum actu fatigandus , nec magnarum , supra que vires appetitarum. Facile est , levia aptare cervicibus , et in hanc aut in illam partem transferre sine lapsu : at quae alienis in nos manibus imposita aegre sustinemus , victi in proximo effundimus , et dum stamus sub sarcina , impares oneri vacillamus.

VII. Idem accidere in rebus civilibus ac domesticis , scias. Negotia expedita et habilia sequuntur auctorem : ingentia , et supra mensuram agentis , nec dant se facile , et si occupata sunt , premunt atque adducunt administrantem , tenerique iam visa , cum ipso cadunt. Itaque sit , ut frequenter irrita sit eius voluntas , qui non quae facilia sunt aggreditur , sed vult facilia esse , quae aggressus est. Quotiens aliquid conaberis , te simul et ea quae paras , quibusque pararis , ipse metire. Faciet enim te asperum poenitentia operis infecti. Hoc interest , utrum quis fervidi sit ingenii , an frigidi atque humilis . generoso repulsa iram exprimet , languido inertique tristitiam. Ergo actiones nostrae nec pravae sint , nec audaces , nec improbae. in vicinum spes exeat. nihil conemur , quod mox adepti quoque successisse miremur.

VIII. Demus operam , ne accipiamus iniuriam , quam ferre nescimus. Cum placidissimo et facilissimo et minime obnoxio morosoque vivendum est. Sumuntur a conversantibus mores : et ut quaedam in contactos corporis vitia transiliunt , ita animus mala

sua proximis tradit. Ebriosus convictores in amorem vini traxit : impudicorum coetus fortem quoque, et , si liceat , virum emolliit : avaritia in proximos virus suum transtulit. Eadem ex diverso ratio virtutum est , ut omne quod secum habent , mitigent. nec tam valitudini profuit utilis regio et salubrius coelum ; quam animis parum firmis , in turba meliore versari. Quae res quantum possit , intelliges , si videris feras quoque convictu nostro mansuescere : nullique etiam immanni bestiae vim suam permanere , si hominis contubernium diu passa est. Retunditur omnis asperitas , paulatimque inter placida dediscitur. Accedit huc , quod non tantum exemplo melior fit , qui cum quietis hominibus vivit : sed quod causas irascendi non invenit , nec vitium suum exercet. Fugere itaque debbit omnes , quos irritaturos iracundiam sciet. Qui sunt , inquis , isti ? multi ex variis causis idem facturi. Offendet te superbus contemtu , dicax contumelia , petulans iniuria , lividus malignitate , pugnax contentione , ventosus et mendax vanitate. Non feres a suspiciose timeri , a pertinace vinci , a delicato fastidiri. Elige simplices , faciles , moderatos ; qui iram tuam nec evocent , et ferant. Magis adhuc proderunt submissi et humani , et dulces , non tamen usque in adulationem. nam iracundos nimia assentatio offendit. Erat certe amicus noster , vir bonus , sed irae paratoris , cui non magis erat tutum blandiri , quam maledicere. Caelium oratorem fuisse iracundissimum constat. cum quo , ut aiunt , coenabat in cubiculo lectae patientiae cliens : sed difficile erat illi in copulam coniecto , rixam eius , cum quo haerebat , effu-

gere. Optimum indicavit, quidquid dixisset, sequi, et secundas agere. Non tulit Caelius assentientem, sed exclamavit: Dic aliquid contra, ut duo simus. Sed ille quoque, quod non irasperetur iratus, cito sine adversario desit. Eligamus ergo vel hos potius, si consciit nobis iracundiae sumus, qui vultum nostrum ac sermonem sequantur. facient quidem nos delicatos, et in malam consuetudinem inducent, nihil contra voluntatem audiendi: sed proderit, vitio suo intervalum et quietem dare. Difficilis quoque et indomita natura, blandientem feret: et nihil asperum taetrumque palpanti est. Quotiens disputatio longior et pugnacior erit, in prima resistamus, antequam robur accipiat. Alit se ipsa contentio: demissos altius tenet. Facilius est se a certamine abstinere, quam abducere.

IX. Studia quoque graviora iracundis omittenda sunt, aut certe citra lassitudinem exercenda: et animus non inter plura versandus, sed artibus amoenis tradendus. Lectio illum carminum obleniat, et historia fabulis detineat: mollius delicatusque tractetur. Pythagoras perturbationes animi lyra componebat. quis autem ignorat, lituos et tubas concitamenta esse; sicut quosdam cantus blandimenta, quibus mens resolvatur? Confusis oculis profunt virentia, et quibusdam coloribus infirma acies acquiescit, quorundam splendore praestringitur: sic mentes aegras studia laeta permulcent. Forum, advocationes, iudicia, fugere debeimus, et omnia quae exulcerant vitium: aequa cavere lassitudinem corporis. consumit enim, quidquid in nobis mite placidumque est, et acria concitat. Ideo quibus stomachus suspectus est, pro-

cessuri ad res agendas maioris negotii , bilem cibo temperant , quam maxime movet fatigatio : sive quia calorem inedia compellit , et nocet sanguini , cursumque eius , venis laborantibus , fistit : sive quia corpus attenuatum et infirmum incunibit animo . certe ob eandem causam iracundiores sunt valetudine aut aetate fessi . Fames quoque et sitis , ex eisdem causis , vitanda est : exasperat et incendit animos .

X. Vetus dictum est , A lasso rixam quaeri . aequem autem et ab esuriente , et a sitiente , et ab omni homine quem aliqua res urit . Nam ut ulcera ad levem tactum , deinde etiam ad suspicionem tactus condolescunt : ita animus affectus , minimis offenditur ; adeo ut quosdam salutatio , epistola , oratio , et interrogatio in litem evocent . Nunquam sine querela aegra tanguntur . Optimum est itaque , ad primum mali sensum mederi sibi : tum verbis quoque suis minimum libertatis dare , et inhibere impetum . Facile est autem , affectus suos , cum primum oriuntur , deprehendere . morbum signa praecurrunt . Quemadmodum tempestatis ac pluviae ante ipsas notae veniunt : ita irae , amoris , omniumque istarum procellarum animos vexantium , sunt quaedam praenuntia . Qui comitiali vitio solent corripi , iam adventare valetudinem intelligunt , si calor summa deseruit , et incertum lumen , nervorumque trepidatio est , si memoria sublabitur , caputque versatur . Solitis itaque remediis incipientem casum occupant , et odore gustuque , quidquid est quod alienat animos , repellitur : aut fomentis contra frigus rigoremque pugnatur : aut si parum medicina proficit , vitaverunt turbam , et sine

teste ceciderunt. Prodest morbum suum nosse, et vires eius antequam spatientur, opprimere. Videamus quid sit, quod nos maxime concitet. Alium verborum, alium rerum contumeliae movent. hic vult nobilitati sua, hic formae sua parci. ille elegantissimus haberi cupit, ille doctissimus. hic superbiae impatiens est, hic contumacia; ille servos non putat dignos quibus irascatur: hic intra domum saevus est, foris mitis. ille rogari, invidiam iudicat: hic, non rogari, contumeliam. Non omnes ab eadem parte feriuntur.

XI. Scire itaque oportet, quid in te imbecillum sit, ut id maxime protegas. Non expedit omnia videre, omnia audire. multae nos iniuriae transeant: ex quibus plerasque non accipit, qui nescit. Non vis esse iracundus? ne sis curiosus. Qui inquirit quid in se dictum sit, qui malignos sermones etiam si secreto habitu sint, eruit, se ipse inquietat. Quaedam interpretatio eo perducit, ut videantur iniuriae. Itaque alia differenda sunt, alia deridenda, alia donanda. Circumscribenda multis modis ira est. pleraque in lusum iocumque vertantur. Socratem, aiunt, colapho percussum nihil amplius dixisse, quam, Molestem esse, quod nescirent homines, quando cum galea prodire deberent. Non quemadmodum facta sit iniuria refert, sed quemadmodum lata. Nec video quare difficilis sit moderatio, cum sciam tyrannorum quoque tumida et fortuna et licentia ingenia, familiarem sibi saevitiam repressisse. Pisistratum certe, Atheniensium tyrannum, memoriae proditur, cum multa in crudelitatem eius ebrius conviva dixisset, nec deessent qui

vellent manus ei commodare , et alius hinc , alius illinc faces subderent ; placido animo tulisse , et hoc irritantibus respondisse , Non magis illi se succensere , quam si quis obligatis oculis in se incurrisset. Magna pars querelas manu fecit , aut falsa suspicando , aut levia aggrediendo.

XII. Saepe ad nos ira venit , saepius nos ad illam : quae nunquam arcessenda est : etiam cum incidit , reiiciatur. Nemo dicit sibi : Hoc propter quod irascor , aut feci , aut fecisse potui. Nemo animum facientis , sed ipsum aestimat factum. atqui ille intundus est : voluerit , an inciderit : coactus sit , an deceptus : odium secutus sit , an praemium : sibi morem gesserit , an manum alteri commodaverit. Aliquid peccantis aetas facit , aliquid fortuna : ut ferre ac pati , aut humanum , aut humile sit. Eo loco nos constituamus , quo ille est cui irascimur. nunc facit iracundos iniqua nostri aestimatio , et quae facere vellemus , pati nolumus. Nemo se differt. atqui maximum remedium irae , dilatio est : ut primus eius fervor relanguescat , et caligo quae premit mentem , aut residat , aut minus densa sit. Quaedam ex his quae te praecepitem ferebant , hora , non tantum dies , molliet : quaedam ex toto evanescent. Si in hoc erit petitia advocatio , apparebit iam iudicium esse , non iram. Quidquid voles quale sit scire , tempori trade . nihil diligenter in fluctu cernitur. Non potuit impertrare Plato a se tempus , cum servo suo irasceretur , sed ponere illum statim tunicam , et praebere scapulas verberibus iussit , sua manu ipse caesurus. Postquam intellexit irasci se , sicut sustulerat , manum suspensam

detinebat, et stabat percussuro similis. Interrogatus deinde ab amico, qui forte intervenerat, quid ageret? Exigo, inquit, poenas ab homine iracundo. Velut stupens, gestum illum saevituri deformem sapienti viro servabat, oblitus iam servi: quia aliud quem potius castigaret, invenerat. Itaque abstulit sibi in suos potestatem, et ob peccatum quoddam commotior, Tu, inquit, Speusippe, servulum istum verberibus obiurga: nam ego irascor. Ob hoc non cecidit, propter quod alius cecidisset. Irascor, inquit: plus faciam quam oportet: libentius faciam. non sit iste servus in eius potestate, qui in sua non est. Aliquis vult irato committi ultiōrem, cum Plato sibi ipse imperium abrogaverit? Nihil tibi liceat, dum irasceris. quare? quia vis omnia licere. Pugna tecum ipse. si iram vincere non potes, illa te incipit vincere. Si absconditur, si illi exitus non datur, signa eius obruamus: et illam, quantum fieri potest, occultam secretamque teneamus.

XIII. Cum magna id nostra molestia fiet. Cupit enim exsilire, et incendere oculos, et mutare faciem: sed si eminere illi extra nos licuit, supra nos est. In imo pectoris secessu recondatur, feraturque, non ferat: immo in contrarium omnia eius indicia flectamus. Vultus remittatur, vox lenior sit, gradus lenior: paulatim cum exterioribus interiora formentur. In Socrate irae signum erat, vocem submittere, loqui parcus. apparebat tunc illum sibi obstare. Deprehendebatur itaque a familiaribus, et coarguebatur: nec erat illi exprobratio latitantis irae ingrata. Quid ni gauderet, quod iram suam multi intelligerent,

nemo sentiret? sensisset autem, nisi ius amicis obiurgandi se dedisset, sicut ipse sibi in amicos sumferat. Quanto magis hoc nobis faciendum est? rogemus amicissimum quemque, ut tunc maxime adversus nos libertate utatur, cum minime illam pati poterimus: nec assentiat irae nostrae. Contra potens malum, et apud nos gratiosum, dum conspicimus, dum nostri sumus, advocemus.

XIV. Qui vinum male ferunt, et ebrietatis suae temeritatem ac petulantiam metuunt, mandant suis, ut e convivio auferantur. Intemperantiam in morbo suam experti, parere sibi in adversa valetudine ventant. Optimum est, notis vitiis impedimenta prospicere, et ante omnia ita componere animum, ut etiam gravissimis rebus subitisque concussus iram aut non sentiat, aut magnitudine inopinatae iniuria exortam in altum retrahat, nec dolorem suum profiteatur. Id fieri posse apparebit, si pauca ex ingenti turba exempla protulero: ex quibus utrumque discere licet, quantum mali habeat ira, ubi hominum praepotentum potestate tota utitur: quantum sibi imperare possit, ubi metu maiore compressa est. Cambyses regem nimis deditum vino Praexaspes unus ex carissimis monebat, ut parcus biberet: Turpem esse dicens ebrietatem in rege, quem oculi omnium auresque sequerentur. Ad hoc ille, Ut scias, inquit, quem admodum nunquam excidam mihi, approbabo iam, et oculos post vinum in officio esse, et manus. Bibit deinde liberalius quam alias, capacioribus scyphis: et iam gravis, et temulentus, obiurgatoris sui filium procedere ultra limen iubet, allevataque super caput

sinistra manu stare. Tunc intendit arcum, et ipsum cor adolescentis (id enim se petere dixerat) figit, recisoque pectore haerens in ipso corde spiculum ostendit: ac respiciens patrem, satisne certam haberet manum? interrogavit. At ille negavit Apollinem potuisse certius dimittere. Dii illum male perdant, animo magis quam conditione mancipium. Eius rei laudator fuit, cuius nimis erat spectatorem fuisse. occasionem blanditiarum putavit, pectus filii in duas partes diductum, et cor sub vulnere palpitans. Controversiam illi facere de gloria debuit, et revocare iactum, ut regi liberet in ipso patre certioremanum ostendere. O regem cruentum! o dignum in quem omnium suorum arcus verterentur! Cum execrati fuerimus illum, convivia suppliciis funeribusque solventem, tamen sceleratus telum illud laudatum est, quam missum. Videbimus quomodo se pater gerere debuerit, stans super cadaver filii sui, caedemque illam, cuius et testis fuerat et causa. id de quo nunc agitur, appareat, iram suppressi posse. Non maledixit regi, nullum emisit ne calamitosi quidem verbum, cum aequo cor suum, quam filii, transfixum videret. Potest dici, merito devorasse verba. nam si quid tanquam iratus dixisset, nihil tanquam pater facere potuisset. Potest, inquam, videri sapientius se in illo casu gessisse, quam cum de potandi modo praecipere: quem satius erat vinum quam sanguinem bibere, cuius manus poculis occupari pax erat. Accessit itaque ad numerum eorum, qui magnis cladibus ostenderunt, quanti constarent regum amicis bona consilia.

XV. Non dubito, quin Harpagus quoque tale

aliquid regi suo Persarumque suaserit , quo offensus , liberos illi epulandos apposuit , et subinde quaeſit , an placaret conditura. Deinde ut satis illum plenum malis suis vidit , afferri capita illorum iuſſit , et , quomodo eſſet acceptus , interrogavit. Non defuerunt miſero verba , non os concurrit : Apud regem , inquit , omnis coena iucunda eſt. Quid hac adulatione profecit ? nē ad reliquias invitaretur. Non vero patrem damnare regis ſui factum , non vero quaerere dignam tam truci portento poenam : fed hoc interim colligo , poſſe etiam ex iungentibus malis naſcentem iram abſcondi , et ad verba contraria ſibi cogi. Neceſſaria eſt iſta doloris refraenatio , utique hoc ſortis vitae genus , et ad regiam adhibitis mensam. Sic editur apud illos , ſic bibitur , ſic reſpondeatur : funeribus ſuis arridendum eſt. An tanti ſit vita , videbi- mus : alia iſta quaestio eſt. Non conſolabimur tam tri- ſte ergastulum , non adhortabimur ferre imperia car- nificum , oſtendemus in omni ſervitute apertam li- bertati viam. Si aeger animus , et ſuo vitio miſer eſt , huic miſerias finire ſecum licet. Dicam et illi qui in regem incidunt , ſagittis pectora amicorum petentem , et illi cuius dominus liberorum viſceribus patres fa- turat : Quid gemis , demens , quid exſpectas , ut te aut hostis aliquis per exitium gentis tuae vindicet , aut rex a longinquō potens advolet ? Quocunque reſpe- xeris , ibi malorum finis eſt. Vides illum praecipitem locum ? illic ad libertatem deſcenditur. Vides illud mare , illud flumen , illum puteum ? libertas illic in imo ſedet. Vides illam arborem , brevem , retorri- dam , infelicem ? pendet inde libertas. Vides iugulum

tuum, guttur tuum, cor tuum? effugia servitutis sunt. Nimis tibi operosos exitus monstramus, et multum animi ac roboris exigentes. Quaeris, quod sit ad libertatem iter? quaelibet in corpore tuo vena.

XVI. Quamdiu quidem nihil tam intolerabile nobis videtur, ut nos expellat e vita, iram in quocunque erimus statu, removeamus. Perniciosa est servientibus. omnis enim indignatio in tormentum suum proficit, et imperia graviora sentit: quo contumacius patitur. Sic laqueos fera dum iactat, adstringit: sic aves viscum, dum trepidantes excutiunt, plumis omnibus illinunt. Nullum tam arctum est iugum, quod non minus laedat ducentem, quam repugnatum. Unum est levamentum malorum ingentium, pati, et necessitatibus suis obsequi. Sed cum utilis sit servientibus, affectuum suorum, et huius praecipue rabidi atque effraenis continentia, utilior est regibus. Perierunt omnia, ubi quantum suadet ira, fortuna permittit: nec diu potest, quae multorum malo exercetur, potentia stare. Periclitatur enim, ubi eos qui separatim gemunt, communis metus iunxit. Plerosque itaque modo singuli maestaverunt, modo universi, cum illos conferre in unum iras publicus dolor coegisset. Atqui plerique sic iram, quasi insigne regium, exercuerunt. Sicut Darius, qui primus, post ablatum Mago imperium, Persas et magnam partem Orientis obtinuit. Nam cum bellum Scythis indixisset, Orientem cingentibus, rogatus ab Oebazo nobilis sene, ut ex tribus liberis unum in solatium patri relinqueret, duorum opera uteretur: plus quam rogarbatur pollicitus, omnes se illi dixit remissurum: et

occisos in conspectu parentis abiecit, crudelis futurus, si omnes abduxisset.

XVII. At quanto Xerxes facilior? qui Pythio, quinque filiorum patri, unius vacationem petenti, quem vellet, eligere permisit: deinde quem elegerat, in partes duas distractum ab utroque viae latere posuit, et hac viðima lustravit exercitum. Habuit itaque quem debuit exitum. viðtus, et late longeque fusus, ac stratum ubique ruinam suam cernens, medius inter suorum cadavera incessit. Haec barbaris regibus feritas in ira fuit: quos nulla eruditio, nullus literarum cultus imbuerat. Dabo tibi ex Aristote- lis sinu regem Alexandrum, qui Clitum carissimum sibi et una educatum, inter epulas transfodit, et manu quidem sua, parum adulantem, et pigre ex Ma- cedone ac libero in Persicam servitutem transeun- tem! Nam Lysimachum, aequa familiarem sibi, leoni obiecit. Numquid ergo hic Lysimachus, felicitate quadam dentibus leonis elapsus, ob hoc cum ipse regnaret, mitior fuit? Nam Telesphorum Rhodium amicum suum undique decurtatum, cum aures illi nasumque abscidisset, in cavea velut novum animal aliquod et inusitatum diu pavit: cum oris detruncati mutilatique deformitas humanam faciem perdidisset. Accedebat fames et squalor et illuvies corporis, in stercore suo destituti, callosis super haec genibus manibusque, quas in usum pedum angustiae loci co- gebant. lateribus vero attritu exulceratis, non minus foeda quam terribilis erat forma eius visentibus: factusque poena sua monstrum, misericordiam quo- que amiserat. tamen cum dissimillimus esset homi-

mini, qui illa patiebatur; dissimilior erat, qui faciebat.

XVIII. Utinam ista saevitia intra peregrina mansisset exempla, nec in Romanos mores cum aliis adventitiis vitiis, et suppliciorum irarumque barbaria transisset! M. Mario, cui vicatim populus statuas posuerat, cui thure et vino Romanus populus supplocabat, L. Sylla perfringi crura, erui oculos, amputari manus iussit; et quasi totiens occideret, quotiens vulnerabat, paulatim et per singulos artus laceravit. Quis erat huius imperii minister? quis, non Catilina, iam in omne facinus manus exercens? hic illum ante bustum Q. Catuli carpebat, gravissimus mitissimi viri cineribus: supra quos vir mali exempli, popularis tamen, et non tam immerito quam nimis amatus, per stillicidia sanguinem dabat. Dignus erat Marius qui illa pateretur, Sylla qui iuberet, Catilina qui faceret: sed indigna Respublica quae in corpus suum pariter et hostium et vindicium gladios reciperet. Quid antiqua perscrutor? modo C. Caesar Sextum Papinium, cui pater erat consularis, Betilienum Bassum quaestorem suum Procuratoris sui filium, alios Senatores et equites Romanos, uno die flagellis cecidit, torsit, non quaestionis, sed animi causa. Deinde adeo impatiens fuit differendae voluptatis, quam ingentem crudelitas eius sine dilatione poscebat, ut in xylo maternorum hortorum, qui porticum a ripa separat, inambulans, quosdam ex illis cum matronis atque aliis senatoribus ad lucernam decollaret. Quid instabat? quod periculum, aut privatum, aut publicum una nox minabatur? quantulum fuit, lucem

exspectare? denique ne senatores populi Romani soleatus occideret.

XIX. Quam superbae fuerit crudelitatis, ad rem pertinet scire, quamquam aberrare alio possumus videri, et in devium exire: sed hoc ipsum pars erit irae, super solita saevientis. Ceciderat flagellis senatores: ipse effecit, ut dici possit, Solet fieri. torserat per omnia, quae in rerum natura tristissima sunt, fidiculis, tabularibus, eculeo, igne, vultu suo. Et hoc loco respondebitur, magnam rem! si tres senatores, quasi nequam mancipia, inter verbera et flamas divisit, homo qui de toto senatu trucidando cogitabat: qui optabat, ut populus Romanus unam cervicem haberet, ut sclera sua tot locis ac temporibus diducta, in unum iustum et unum diem cogeret. Quid tam inauditum quam nocturnum supplicium? cum latrocinia tenebris abscondi soleant; animadversiones, quo notiores sunt, plus ad exemplum emendationemque proficiunt. Et hoc loco respondebitur mihi: Quod tantopere admiraris, isti beluae quotidianum est; ad hoc vivit, ad hoc vigilat, ad hoc lucubrat. Nemo certe invenietur alias, qui imperaverit his, in quos animadverti iubebat, os inserta spongia includi, ne vocis emitendae haberent facultatem. Cui unquam morituro non est relictum, qua gemeret? timuit, ne quam liberiorem vocem extremus dolor mitteret: ne quid, quod nollet, audiret. sciebat autem innumerabilia esse, quae obiicere illi nemo, nisi periturus, auderet. Cum spongiae non invenirentur, scindi vestimenta miserorum, et in os sarciri pannos imperavit. Quae ista saevitia est? liceat

ultimum spiritum trahere : da exiturae animae locum : liceat illam non per vulnus emittere.

XX. Adicere his longum est, quod patres quoque occisorum eadem nocte, dimissis per domos centurionibus, confecit : id est, homo misericors lucu liberavit. Non enim Caii saevitiam, sed irae malum propositum est describere : quae non tantum viritim furit, sed gentes totas lacinat, sed urbes, sed flumina, et tuta ab omni sensu doloris converberat. Sicut rex Persarum, totius populi nares recidit in Syria : inde Rhinocolura loci nomen est. Pepercisse illum iudicas, quod non tota capita praecidit? novo genere poenae delectatus est. Tale aliquid passi forent Aethiopes, qui ob longissimum vitae spatium Macrobii appellantur. in hos enim, quia non supinis manibus exceperant servitutem, missisque legatis libera responsa dederant, quae contumeliosa reges vocant, Cambyses fremebat : et non provisis commeatibus, non exploratis itineribus, per invia, per arentia trahebat omnem bello utilem turbam : cui intra primum iter deerant necessaria, nec quidquam subministrabat sterilis et inculta humanoque ignota vestigio regio : sustinebant famem primo tenerrima frondium, et cacumina arborum, tum coria igne mollita, et quidquid necessitas cibum fecerat : postquam inter harenas radices quoque et herbae defecerant, apparuitque inops etiam animalium solitudo, decimum quemque fortiti, alimentum habuerunt fame saevius. Agebat adhuc ira regem precipitem, cum partem exercitus amisisset, partem comedisset : donec timuit, ne et ipse vocaretur ad sortem. tum

demum signum receptui dedit. Servabantur interim illi generosae aves, et instrumenta epularum camelis vehebantur: cum fortirentur milites eius, quis male periret, quis peius viveret.

XXI. Hic iratus fuit genti, et ignotae, et immeritae, sensurae tamen: Cyrus flumini. Nam cum Babylonem oppugnaturus festinaret ad bellum, cuius maxima momenta in occasionibus sunt, Gynden late fusum amnem vado transire tentavit: quod vix tutum est etiam cum sensit aestatem, et ad minimum deductus est. Ibi unus ex his equis, qui trahere regium currum albi solebant, abreptus, vehementer commovit regem. iuravit itaque, amnem illum regis commeatus auferentem, eo se redacturum, ut transiri calcarique etiam a feminis posset. Huc deinde omnem transfulit belli apparatus, et tamdiu assedit operi, donec C et LXXX cuniculis divisum alveum in CCC et LX rivos dispergeret, et siccum relinqueret in diversum fluentibus aquis. Periit itaque et tempus, magna in magnis rebus iactura, et militum ardor, quem inutilis labor fregit, et occasio aggrediendi imparatos, dum ille bellum indictum hosti cum flumine gerit.

XXII. Hic furor (quid enim aliud voces?) Romanos quoque contigit. C. enim Caesar villam in Herculaniensi pulcherrimam, quia mater sua aliquando in illa custodita erat, diruit, fecitque eius per hoc notabilem fortunam. stantem enim praenavigabamus: nunc causa dirutae quaeritur. Et haec cogitanda sunt exempla, quae vites; et illa e contrario, quae sequaris, moderata, lenia: quibus nec ad irascendum causa

defuit, nec ad ulciscendum potestas. Quid enim facilius fuit Antigono, quam duos manipulares duci iubere, qui incumbentes regio tabernaculo faciebant, quod homines et periculofissime et libentissime faciunt, de rege suo male existimabant? Audierat omnia Antigonus, utpote cum inter dicentes et audentem palla interesset: quam ille leviter commovit, et, Longius, inquit, discedite, ne vos rex audiat. Idem quadam nocte, cum quosdam ex militibus suis exaudisset, omnia mala imprecantes regi, qui ipsos in illud iter et inextricable lutum deduxisset, accessit ad eos qui maxime laborabant: et cum ignorantes a quo adiuvarentur, explicuisset: Nunc, inquit, maledicite Antigono, cuius vitio in has miserias incidistis: ei autem bene optate, qui vos ex hac voragine eduxit. Idem tam miti animo hostium suorum maledicta, quam civium tulit. Itaque cum in parvulo quodam castello Graeci obfiderentur, et fiducia loci contemnentes hostem multa in deformitatem Antigoni iocarentur, et nunc staturam humilem, nunc collisum nasum deriderent: Gaudeo, inquit, et aliquid boni spero: si in castris meis Silenus habeo. Cum hos dicaces fame domuisset, captis sic usus est, ut eos qui militiae utiles erant, in cohortes describeret, ceteros praeconi subiiceret: id quoque se negavit facturum fuisse, nisi expediret his dominum habere, qui tam malam haberent linguam. Huius nepos fuit Alexander, qui lanceam in convivas suos torquebat, qui ex duobus amicis quos paulo ante retuli, alterum ferae obiecit, alterum sibi. Ex his duobus tamen, qui leoni obiectus est, vixit.

XXIII. Non habuit hoc avitum ille vitium , ne pa-
ternum quidem. Nam si qua alia in Philippo virtus ,
fuit et contumeliarum patientia , ingens instrumen-
tum ad tutelam regni. Demochares ad illum , Parrhe-
siastes ob nimiam et procacem linguam appellatus ,
inter alios Atheniensium legatos venerat. audita be-
nigne legatione , Philippus , Dicte , inquit , mihi ;
facere quid possum , quod sit Atheniensibus gratum ?
Excepit Demochares : Te , inquit , suspendere. In-
dignatio circumstantium ad tam inhumanum respon-
sum exorta est : quos Philippus conticescere iussit , et
Thersitam illum salvum incolumemque dimittere. At
vos , inquit , ceteri legati , nuntiate Atheniensibus ,
multo superbiores esse , qui ista dicunt , quam qui
impune dicta audiunt. Multa et divus Augustus digna
memoria fecit , dixitque : ex quibus appareat illi iram
non imperasse. TImagenes historiarum scriptor , quae-
dam in ipsum , quaedam in uxorem eius , et in totam
domum dixerat , nec perdiderat dicta. magis enim
circumfertur , et in ore hominum est , temeraria ur-
banitas. Saepe illum Caesar monuit , ut moderatius
lingua uteretur : perseveranti , domo sua interdixit.
Postea TImagenes in contubernio Pollionis Afini*ii*
consenuit , ac tota civitate direptus est. nullum illi li-
men praeclusa Caesaris domus abstulit. Historias po-
stea quas scripserat , recitavit , et combussit , et li-
bros acta Caesaris Augusti continentis in ignem po-
suit. Inimicitias gessit cum Caesare. nemo amicitiam
eius extimuit , nemo quasi fulguritum refugit : fuit
qui praeberet tam alte cadenti sinum. Tulit hoc , ut
dixi , Caesar patienter , ne eo quidem motus , quod

laudibus suis rebusque gestis manus attulera^t. Nunquam cum hospite inimici sui questus est : hoc dumtaxat Polioni Asinio dixit, οὐριοτρόφεῖς. Paranti deinde excusationem , obstitit. Et , fruere , inquit , mi Pollio , fruere. Et cum Pollio diceret : Si iubes , Caesar , statim illi domo mea interdicam. Hoc me , inquit , putas facturum , cum ego vos in gratiam reduxerim? Fuerat enim aliquando Timageni Pollio iratus : nec ullam aliam habuerat causam desinendi , quam quod Caesar cooperat.

XXIV. Dicat itaque quisque sibi , quoties laceſſitur : Numquid potentior sum Philippo ? illi tamen impune maledictum est. Numquid in domo mea plus possum , quam toto orbe terrarum divus Augustus potuit ? ille tamen contentus fuit , a conviciatore suo secedere. Quid est quare ego servi mei clarius responsum , et contumaciorem vultum , et non pervenientem usque ad me murmurationem , flagellis et compedibus expiem ? quis sum , cuius aures laedi nefas sit ? Ignoverunt multi hostibus : ego non ignoscam pigris , negligentibus , garrulis ? Puerum aetas excusat , feminam sexus , extraneum libertas , domesticum familiaritas. Nunc primum offendit ? cogitemus quamdiu placuerit. Saepe et alias offendit ? ferainus quod diu tulimus. Amicus est ? fecit quod noluit. Inimicus ? fecit quod debuit. Prudentiori cedamus : stultiori remittamus. pro quoquaque illud respondeamus nobis , sapientissimos quoque viros multa delinquere : neminem esse tam circumspectum , cuius non diligentia aliquando sibi ipsi excidat : neminem tam maturum , cuius non gravitatem in ali-

quod servidius factum casus impingat : neminem tam timidum offendarum , qui non in illas , dum vitat , incidat.

XXV. Quomodo homini pusillo solatum in malis fuit , etiam magnorum virorum titubare fortunam , et aequiore animo filium in angulo flevit , qui vedit acerba funera etiam ex regia duci : sic animo aequiore feret ab aliquo laedi , ab aliquo contemni , cuicunque venit in mentem , nullam esse tantam potentiam , in quam non incurrat iniuria. Quodsi etiam prudentissimi peccant , cuius non error bonam causam habet ? Respiciamus , quoties adolescentia nostra in officio parum diligens fuerit , in sermone parum modesta , in vino parum temperans. Si iratus est : demus illi spatium , quo dispicere , quid fecerit , possit . se ipse castigabit. Denique debeat poenas . non est quod cum illo paria faciamus. Illud non venit in dubium , quin se exemerit turbae , et altius steterit , quisquis despexit lacescentes. proprium est magnitudinis vere , non se sentire percussum. Sic immanis fera ad latratum canum lenta respexit : sic irritus ingenti scopulo fluctus assultat. Qui non irascitur , inconcussus iniuria perstinet : qui irascitur , motus est. At ille quem modo altiorem omni incommodo posui , tenet quodam amplexu summum bonum. nec homini tantum , sed ipsi fortunae responderet : Omnia licet facias , minor es , quam ut serenitatem meam obducas. Vetat hoc ratio , cui vitam regendam dedi. plus mihi nocitura est ira , quam iniuria. Quid ni plus ? illius modus certus est : ista quousque me latura sit , incertum est.

XXVI. Non possum , inquis , pati. grave est , in-

iuriam sustinere. Mentiris. quis enim iniuriam non potest ferre, qui potest iram? Adiice nunc, quod id agis ut et iram feras, et iniuriam. Quare fers aegri rabiem, et phrenetici verba? puerorum protervas manus? nempe quia videntur nescire, quid faciant. Quid interest, quo quisque vitio fiat imprudens? imprudentia par in omnibus patrocinium est. Quid ergo? inquis. impune illi erit? Puta, te velle: tamen non erit. Maxima est enim factae iniuriae poena, fecisse: nec quisquam gravius afficitur, quam qui ad supplicium poenitentiae traditur. Denique ad conditionem rerum humanarum respiciendum est, ut omnium accidentium aequi iudices simus: iniquus autem est, qui commune vitium singulis obiecit. Non est Aethiopis inter suos insignitus color; nec rufus crinis et coactus in nodum apud Germanos virum dedecet. Nihil in uno iudicabis notabile aut foedum, quod genti suae publicum est. At ista quae retuli, unius regionis atque anguli consuetudo defendit: vide nunc quanto in his iustior venia sit, quae per totum genus humanum vulgata sunt. Omnes inconsulti et improvidi sumus, omnes incerti, queruli, ambitiosi. Quid lenioribus verbis hulcus publicum abscondo? omnes mali sumus. Quidquid itaque in alio reprehenditur, id unusquisque in suo sinu inventet. Quid illius pallorem, illius maciem notas? pestilentia est. Placidiores itaque invicem simus. mali inter malos vivimus. Una res nos facere potest quietos, mutuae facilitatis conventio. Ille mihi iam nocuit: ego illi nondum. sed iam aliquem fortasse laefisti: sed laedes.

XXVII. Noli aestimare hanc horam, aut hunc diem ; totum inspice mentis tuae habitum. etiam si nihil mali fecisti, potes facere. Quanto satius est, sanari iniuriam, quam ulcisci ? Multum temporis ultimo absunit. multis se iniuriis obiicit, dum una dolet. Diutius irascimur omnes, quam laedimur. quanto melius est, abire in diversum, nec vitia vitiis compонere ? Num quis satis constare sibi videatur, si mullam calcibus repeatat, et canem morsu ? Ista, inquis, peccare se nesciunt. Primum, quam iniquus est, apud quem hominem esse, ad impetrandam veniam nocet ? deinde, si cetera animalia irae tuae subducit, quod consilio carent : eo loco tibi sit, quisquis consilio caret. Quid enim refert, an alia mutis dissimilia habeat, si hoc quod in omnini peccato muta defendit, simile habet, caliginem mentis ? Peccavit. Hoc enim primum, hoc enim extremum. Non est quod illi credas, etiam si dixit : Iterum non faciam. Et iste peccabit, et in istum alius ; et tota vita inter errores volutabitur. Mansuete immansueta tractanda sunt. Quod in luctu dici solet, efficacissime et in ira dicitur : Utrum aliquando desines, an nunquam ? si aliquando, quanto satius est iram relinquere, quam ab ira relinquere ? Sin semper haec cogitatio durabit ; vides quam impacatam tibi denunties vitam. qualis enim erit semper tumentis ?

XXVIII. Adiice nunc, quod nisi bene te ipse succederis, et subinde causas quibus stimuleris, renovaveris, sua sponte ira discedet, et vires illi dies subtrahet. quanto satius est a te illam vinci, quam a se ? Huic irasceris, deinde illi : servis, deinde libertis :

parentibus, deinde liberis : notis, deinde ignotis. Ubique enim causae supersunt, nisi deprecator animus accessit. Hinc te illo furor rapiet, illinc alio : et novis subinde irritamentis orientibus, continuabitur rabies. Age infelix, et quando amabis? O quam bonum tempus in re mala perdis! Quanto nunc satius erat, amicos parare, inimicos mitigare, Rempublicam administrare, transferre in res domesticas operam : quam circumspicere quid alicui possis facere mali? quod aut dignitati eius, aut patrimonio, aut corpori vulnus infligas? cum id tibi contingere sine certamine ac periculo non possit, etiamsi cum inferiore concurses. Vincentum licet accipias, et ad arbitrium tuum omni patientiae expositum : saepe nimia vis caendentis aut articulum loco movit, aut nervum in his quos fregerat, dentibus fixit. Multos iracundia mancos, multos debiles fecit, etiam ubi patientiae est nacta materiam. Adiice nunc, quod nihil tam imbecille natum est, ut sine elidentis periculo pereat. imbecillos valentissimis alias dolor, alias casus exaequat. Quid, quod pleraque eorum, propter quae irascimur, offendunt nos magis, quam laedunt? multum autem interest, utrum aliquis voluntati meae obstat, an desit: eripiat, an non det. Atqui in aequo ponimus, utrum aliquis auferat, an neget: utrum spem nostram praecidat, an differat: utrum contra nos faciat, an pro se: amore alterius, an odio nostri. Quidam vero non tantum iustas causas standi contra nos, sed etiam honestas habent. Alius patrem tuetur, alius fratrem, alius patruum, alius amicum. his tamen non ignoramus id facientibus: quod nisi face-

rent, improbaremus, immo, quod est incredibile; saepe de facto bene existimamus, de faciente male.

XXIX. At mehercules vir magnus ac iustus, fortissimum quemque ex hostibus suis, et pro libertate ac salute patriae pertinacissimum suspicit, et talem sibi civem, talem militem contingere optat. Turpe est, odisse quem laudes: quanto vero turpius, ob id aliquem odisse, propter quod misericordia dignus est? Si captivus in servitutem subito depresso reliquias libertatis tenet, nec ad fordida ac laboriosa ministeria agilis occurrit, si ex otio piger equum vehiculumque domini cursu non exaequat, si inter quotidianas vigilias fessum somnus oppressit, si rusticum laborem recusat, aut non fortiter obit, a servitute urbana et feriata translatus ad durum opus. Distinguamus, utrum aliquis non possit, an nolit. multos absolvemus, si cooperimus ante iudicare, quam irasci. Nunc autem primum impetum sequimur. deinde quamvis vana nos concitaverint, perseveramus, ne videamur coepisse sine causa: et quod iniquissimum est, pertinaciores nos facit iniquitas irae. Retinemus enim illam, et augemus: quasi argumentum sit iuste irascentis, graviter irasci. Quanto melius est, initia ipsa perspicere, quam levia sint, quam innoxia? Quod accidere vides in animalibus mutis, idem in homine deprehendes: frivolis turbamur, et inanibus.

XXX. Taurum color rubicundus excitat, ad umbram aspis exsurgit, ursos leonesque mappa proritat. Omnia quae natura fera ac rabida sunt, consternantur ad vanam. Idem inquietis et stolidis ingenii evenit:

rerum suspicione feriuntur: adeo quidem, ut interdum iniurias vocent modica beneficia; in quibus frequentissima, certe acerbissima iracundiae materia est. Carissimis enim irascimur, quod minora nobis praestiterint, quam mente concepimus, quam quae alii tulerint: cum utriusque rei paratum remedium sit. Magis alteri iudicis? nostra nos sine comparatione delecent. nunquam erit felix, quem torquebit felicior. Minus habeo quam speravi? sed fortasse plus speravi, quam debui. Haec pars maxime metuenda est: hinc perniciosissimae irae nascuntur, et sanctissima quaeque invasurae. Divum Iulium plures amici confecerunt, quam inimici, quorum non expleverat spes inexplebiles. Voluit quidem ille: neque enim quisquam liberalius victoria usus est, ex qua nihil sibi vindicavit, nisi dispensandi potestatem: sed quemadmodum sufficere tam improbis desideriis posset, cum tantum omnes concupiscerent, quantum poterat unus? Vedit itaque strictis circa sellam suam gladiis commilitones suos, Cimbrum Tullium acerrimum paulo ante suarum partium defensorem, aliosque post Pompeium demum Pompeianos.

XXXI. Haec res sua in reges arma convertit, fidissimosque eo compulit, ut de morte eorum cogitarent, pro quibus et ante quos mori, votum haberant. Nulli ad aliena respicienti, sua placent. Inde diis quoque irascimur, quod aliquis non antecedat, oblii quantum hominum retro sit, et paucis invidentes quantum sequatur a tergo ingentis invidiae. Tanta tamen importunitas hominum est, ut quavis multum acceperint, iniuriae loco sit, plus accipe-

re potuisse. Dedit mihi praeturam? sed consulatum speraveram. Dedit duodecim fasces? sed non fecit ordinarium consulem. A me numerari voluit annum? sed deest mihi ad sacerdotium. Cooptatus in collegium sum? sed cur in unum? Consummatum dignitatem meam? sed patrimonio nihil contulit. Ea dedit mihi, quae debebat alicui dare. de suo nihil protulit. Age potius gratias pro his quae accepisti: reliqua exspecta, et nondum plenum te esse gaude. Inter voluptates est, superesse quod spares. Omnes vicisti? primum te esse in animo amici tui laetare. multi te vincunt? considera, quanto antecedas plures, quam sequaris.

XXXII. Quod sit in te maximum vitium, quaeris? falsas rationes confidis: data magno aestimas, accepta parvo. Aliud in alio nos deterreat, quibusdam timeamus irasci, quibusdam vereamur, quibusdam fastidiamus. Magnam rem sine dubio fecerimus, si servulum infelicem in ergastulum miserimus. Quid proferamus verberare statim, crura protinus frangere? non peribit potestas ista, si differetur. Sine id tempus veniat, quo ipsi iubeamus: nunc ex imperio irac loquimur. cum illa abierit, tunc videbimus, quanti sit ista lis aestimanda. In hoc enim praecipue fallimur, ad ferrum venimus, ad capitalia suppicia: et vinculis, carcere, fame vindicamus rem, castigandam flagris levioribus. Quomodo, inquis, nos iubes intueri, quam omnia per quae laedi videmur, exigua, misera, puerilia sint? Ego vero nihil magis suaserim, quam sumere ingentem animum, et haec propter quae litigamus, discurrimus, anhelamus; videre

quam humilia et abiecta sint, nulli qui altum quidam aut magnificum cogitat, respicienda. Circa pecuniam plurimum vociferationis est: haec fora defatigat, patres liberosque committit, venena miscet, gladios tam percussoribus quam legionibus tradit. haec est sanguine nostro delibuta. propter hanc uxorum maritorumque noctes strepunt litibus, et tribunalia magistratum premit turba: reges saeviunt, rapiuntque, et civitates longo seculorum labore constructas evertunt, ut aurum argentumque in cinere urbium scrutentur.

XXXIII. Libet intueri fiscos in angulo iacentes. Hi sunt, propter quos oculi clamore exprimuntur: fremitu iudiciorum basilicae resonant: evocati ex longinquis regionibus iudices sedent, iudicaturi, utrius iustior avaritia sit. Quid si ne propter fiscum quidem, sed pugnum aeris, aut imputatum a servo denarium, senex sine herede moriturus stomacho dirumpitur? Quid si propter usuram haud millesimam, valetudinarius foenerator distortis pedibus, et manibus ad computandum modo relictis, clamat, ac per vadimonia asses suos in ipsis morbi accessionibus vindicat? Si totam mihi ex omnibus metallis, quae cum maxime depromimus, pecuniam proferas, si in medium proiicias quidquid thesauri tegunt, avaritia iterum sub terras referente quae male egesserat; omnem istam congeriem dignam non putem, quae frontem viri boni contrahat. Quanto risu prosequenda sunt, quae nobis lacrimas educunt?

XXXIV. Cedo nunc, persequere cetera, cibos, potiones, horumque causa paratam ambitionem,

munditias, verba, contumelias, et motus corporum parum honorificos, et suspiciones, et contumacia iumenta, et pigra mancipia, interpretationes malignas vocis alienae: quibus efficitur, ut inter iniurias naturae numeretur sermo homini datus. Crede mihi, levia sunt: propter quae non leviter excandescimus, qualia quae pueros in rixam et iurgium concitant. Nihil ex his, quae tam tristes agimus, seruum est, nihil magnum. Inde, inquam, vobis ira et insania est, quod exigua magno aestimatis. Auferre hic mihi hereditatem voluit: hic me diu spe suprema captatum criminatus est: hic scortum meum concupivit. Quod vinculum amoris esse debebat, seditionis atque edii causa est, idem velle.

XXXV. Iter angustum rixas transeuntium concitat: diffusa et late patens via ne populos quidem collidit. Ista quae appetitis, quia exigua sunt, nec possunt ad alterum, nisi alteri erepta, transferri: eadem affectantibus pugnam et iurgia excitant. Respondisse tibi servum indignaris liberumque et uxorem, et clientem: deinde idem de republica libertatem sublatam quereris, quam domi sustulisti. Rursus si tacuit interrogatus, contumaciam vocas. Et loquatur, et taceat, et rideat. coram domino? inquis. immo coram patrefamilias. Quid clamas? quid vociferaris? quid flagella media coena petis, quod servi loquuntur, quod non eodem loco turba concionis est, et silentium solitudinis? In hoc habes aures, ut nisi modulata tantum et mollia, et ex dulci tracta compo sitaque accipient? Et risum audias oportet, et fletum; et blanditias, et lites; et prospera, et tristia; et homi-

num voces, et fremitus animalium latratusque. Quid miser expavescis ad clamorem servi, ad tinnitus aeris, ad ianuae impulsum? cum tam delicatus fures, tonitrua audienda sunt. Hoc quod de auribus dictum est, transfer ad oculos: qui non minus fastidio laborant, si male instituti sunt. macula offenduntur et fordibus, et argento parum splendido, et stagno non ad solem perlucente. Hi nempe oculi, qui non ferunt nisi varium ac recenti cura nitens marmor, qui mensam nisi crebris distinctam venis, qui nolunt domi nisi auro pretiosa calcare: aequissimo animo foris et scabras lutosasque semitas spectant, et maiorem partem occurrentium squalidam, parietes insularum exesos, ruinosos, inaequales.

XXXVI. Quid ergo aliud est quod illos in publico non offendat, domi moveat, quam opinio illuc aequa et patiens, domi morosa et querula? Omnes sensus perducendi sunt ad firmitatem. natura patientes sunt, si animus illos desit corrumpere: qui quotidie ad rationem reddendam vocandus est. Faciebat hoc Sextius, ut consummato die, cum se ad nocturnam quietem recepisset, interrogaret animum suum: Quod hodie malum tuum sanasti? cui vitio obstisti? qua parte melior es? Desinet ira, et erit moderationis, quae sciet sibi quotidie ad iudicem esse veniam. Quid ergo pulchrius hac consuetudine executiendi totum diem? qualis ille somnus post recognitionem sui sequitur? quam tranquillus, altus ac liber, cum aut laudatus est animus, aut admonitus, et speculator sui censorque secretus cognoscit de moribus suis? Utor hac potestate, et quotidie apud

me causam dico. cum sublatum e conspectu lumen est, et conticuit uxor moris iam mei conscientia, totum diem mecum scrutor, facta ac dicta mea remetior. Nihil mihi ipse abscondo, nihil transeo: quare enim quidquam ex erroribus meis timeam, cum possim dicere: Vide ne istud amplius facias, nunc tibi ignosco. In illa disputatione pugnacius locutus es: noli postea congregari cum imperitis. nolunt discere, qui nunquam didicerunt. Illum liberius admonuisti, quam debebas. itaque non emendasti, sed offendisti. de cetero vide, non tantum an verum sit quod dicis, sed an ille cui dicitur, veri patiens sit.

XXXVII. Admoneri bonus gaudet: pessimus quisque correptorem asperrime patitur. In convivio querundam te sales, et in dolorem tuum iacta verba testigerunt? vitare vulgares convictus memento. solutior est post vinum licentia, quia ne sobriis quidem pudor est. Iratum vidisti amicum tuum ostiario causidici alicuius, aut divitis, quod intrantem submovebat: et ipse pro illo iratus extremo mancipio fuisti. Irasceris ergo catenario cani? et hic cum multum latravit, obiecto cibo mansuescit. recede longius, et ride. Nunc iste aliquem se putat, quod custodit litigatorum turba limen obsessum. nunc ille qui intra iacet, felix fortunatusque est: et beati hominis iudicat ac potentis indicium, difficilem ianuam. nescit durissimum esse ostium carceris. Praesume animo, multa esse tibi patientia. Numquis se hieme algere miratur? numquis in mari naufragare, in via concuti? Fortis est animus, ad quae praeparatus venit. Minus honorato loco positus, irasci coepisti convivatori,

vocatori , ipsi qui tibi praeferebatur. Demens , quid interest , quam lecti premias partem? honestiorem te aut turpiorem potest facere pulvinus? Non aequis quendam oculis vidisti , quia de ingenio tuo male locutus est. Recipis hanc legem? ergo te Ennius , quo non delectaris , odisset : et Hortensius simultates tibi indicaret : et Cicero , si derideres carmina eius , inimicus esset.

XXXVIII. Vis tu aequo animo pati candidatus suffragia? Contumeliam tibi fecit aliquis. numquid maiorem quam Diogeni , philosopho Stoico? cui de ira cum maxime differenti , adolescens protervus inspuuit. tulit hoc ille leniter ac sapienter. Non quidem , inquit , irascor : sed dubito tamen , an irasci oporteat. Cato noster melius. cui cum causam agenti , in frontem medium quantum poterat attracta pingui saliva , inspuisset Lentulus , ille patrum nostrorum memoria factiosus et impotens , abstesit faciem , et , Affirmabo , inquit , omnibus , Lentule , falli eos , qui te negant os habere.

XXXIX. Contigit iam nobis , Novate , bene componere animum , si aut non sentit iracundiam , aut superior est. Videamus quomodo alienam iram leniamus. nec enim fani esse tantum volumus , sed sanare. Primam iram non audebimus oratione mulcere , surda est et amens : dabimus illi spatium. remedia in remissionibus profunt. nec oculos tumentes tentabimus , vim rigentem movendo incitaturi , nec cetera vitia dum fervent. Initia morborum quies curat. Quantulum , inquis , prodest remedium tuum , si sua sponte desinentem iram placat? Primum , ut citius desinat ,

efficit: deinde custodiet, ne recidat: ipsum quoque impetum, quem non audet lenire, fallet. Removebit omnia ultiōnis instrumenta. simulabit iram, ut tanquam adiutor, et doloris comes plus auctoritatis in consiliis habeat. moras necet: et dum maiorem quaerit poenam, praesentem differet: oīni arte requiem furori dabit. Si vehementior erit; aut pudorem illi cui non resistat, incutiet, aut metum. Si infirmior, sermones inferet, vel gratos, vel novos, et cupiditate cognoscendi avocabit. Medicum aiunt, cum regis filiam curare deberet, nec sine ferro posset, dum tumentem mammam leviter foveat, scalpellum spongia tectum induxisse. Repugnasset puebla remedio palam admoto: eadem, quia non exspectavit, dolorem tulit.

XL. Quaedam non nisi decepta sanantur. Alteri dices: Vide ne inimicis iracundia tua voluptati sit. Alteri: Vide ne magnitudo animi tui, creditumque apud plerosque robur, cadat. Indignor mehercule, et non invenio dolendi modum: sed tempus exspectandum est. dabit poenas. Serva istud in animo tuo, cum potueris, et pro mora reddes. Castigare vero irascentem, et ultro obirasci, incitare est. Varie aggredieris, blandeque: nisi forte tanta persona eris, ut possis iram comminuere: quemadmodum fecit divus Augustus, cum coenaret apud Vedium Pollionem. Fregerat unus ex servis eius crystallinum. rapi eum Vadius iussit, nec vulgari quidem periturum morte: muraenis obiici iubebatur, quas ingentes in piscina continebat. Quis non hoc illum putaret luxuriae causa facere? saevitia erat. Evasit e manibus puer, et con-

fugit ad Caesaris pedes : nihil aliud petiturus, quam ut aliter periret, nec esca fieret. Motus est novitate crudelitatis Caesar, et illum quidem mitti, crystallina autem omnia coram se frangi iussit, complerique piscinam. Fuit Caesari sic castigandus amicus : bene usus est viribus suis. E convivio rapi homines impellas, et novi generis poenis lacinari? si calix tuus fractus est, viscera hominis distrahentur? tantum tibi placebis, ut ibi aliquem duci iubeas, ubi Caesar est?

XLI. Si cui tantum potentiae est, ut iram ex superiori loco aggredi possit, male tractet. talem dum taxat, qualem modo retuli, feram, immanem, sanguinariam, quae iam insanabilis est, nisi maius aliquid extimuit. Pacem demus animo, quam dabit praceptorum salutarium astida meditatio, aetusque rerum boni, et intenta mens ad unius honesti cupiditatem. Conscientiae satis fiat. nil in famam laboremus : sequatur vel mala, dum bene merentes. At vulgus animosa miratur, et audaces in honore sunt : placidi pro inertibus habentar. Primo forsitan aspectu : sed simul ac aequalitas vitae fidem facit, non segnitiem illam animi esse, sed pacem, veneratur idem illos populus colitque. Nihil ergo habet in se utile taeter ille et hostilis affectus ; at omnia e contrario mala, ferrum, ignes : pudore calcato, caedibus inquinavit manus, membra liberorum dispersit. Nihil vacuum reliquit a scelere, non gloriae memor, non infamiae metuens, inemendabilis cum ex ira in odium occalluit.

XLII. Careamus hoc malo, purgemosque mentem, et extirpemus radicitus ea vitia, quae quam-

vis tenuia undecunque exierint, renascentur: et iram non temperemus, sed ex toto removeamus. Quod enim malae rei temperamentum est? poterimus autem, adnitamur modo. Nec ulla res magis proderit, quam cogitatio mortalitatis. sibi quisque ut alteri dicat: Quid iuvat, tanquam in aeternum genitos iras indicere, et brevissimam aetatem dissipare? quid iuvat, dies quos in voluptatem honestam impendere licet, in dolorem alicuius tormentumque transferre? Non capiunt res istae iaetoram, nec tempus vacat perdere. Quid ruimus in pugnam? quid certamina nobis arcessimus? quid imbecillitatis oblii, ingentia odia suscipimus, et ad frangendum fragiles consurgimus? Iam istas inimicitias, quas implacabili gerimus animo, febris aut aliud malum corporis vetabit geri. iam par acerrimum media mors dirimet. Quid tumultuamur, et vitam seditiosi conturbamus? stat super caput fatum, et pereuntes dies imputat, propiusque ac proprius accedit. Istud tempus, quod alienae destinas morti, fortasse circa tuam est.

XLIII. Quin potius vitam brevem colligis, placidamque et tibi et ceteris praestas? quin potius amabilem te, dum vivis, omnibus: desiderabilem, cum excesseris, reddis? Et quid illum, nimis ex alto tecum agentem, detrahere cupis? quid illum oblatrantem tibi, humilem quidem et contemptum, sed superioribus acidum ac molestum, exterrere viribus tuis tentas? Quid servo? quid domino? quid regi? quid clienti tuo irasceris? sustine paulum. venit ecce mors, quae nos pares faciat. Ridere solemus inter matutina harenae spectacula, tauri et ursi pugnam inter se col-

ligatorum : quos , cum alter alterum vexarit , suus confector exspectat . Idem facimus . aliquem nobiscum alligatum lacesimus : cum vieto victorie finis , et quidem matutinus , immineat . Quieti potius , pacatique , quantulumcunque superest , exigamus . nulli cadaver nostrum iaceat invisum . Saepe rixam clamatum in vicino incendium solvit : et interventus ferae , latronem viatoremque diducit . Colluctari cum minoribus malis non vacat , ubi metus maior apparet . Quid nobis cum dimicatione et insidiis ? numquid amplius isti cui irasceris , quam mortem optas ? etiam te quiescente morietur . perdis operam : facere vis , quod futurum est . Nolo , inquis , utique occidere , sed exsilio , sed ignominia , sed damno afficere . Magis ignosco ei , qui vulnus inimici , quam qui pulsulam concupiscit . hic enim non tantum mali animi est , sed pusilli . Sive de ultimis suppliciis cogitas , sive de levioribus ; quantulum est temporis , quo aut ille poena sua torqueatur , aut tu malum gaudium ex aliena percipias ? Iam ipsum spiritum exspuimus , interim dum trahimus . Dum inter homines sumus , collamus humanitatem : non timori cuiquam , non periculo sumus : detrimenta , iniurias , convicia , vellificationes contemnamus , et magno animo brevia feramus incommoda . Dum respicimus , quod aiunt , versamusque nos , iam mortalitas aderit .

L. ANNAEI SENECAE
AD HELVIAM MATREM
DE CONSOLATIONE
LIBER UNUS.



L. ANNAEI SENECAE
 AD HELVIAM MATREM
 DE CONSOLATIONE
 LIBER UNUS.

Argumentum & Ordo.

Scriptus hic libellus in exilio, quod primo imperii Claudiani anno (Urbis DCCXCIV) subiit, faciente impura illa Messalina. Haec omnium virorum mulier, adulterium Iuliae Germanici filiae obiecit: eique Senecam innexuit. Diximus in eius Vita. Iam ergo in Corsica relegatus, matrem solatur, et ostendit se casum hunc fortiter ferre, atque ipsam debere. Scriptus non statim initio exsili (quod Praefatio dicit) sed extremo primo anno, aut initio sequentis: ac scriptus iam in aevi et ingenii vigore ac labore, annos natus paulo plus quadraginta. Itaque scriptum ipsum tale est, animi et eloquentiae plenum, numeris & structura compositum, atque etiam ordine praeter cetera dispositum. Ausim dicere, palmam inter libellos poscit. Consolationis autem duo capita facit: Neque meo nomine dolere, neque tuo debes. Non Meo. nam nihil mihi mali est. quae vulgus putat, Loci mutatio, Paupertas, Ignominia, Contemptus, non sunt Mala: atque id ordine ostendit, ad Cap. XIV. Non etiam Tuo debes. nam duo sunt quae affligere te possint: vel, quod Praesidium aliquod in me amiseris, vel, quod Desiderium mei ferre non possis. Prius in te non cadit, quae ambitione non es, nec gratiam aut potentiam filiorum unquam ostentasti. Non debet item alterum: quia supra sexum tuum fortis semper fuisti. Multa mala tolerasti, hoc etiam fer. Confer te ad Sapientiae studia, quae iuvabunt: verte ad fratres meos, et ex his et me nepotes: non es deserta. Officia et oblec-

tamenta isti dabunt. Verte etiam ad sororem tuam, quae solazium erit, & exemplum. Atque in eius laudibus libelli finis. Carmina hic visum praescribere, quae Senecae tribuuntur, certe exsilium eius tangunt. Sive ab ipso igitur, sive de ipso scripta, ad argumentum & lucem libelli spectant.

L. ANNAEI SENECAE

EPIGRAMMATA SUPER EXSILIO.

I. AD CORSICAM.

CORSICA Phocaico tellus habitata colono,
Corsica, quae Graio nomine Cyrrus eras;
Corsica Sardinia brevior, porrectior Ilva:
Corsica piscoxis pervia fluminibus;
Corsica terribilis, cum primum incanduit aestas:
Saevior, ostendit cum ferus ora Canis:
Parce relegatis, hoc est, iam parce sepultis.
Vivorum cineri sit tua terra levis.

II. D E E A D E M.

Barbara praeruptis inclusa est Corsica faxis:
. Horrida, desertis undique vasta locis.
Non poma Autumnus, segetes non educat Aestas:
Canaque Palladio munere Bruma caret:
Umbrarum nullo Ver est laetabile foetu,
Nullaque in infasto nascitur herba solo:
Non panis, non haustus aquae, non ultimus ignis:
Hic sola haec duo sunt, exful, et exsilium.

III. Q U E R E L A.

Occisi ingulum quisquis scrutaris amici,

Tu miserum necdum me fatis esse putas.
 Desere confossum. victori vulnus iniquo
 Mortiferum impressit mortua saepe manus.

IV.

I T E M.

Quisquis es, et nomen dicam? dolor omnia cogit,
 Qui nostrum cinerem nunc, inimice, prenis:
 Et non contentus tantis, subitisque ruinis,
 Stringis in extinctum tela cruenta caput.
 Crede mihi, vires aliquas Natura sepulcris
 Attribuit: tumulos vindicat umbra suos.
 Ipsos crede Deos hoc nunc tibi dicere, Livor,
 Hoc tibi nunc Manes dicere crede meos:
 Res est sacra, miser. Noli mea tangere fata.
 Sacrilegæ bustis abstinuere manus.

V.

I T E M.

Carmina mortifero tua sunt suffusa veneno;
 Et sunt carminibus pectora nigra magis.
 Nemo tuos fugiat, non vir, non femina, dentes,
 Haud puer, haud aetas undique tuta senis.
 Utque furens totas immittit saxa per urbes:
 In populum sic tu verba maligna iacis.
 Sed solet insanos populus compescere sanus:
 Et repetunt motum saxa remissa caput.
 In te nunc stringit nullus non carmina vates,
 Inque tuam rabiem publica Musa fuit.
 Dum sua compositus nondum bene concutit arma
 Miles, et e nostra lancea torta manu:
 Bellus homo, et valide capitalia crimina ludis:
 Deque tuis manant atra venena iocis.

Sed tu perque iocum dicis vinumque, quid ad rem,
 Si plorem? risus si tuus ista facit?
 Quare tolle iocos, non est iocus esse malignum.
 Nunquam sunt grati, qui nocuere sales.

VI. A D A M I C U M.

Crispe, meae vires, lassarumque ancora rerum:
 Crispe vel antiquo conspicie de foro:
 Crispe potens nunquam, nisi cum prodeesse volebas:
 Naufragio litus, tutaque terra meo.
 Solus honor nobis, arx et tutissima nobis:
 Et nunc afflito sola quies animo.
 Crispe, fides dulcis, placidique acerrima virtus,
 Cuius Cecropio pectora melle madent.
 Maxima facundo vel avo, vel gloria patri:
 Quo solo careat, si quis in exsilio est.
 At mea Cyrnaeae saxis telluris adhaerens
 Mens tecum est, nulla quae cohibetur humo.

VII. DE QUALITATE TEMPORIS.

Omnia tempus edax depascitur, omnia carpit,
 Omnia sede movet, nil sinit esse diu.
 Flumina deficiunt, profugum mare litora siccatur,
 Subsidunt montes, et iuga celsa ruunt.
 Quid tam parva loquor? moles pulcherrima coeli
 Ardebit flammis tota repente suis.
 Omnia mors poscit. Lex est, non poena, perire,
 Hic aliquo mundus tempore nullus erit.

VIII. V O T U M.

Sic mihi sit frater, maiorque, minorque, superstes,

Et de me doleant nil, nisi morte mea.
 Sic illos vincam, sic vincar rursus amando :
 Mutuuus inter nos sic bene certet amor.
 Sic dulci Marcus qui nunc sermone ffitinnit,
 Facundo patruos provocet ore duos.

Haec in schedis Pythoeanis palam Seneca adscribuntur: est et aliud, quod ob argumenti similitudinem viri doctri pariter assignant.

IX. A D C O R D U B A M,

Corduba solve comas, et tristes indue vultus :
 Inlacrimans cineri munera mitte meo.
 Nunc longinqua tuum deplora, Corduba, vatem :
 Corduba non alio tempore moesta magis.
 Tempore non alio, quo versis viribus Orbis,
 Incubuit belli tota ruina tibi.
 Cum geminis oppressa malis utrimque peribas :
 Et tibi Pompeius, Caesar et hostis erat.
 Tempore non alio, quo ter tibi funera centum
 Heu nox una dedit, quae tibi summa fuit.
 Non, Lusitanus quateret cum moenia latro,
 Figeret et portas lancea torta tuas.
 Ille tuus quondam magnus, tua gloria, civis
 Infigat scopulo. Corduba, solve comas,
 Et gratare tibi, quod te Natura supremo
 Alluit Oceano : tardius ista doles.

I. **S**AEPE iam, mater optima, impetum cepi consolandi te, saepe continui. Ut auderem, multa me impellebant. primum, videbar depositurus omnia in-

commoda , cum lacrimas tuas , etiam si supprimere non potuisssem , interim certe absterrissem. deinde , plus habiturum me auctoritatis non dubitabam ad excitandam te , si prior ipse consurrexissem. praeterea timebam , ne a me non victa fortuna aliquem meorum vinceret. Itaque utcunque conabar , manu super plagam meam imposta , ad obliganda vulnera vestra reptare. Hoc propositum meum erant rursus quae retardarent. Dolori tuo , dum recens faeviret , sciebam occurrentum non esse , ne illum ipsa solatia irritarent , et accenderent. nam in morbis queque nihil est perniciosius , quam immatura medicina. Exspectabam itaque dum ipse vires suas frangeret , et ad sustinenda remedia mora mitigatus , tangi se ac tractari pateretur. Praeterea , cum omnia clarissimorum ingeniorum monumenta , ad compescendos moderandosque luctus composita evolverem , non inveniebam exemplum eius , qui consolatus suos esset , cum ipse ab illis comploraretur. Ita in re nova haesitabam , verebarque , ne haec non consolatio , sed exulceratio esset. Quid quod novis verbis , nec ex vulgari et quotidiana summis allocutione , opus erat homini ad consolandos suos ex ipso rogo caput allevanti? Omnis autem magnitudo doloris modum excedentis necesse est dilectum verborum eripiat , cum saepe vocem quoque ipsam intercludat. Utcunque connitar , non fiducia ingenii , sed quia possum instar efficacissimae consolationis esse consolator. Cui nihil negares , huic hoc utique te non esse negaturam (licet omnis moeror contumax sit) spero , ut desiderio tuo velis a me modum statui.

II. Vide quantum de indulgentia tua promiserim mihi : potentiores me futurum apud te non dubito , quam dolorem tuum , quo nihil est apud miseros potentius. Itaque ne statim cum eo concurram , adero prius illi , et quibus excitetur, ingeram : omnia proferam, et rescindam quae iam obducta sunt. Dicet aliquis : Quod hoc genus est consolandi , obliterata mala revocare , et animum in omnium aerumnarum suarum conspectu collocare , vix unius patientem? Sed is cogitet , quaecunque usque eo perniciosa sunt , ut contra remedium convaluerint , plerumque contrariis curari. Omnes itaque luctus illi suos , omnia lugubria admovebo. hoc erit non molli via mederi , sed urere ac secare. Quid consequar ut pudeat animum , tot miseriarum victorem , aegre ferre unum vulnus in corpore tam cicatricoso. Fleant itaque diutius , et gemant , quorum delicatas mentes enervavit longa felicitas , et ad levissimarum iuriarum motus collabantur : at quorum omnes anni per calamitates transferunt , gravissima quoque forti et immobili constantia perferant. Unum habet assidua infelicitas borum , quod quos saepe vexat , novissime indurat. Nullam tibi fortuna vacationem dedit a gravissimis luctibus : ne natalem quidem tuum exceptit. Amisi di matrem statim nata , immo dum nascereris : et ad vitam quodammodo exposita es. Crevisti sub noverca : quam tu quidem omni obsequio , et pietate , quanta vel in filia conspici potest , matrem sibi coegeristi : nulli tamen non magno constituit et bona noverca. Avunculum indulgentissimum , optimum ac fortissimum virum , cum adventum eius

exspectares, amisisti. Et ne saevitiam suam fortuna leviorem diducendo faceret, intra tricesimum diem, carissimum virum tuum, ex quo mater trium liberorum eras, extulisti. Lugenti tibi luctus nuntiatus est, omnibus quidem absentibus liberis: quasi de industria in id tempus conie&atis malis tuis, ut nihil esset ubi se dolor tuus reclinaret. Transeo tot pericula, tot metus, quos sine intervallo in te incurantes pertulisti: modo in eundem sinum, ex quo tres nepotes emiseras, offa trium nepotum recepisti. Intra vice-simum diem, quam filium meum in manibus et in osculis tuis mortuum funeraveras, raptum me audiisti. hoc adhuc defuerat tibi, lugere vivos.

III. Gravissimum est ex omnibus, quae unquam in corpus tuum descenderunt, recens vulnus: fateor. non summam cutem rupit: pectus et viscera ipsa divisit. Sed quemadmodum tirones leviter faucri tamen vociferantur, et manus medicorum magis, quam ferrum horrent: at veterani, quamvis confossi, patienter ac sine gemitu, velut aliena corpora, exsecari patiuntur: ita tu nunc debes te fortiter praebere curationi. Lamentationes quidem et ululatus, et alia per quae fere muliebris dolor tumultuatur, amove. perdidisti enim tot mala, si nondum misera esse didicisti. Ecquid videor tecum timide egisse? nil tibi subduxi ex malis tuis, sed omnia coacervata ante te posui. Magno id animo feci: constitui enim vincere dolorem tuum, non circumscribere.

IV. Vincam autem, puto: primum si ostendero nihil me pati, propter quod possim dici miser, ne-

dum propter quod miseros etiam, quos contingo, faciam: deinde si ad te transiero, et probavero, neutrām quidem gravem esse fortunam, quae tota ex mea penderet. Hoc prius aggrediar, quod pietas tua audire gestit, nihil mali esse mihi: si potero, ipsas res quibus me putas premi, non esse intolerabiles, faciam manifestum. Sin id credi non potuerit: at ego mihi ipse magis placebo, quod inter eas res beatus ero, quae miseros solent facere. Non est quod de me aliis credas: ipse tibi, ne quid incertis opinionibus perturberis, indico me non esse miserum. Adiiciam, quo securior sis, nec fieri quidem posse miserum.

V. Bona conditione conditi sumus, si eam non deseruerimus. Id egit rerum natura, ut ad bene vivendum non magno apparatu opus esset: unusquisque facere se beatum potest. Leve momentum in adventitiis rebus est, et quod in neutrām partem magnas vires habeat: nec secunda sapientem evenunt, nec adversa demittunt. Laboravit enim semper, ut in se plurimum poneret, intra se omne gaudium peteret. Quid ergo? sapientem me esse dico? minime. nam id quidem si profiteri possem, non tantum negarem miserum me esse, sed omnium fortunatissimum, et in vicinum Deo perductum praedicarem. Nunc, quod satis est ad omnes miseras leniendas, sapientibus viris me dedi; et nondum in auxilium mei validus, in aliena castra consugi, eorum scilicet, qui facile se et sua tuentur. Illi me iusserunt stare assidue, velut in praesidio positum, et omnes conatus fortunae, et omnes impetus prospicere multo ante quam incurvant. Illis gravis est,

quibus est repentina : facile eam sustinet , qui semper exspectat . Nam et hostium adventus eos prosternit , quos inopinatae occupavit : at qui futuro se bello ante bellum paraverunt , compositi et aptati , primum , qui tumultuosissimus est , ictum facile excipiunt . Nunquam ego fortunae credidi , etiam si vis deretur pacem agere : omnia illa , quae in me indulgentissime conferebat , pecuniam , honores , gloriam , eoque loco posui , unde posset ea sine motu meo repeterc . Intervallum inter me et illa magnum habui . itaque abstulit illa , non avulsit . Neminem aduersa fortuna commiruit , nisi quem secunda decepit . Illi qui munera eius velut sua et perpetua amaverunt , qui se propter illa suspici voluerunt , iacent et moerent , cum vanos et pueriles animos , omnis solidae voluptatis ignaros , falsa et mobilia oblectamenta destruunt . At ille qui se laetis rebus non inflavit , nec mutatis contrahit ; adversus utrumque statum invictum animum tenet , exploratae iam firmitatis . nam in ipsa felicitate , quid contra infelicitatem valeret , expertus est . Itaque ego in illis quae omnes optant , existimavi semper , nihil veri boni inesse : quin inania , et specioso ac decepturo fuco circumlitia inveni , intra nihil habentia fronti suae simile . Nam in illis quae mala vocantur , nihil tam terribile ac durum invenio , quam opinio vulgi minabatur . verbum quidem ipsum , persuasione quadam et consensu , iam asperius ad aures venit , et audientes tanquam triste et execrabile ferit : ita enim populus iussit : sed populi scita ex magna parte sapientes abrogant .

VI. Remoto igitur iudicio plurium, quos prima reruin facies, utcunque credita est, aufert, videamus quid sit exsiliū. nempe, loci commutatio est. Angustare ne videamur vim eius, et quidquid pessimum in se habet, subtrahere: hanc commutationem loci sequuntur incommoda, paupertas, ignominia, contemtus. Adversus ista postea configam: interim primum illud intueri volo, quid acerbi afferrat ipsa loci commutatio. Carere patria, intolerabile est. Aspice agendum hanc frequentiam, cui vix urbis immensae tecta sufficiunt. maxima pars illius turbae patria caret: ex municipiis et coloniis suis, ex toto denique orbe terrarum confluxerunt. Alios adducit ambitio, alios necessitas officii publici, alios imposita legatio, alios luxuria, opulentum et opportunum vitiis locum quaerens: alios liberalium studiorum cupiditas, alios spectacula: quosdam traxit amicitia, quosdam industria, latam ostendendae virtuti naeta materiam: quidam venalem formam attulerunt, quidam venalem eloquentiam. Nullum non hominum genus concurrevit in urbem, et virtutibus et vitiis magna pretia ponentem. Iube omnes istos ad nomen citari, et, Unde domo quisque fit, quare: videbis maiorem partem esse, quae relictis sedibus suis, venerit in maximam quidem ac pulcherrimam urbem, non tamen suam. Deinde ab hac civitate discede, quae velut communis patria potest dici: omnes urbes circumi, nulla non magnam partem peregrinae multitudinis habet. Nunc transi ab iis, quarum amoena positio, et opportunitas regionis plures allicit: deserta loca, et asperrimas insu-

las, Sciathum et Seriphum, Gyrum, et Cosuram pete. nullum invenies exsilio, in quo non aliquis amici causa moretur. Quid tam nudum inventari potest, quid tam abruptum undique, quam hoc faxum? quid ad copias respicienti ieunius? quid ad homines immanisius? quid ad ipsum loci situm horribilius? quid ad coeli naturam intemperatus? plures tamen hic peregrini, quam cives consistunt. Usque eo ergo commutatio ipsa locorum gravis non est, ut hic quoque locus a patria quosdam abduxerit. Invenio qui dicant, inesse naturalem quandam animis irritationem commutandi sedes, et transference domicia. Mobilis enim et inquieta mens homini data est: nunquam se tenet: spargitur, et cogitationes suas in omnia nota atque ignota dimittit, vaga, et quietis impatiens, et novitate rerum laetissima. Quod non miraberis, si primam eius originem adspexeris. Non ex terreno et gravi concreta corpore: ex illo coelesti spiritu descendit. coelestium autem natura semper in motu est: fugit, et velocissimo cursu agitur. Adspice sidera mundum illustrantia: nullum eorum perstat. labitur assidue, et locum ex loco mutat: quamvis cum universo vertatur, in contrarium nihilominus ipsi mundo referuntur: per omnes signorum partes discurrunt; perpetua eius agitatio, et aliunde alio commigratio est. Omnia volvuntur semper, in transitu sunt, et ut lex et naturae necessitas ordinavit, aliunde alio deferuntur. Cum per certa annorum spatia orbes suos explicuerint, iterum ibunt per quae venerant. I nunc, et animum humanum, ex iisdem quibus divina

constant compositum feminibus, moleste ferre puta transitum ac migrationem: cum Dei natura, aſfidua et citatissima commutatione, vel delectet ſe, vel conſervet. A coeleſtibus, agedum, te ad humana converte. videbis gentes, populosque mutaſſe ſedem. Quid ſibi volunt in mediis Barbarorum regionibus Graecae urbes? quid inter Indos Persasque Macedonicus fermo? Scythia, et totus ille ferarum indomitarumque gentium tractus, civitates Achaiae Ponticis imposita litoribus oſtentat. Non perpetuae hiemis faevitia, non hominum ingenia, ad ſimilitudinem coeli ſui horrentia, transferentibus domus suas obſtiterunt. Atheniensis in Asia turba eſt: Miletus LXXV urbium populum in diversa effudit: totum Italiae latus, quod infero mari alluitur, maior Graecia fuit. Tuscos Asia ſibi vindicat: Tyrii Africam incolunt: Hispaniam Poeni: Graeci ſe in Galliam immiferunt, in Graeciam Galli: Pyrenaeus Germanorum transitus non inhibuit: per invia, per incognita versavit ſe humana levitas. Liberos, coniugesque, et graves ſenio parentes traxerunt. Alii longo errore iactati, non iudicio elegerunt locum, ſed laſſitudine proximum occupaverunt: alii armis ſibi ius in aliena terra fecerunt; quasdam gentes, cum ignota peterent, mare haufit, quaedam ibi confederunt, ubi illas rerum inopia depositiſt. Nec omnibus eadem cauſa relinquendi quaerendique patriam fuit. Alios excidia urbium fuarum, hostilibus armis elapſos, in aliena, ſpoliatos ſuis, expulerunt: alios domēſtica ſeditio ſubmovit: alios nimia ſuperfluentis populi frequentia, ad exonerandas vires, emiſit:

alios pestilentia , aut frequens terrarum hiatus , aut aliqua intoleranda infelicis soli vitia eiecerunt : quos-dam fertilis orae , et in maius laudatae , fama corrupit : alios alia causa excivit domibus suis. Illud itaque est manifestum , nihil eodem loco mansisse , quo genitum est . assiduus humani generis discursus est . quotidie aliquid in tam magno orbe mutatur . Nova urbium fundamenta iaciuntur : nova gentium nomina , extintis prioribus , aut in accessionem validioris conversis , oriuntur . Omnes autem istae populorum transportationes , quid aliud , quam publica exsilia sunt ?

VII. Quid tam longo te circuitu traho ? quid interest enumerare Antenorem Patavii conditorem , et Evandrum in ripa Tiberis regna Arcadum collocan-tēm ? quid Diomedem , aliasque quos Troianum bellum , viatos simul viatoresque , per alienas terras dis-pavit ? Romanum imperium nempe auctorem ex-fulem respicit : quem profugum , capta patria , exiguas reliquias trahentem , necessitas et viatoris me-tus , longinqua quaerentem , in Italiam detulit . Hic deinde populus quot colonias in omnes provincias misit ? ubicunque vicit Romanus , habitat . Ad hanc commutationem locorum libentes nomina dabant , et relictis aris suis trans maria sequebatur colonus senex .

VIII. Res quidem non desiderat plurium enumera-tionem : unum tamen adiiciam , quod in oculos se in-gerit . Haec ipsa insula saepe iam cultores mutavit . Ut antiquiora quae vetustas obduxit , transeam , Pho-cide relicta , Graii qui nunc Massiliam colunt , prius

in hac insula confederunt. Ex qua quid eos fugaverit, incertum est: utrum coeli gravitas, an praepotentis Italiae conspectus, an natura importuosi maris. nam in causa non fuisse feritatem accolarum, eo apparet, quod maxime tunc trucibus et inconditis Galliae populis se interposuerunt. Transferunt deinde Ligures in eam, transferunt et Hispani, quod ex similitudine ritus apparet. eadem enim tegumenta caputum, idemque genus calceamenti, quod Cantabris est, et verba quaedam. nam totus sermo, conversatione Graecorum Ligurumque, a patrio descivit. Deductae deinde sunt duae civium Romanorum coloniae: altera a Mario, altera a Sylla. Toties huius aridi et spinosi faxi mutatus est populus. Vix denique invenies ullam terram, quam etiam nunc indigenae colant. permixta omnia et infinita sunt: alius alii successit. Hic concupivit, quod alii fastidio fuit: ille unde expulerat, electus est. Ita fato placuit, nullius rei eodem semper loco stare fortunam. Adversus ipsam mutationem locorum, detractis ceteris incommidis quae exsilio adhaerent, satis hoc remedii putat Varro, doctissimus Romanorum, quod quocunque venimus, eadem rerum natura utendum est. M. Brutus satis hoc putat, quod licet in exsiliis euntibus virtutes suas ferre secum. Haec etiam si quis singula parum iudicat efficacia ad consolandum exsulem, utraque in unum collata fatebitur plurimum posse. Quantulum enim est, quod perdidimus? duo quae pulcherrima sunt, quocunque nos moverimus, sequentur: natura communis, et propria virtus. Id actum est, mihi crede, ab illo, quisquis formator

universi fuit, sive ille Deus est potens omnium, sive incorporalis ratio ingentium operum artifex, sive divinus spiritus, per omnia maxima minima, aequali intentione diffusus, sive fatum et immutabilis causarum inter se cohaerentium series: id, inquam, actum est, ut in alienum arbitrium, nisi vilissima quaeque, non caderent. Quidquid optimum homini est, id extra humanam potentiam iacet: nec dari, nec eripi potest. Mundus hic, quo nihil neque maius, neque ornatius, rerum Natura genuit: animus contemplator, admiratorque mundi, pars eius magnificentissima, propria nobis et perpetua, tamdiu nobiscum mansura, quamdiu ipsi manebimus. Alacres itaque et erecti, quocunque res tulerit, intrepido gradu propereamus.

IX. Emetiamur quascunque terras, nullam invenire intra mundum est alienam nobis. undecunque ex aequo ad coelum erigitur acies: paribus intervallis omnia divina ab omnibus humanis distant. Proinde dum oculi mei ab illo spectaculo, cuius insatiables sunt, non abducantur, dum mihi lunam soleisque intueri liceat, dum ceteris inhaerere sideribus, dum ortus eorum, occasus, intervallaque, et causas investigare velocius meandi, vel tardius, spectare tot per noctem stellas micantes, et alias immobiles, alias non in magnum spatium exeuntes, sed intra suum se circumgentes vestigium, quasdam subito erumpentes, quasdam igne fuso perstringentes aciem, quasi decidant, vel longo tractu cum luce multa praetervolantes; dum cum his sim, et coelestibus, qua homini fas est, immiscear; duni animum,

ad cognatarum rerum conspectum tendentem, in sublimi semper habeam: quantum refert mea, quid calcem? At non est haec terra frugiferarum aut laetarum arborum ferax: non magnis et navigabilibus fluminum alveis irrigatur: nihil gignit, quod aliae gentes petant, vix ad tutelam incolentium fertilis: non pretiosus hic lapis caeditur, non auri argenteique venae eruuntur. Angustus animus est, quem terrena delectant. ad illa abducendus est, quae ubique aequa apparent, ubique aequa splendent: et hoc cogitandum est, ista veris bonis per falsa et prave credita obstat. Quo longiores porticus expediunt, quo altius turres sustulerint, quo latius vicos porrexerint, quo depresso aestivos specus foderint, quo maiori mole fastigia coenationum subvexerint: hoc plus erit, quod illis coelum abscondat. In eam te regionem casus eiecit, in qua latissimum receptaculum casa est. Nae tu pusilli animi es, et sordide se consolantis, si ideo id fortiter pateris, quia Romuli casam nosti. Dic illud potius: Istud humile tugurium nempe virtutes recipit. iam omnibus templis formosius erit, cum illic iustitia conspecta fuerit, cum continentia, cum prudentia, pietas, omnium officiorum recte dispensandorum ratio, humanorum divinorumque scientia. Nullus angustus est locus, qui hanc tam magnarum virtutum turbam capit: nullum exsiliū grave est, in quo licet cum hoc ire comitatu. Brutus in eo libro, quem de Virtute composuit, ait, se vidisse Marcellum Mitylenis exsulantem, et, quantum modo natura hominis pateretur, beatissime viventem, neque unquam bonarum artium cupidorem, quam illo

tempore. Itaque adiicit, visum sibi se magis in exsilium ire, qui sine illo redditurus esset, quam illum in exilio relinquere. O fortunatiorem Marcellum, eo tempore, quo exsilium suum Brutus approbavit, quam quo reipublicae consulatum! Quantus vir ille fuit, qui effecit, ut aliquis exsul sibi videretur, quod ab exsule recederet? qui in admirationem sui abduxit hominem, etiam Catoni suo mirandum? Idem Brutus ait, C. Caesarem Mitylenas praetervectum, quia non sustineret videre deformatum virum. Illi quidem redditum impetravit Senatus, publicis precibus, tam sollicitus ac moestus, ut omnes illo die Bruti habere animum viderentur, et non pro Marcello, sed pro se deprecari, ne exsules essent, si sine illo fuissent: sed plus multo consecutus est, quo die illum exsulem Brutus relinquere non potuit, Caesar videre. Contigit enim illi testimonium utriusque. Brutus sine Marcello reverti se doluit: Caesar erubuit. Num dubitas, quin ille tantus vir, sic ad tolerandum aequo animo exsilium se ipse adhortatus sit? Quod patria cares, non est miserum. Ita te disciplinis imbuisti, ut scires omnem locum sapienti viro patriam esse. Quid porro? hic qui te expulit, non ipse per annos decem continuos patria caruit? propagandi sine dubio imperii causa: sed nempe caruit. nunc ecce trahit illum ad se Africa resurgentis belli minis plena, trahit Hispania, quae fractas et afflitas partes refovet, trahit Aegyptus infida, totus denique orbis, qui ad occasionem concussi imperii intentus est. Cui primum rei occurret? cui parti se opponet? Aget illum per omnes terras victoria sua. Illum suspiciant et co-

lant gentes : tu vive Bruto miratore contentus. Benē ergo exsilium tulit Marcellus : nec quidquam in animo eius mutavit loci mutatio , quamvis eam paupertas sequeretur. in qua nihil mali esse , quisquis modo nondum pervenit in infaniam omnia subvertentis avaritiae atque luxuriae , intelligit. Quantulum est enim , quod in tutelam homini necessarium sit ? et cui deesse hoc potest , ullam modo virtutem habenti ? Quod ad me quidem pertinet , intelligo me non opes , sed occupationes perdidisse. corporis exigua desideria sunt : frigus submovere vult , alimentis famem ac sitiū extinguere : quidquid extra concupiscitur , vitiis , non usibus laboratur. Non est necesse omne perscrutari profundum , nec strage animalium ventrem onerare , nec conchylia ultimi maris ex ignoto litore eruere. Dii istos deaeque perdant , quorum luxuria tam invidiosi imperii fines transcendit. Ultra Phasim capi volunt , quod ambitiosam popinam instruat : nec piget a Parthis , a quibus nondum poenas repetimus , aves petere. Undique convehunt omnia nota fastidienti gulæ. Quod dissolutus deliciis stomachus vix admittat , ab ultimo portatur Oceano. Vomunt ut edant , edunt ut vomant : et epulas , quas toto orbe conquirunt , nec concoquere dignantur. Ista si quis despicit , quid illi paupertas nocet ? si quis concupiscit , illi paupertas etiam prodest. Invitus enim sanatur : et si remedia ne coactus quidem recipit , interim certe dum non potest , nolenti similis est. C. Caesar , quem mihi videtur rerum natura edidisse , ut ostenderet quid summa vitia in summa fortuna possent , centies festertio coenavit uno die : et in hoc omnium

adiutus ingenio , vix tamen invenit, quomodo trium provinciarum tributum una coena fieret. O miserabiles, quorum palatum nisi ad pretiosos cibos non excitatur ! pretiosos autem , non eximius sapor aut aliqua faucium dulcedo, sed raritas et difficultas parandi facit. Alioquin si ad sanam illis mentem placeat reverti, quid opus est tot artibus ventri servientibus ? quid mercaturis ? quid vastatione silvarum ? quid profundi perscrutatione ? passim iacent alimenta , quae rerum natura omnibus locis deposita. sed haec velut caeci transeunt , et omnes regiones perva- gantur , maria traiiciunt , et cum famem exiguo pos- fint sedare , magno irritant.

X. Libet dicere : Quid deducitis naves? quid manus et adversus feras et adversus homines armatis ? quid tanto tumultu discurritis ? quid opes opibus ageritis ? non vultis cogitare , quam parva vobis cor- pora sint ? Nonne furor et ultimus mentium error est, cum tam exiguum capias , cupere multum ? Li- cet itaque augeatis census , promoveatis fines : nun- quam tamen corpora vestra laxabitis. Cum bene ces- ferit negotiatio , multum militia retulerit; cum inda- gati undique cibi coierint , non habebitis ubi istos apparatus vestros collogetis. Quid tam multa con- quiritis? Scilicet maiores nostri, quorum virtus etiam nunc vitia nostra sustentat , infelices erant , qui sibi manu sua parabant cibum : quibus terra cubile erat : quorum tecta nondum auro fulgebant : quorum tem- pla nondum gemmis nitebant. Itaque tunc per fictiles deos religiose iurabatur : qui illos invocaverant , ad hostem morituri , ne fallerent , redibant. Scilicet

minus beatè vivebat dictator noster, qui Samnitum legatos audit, cum vilissimum cibum in foco ipse manu sua versaret, illa, qua iam saepe hostem percusserat, laureamque in Capitolini Iovis gremio reposuerat, quam Apicius nostra memoria vixit! qui in ea urbe, ex qua aliquando philosophi, velut corruptores iuventutis, abire iussi sunt, scientiam popinae professus, disciplina sua seculum infecit: cuius exitum nosse operae pretium est. Cum festertium millies in culinam congesisset, cum tot congiaria principum, et ingens Capitolii vestigal singulis commessionibus exsorpsisset; aere alieno oppressus, rationes suas tunc primum coactus inspexit. superfuturum sibi festertium centies computavit: et velut in ultima fame victurus, si in festertio centies vixisset, veneno vitam finivit. Quanta luxuria erat, cui festertium centies egestas fuit? I nunc, et puta pecuniae modum ad rem pertinere, non animi.

XI. Festertium centies aliquis extimuit: et quod alii voto petunt, veneno fugit. illi vero tam pravae mentis homini ultima potio saluberrima fuit. Tunc venena edebat bibebatque, cum immensis epulis non delectaretur tantum, sed gloriaretur, cum virtus sua ostentaret, cum civitatem in luxuriam suam converteret, cum iuventutem ad imitationem sui solicitaret, etiam sine malis exemplis per se docilem. Haec accidentum divitias non ad rationem revocantibus, cuius certi sunt fines: sed ad vitiosam consuetudinem, cuius immensum et incomprehensibile arbitrium est. Cupiditati nihil satis est: naturae satis est etiam pa- rum. Nullum ergo paupertas exfulis incommodum

habet: nullum enim tam inops exsiliū est, quod non alendo homini abunde fertile sit. An vestem, an domum desideraturus est exsul? Si haec quoque ad usum tantum desiderabit, neque tectum ei deerit, neque velamen. aequē enim exiguo tegitur corpus, quam alitur. nihil homini natura, quod necessarium faciebat, fecit operosum. Si desiderat saturatam multo conchylio purpuram, intextam auro, variisque coloribus distinctam et artibus; non fortunae iste vitio, sed suo pauper est. etiam si illi, quidquid amisit, restitueris, nihil ages. plus enim restituto deerit ex eo quod cupid, quam exsuli ex eo quod habuit. Si desiderat aureis fulgentem vasis supellecīlem, et antiquis nominibus artificum argentum nobile, aes paucorum infania pretiosum, et servorum turbam, quae quamvis magnam domum angustet, iumentorum corpora differta et coacta pingue scere, et nationum omnium lapides: ista congerantur licet, nunquam explebunt inexplebilem animū. non magis, quam illus sufficiet humor ad satiandum eum, cuius desiderium non ex inopia, sed ex aestu ardentiū viscerum oritur. non enim sitis illa, sed morbus est. Nec hoc in pecunia tantum, aut alimentis evenit; eadem natura est in omni desiderio, quod non ex inopia, sed ex vitio nascitur. quidquid illi congeſſeris; non finis erit cupiditatis, sed gradus. Qui continebit itaque se intra naturalem modum, paupertatem non sentiet: qui naturalem modum excedet, eum in summis opibus quoque paupertas sequetur. Necessariis rebus et exilia sufficiunt: supervacuis nec regna. Animus est qui divites facit. hic in exilia sequitur,

et in solitudinibus asperrimis, cum quantum satis est sustinendo corpori, invenit, ipse bonis suis abundat et fruitur. Pecunia nihil ad animum pertinet, non magis, quam ad deos immortales omnia ista, quae imperita ingenia, et nimis corporibus suis addicta, suspiciunt. Lapidès, aurum et argentum, et magni laevatique mensarum orbes, terrena sunt pondera: quae non potest amare sincerus animus, ac naturae suae memor; levis ipse, et exsertus, et quandoque emissus fuerit, ad summa emicaturus. interim, quantum per moras membrorum, et hanc circumfusam gravem sarcinam licet, celeri et volucri cogitatione divina perlustrat. Ideoque nec exsulare unquam potest liber, et diis cognatus, et omni mundo omnique aevo par. Nam cogitatio eius circa omne coelum, et in omne praeteritum futurumque tempus immittitur. Corpusculum hoc, custodia et vinculum animi, huc atque illuc iactatur: in hoc supplicia, in hoc latrocinia, in hoc morbi exercentur. animus quidem ipse facer et aeternus est, et cui non possunt iniici manus.

XII. Nec me putas ad elevanda incommoda paupertatis, quam nemo gravem sentit nisi qui putat, ut tantum praeceptis sapientum. Primum aspice, quanto maior pars sit pauperum, quos nihilo notabis tristiores sollicitioresque divitibus: immo nescio an eo latores sint, quo animus eorum in pauciora distingitur. Transeamus a pauperibus: veniamus ad locupletes. quam multa sunt tempora, quibus pauperibus similes sunt? Circumcisae sunt peregrinantium sarcinae: et quotiescumque festinationem necessitas iti-

neris exigit, comitum turba dimittitur. Militantes quotam partem rerum suarum secum habent? cum omnem apparatum castrensis disciplina submoveat. Nec tantum conditio illos temporum, aut locorum inopia, pauperibus exaequat: sumunt quosdam dies, cum iam illos divitiarum taedium cepit, quibus humi coenent, et remoto auro argentoque, fictilibus utantur. Dementes! hoc quod aliquando concupiscunt, semper timent. O quanta illos caligo mentium, quanta ignorantia veritatis exercet, qui fugiunt quod voluptatis causa imitantur! Me quidem, quoties antiqua exempla respexi, paupertatis uti solatiis pudet. quoniam quidem eo temporum luxuria prolapsa est, ut maius viaticum exsulum sit, quam olim patrimonium principum fuit. Unum fuisse Homero servum, tres Platonis, nullum Zenoni, a quo coepit Stoicorum rigida ac virilis sapientia, satis constat. num ergo quisquam eos miseros vixisse dicet, ut non ipse miserrimus ob hoc omnibus videatur? Menerius Agrippa, qui inter patres ac plebem publicae gratiae sequester fuit, aere collato funeratus est. Attilius Regulus, cum Poenos in Africa funderet, ad Senatum scripsit, mercenarium suum discessisse, et ab eo desertum esse rus: quod Senatui publice curari, dum abesset Regulus, placuit. Fuit nae tanti, servum non habere, ut colonus eius populus Romanus esset. Scipionis filiae ex aerario dotem acceperunt, quia nihil illis reliquerat pater. Aequum mehercules erat populum Romanum tributum Scipioni semel conferre, cum a Carthagine semper exigeret. O felices viros puellarum, quibus populus Romanus loco ficeri

fuit! Beatoresne istos putas, quorum pantomimae decies festertio nubunt, quam Scipionem, cuius liberis a senatu, tutore suo, in dotem aes grave acceperunt? Designatur aliquis paupertatem, cuius tam clarae imagines sunt? indignatur exsul aliquid sibi deesse, cum defuerit Scipioni dos, Regulo mercenarius, Mennio funus? cum omnibus illis, id quod deerat, ideo honestius suppletum sit, quia defuerat? His ergo advocatis non tantum tuta est, sed etiam grata paupertas.

XIII. Responderi potest: Quid artificiose ista ducis, quae singula sustineri possunt, collata non possunt? Commutatio loci tolerabilis est, si tantum locum mutes: paupertas tolerabilis est, si ignominia absit, quae vel sola opprimere animos solet. Adversus hunc, quisquis me malorum turba terrebit, his verbis utendum erit. Si contra unamquamlibet partem fortunae satis tibi roboris est, ideni adversus omnes erit. cum semel animum virtus induravit, undique invulnerabilem praefstat. Si avaritia dimisit, vehementissima generis humani pestis; moram tibi ambitio non faciet. Si ultimum diem non quasi poenam, sed quasi naturae legem adspicis; ex quo pectore metum eieceris, in id nullius rei timor audebit intrare. Si cogitas, libidinem non voluptatis causa homini datam, sed propagandi generis; quem non violaverit hoc secretum et infixum visceribus ipsis exitium, omnis alia cupiditas intactum præteribit. Non singula vitia ratio, sed pariter omnia prosternit: in universum semel vincitur. Ignominia tu putas quemquam sapientem moveri posse,

qui omnia in se reposuit, qui ab opinionibus vulgi secessit? Plus etiam quam ignominia est mors ignominiosa. Socrates tamen eodem illo vultu, quo aliquando solus triginta tyrannos in ordinem redegerat, carcerem intravit, ignominiam ipsi loco detracturus. neque enim poterat carcer videri, in quo Socrates erat. Quis usque eo ad conspiciendam veritatem excaecatus est, ut ignominiam putet M. Catonis fuisse, duplum in petitione praeturae et consulatus repulsam? ignominia illa praeturae et consulatus fuit, quibus ex Catone honor habebatur. Nemo ab alio contemnitur, nisi a se ante contemtus est. Humilis et proiectus animus fit isti contumeliae opportunus: qui vero adversus saevissimos casus se extollit, et ea mala quibus alii opprimuntur, revertit, ipsas miserias infilarum loco habet: quando ita affecti sumus, ut nihil aequa magnam apud nos admirationem occupet, quam homo fortiter miser. Ducebatur Athenis ad supplicium Aristides: cui quisquis occurrerat, deiiciebat oculos, et ingemiscebat; non tanquam in hominem iustum, sed tanquam in ipsam iustitiam animadverteretur. Inventus est tamen, qui in faciem eius inspueret. poterat ob hoc moleste ferre, quod sciebat neminem id ausurum puri oris. At ille abstersit faciem, et subridens ait comitanti se magistratui: Admone istum, ne postea tam improbe oscitet. Hoc fuit contumeliae ipsi contumeliam facere. Scio quosdam dicere, contemtu nihil esse gravius, mortem ipsis potiorera videri. His ego respondebo, et exsilium saepe contumitione omni carere. Si magnus vir cecidit, mag-

nus iacuit. non magis illum putes contemni , quam cum aedium sacrarum ruinae calcantur , quas religiosi aequae ac stantes adorant.

XIV. Quoniam meo nomine nihil habes , mater carissima , quod te in infinitas lacrimas agat, sequitur ut causae tuae te stimulent. Sunt autem duas. nam aut illud te movet, quod praesidium aliquod videris amisisse : aut, quod desiderium ipsum per se pati non potes. Prior pars mihi leviter perstringenda est. novi enim animum tuum , nihil in suis praeter ipsos amantem. Viderint illae matres , quae potentiam liberorum muliebri impotentia exercent , quae , quia feminis honores non licet gerere , per illos ambitiosae sunt , quae patrimonia filiorum et exhaustiunt , et captant ; quae eloquentiam commodando aliis fatigant. Tu liberorum tuorum bonis plurimum gavisa es , minimum usa : tu liberalitati nostrae semper imposuisti modum , cum tuae non imponeres : tu filiasfamilias , locupletibus filiis ultro contulisti : tu patrimonia nostra sic administrasti , ut tanquam in tuis laborares , tanquam alienis abstineres : tu gratiae nostrae , tanquam alienis rebus uteris , pepercisti , et ex honoribus nostris nihil ad te nisi voluptas et impensa pertinuit. nunquam indulgentia ad utilitatem respexit. Non potes itaque eretto filio desiderare , quae incolumi nunquam ad te pertinere duxisti.

XV. Illo omnis consolatio mihi vertenda est, unde vera vis materni doloris oritur. Ego complexu filii carissimi careo , non conspectu eius , non sermone fruor. ubi est ille , quo viso tristem vultum relaxavi,

in quo omnes solicitudines meas deposui? ubi colloquia, quorum inexplebilis eram? ubi studia, quibus libentius quam semina, familiarius quam mater, intereram? ubi ille occursus? ubi matre visa semper puerilis hilaritas? Adiicis istis loca ipsa gratulationum et convictuum, et, ut necesse est, efficacissimas ad vexandos animos recentis conversationis notas. Nam hoc quoque adversus te crudeliter fortuna molita est, quod te ante tertium deum diem quam percussus sum, securam, nec quidquam tale metuentem, regredi voluit. bene nos longinquitas locorum diviserat: bene aliquot annorum absentia huic te malo praeparaverat: redisti, non ut voluptatem ex filio perciperes, sed ne consuetudinem desiderii perderes. Si multo ante absuisses, fortius tulisses, ipso intervallo desiderium molliente: si non recessisses, ultimum certe fructum biduo diutius videndi filium tulisses. Nunc crudele fatum ita composuit, ut nec fortunae meae interesses, nec absentiae assuesceres. Sed quanto ista duriora sunt, tanto maior tibi virtus advocanda est, et velut cum hoste noto, ac saepe iam victo, acrius est congregendum. Non ex intacto corpore tuo sanguis hic fluxit: per ipsas cicatrices percussa es.

XVI. Non est quod utaris excusatione nominis muliebris, cui paene concessum est immoderatum in lacrimas ius, non immensum tamen: et ideo maiores deceim mensium spatium lugentibus viros dederunt, ut cum pertinacia muliebris moeroris publica constitutione deciderent, non prohibuerunt luctus, sed finierunt. Nam et infinito dolore, cum aliquem ex carissimis amiferis, affici, stulta indulgen-

tia est : et nullo , inhūmana duritia. Optimum inter pietatem et rationem temperamentum est , et sentire desiderium , et opprimere. Non est quod ad quasdam feminas respicias , quarum tristitiam semel sumtam mors finivit. nosti quasdam , quae amissis filiis , imposta lugubria nuncuam exuerunt. a te plus exigit vita ab initio fortior. non potest muliebris excusatio contingere ei , a qua omnia vitia muliebria absuerunt. Non te maximum seculi malum , impudicitia , in numerum plurium adduxit. non gemmae te , non margaritae flexerunt : non tibi divitiae , velut maximum generis humani bonum , refulserunt : non te bene in antiqua et severa institutam domo , periculosa etiam probis peiorum detorsit imitatio. Nunquam te fecunditatis tuae , quasi exprobraret aetatem , puduit : nunquam more aliarum , quibus omnis commendatio ex forma petitur , tumescentem uterum abscondisti , quasi indecens onus ; nec intra viscera tua conceptas spes liberorum elisisti. Non faciem lenociniis ac coloribus polluisti. nunquam tibi placuit vestis , quae nihil amplius nudaret , cum poneretur : unicum tibi ornamentum , pulcherrima et nulli obnoxia aetati forma , maximum decus , visa est pudicitia. Non potes itaque , ad obtinendum dolorem , muliebre nomen praetendere , ex quo te virtutes tuae seduxerunt. tantum debes a seminarum lacrimis abesse , quantum a vitiis. Ne feminae quidem te sinent intabescere vulneri tuo , sed leviori necessario moerore cito defunctam , iubebunt exsurgere : si modo illas intueri voles feminas , quas conspecta virtus inter magnos viros posuit. Corneliam ex duo-

decim liberis ad duos fortuna redegerat. Si numerare funera Corneliae velles, amiserat decem: si aestimare, amiserat Gracchos. Flentibus tamen circa se, et fatum eius exsecrantibus interdixit, Ne fortunam accusarent, quae sibi filios Gracchos dedisset. Ex hac femina debuit nasci, qui diceret in concione: Tu matri meae maledicas, quae me peperit? Multo mihi videtur animosior vox matris. Filius magno aestimabat Gracchorum natales: mater et funera. Rutilia Cotram filium secuta est in exsilio, et usque eo fuit indulgentia constricta, ut mallet exsilio pati, quam desiderium: nec ante in patriam, quam cum filio rediit. Eundem iam reducem, et in Republica florentem tam fortiter amisit, quam secuta est: nec quisquam lacrimas eius post elatum filium notavit. In expulso virtutem ostendit, in amissso prudentiam. nam et nihil illam a pietate deterruit, et nihil in tristitia supervacua stultaque detinuit. Cum his te numerari feminis volo, quarum vitam semper imitata es: earum in coercenda comprimendaque aegritudine optime sequeris exemplum. Scio rem non esse in nostra potestate, nec ullum affectum servire: minime vero eum, qui ex dolore nascitur. Ferrox enim, et adversus omne remedium contumax est. volumus eum interim obtruere, et devorare gemitus: per ipsum tamen compositum fictumque vulnus lacrimae profunduntur. Ludis interim aut gladiatoriibus animum occupamus: at illum inter ipsa, quibus avocatur, spectacula, levis aliqua desiderii nota subruit. Ideo melius est, illum vincere, quam fallere. Nam qui aut delusus voluptatibus, aut occu-

pationibus abductus est, resurgit, et ipsa quiete impetum ad saeviendum colligit: at quisquis rationi cef- sit, in perpetuum componitur. Non sum itaque tibi monstraturus illa, quibus usos multos esse scio, ut peregrinatione te vel longa detineas, vel amoena de- lectes; ut rationum accipiendarum diligentia, patri- monii administratione multum occupies temporis; ut semper novo te aliquo negotio implices: omnia ista ad exiguum momentum prosunt, nec remedia dolo- ris, sed impedimenta sunt: ego autem malo illum desi- nere, quam dicipi. Itaque illo te duco, quo omnibus qui fortunam fugiunt, confugiendum est, ad liberalia studia. illa sanabunt vulnus tuum, illa omnem tristitiam tibi evellet. His etsi nunquam assuefles, nunc uten- dum erat: sed quantum tibi patris mei antiquus ri- gor permisit, omnes bonas artes non quidem com- prehendisti, attigisti tamen. Utinam quidem viro- rum optimus, pater meus, nimis maiorum consue- tudini deditus, voluisse te sapientum praeceptis eru- diri potius, quam imbui! non parandum tibi nunc contra fortunam esset auxilium, sed proferendum. Propter istas quae literis non ad sapientiam utun- tur, sed ad luxuriam instruuntur, minus est indul- gere studiis passus. beneficio tamen rapacis ingenii plus quam pro tempore hausisti: iacta sunt disciplinarum omnium fundamenta. Nunc ad illas rever- tere: tutam te praestabunt. illae consolabuntur, il- lae delestantur, illae si bona fide animum tuum in- traverunt, nunquam amplius intrabit dolor, nun- quam solicitude, nunquam afflictionis irritae super- vacua vexatio: nulli horum patebit pectus tuum:

nam ceteris vitiis iampridem clusum est. Haec quidem certissima praesidia sunt, et quae sola te fortunae eripere possint: sed quia dum in illum portum, quem studia promittunt, perveneris, adminiculis, quibus innitaris, opus est, volo interim solatia tua tibi ostendere. Respice fratres meos: quibus salvis, fas tibi non est accusare fortunam. in utroque habes quod te diversa virtute delectet: alter honores industria consecutus est, alter sapienter contempsit. Acquiesce alterius filii dignitate, alterius quiete, utriusque pietate. novi fratrū meorum intimos affectus. alter in hoc dignitatem excolit, ut tibi ornamento sit: alter in hoc se ad tranquillam quietamque vitam recepit, ut tibi vacet. Bene liberos tuos et in auxilium, et in oblectamentum, fortuna disposuit: potes alterius dignitate defendi, alterius otio frui. Certabunt in te officiis: et unius desiderium. duorum pietate supplebitur. Audeacter possum promittere: nihil tibi deerit, practer numerum. Ab his ad nepotes quoque respice; Marcum blandissimum puerum, ad cuius conspectum nulla potest durare tristitia: nihil tam magnum, nihil tam recens in cuiusquam pectore fuerit, quod non circumfusus ille permulceat. Cuius non lacrimas illius hilaritas supprimat? cuius non contractum solicitudine animum illius argutiae solvant? quem non in iecos vocabit illa lascivia? quem non in se converteret, et abducet infixum cogitationibus, illa neminem fatiatura garrulitas? Deos oro, contingat hunc habere nobis superstitem. In me omnis fatorum crudelitas lassata consistat: quidquid matri dolendum fuit,

in me transierit : quidquid aviae , in me. Floreat reliqua in suo statu turba : nihil de orbitate , nihil de conditione mea querar. Fuerim tantum , nihil amplius doliturae domus , piamentum. Tene in gremio tuo cito tibi daturam pronepotes Novatillam : quam sic in me transtuleram , sic mihi adscripsoram , ut possit videri , quod me amisit , quamvis salvo patre , pupilla. hanc et pro me dilige. Abstulit illi nuper fortuna matrem : tua potest efficere pietas , ut perdidisse se matrem doleat tantum , non et sentiat. Nunc mores eius compone , nunc formam : altius praecpta descendunt , quae teneris imprimuntur aetatisbus. Tuis assuescat sermonibus : ad tuum fungatur arbitrium. multum illi dabis , etiamsi nihil dederis praeter exemplum. Hoc iam tibi solemne officium pro remedio erit. non potest animum pie dolentem a solitudine avertere , nisi aut ratio , aut honesta occupatio. Numerarem inter magna solatia patrem quoque tuum , nisi abesset. nunc tamen ex affectu tuo , quid illius intersit , cogita : intelliges , quanto iustius sit , te illi servari , quam mihi impendi. quoties te immodica vis doloris invaserit , et sequi se iubebit , patrem cogita. cui tu quidem tot nepotes pronepotesque dando effecisti ne unica es : consummatio tamen aetatis aetiae feliciter , in te vertitur. Illo vivo , nefas est , te , quod vixeris , queri.

XVII. Maximum adhuc solatium tuum tacueram , sororem tuam : illud fidelissimum peccatus tibi , in quod omnes curae tuae pro indiviso transferuntur : illum animum omnibus nobis maternum. Cum hac tu lacrimas tuas miscuisti , in huius primum respirasti finu.

Illa quidem affectus tuos semper sequitur. in mea tamen persona , non tantum pro te dolet. Illius manibus in urbem perlatus sum : illius pio maternoque nutricio per longum tempus aeger convalui : illa pro quaestura mea gratiam suam extendit : et quae ne sermonis quidem, aut clarae salutationis sustinuit audaciam , pro me vicit indulgentia verecundiam. Nihil illi seductum vitae genus , nihil modestia , in tanta seminarum petulantia , rustica , nihil quies , nihil secreti et ad otium repositi mores obliterunt , quo minus pro me etiam ambitiosa fieret. Haec est , mater carissima , solatium , quo reficiaris : illi quantum potes te iunge , illius arctissimis amplexibus alliga. Solent moerentes , ea quae maxime diligunt , fugere , et libertatem dolori suo quaerere : tu ad illam te , et quidquid cogitaveris , confer. sive servare habitum istum voles , sive deponere , apud illam invenies vel finem dolori tuo , vel comitem. Sed si prudentiam perfectissimae feminae novi , non patietur te nihil profuturo moerore consumi , et exemplum tibi suum , cuius ego etiam spectator fui , narrabit. Carissimum virum amiserat , avunculum nostrum , cui virgo nupserat , in ipsa navigatione : tulit tamen eodem tempore et luctum , et metum , evictisque tempestatibus corpus eius naufraga evexit. O quam multarum egregia opera in obscuro iacent ! Si huic illa simplex admirandis virtutibus contigisset antiquitas : quanto ingeniorum certamine celebraretur uxor , quae obliterata imbecillitatis , oblita etiam firmissimis metuendi maris , caput suum periculis pro sepultura obiecit , et dum cogitat de viri funere , nihil de suo timuit ? No-

bilitatur carminibus omnium, quae se pro coniuge vicariam dedit. hoc amplius est, discrimine vitae sepulcrum viro quaerere: maior est amor, qui pari periculo minus redimit. Post hoc nemo miratur, quod per sedecim annos, quibus maritus eius Aegyptum obtinuit, nunquam in publico conspecta est. neminem provincialem domum suam admisit: nihil a viro petiit, nihil a se peti passa est. Itaque loquax, et ingeniosa in contumelias praefectorum provincia, in qua etiam qui vitaverunt culpam, non effugerunt infamiam, velut unicum sanctitatis exemplum suscepit: et quod illi difficillimum est, cui etiam periculosi sales placent, omnem verborum licentiam continuit, et hodie similem illi, quamvis nunquam sperret, semper optat. Multum erat, si per sedecim annos illam provincia probasset: plus est, quod ignoravit. Haec non ideo refiero, ut eius laudes exsequar, quas circumscribere est, tam parce transcurrere: sed ut intelligas, magni animi esse feminam, quam non ambitione, non avaritia, comites omnis potentiae et pestes, vicerunt: non metus mortis eam, exarmata navi naufragium suum spectantem, deterruit, quo minus exanimi viro haerens, quaereret, non quemadmodum inde exiret, sed quemadmodum efferret. Huic parem virtutem exhibeas oportet, et animum a luctu recipias, et id agas, ne quis te putet partus tui poenitere. Ceterum quia necesse est, cum omnia feceris, cogitationes tamen tuas subinde ad me recurrere, nec quemquam nunc ex liberis tuis frequentius tibi obversari: non quia illi minus cari sint, sed quia naturale est, manum saepius ad id referre quod doleat:

qualem me cogites, accipe. Laetum et alacrem
velut optimis rebus. sunt autem optimae, cum ani-
mus omnis cogitationis expers operibus suis vacat;
et modo se levioribus studiis oblectat, modo ad con-
siderandam suam universique naturam, veri avidus
insurgit. Terras primum, situmque earum quaerit.
deinde conditionem circumfusi maris, cursusque eius
alternos et recursus: tunc quidquid inter coelum ter-
rasque plenum formidinis interiacet, perspicit, et
hoc tonitribus, fulminibus, ventorum flatibus, ac
nimborum nivisque et grandinis iactu tumultuosum
spatium: tum peragratis humilioribus ad summa
prorumpit, et pulcherrimo divinorum spectaculo
fruitur, aeternitatisque suae memor, in omne quod
fuit, futurumque est omnibus seculis, vadit.

L. ANNAEI SENECAE
AD POLYBIUM
DE CONSOLATIONE
LIBER ΑΚΕΦΑΛΟΣ.

L. Ann. Seneca. Vol. I,

K



L. ANNAEI SENECAE
 AD POLYBIUM
 DE CONSOLATIONE
 LIBER AKEΦΑΛΟΣ.

Argumentum & Ordo.

Scriptum in exilio est, dum animo et corpore iacet (fatendum est, et scriptio clamat) anno circiter exsilii eius tertio. Nam palam meminit Britanniae apertae, quod circa id tempus fuit. Polybius autem, inter praeponentes Claudi libertos, a studiis iuclum habuit, & Graece Latineque dicas eruditum, ex laudibus quidem quas Seneca accumulat, eminenter. Solatur eum in fraterna morte: & Dispositio tota latet, quia principium, et pluscula, defunt. In iis quae sunt, haec est. Negat dolendum in unius morte, quoniam mundus ipse, & quidquid in eo, haec lege damnantur. Item, quia vanus dolor, & sine fructu. Tertio, Natos nos esse ad tristia; eoque adscendunt. Quarto, Voluntatem defuncti advocat, illum nolle. Quinto, Constantia & exemplo praeire aliis fratribus debere: quia persona illustris, & oculi in eam versi. Sexto, & a studiis solatium petere vult, quae semper adamavit. Haec & talia usque ad Cap. xxxxi. Ab eo deinde Exemplia spargit eorum, qui fortiter tulere: inter hos (non sine vili adulacione) iussus Caestris, quem & mire laudat: & denique Polybium iterum ad Studia & libros mittit, remedium in dolorem. Senecae hoc scriptum esse, negare non licet: editioni destinatum ab eo non arbitror, sed pro praesenti fortuna abiecte & demisse scriptum, ad servulum, heu, quot laudibus exornatum! Pudet, pudet, inimicus Senecae fuit & gloriae eius, quisquis vulgavit.

EX CAPITE XX.

*** nostra corpora compares, firma sunt: si redigas ad conditionem naturae omnia destruentis, et unde edidit eodem revocantis, caduca sunt. Quid enim immortale manus mortales fecerint? Septem illa miracula, et si qua his multo mirabilia sequentium annorum exstruxit ambitio, aliquando solo aequata visentur. Ita est. nihil perpetuum, pauca diuturna sunt, aliud alio modo fragile est: rerum exitus variantur: ceterum quidquid coepit, et definit. Mundo quidam minantur interitum, et hoc universum, quod omnia divinę humanaque complectitur, si fas putas credere, dies aliquis dissipabit, et in confusione veterem tenebrasque demerget. Eat nunc aliquis, et singulas comploret animas: Carthaginis ac Numantiae Corinthique cinerem, et si quid altius cecidit, lamentetur: cum etiam hoc, quod non habet quo cadat, sit interitum. Eat aliquis, et fata, tantum aliquando nefas ausura, sibi non pepercisse conqueratur.

XXI. Quis tam superbae impotentisque arrogantiae est, ut in hac naturae necessitate, omnia ad eundem finem revocantis, se unum ac suos seponi velit: ruinaeque, etiam ipsi mundo imminentis, aliquam domum subtrahat? Maximum ergo solatium est, cogitare id sibi accidisse, quod ante se passi sunt omnes, omnesque passuri: et ideo mihi videtur rerum natura, quod gravissimum fecit, commune fecisse, ut crudelitatem fati consolaretur aequalitas. Illud quoque te non minimum adiuverit, si cogitaveris nihil

profuturum dolorem tuum , nec illi quem desideras ,
nec tibi. noles enim longum esse , quod irritum est.
Nam si quidquam tristitia profecturi sumus , non re-
cuso , quidquid lacrimarum fortunae meae superfuit ,
tuae fundere. inveniam etiam nunc , per hos exau-
stos iam fletibus domesticis oculos quod effluat , si
modo id tibi futurum bono est. Quid cessas? conque-
ramur. atque adeo ipse hanc litem meam faciam. In-
iquissima omnium iudicio fortuna , adhuc videbaris
ab eo homine te continuisse , qui munere tuo tantam
venerationem receperat , ut , quod raro ulli contin-
git , felicitas eius effugeret invidiam. Ecce eum dolo-
rem illi , quem salvo Caesare accipere maximum po-
terat , impressissi : et cum bene illum undique cir-
cumisses , intellexisti hanc partem tantummodo pa-
tere ictibus tuis. Quid enim illi aliud saceres? pecu-
niā eriperes? nunquam illi obnoxius fuit. nunc
quoque quantum potest , illam a se abiicit , et in
tanta felicitate acquirendi , nullum maiorem ex ea
fructum , quam contemtum eius petit. Eriperes illi
amicos? sciebas tam amabilem esse , ut facile in lo-
cum amissorum posset alios substituere. Unum enim
hunc ex his quos in principali domo potentes vidi ,
cognovisse videor : quem omnibus amicum habere
cum expediat , magis tamen etiam libet. Eriperes illi
bonam opinionem? solidior est haec apud eum , quam
ut a te quoque ipsa concuti posset. Eriperes bonam
valetudinem? sciebas animum eius liberalibus disci-
plinis , quibus non innutritus tantum , sed innatus est ,
sic esse fundatum , ut supra omnes corporis dolores
emineret. Eriperes spiritum? quantulum nocuisses?

longissimum illi aevum ingenii fama promisit. Id egit ipse, ut meliore sui parte duraret, et compositis eloquentiae praeclaris operibus, a mortalitate se vindicaret. Quamdiu fuerit ullus literis honor, quamdiu steterit aut Latinae linguae potentia, aut Graecae gratia, vigebit cum maximis viris: quorum se ingenii vel contulit, vel, si hoc verecundia eius recusat, applicuit.

XXII. Hoc ergo unum excogitasti, quomodo illi maxime posses nocere. Quo melior enim est quisque, hoc saepius ferre te coniuevit, sine ullo delectu furentem, et inter ipsa beneficia metuendam. Quantulum erat, tibi immunem ab hac iniuria praestare eum hominem, in quem videbatur indulgentia tua ratione certa pervenisse, et non ex tuo more temere incidisse? Adiiciamus, si vis, ad has querelas, ipsius adolescentis interceptam inter prima incrementa indolem. Dignus fuit ille te fratre: tu certe eras dignissimus, qui nec ex indigno quidem quidquam doleres fratre. Redditur illi testimonium aequale omnium hominum. desideratur in tuum honorem, laudatur in suum: nihil in illo fuit, quod non libenter agnosceres. Tu quidem etiam minus bono fratri fuisses bonus: sed in illo pietas tua idoneam nacta materiam, multo se liberius exercuit. Nemo potentiam eius iniuria sensit, nunquam ille te fratrem ulli minatus est. Ad exemplum se modestiae tuae formaverat, cogitabatque quantum tu et ornaementum tuorum esses, et onus. Suffecit ille huic sarcinae. O dura fata, et nullis aequa virtutibus! antequam felicitatem suam nosset frater tuus, exemptus est. Parum autem

me indignari scio : nihil est enim difficilius , quam magno dolori paria verba reperire. Iam nunc tamen si quid proficere possumus, conqueramur. Quid tibi voluisti tam iniusta, et tam violenta fortuna ? Tam cito indulgentiae tuae te poenituit ? quae ista crudelitas est ? in medios fratres impetum facere, et tam cruenta rapina concordissimam turbam imminuere , tam bene stipatam optimorum adolescentium domum, in nullo fratre degenerantem , turbare , et sine ulla causa delibare voluisti ? Nihil ergo prodest innocentia ad omnem legem exacta , nihil antiqua frugalitas , nihil felicitatis summae potentia , summa conservata abstinentia , nihil sincerus et tutus literarum amor , nihil ab omni labore mens vacans ? Luget Polybius, et in uno fratre, quid de reliquis possis , admonitus, etiam de ipsis doloris sui solatiis timet . facinus indignum ! luget Polybius, et aliquid propitio dolet Caesare. hoc sine dubio impotens fortuna captasti, ut ostenderes neminem contra te , ne a Caesare quidem , posse defendi.

XXIII. Diutius accusare fata possumus , mutare non possumus. stant dura et inexorabilia. nemo illa convicio , nemo fletu , nemo causa movet : nihil unquam parcunt ulli , nec remittunt. Proinde parcamus lacrimis , nihil proficientibus. facilis enim nos illi dolor iste adiiciet , quam illum nobis reducet. Qui si nos torquet , non adiuvat. primo quoque tempore deponendus est : et ab inanibus solatiis, atque amara quadam libidine dolendi , animus recipiendus. Nam lacrimis nostris, ni ratio finem fecerit , fortuna non faciet. Omnes agedum mortales circumspice : larga

ubique flendi , et assidua materia. alium ad quotidianum opus laboriosa egestas vocat : alium ambitio nunquam quieta solicitat : aliis divitias , quas optaverat , metuit , et voto laborat suo : alium solicitude , alium labor torquet , alium semper vestibulum obsidens turba : hic habere se dolet liberos , hic perdidisse. Lacrimae nobis deerunt , ante quam causae dolendi. Non vides qualem vitam nobis rerum natura promiserit , quae primum nascentium omen fletum esse voluit ? Hoc principio edimur , huic omnis sequentium annorum ordo consentit. sic vitam agimus : ideoque moderate id fieri debet a nobis , quod saepe faciendum est : et respicientes , quantum a tergo rerum tristium immineat , si non finire lacrimas , at certe reservare debemus. Nulli parcendum est rei magis quam huic , cuius tam frequens usus est. Illud quoque te non minimum adiuverit , si cogitaveris , nulli minus gratum esse dolorem tuum , quam ei cui praestari videtur. Torqueri ille te aut non vult , aut non inteligit. nulla itaque eius officii ratio est , quod ei cui praestatur , si nihil sentit , supervacuum est : si sentit , ingratum.

XXIV. Neminem toto orbe terrarum esse , qui delectetur lacrimis tuis , audacter dixerim. Quid ergo ? quem nemo adversus te animum gerit , eum esse tu credis fratri tui , ut cruciatu tuo noceat tibi : ut te velit abducere ab occupationibus tuis , id est , a studio , et a Caesare ? Non est hoc simile veri. Ille enim indulgentiam tibi tanquam fratri praestitit , venerationem tanquam parenti , cultum tanquam superiori , ille desiderio tibi esse vult , tormento esse

non vult. Quid itaque iuvat dolore intabescere : quem , si quis defunctis sensus est, finiri frater tuus cupit ? De alio fratre , cuius incerta posset voluntas videri , omnia haec dubie ponerem , et dicerem : Sive te torqueri lacrimis nunquam desinentibus frater tuus cupit , indignus hoc affectu tuo est : sive non vult , utrique vestrum inertem dolorem dimitte. nec impius frater sic desiderari debet , nec pius sic velit. In hoc vero , cuius tam explorata pietas , pro certo habendum est , nihil esse illi posse acerbius , quam hic si tibi casus eius acerbus est , si te ullo modo torquet. si oculos tuos , indignissimos hoc malo , sine ullo flendi fine et conturbat idem et exhaustit. Pietatem tuam tamen nihil aequa lacrimis tam inutilibus abducet , quam si cogitaveris , fratribus te tuis exemplo esse debere , fortiter hanc fortunae iniuriam sustinendi. Quod duces magni faciunt , rebus affectis , ut hilaritatem de industria simulent , et adversas res adumbrata laetitia abscondant , ne militum animi , si fractam ducis sui mentem viderint , et ipsi collabantur : id nunc tibi quoque faciendum est. Indue dissimilem animo tuo vultum , et , si potes , propriece omnem ex toto dolorem : sin minus , introrsus abde et contine , ne appareat , et da operam , ut fratres tui te imitantur : qui honestum putabunt , quocunque facientem viderint , animumque ex vultu tuo sument. Et solarium debes esse , et consolator illorum : non poteris autem horum moerori obstatre , si tuo indulseris.

XXV. Potest et illa res a luctu te prohibere nimio ; si tibi ipse renuntiaveris , nihil horum quae facis

posse subduci. Magnam tibi partem hominum consensus imposuit : haec tibi tuenda est. Circumstat te omnis ista consolantium frequentia , et in animum tuum inquirit , ac perspicit quantum roboris ille adversus dolorem habeat , et utrumne tu tantum rebus secundis dextere uti scias , an et adversas possis viriliter ferre. observantur oculi tui. Liberiora omnia sunt iis , quorum affectus tegi possunt : tibi nullum secretum liberum est, in multa luce fortuna te posuit. omnes scient , quomodo te in isto tuo gesseris vulnera : utrumne statim percussus arma submiseris , an in gradu steteris. Olim te in altiorem ordinem et amor Caesaris extulit , et tua studia deduxerunt : nihil te plebeium decet , nihil humile. Quid autem tam humile ac muliebre est , quam consumendum se dolori committere ? Non idem tibi in luctu pari , quod tuis fratribus licet. multa tibi non permittit opinio de studiis ac moribus tuis recepta : multum a te homines exigunt , multum exspectant. Si volebas tibi omnia licere ; ne convertisses in te ora omnium. nunc autem tibi praestandum est , quantum promisisti omnibus illis , qui opera ingenii tui laudant , qui describunt : quibus , cum fortuna tua opus non sit , ingenio opus est. Custodes animi tui sunt. nihil unquam itaque potes indignum facere perfecti et eruditii viri professione , ut non multos admirationis de te suae poeniteat. Non licet tibi flere immodice : nec hoc tantummodo non licet , nec somnum quidem extendere in partem diei licet , aut a tumultu rerum in otium ruris quieti configere , aut assidua laboriosi officii statione fatigatum corpus voluptaria peregrinatione recreare,

aut spectaculorum varietate animum detinere, aut tuo arbitrio diem disponere.

XXVI. Multa tibi non licent, quae humillimis et in angulo iacentibus licent. Magna servitus est, magna fortuna. Non licet tibi quidquam arbitrio tuo facere. audienda sunt tot hominum millia, tot disponendi libelli, tantus rerum ex orbe toto coëuntium congestus, ut possit per ordinem suum principis maximi animo subiici, erigendus tuus est. Non licet tibi, inquam, flere: ut multos flentes audire possis, ut periclitantium, et ad misericordiam mitissimi Caesaris pervenire cupientium lacrimae, tibi tuae affliccandae sunt. Hoc tamen etiam non in levioribus remediis adiuvabit. cum voles omnium rerum oblivisci, cogita Caesarem: vide quantam huius in te indulgentiae fidem, quantam industriam debeas. intelliges non magis tibi incurvari licere, quam illi, si quis modo est fabulis traditus, cuius humeris mundus innititur. Caesar quoque ipsi, cui omnia licent, propter hoc ipsum multa non licent. Omnium domos illius vigilia defendit, omnium otium illius labor, omnium delicias illius industria, omnium vaccinationem illius occupatio. Ex quo se Caesar orbi terrarum dedicavit, sibi eripuit: et siderum modo, quae irrequieta semper cursus suos explicant, nunquam illi licet nec subsistere, nec quidquam suum facere. Ad quendam itaque modum tibi quoque eadem necessitas iniungitur: non licet tibi ad utilitates tuas, ad studia tua respicere. Caesare orbem terrarum possidente, impartiri te nec voluptati, nec dolori, nec ulli alii rei potes: totum te Caesar debes. Adiice

nunc, quod, cum semper praedices cariorem tibi spiritu tuo Caesarem esse, fas tibi non est, salvo Caesare, de fortuna queri. Hoc incolumi, salvi tibi sunt tui: nihil perdidisti: non tantum siccios oculos tuos esse, sed etiam laetos oportet. in hoc tibi omnia sunt: hic pro omnibus est. Qued longe a sensibus tuis prudentissimis piissimisque abest, adversus felicitatem tuam parum gratus es, si tibi quidquam, hoc salvo, flere permittis. Monstrabo etiamnum, non quidem firmius remedium, sed familiarius. Si quando te domum receperis, tunc erit tibi metuenda tristitia. nam quamdiu numen tuum intueris, nullum illa ad te inveniet accessum: omnia in te Caesar tenebit: cum ab illo discesseris, tunc, velut occasione data, insidiabitur solitudini tuae dolor, et requiescenti animo tuo paulatim irrepent. Itaque non est, quod ullum tempus vacare patiaris a fludiis. tunc tibi literae tuae, tam diu ac tam fideliter amatae, gratiam referant: tunc te illae antisitem et cultorem suum vindicent: tunc Homerus et Virgilius, tam bene de humano genere meriti, quam tu de omnibus et de illis meruisti, quos pluribus notos esse voluisti quam scripserant, multum tecum morentur. tutum id erit omne tempus, quod illis tuendum commiseris. Tunc Caesaris tui opera, ut per omnia secula domestico narrentur praeconio, quantum potes compone: nam ipse tibi optime formandi condendique res gestas, et materiam dabit, et exemplum.

XXVII. Non audeo te usque eo producere, ut fabellas quoque et Aesopeos logos, intentatum Ro-

manis ingenii opus, solita tibi venustate connectas. difficile est quidem, ut ad haec hilariora studia tam vehementer percussus animus, tam cito possit accedere : hoc tamen argumentum habeto iam corroborati eius, et redditii sibi, si poterit se a severioribus scriptis ad haec solutiora producere. In illis enim quamvis aegrum eum adhuc, et secum reluctantem, avocabit ipsa rerum quas tractabit austertas : haec quae remissa fronte commentanda sunt, non feret, nisi cum iam sibi ab omni parte consolerit. Itaque debabis eum severiore materia primum exercere, deinde hilariore temperare. Illud quoque magno tibi erit levamento, si saepe te sic interrogaveris : Utrumne meo nomine doleo, an eius qui decessit ? Si meo, perit meae indulgentiae iactatio, et incipit dolor, hoc uno excusatus quod honestus est, cum ad utilitatem respiciat, a pietate desciscens. Nihil autem minus bono viro convenit, quam in fratribus luctu calculos ponere. Si illius nomine doleo ; necesse est, alterutrum ex his duobus esse iudicem. Nam si nullus defunctis sensus superest, evasit omnia frater meus vitae incommoda, et in eum restitutus est locum, in quo fuerat antequam nasceretur, et expers omnis mali, nihil timet, nihil cupit, nihil patitur. Quis iste est furor, pro eo me nunquam dolere desinere, qui nunquam dolitus est ? Si est aliquis defunctis sensus; nunc animus fratribus mei, velut ex diutino carcere emissus, tandem sui iuris et arbitrii gestit, et rerum naturae spectaculo fruitur, et humana omnia ex superiori loco despicit ; divina vero, quorum rationem tamdiu frustra quaesierat, proprius intuetur.

Quid itaque eius desiderio maceror, qui aut beatus, aut nullus est? beatum deflere, invidia est: nullum, dementia.

XXVII. An hoc te movet, quod videtur ingentibus et cum maxime circumfusi bonis caruissi? cum cogitaveris multa esse quae perdidit, cogita plura esse quae non timet. Non ira eum torquebit, non meribus affliget, non suspicio lacefset, non edax et inimica semper alienis processibus invidia confectabitur, non metus folicitabit, non levitas fortunae cito munera sua transferentis inquietabit. Si bene computes, plus illi remissum, quam ereptum est. Non opibus fruetur, non tua simul ac sua gratia; non accipiet beneficia, non dabit. Miserum putas quod ista amisit, an beatum quod non desiderat? mihi crede, is beatior est, cui fortuna supervacua est, quam is cui parata est. Omnia ista bona, quae nos speciosa, sed fallaci voluptate delestant, pecunia, dignitas, potentia, aliaque complura, ad quae generis humani caeca cupiditas obstupescit, cum labore possidentur, cum invidia conspicuntur: eosque ipsos quos exornant, et premunt, plus minantur, quam profunt. lubrica et incerta sunt; nunquam bene tenentur. nam ut nihil de tempore futuro timetur, ipsa tamen magnae felicitatis tutela sollicita est. Si velis credere altius veritatem intuentibus, omnis vita supplicium est. In hoc profundum inquietumque proiecti mare, alternis aestibus reciprocum, et modo allevans nos subitis incrementis, modo maioribus damnis deferens, assidueque iactans, nunquam stabili consitimus loco: pendemus et fluc-

tuamur, et alter in alterum illidimur, et aliquando naufragium facimus, semper timemus. In hoc tam procelloso, et in omnes tempestates exposito mari navigantibus, nullus portus nisi mortis est. Ne itaque invideris fratri tuo. quiescit. tandem liber, tandem tutus, tandem aeternus est: superstitem Caesarem, omnemque eius prolem, superstitem cum omnibus habet fratribus. Antequam quidquam ex suo favore fortuna mutaret, stantem adhuc illam, et munera plena manu congerentem reliquit. Frustratur nunc aperto et libero coelo, ex humili atque depresso in eum emicuit locum, quisquis ille est, qui solutas vinculis animas beato recipit sinu: et nunc libere vagatur, omniaque rerum naturae bona cum summa voluptate perspicit. Erras. non perdidit lucem frater tuus, sed securiorum sortitus est. omnibus illo nobis commune est iter. Quid fata deflemus? non reliquit ille nos, sed antecessit.

XXIX. Est, mihi crede, magna felicitas in ipsa felicitate moriendi. Nihil ne in totum quidem diem certi est. quis in tam obscura et involuta veritate divinat, utrumne fratri tuo mors inviderit, an consuluerit? Illud quoque, qua iustitia in omnibus rebus es, necesse est te adiuvet cogitantem, non iniuriam tibi factam, quod tales fratrem amisisti, sed beneficium datum, quod tamdiu pietate eius uti fruique licuit. Iniquus est, qui muneric sui arbitrium danti non relinquunt: avidus, qui non lucri loco habet quod accepit, sed damni, quod reddidit. Ingratus est, qui iniuriam vocat finem voluptatis: stul-

tus, qui nullum fructum esse putat bonorum, nisi praesentium, qui non et in praeteritis acquiescit, et ea iudicat certiora quae abierunt, quia de illis, ne desinant, non est timendum. Nimis angustat gaudia sua, qui eis tantummodo quae habet ac videt, frui se putat, et habuisse eadem pro nihilo dicit. cito enim ncs omnis voluptas relinquit, quae fluit et transit, et paene antequam veniat, aufertur. Itaque in praeteritum tempus animus mittendus est, et quidquid nos unquam delectavit, reducendum, ac frequenti cogitatione pertractandum est. Longior fideliorque est memoria voluptatum, quam praesentia. Quod habuisti ergo optimum fratrem, in summis bonis pone. Non est quod cogites, quanto diutius habere potueris, sed quamdiu habueris. Rerum natura illum tibi, sicut ceteris fratribus, non mancipio dedit, sed commodavit: cum visum est deinde, repetiit, nec tuam in eo satietatem secuta est, sed suam legem. Si quis pecuniam creditam solvisse se moleste ferat, eam praesertim cuius usum gratuitum acceperit, nonne iniustus habebitur? Dedit natura fratri tuo vitam, dedit et tibi: quae suo iure usa, a quo voluit debitum suum citius exegit. non illa in culpa est, cuius nota erat conditio, sed mortalis animi spes avida, quae subinde quid rerum natura sit oblitifatur, nec unquam fortis suae meminit, nisi cum admonetur. Gaude itaque habuisse te tam bonum fratrem, et usumfructum eius, quamvis brevior vo-
to tuo fuerit, boni consule. Cogita iucundissimum esse, quod habuisti; humanum, quod perdidisti. Nec enim quidquam minus inter se consentaneum

est, quam aliquem moveri, quod sibi talis frater pa-
rum diu contigerit: non gaudere, quod tamen con-
tigerit. At inopinanti eruptus est. Sua quemque cre-
dulitas decipit: et in eis quae diligit, voluntaria mor-
talitatis oblivio. Natura nulli se necessitatis suae gra-
tiam facturam esse testata est. Quotidie praeter ocu-
los nostros transeunt notorum ignotorumque fune-
ra: nos tamen aliud agimus, et subitum id putamus
esse, quod nobis tota vita denuntiatur futurum.
Non est itaque ista fatorum iniquitas, sed men-
tis humanae pravitas, insatiabilis rerum omnium:
quae indignatur inde se exire, quo admissa est
precario.

XXX. Quanto ille iustior, qui nuntiata filii mor-
te, dignam magno viro vocem emisit: Ego cum ge-
nui, tum moriturum scivi. Prorsus non mireris ex
hoc natum esse, qui fortiter mori posset. Non ac-
cepit tanquam novum nuntium, filii mortem. quid
est enim novi, hominem mori, cuius tota vita ni-
hil aliud quam ad mortem iter est? Ego cum ge-
nui, tum moriturum scivi. Deinde adiecit rem ma-
ioris et prudentiae et animi: Huic rei sustuli. Om-
nes huic rei tollimur: quisquis ad vitam editur, ad
mortem destinatur. Gaudeamus ergo omnes eo quod
datur, reddamusque id cum reposcemur. alium alio
tempore fata comprehendent, neminem praeteribunt.
In procinctu stet animus: et id quod necesse est,
nunquam timeat: quod incertum est, semper exspec-
tet. Quid dicam duces, ducumque progenies, et mul-
tis aut consulatibus conspicuos, aut triumphis, for-
te defunctos inexorabili? tota cum regibus regna,

populique cum gentibus tulere fatum suum. Omnes ; immo omnia in ultimum diem spectant. non idem universis finis est. Alium in medio cursu vita deserit , alium in ipso aditu relinquit , alium in extrema senectute fatigatum iam et exire cupientem vix emitit : alio quidem atque alio tempore , omnes tamen in eundem locum tendimus. Utrumne stultius sit necio , mortalitatis legem ignorare , an impudentius , recusare. Agedum illa quae multo ingenii tui labore celebrata sunt , in manus sume , utriuslibet auctoris carmina : quae tu ita resolvisti , ut quamvis structura illorum recesserit , permaneat tamen gratia. Sic enim illa ex alia lingua in aliam transtulisti , ut (quod difficillimum erat) omnes virtutes in alienam te orationem secutae sint. Nullus erit in illis scriptis liber , qui non plurima varietatis humanae incertorumque casuum et lacrimarum , ex alia atque alia causa fluentium , exempla tibi suggerat. Lege , quanto spiritu ingentibus intonueris rebus : pudebit te subito deficere , et ex tanta orationis magnitudine decidere. Ne commiseris , ut quisquis extemplo ac modo scripta tua mirabatur , quaerat quomodo tam grandia tamque solida tam fragilis animus conceperit. Potius ab ipsis quae te torquent , ad haec tot et tanta quae consolantur , converte , ac respice optimos fratres , respice uxorem , filium respice. Pro omnium horum salute , hac tecum portione fortuna decidit. Multos habes in quibus acquiescas:

XXXI. Ab hac te infamia vindica , ne videatur omnibus plus apud te valere unus dolor , quam haec tam multa solatia. Omnes istos una tecum percul-

sos vides , nec posse tibi subvenire , immo etiam ul-
tro exspectare , ut a te subleventur , intelligis : et ideo
quanto minus in illis doctrinae minusque ingenii
est , tanto magis resistere te necesse est communi ma-
lo. Est autem hoc ipsum solatii loco , inter multos
dolorem suum dividere : qui quia dispensatur inter
plures , exigua debet apud te parte subsidere. Non
desinam totiens tibi offerre Caesarem. illo moderante
terras , et ostendente , quanto melius beneficiis impe-
rium custodiatur , quam armis , illo rebus humanis
praeside , non est periculum , ne quid perdidisse te sen-
tias. in hoc uno tibi satis praesidii , satis solatii est.
Attolle te , et quotiens lacrimae suboriuntur oculis
tuis , totiens illos in Caesarem dirige ; siccabuntur ,
maximi et clarissimi conspectu numinis. Fulgor eius
illos , ut nihil aliud possint adspicere , preestringet ,
in se haerentes detinebit. Hic tibi , quem tu diebus
intueris ac noctibus , a quo nunquam deiiciis animum ,
cogitandus est , hic contra fortunam advocandus :
nec dubito , cum tanta illi adversus omnes suos sit
mansuetudo , tantaque indulgentia , quin multis iam
solatiis tuum istud vulnus obduxerit , nonnulla quae
dolori obstarent tuo , congesserit. Quid porro ? ut
nihil horum fecerit , nonne protinus ipse conspec-
tus per se tantummodo cogitatusque Caesar , maxi-
mo solatio tibi est ? Dii illum Deaeque omnes ter-
ris diu commodent. aetate hic D. Augusti aequet , an-
nos vincat , ac , quamdiu inter mortales erit , ni-
hil ex domo sua mortale esse sentiat. Rectorem Ro-
mano imperio filium longa fide approbet , et ante
illum consortem patris , quam successorem accipiat.

Sera, et nepotibus demum nostris dies nota sit, qua illum gens sua coelo afferat.

XXXII. Abstine ab hoc manus tuas, fortuna, nec in isto potentiam tuam, nisi ea parte qua prodes, ostenderis. patere illum generi humano iam diu aegro et affecto mederi : patere, quidquid prioris principis furor concussit, in locum suum restituere ac reponere. Sidus hoc, quod praecipitato in profundum, ac demerso in tenebras orbi refulsit, semper luceat. Hic Germaniam pacet, Britanniam apriat, et patrios triumphos ducat, et novos : quorum me quoque spectatorem futurum, quae primum obtinet locum ex virtutibus eius, promittit clementia. nec enim sic me deiecit, ut nollet erigere : immo ne deiecit quidem, sed impulsu a fortuna et cadentem sustinuit, et in praeceps euntem leniter divinae manus usus moderatione deposuit. Deprecatus est pro me senatum, et vitam mihi non tantum dedit, sed etiam petiit. Viderit, qualem volet aestimari causam meam. vel iustitia eius bonam perspiciet, vel clementia faciet, utrumque in aequo mihi eius beneficium erit, sive innocentem me scierit esse, sive voluerit. Interim magnum miseriarum mearum solarium est, videre misericordiam eius totum orbem pervagantem : quae cum ex ipso angulo, in quo ego defossum sum, complures multorum iam annorum ruina obrutos effoderit, et in lucem reduxerit, non vereor ne me unum transeat. Ipse autem optime novit tempus, quo cuique debeat succurrere : ego omnem operam dabo, ne pervenire ad me erubescat. O felicem clementiam tuam, Caesar ! quae efficit,

ut quietiorem sub te agant vitam exsules, quam nuper sub Caio egere principes. Non trepidant, nec per singulas horas gladium exspectant, nec ad omnem navium conspectum pavent. Per te habent, ut fortunae saevientis modum, ita spem quoque melioris eiusdem, ac praesentis quietem. Scias licet ea demum fulmina esse iustissima, quae etiam percussi colunt.

XXXIII. Hic itaque princeps, qui publicum omnium hominum solarium est, aut me omnia fallunt, aut iam recreavit animum tuum, et tam magno vulneri maiora adhibuit remedia: iam te omni confirmavit modo: iam omnia exempla, quibus ad animi aequitatem compellereris, tenacissima memoria retulit: iam omnium praecepta sapientum assueta sibi facundia explicuit. Nullus itaque melius has alloquendi partes occupaverit. aliud habebunt hoc diciente pondus verba, velut ab oraculo missa. omnem vim doloris tui divina eius contundet auctoritas. Hunc itaque tibi puta dicere: Non te solum fortuna defumis sibi, quem tam gravi afficeret iniuria. nulla domus in toto orbe terrarum aut est, aut fuit sine aliqua comploratione. Transibo exempla vulgaria, quae etiamsi minora, tamen mira sunt: ad fastos te, et annales perducam publicos. Vides omnes has imagines, quae implevere Caesareum atrium? nulla non harum aliquo suorum incommode insignis est: nemo non ex ipsis in ornamentum seculorum resurgentibus viris, aut desiderio suorum tortus est, aut a suis cum maximo animi cruciatu desideratus est. Quid tibi referam Scipionem Africa-

num, cui mors fratris in exilio nuntiata est? Is frater qui eripuit fratrem carcere, non potuit eripere fato: et quam iuris aequi impatiens pietas Africani fuerit, cunctis apparuit. eodem enim die, quo viatoris manibus fratrem abstulerat, tribuno quoque plebis privatus intercessit. tam magno tamen fratrem desideravit hic animo, quam defenderat. Quid referam Aemilianum Scipionem, qui uno paene eodemque tempore spectavit patris triumphum, duorumque fratrum funera? adolescentulus tamen, ac propemodum puer, tanto animo tulit illam familiae suae, super ipsum Pauli triumphum coincidentis, subitam vastitatem, quanto debuit ferre vir in hoc natus, ne urbi Romanae aut Scipio deesset, aut Carthago supereasset.

XXXIV. Quid referam duorum Lucullorum di-reptam morte concordiam? Quid Pompeios? quibus ne hoc quidem saeviens reliquit fortuna, ut una denique conciderent ruina. Vixit Sextus Pompeius, primum sorori superstes, cuius morte optime cohaerentis Romanae pacis vincula resoluta sunt. Idemque vixit superstes optimo fratri: quem fortuna in hoc erexerat, ne minus alte eum deiiceret, quam patrem deiecerat: et post hunc tamen casum non tantum dolori, sed bello suffecit. Innumerabilia undique exempla separatorum morte fratrum succurrunt; immo contra, vix ulla unquam horum paria conspecta sunt una senescentia: sed contentus nostrae domus exemplis ero. Nemo enim tam expers erit sensus ac sanitatis, ut fortunam ulli queratur luctum intulisse: quam sciet etiam Caesarum lacrimas con-

cupisse. Divus Augustus amisit Octaviam fororem carissimam, et ne ei quidem rerum natura lugendi necessitatem abstulit, cui coelum destinaverat: immo vero idem omni genere orbitatis vexatus, fororis filium successioni praeparatum suae perdidit. Denique ne singulos eius luctus enumerem, et generos ille amisit, et liberos, et nepotes: ac nemo magis ex omnibus mortalibus hominem esse se, dum inter homines erat, sensit. Tamen tot tantosque luctus cepit rerum omnium capacissimum eius pectus, victorque divus Augustus non gentium tantummodo externarum, sed etiam dolorum fuit. Caius Caesar, divi Augusti avunculi mei filius ac nepos, circa primos iuventae suae annos Lucium fratrem carissimum sibi, princeps iuuentutis principem eiusdem iuventutis amisit, in apparatu Parthici belli, et graviore multo animi vulnere, quam postea corporis, icthus est: quod utrumque piissime idem, et fortissime tulit. Caesar patruus meus, Drusum Germanicum patrem meum, minorem natu quam ipse erat fratrem, intima Germaniae recludentem, et gentes ferocissimas Romano subiicientem imperio, in complexu et osculis suis amisit: modum tamen lugendi non sibi tantum, sed etiam aliis fecit: ac totum exercitum, non solum moestum, sed etiam attonitum, corpus Drusi sui sibi vindicantem, ad morem Romani luctus redigit: iudicavitque non militandi tantum disciplinam esse servandam, sed etiam dolendi. Non potuisset ille lacrimas alienas compescere, nisi prius pressisset suas.

XXXV. M. Antonius avus meus, nullo minor

nisi eo a quo vietus est, tunc cum Rempublicam constitueret, et triumvirali potestate praeditus, nihil supra se, exceptis vero duobus collegis omnia infra se cerneret, fratrem interfectum audivit. Fortuna impotens, quales ex humanis malis tibi ipsa ludos facis! Eo ipso tempore, quo M. Antonius civium suorum vitae sedebat mortisque arbiter, M. Antonii frater duci iubebatur ad supplicium. Tulit hoc tamen tam triste vulnus eadem magnitudine animi, qua omnia alia adversa toleraverat: et hoc fuit ei lugere, viginti legionum sanguine fratri parentare. Sed ut omnia alia exempla praeteream, ut in me quoque ipso alia taceam funera, bis me fraterno luctu fortuna aggressa est: bis intellexit laedi me posse, vinci non posse. Amisi Germanicum fratrem: quem quomodo amaverim, intelligit profecto, quisquis cogitat, quomodo suos fratres pii fratres ament. Sic tamen affectum meum rexī, ut nec relinquerem quidquam quod exigi deberet a bono fratre, nec facerem quod reprehendi posset in principe. Haec ergo puta tibi parentem publicum referre exempla, eundem ostendere quam nihil sacrum intactumque sit fortunae, quae ex his penatibus ausa est funera ducere, ex quibus erat deos petitura. Nemo itaque miretur, aliquid ab illa aut crudeliter fieri, aut iniuste. Potest enim haec adversus privatas domos ullam aequitatem nosse, aut ullam modestiam, cuius implacabilis faecitia totiens ipsa funestavit pulvinaria? Faciamus licet illi convicium, non nostro tantum ore, sed etiam publico: non tamen mutabitur: adversus omnes se preces, omnesque ceremonias eri-

get. Hoc fuit in rebus humanis fortuna, hoc erit; nihil inausum sibi reliquit: nihil intactum relinquet. Ibit violentior per omnia, sicut semper est solita, eas quoque domos ausa iniuriae causa intrare, in quas per tempora aditur, et atram laureatis foribus induet vestem.

XXXVI. Hoc unum obtineamus ab illa votis ac precibus publicis, si nondum illi genus humanum placuit consumere, si Romanum adhuc nomen propria respicit, hunc principem, lapsis hominum rebus datum, sicut omnibus mortalibus, sibi esse sacro-sanctum velit. discat ab illo clementiam, atque sit mitissimo omnium principum mitis. Debes itaque omnes intueri eos, quos paulo ante retuli, aut ascitos coelo, aut proximos, et ferre aequo animo fortunam, ad te quoque porrigentem manus, quas ne ab eis quidem, per quos vivimus, abstinet. Debes illorum imitari firmitatem in perferendis et evincendis doloribus, et in quantum modo homini fas est, per divina ire vestigia. Quamvis in aliis rebus dignitatum ac nobilitatum magna discrimina sint, virtus in medio posita est: neminem designatur, qui modo dignum se illa iudicet. Optime certe illos imitaberis, qui cum indignari possent non esse ipsos expertes huius mali, tamen in hoc uno se ceteris exaequare hominibus, non iniuriam, sed ius mortalitatis iudicaverunt; tuleruntque nec nimis acerbe et asperre quod acciderat, nec molliter et effeminate. Nam et non sentire mala sua, non est hominis: et non ferre, non est viri. Non possum tamen, cum omnes circumiverim Caesares, quibus fortuna fra-

tres et sorores eripuit, hunc praeterire ex omni
Caesarum numero excerptum: quem rerum natu-
ra in exitium opprobriumque humani generis edi-
dit, a quo imperium eversum funditus, principis
piissimi recreat clementia. C. Caesar, amissa forore
Drusilla, is homo qui non magis dolere quam gau-
dere principaliter posset, conspectum conversatio-
nemque civium suorum profugit, exequiisque foro-
ris suae non interfuit, iusta sorori non praestitit, sed
in Albano suo tesseris ac foro, et provocatis huius-
modi aliis occupationibus acerbissimi funeris levabat
mala. Pro pudor imperii! principis Romani lugentis
fororem, alea solatium animi fuit. Idem ille Caius
furiosa inconstantia, modo barbam capillumque sub-
mittens, modo Italiae ac Siciliae oras errabundus
permetiens, et nunquam satis certus utrum lugeri
vellet, an coli fororem. Eodem enim tempore, quo
templa illi constituebat ac pulvinaria, eos qui pa-
rum moesti fuerant, crudelissima afficiebat animad-
versione. Eadem enim intemperie animi adversa-
rum rerum ictus serebat, qua secundarum elatus
eventu, supra humanum intumescebat modum. Pro-
cul istud exemplum ab Romano viro, luctum suum
aut intempestivis avocare lusibus, aut sordium ac
squaloris foeditate irritare, aut alienis malis ob-
lectare, minime humano solatio. Tibi vero nihil
ex consuetudine mutandum tua. quoniam quidem
ea instituisti amare studia, quae et optime felicita-
tem extollunt, et facillime minuunt calamitatem:
eademque et ornamenta hominum maxima sunt, et
solatia.

XXXVII. Nunc itaque te studiis tuis immerge altius, nunc illa tibi velut mumenta animi circumda, nec ex ulla tui parte inveniat introitum dolor. Fratris quoque tui produc memoriam aliquo scriptorum monumento tuorum. hoc enim unum est rebus humanis opus, cui nulla tempestas noceat, quod nulla consumat vetustas: cetera, quae per constructionem lapidum, et marmoreas moles, aut terrenos tumulos in magnam eductos altitudinem constant, non propagabunt longam diem: quippe et ipsa intereunt. Immortalis est ingenii memoria: hanc tuo fratri largire, in hac eum colloca. melius illum duraturo semper consecrabis ingenio, quam irrito dolore lugebis. Quod ad ipsam fortunam pertinet, etiamsi nunc agi apud te causa eius non potest: omnia enim illa quae nobis dedit, ob hoc ipsum, quod aliquid eripuit, invisa sunt: tunc tamen erit agenda, cum primum aequiorem te illi iudicem dies fecerit: tunc enim poteris in gratiam cum illa redire. Nam multa providit, quibus hanc emendaret iniuriam: multa etiam nunc dabit quibus redimat: denique ipsum quod abstulit, ipsa dederat tibi. Noli ergo contra te ingenio uti tuo, noli adesse dolori tuo. Potest quidem eloquentia tua, quae parva sunt approbare pro magnis: rursus magna attenuare, et ad minima deducere: sed alio ista vires servet suas, nunc tota se in solatium tuum conferat. Sed tamen dispice, ne hoc iam quoque ipsum sit supervacuum. aliquid enim a nobis natura exigitur: plus vanitate contrahitur. Nunquam autem ego a te, ne ex toto moereas, exigam. Et scio inveniri quosdam durae ma-

gis quam fortis prudentiae viros, qui negent dolitum esse sapientem. Hi vero videntur nunquam in huiusmodi casum incidisse. alioquin excussisset illis fortuna superbam sapientiam, et ad confessionem eos veri etiam invitatos compulisset. Satis praestiterit ratio, si id unum ex dolore, quod et superest et abundat, exciderit. ut quidem nullum omnino esse eum patiatur, nec sperandum ulli, nec concupiscendum est. Hunc potius modum servet, qui nec impietatem imitetur, nec insaniam: et nos in eo teneat habitu, qui et piae mentis est, nec emotae. Fluant lacrimae, sed eaedem desinant: trahantur ex imo peccatore gemitus, sed iidem et finiantur. Sic rege animum tuum, ut et sapientibus te approbare possis, et fratribus. Effice, ut frequenter fratris tui memoriam tibi velis occurrere, ut illum et sermonibus celebres, et assidua recordatione repraesentes tibi. Quod ita denique consequi poteris, si tibi memoriam eius incundam magis, quam flebilem feceris. naturale est enim, ut semper animus ab eo refugiat, ad quod cum tristitia revertitur. Cogita modestiam eius, cogita in rebus agendis soleritiam, in exsequendis industriam, in promissis constantiam. Omnia dicta eius ac facta et aliis expone, et tibi met ipse commemora. Qualis fuerit cogita, qualisque sperari potuerit. quid enim de illo non tuto sponderi fratre posset? Haec, utcunque potui, longo iam situ obsoleto et hebetato anima composui: quae si aut parum respondere ingenio tuo, aut parum mederi dolori videbuntur, cogita quam non possit is alienae vacare consolationi, quem sua ma-

la occupatum tenent; quam non facile Latina ei
verba homini succurrant, quem barbarorum incon-
ditus et barbaris quoque humanioribus gravis fre-
mitus circumsonat.

L. ANNAEI SENECAE
AD MARCIAM
DE CONSOLATIONE
LIBER UNUS.

L. ANNAEI SENECAE
 AD MARCIAM
 DE CONSOLATIONE
 LIBER UNUS.

Argumentum & Ordo.

Marcia gratiosa & dives matrona, ut apparet: filia A. Cremutii Cordi, viri a studiis scriptisque etiam incliti. Filium habuit, qui iam grandior obiit, maritus, pater & sacerdos: triennium autem iam ibat (ex Cap. 1. in fine) ab eius morte. Itaque argumenter, hoc Scriptum editum initio Claudiani temporis, nec ante. Nam sub Tiberio auctum Metilium hunc (ita vocabatur) honoribus, vix probabile: sub Caio igitur, qui & alia aetate Tiberii rescidit, & nominatim A. Cremutii Cordi scripta lectari permisit. Quod eodem isto Cap. 1. quoque tangitur: neque igitur ante potuit haec Consolatio edi, praesertim inveterato dolore, ut loquitur, et triennali illo lapsu. Immo bene consideranti, sub Claudio, & post exsilium fortasse haec scripta censentur. In parvo est. ipse libellus inter insignes, et si adulatione feminea hand expers. Duae partes sunt. Priore laudat illam, & a suo atque alienis deinde Exemplis solatur: usque ad Cap. vi. Posteriore ad Rationes transit, & primam illam communem, luctu nihil profici: tum secundum Naturam eum non esse, sed a mollitie nostra, & incogitantia, quod quae fieri possunt futura non providemus. Iterum deinde Exempla virorum, et mulierum. Tum ad sortem conditionemque nascendi transit, cui mors annexa: usque ad Cap. xix. Ibi Dilemma inserit, Nec matri, nec ipsi male factum. De matre, breviter: gratiosa est, nec nisi opinione vexatur. De filio, pluribus: in quiete est, & casibus,

L. Ann. Seneca. Vol. I.

M

*vitiisque eruptus. Quid si ad ista in tam corrupta civitate ivis-
set? Tempestive igitur subductus: & Patris deinde (Cremutii)
persona inducitur filiam solantis & erigentis, & magno ore,
ad supera illa & coeli spectacula, vocantis.*

I. **N**ISI te, Marcia, scirem tam longe ab infirmitate muliebris animi, quam a ceteris vitiis recessisse, et mores tuos velut antiquum aliquod exemplar aspici: non auderem obviam ire dolori tuo, cui viri quoque libenter haerent et incubant. nec spem conceperem, tam iniquo tempore, tam inimico iudice, tam invidioso crimine, posse me efficere, ut fortunam tuam absolveres. Fiduciam mihi dedit exploratum iam robur animi, et magno experimento approbata virtus tua. Non est ignotum, qualem te in personam patris tui gesseris: quem non minus quam liberos dilexisti: excepto eo, quod non optabas superstitem. nec scio an et optaveris. Permittit enim sibi quaedam et contra bonum morem magna pietas. Mortem A. Cremutii Cordi, parentis tui, quantum poteras, inhibuisti. Postquam tibi aperuit, inter Seianianos satellites illam unam patere servitutis fugam, non favisti consilio ciuis, sed dedisti manus victa, fudistiique lacrimas palam, et gemitus devorasti quidem, non tamen hilari fronte texisti: et hoc illo seculo, quo magna pietas erat, nihil impie facere. Ut vero aliquam occasionem mutatio temporum dedit: ingenium patris tui, de quo sumtum erat supplicium, in usum hominum reduxisti, et a vera illum vindicasti morte, ac restituisti in publica monumenta libros, quos vir ille fortissimus san-

guine suo scripserat. Optime meruisti de Romanis studiis : magna illorum pars arserat. optime de posteris : ad quos veniet incorrupta rerum fides, auctori suo magno imputata. optime de ipso : cuius vigebitque memoria, quamdiu fuerit in pretio Romana cognosci ; quamdiu quisquam erit, qui reverti velit ad acta maiorum ; quamdiu quisquam , qui velit scire, quid sit vir Romanus , quid subiectis iam cervicibus omnium , et ad Seianianum iugum adiectis , indomitus sit homo , ingenio , animo , manu liber. Magnum mehercule detrimentum respublica ceperat, si illum ob duas partes pulcherrimas in oblivionem coniectum , eloquentiam et libertatem , non erisses. Legitur , floret , in manus hominum , in pectora receptus , vetustatem nullam timet. At illorum carnificum cito scelera quoque , quibus solis memoriam meruerunt , tacebunt. Haec magnitudo animi tui vetuit me ad sexum tuum respicere : vetuit ad vultum , quem tot annorum continua tristitia , ut semel obduxit , tenet. Et vide quam non surrepam tibi , nec fucum facere affectibus tuis cogitem. Antiqua mala in memoriam reduxi. et vis scire hanc quoque plagam esse sanandam ? ostendi tibi aequi magni vulneris cicatricem. Alii itaque molliter agant , et blandiantur : ego configere cum tuo moerore constitui, et defessos exhaustosque oculos , si verum audire vis , magis iam ex consuetudine , quam ex desiderio fluentes , continebo , si fieri potuerit , te favente remediis tuis ; sin minus , vel invita . tenas licet et amplexeris dolorem tuum , quem tibi in filii locum superstitem fecisti. Quis enim erit

finis? omnia in supervacuum tentata sunt. fatigatae allocutiones amicorum; auctoritates magnorum et affinium tibi virorum; studia, hereditarium et paternum bonum, surdas aures, irrito ac vix ad brevem occupationem proficiente solatio, transeunt. Illud ipsum naturale remedium temporis, quod maximas aerumnas quoque componit, in te una vim suam perdidit. Tertius iam praeterit annus, cum interim nihil ex primo illo impetu cecidit: renovat se, et corroborat quotidie luctus: et iam sibi ius mora fecit, eoque adductus est, ut putet turpe desinere. Quemadmodum omnia vitia penitus insidunt, nisi, dum surgunt, oppressa sint: ita quoque haec tristia et misera, et in se saevientia, ipsa novissime acerbitate pascuntur, et fit infelicitis animi prava voluptas dolor. Cupissem itaque primis temporibus ad istam curationem accedere. leviore medicina fuisset oriens adhuc restinguenda vis: vehementius contra inveterata pugnandum est. Nam vulnerum quoque sanitas facilis est, dum a sanguine recentia sunt: tunc et uruntur, et in altum revocantur, et digitos scrutantium recipiunt. ubi corrupta in malum ulcus veterarunt, difficilius curantur. Non possum nunc per obsequium, nec molliter assequi tam durum dolorem: frangendus est.

II. Scio, a praeceptis incipere omnes qui monere aliquem volunt, et in exempla desinere. Mutari hunc interim morem expedit. Aliter enim cum alio agendum est. Quosdam ratio dicit: quibusdam nomina clara opponenda sunt, et auctoritas, quae liberum non relinquat animum ad speciosa stupentem. Duo

tibi ponam ante oculos maxima, et sexus et seculi tui, exempla: alterius, feminae, quae se tradidit ferrandam dolori: alterius quae pari affecta casu, maiore damno, non tamen dedit longum in se malis suis dominum, sed cito animum in fedem suam reposuit. Octavia et Livia, altera soror Augusti, altera uxor, amiserunt filios iuvenes, utraque spe futuri principis certa. Octavia Marcellum, cui et avunculus et ficer incumbere cooperat, in quem onus imperii reclinaret. adolescentem animo alacrem, ingenio potentem; sed et frugalitatis continentiaeque in illis aut annis aut opibus non mediocriter admirandum; patientem laboris, voluptatibus alienum; quantumcunque imponere illi avunculus, et (ut ita dicam) inaedificare voluisse, laturum. Bene legerat nulli cessura ponderi fundamenta. Nullum finem, per omne vitae suae tempus, flendi gemendique fecit: nec ulla admisit voces, salutare aliquid afferentes. Ne avocari quidem se passa est. Intenta in unam rem et toto animo affixa, talis per omnem vitam fuit, qualis in funere. non dico non ausa consurgere, sed allevari recusans: secundam orbitatem iudicans, lacrimas mittere. Nullam habere imaginem filii carissimi voluit, nullam sibi fieri de illo mentionem. Orderat omnes matres, et in Liviam maxime furebat: quia videbatur ad illius filium transisse / sibi promissa felicitas. Tenebris et solitudini familiarissima, ne ad fratrem quidem respiciens, carmina celebrandae Marcelli memoriae composita, aliosque studiorum honores reiecit, et aures suas adversus omne solarium clausit: a solemnibus officiis seducta, et ipsam

magnitudinis fraternae nimis circumlucentem fortunam exosa, defodit se, et abdidit. Assidentibus liberis, nepotibus, lugubrem vestem non depositus, non sine contumelia omnium suorum, quibus salvis orba sibi videbatur.

III. Livia amiserat filium Drusum, magnum futurum principem, iam magnum ducem. Intraverat penitus Germaniam, et ibi signa Romana fixerat, ubi vix ullos esse Romanos notum erat. In expeditione [victor] decesserat, ipsis illum hostibus aegrum cum veneratione et pace mutua prosequentibus, nec optare quod expediebat audentibus. Accedebat ad hanc mortem, quam ille pro republica obierat, ingens civium provinciarumque, et totius Italiae desiderium, per quam effusis in officium lugubre municipiis coloniisque usque in urbem ductum erat funus triumpho simillimum. Non licuerat matri ultima filii oscula, gratumque extremi sermonem oris haurire. Longo itinere reliquias Drusi sui prosecuta, tot per omnem Italiam ardentibus rogis, quasi totiens illum amitteret, irritata, ut primum tamen intulit tumulo, simul et illum, et dolorem suum posuit: nec plus doluit quam aut honestum erat Caesari, aut aequum matri. Non desit itaque Drusi sui celebrare nomen, ubique illum sibi privatim publiceque repraesentare, et libentissime de illo loqui, de illo audire: cum memoriam alterius nemo posset retinere ac frequentre, quin illam tristem sibi redderet. Elige itaque, utrum exemplum putas probabilius. si illud prius sequi vis, eximis te numero vivorum; averfaberis et alienos liberos et tuos, ipsumque desiderans, triste

matribus omen occurses. Voluptates honestas, permissas, tanquam parum decoras fortunae tuae reicies, invisam habebis lucem: et aetati tuae, quod non praecipiet te quamprimum, et finiat, infestissima eris: quod turpissimum alienissimumque est animo tuo, in meliorem noto partem, ostendes te vivere nolle, mori non posse. Si ad hoc maximae feminae te exemplum applicueris; moderatius ac mitius eris in aerumnis, nec te tormentis macerabis. Quae enim, malum, amentia est, poenas a se infelicitatis exigerre, et mala sua augere? Quam in omni vita servasti, morum probitatem et verecundiam, in hac quoque re praestabis. est enim quaedam et dolendi modestia. Illum ipsum iuvenem dignissime quietum semper nominans cogitansque facies, et meliore pones loco, si matri suae, qualis vivus solebat, hilaris et cum gaudio occurrat.

IV. Nec te ad fortiora ducam praecepta, ut inhumano ferre humana iubeam modo, ut ipso funebri die oculos matris exsiccem: ad arbitrum tecum veniam: hoc inter nos quaeretur, utrum magnus esse debeat, an perpetuus dolor. Non dubito, quin Liviae Augustae, quam familiariter coluisti, magis tibi placeat exemplum. Illa te ad suum consilium vocat: illa in primo fervore, cum maxime impatientes ferocesque sunt miseriae, se consolandam Areo philosopho viri sui praebuit, et multum eam rem profuisse sibi confessa est: plus quam populum Romanum, quem nolebat tristem tristitia sua facere: plus quam Augustum, qui subducto altero adminiculo titubabat, nec luctu suorum inclinandus erat: plus quam

Tiberium filium, cuius pietas efficiebat, ut in illo acerbo et defleto gentibus funere, nihil sibi nisi numerum deesse sentiret. Hic, ut opinor, aditus illi fuit, hoc principium apud feminam opinionis suae custodem diligentissimam!

Usque in hunc diem Livia (quantum quidem ego sciam, assiduus viri tui comes, cui non tantum quae in publicum emittuntur, nota sunt, sed omnes quoque secretiores animorum vestrorum motus) dedisti operam ne quid esset, quod in te quisquam reprehenderet. Nec id in maioribus modo observasti, sed in minimis, ne quid faceres, cui famam, liberrimam principum iudicem, velles ignoscere. Nec quidquam pulchrius existimo in fastigio collocatis, quam multarum rerum veniam dare, nullius petere. Servandus itaque tibi in hac re tuus mos est, ne quid committas, quod minus aliterve factum velis.

V. Deinde oro atque obsecro, ne te difficilem amicis et intraetabilem praestes. Non est enim quod ignoretes omnes hos nescire quemadmodum se gerant: loquantur aliquid coram te de Druso, an nihil: ne aut oblivio clarissimi iuvenis illi faciat iniuriam, aut mentio tibi. Cum secessimus, et in unum convenimus, facta eius dictaque quanto meruit suspectu celebramus: coram te altum nobis de illo silentium est. Cares itaque maxima voluptate, filii tui laudibus, quas non dubito quin vel impendio vitae, si potestas detur, in aevum omne sis prorogatura. Quare patere, immo arcessere sermones, quibus ille narretur, et apertas aures praebet ad nomen memoriamque filii tui: nec hoc grave duxeris, ceterorum mo-

re , qui in eiusmodi casibus partem mali putant , audi-
re solatia. Nunc incubuisti tota in alteram partem ,
et oblita meliorum , fortunam tuam , qua deterior
est , aspicis. Non convertis te ad convictus filii tui ,
occursusque iucundos , non ad pueriles dulcesque
blanditias , non ad incrementa studiorum : ultimam
illam faciem rerum premis. Illi , tanquam parum ipsa
per se horrida sit , quidquid potes congeris. Ne , ob-
fecro te , concupieris , perversissimam gloriam infe-
licissimam videri.

VI. Simul cogita , non esse magnum , se rebus
prosperis fortem gerere , ubi secundo cursu vita pro-
cedit : nec gubernatoris quidem artem tranquillum
mare et obsequens ventus ostendit : adversi aliquid
incurrat oportet , quod animum probet. Proinde ne
submiseris te , immo contra fige stabilem gradum :
et quidquid onerum supra cecidit , sustine , primo
dumtaxat strepitu conterrita. Nulla re maior invidia
fortunae fit , quam aequo animo. Post hoc ostendit
illi filium in columem , ostendit ex amissio nepotes.
Tuum illic Marcia negotium actum , tibi Areus asse-
dit : te mutata persona consolatus est. Sed puta , Mar-
cia , ereptum tibi amplius quam ulla unquam mater
amiserit . (non permulceo te , nec extenuo calamita-
tem tuam .) si fletibus fata vincuntur , conferamus :
eat omnis inter luctus dies : noctem sine somno tristi-
tia consumat : ingerantur lacerato pectori manus , et
in ipsam faciem impetus fiat : atque omni se genere
saevitiae profecturus moeror exerceat. Sed si nullis
planctibus defuncta revocantur ; si sors iminota , et
in aeternum fixa , nulla miseria mutatur , et mors

tenet quidquid abstulit; desinat dolor, qui perit. Quare regamus: nec nos ista vis transversos auferrat. Turpis est navigii rector, cui gubernacula fluctus eripuit, qui fluctuantia vela deseruit, permisit tempestatei ratem: at ille vel in naufragio laudandus, quem obruit mare clavum tenentem et obnixum.

VII. At enim naturale desiderium suorum est. Quis negat, quamdiu modicum est? nam ex discessu, non solum amissione, carissimorum necessarius morsus est, et firmissimorum quoque animorum contratio. Sed plus est quod opinio adiicit, quam quod natura imperavit. Adspice mutorum animalium quam concitata sint desideria, et tamen quam brevia. Vacarum uno die alterove mugitus auditur: nec diutius equarum vagus ille amensque discursus est. Ferae cum vestigia catulorum consectatae sunt, et silvas pervagatae: cum saepe ad cubilia expilata redierint, rabiem intra exiguum tempus extinguunt. Aves cum stridore magno inanes nidos circumfremunt: intra momentum tamen quietae, volatus suos repetunt. Nec ulli animali longum foetus sui desiderium est, nisi homini: qui adest dolori suo, nec tantum quantum sentit, sed quantum constituit, afficitur. Ut scias autem non esse hoc naturale, luctibus frangi, primum magis feminas quam viros, magis barbaros quam placidos eruditaeque gentis homines, magis indocitos quam doctos, eadem orbitas vulnerat. Atq[ue] ea, quae a natura vim acceperunt, eandem in omnibus servant. Apparet non esse naturale, quod varium est. Ignis omnes aetates, omnium urbium cives, tam virqs quam feminas, uret: ferrum in omni corpore

exhibebit secaandi potentiam. quare? quia vires illi a natura datae sunt, quae nihil in personam constituit. Paupertatem, luctum, ambitionem alius aliter sentit, prout illum consuetudo infecit: et imbecillum impatientemque reddit praesumta opinio de non timendis terribilis.

VIII. Deinde quod naturale est, non decrescit mora: dolorem dies consumit. licet contumacissimum, quotidie insurgentem, et contra remedia effervescentem; tamen illum efficacissimum mitigandae ferociae tempus enervat. Manet quidem tibi, Marcia, etiamnum ingens tristitia, et iam videtur duxisse callum, non illa concitata, qualis initio fuit, sed pertinax et obstinata. tamen hanc quoque aetas tibi minutatim eximet. Quoties aliud egeris, animus relaxabitur: nunc te ipsa custodis. multum autem interest, utrum tibi permittas moerere, an imperes. Quanto magis hoc morum tuorum elegantiae convenit, finem luctus potius facere, quam exspectare: nec illum opperiri diem, quo te invita dolor desinat, / ipsa illi renuntia.

IX. Unde ergo tanta nobis pertinacia in deploratione nostri, si id non fit naturae iussu? quod nihil nobis mali, antequam eveniat, proponimus, sed ut immunes ipsi, et aliud pacatius ingressi iter, alienis non admoneamur casibus, illos esse communes. Tot praeter domum nostram ducuntur exsequiae: de morte non cogitamus. tot acerba funera: nos togam nostrorum infantium, nos militiam, et paternae hereditatis successionem animo agitamus. tot divitum subita paupertas in oculos incidit: et nobis nunquam

in mentem venit, nostras quoque opes aequa in lube
brico positas. Necessa est itaque magis corruamus,
qui quasi ex inopinato ferimur. Quae multo ante
praevisa sunt, languidius incurunt. Vis tu scire te
ad omnes expositam iactus stare, et illa quae alios
tela fixerunt, circa te vibrasse? velut murum ali-
quem, aut obsessum multo hoste locum, et arduum
adscensu, inermis adeas, exspecta vulnus, et illa su-
perne volantia cum sagittis pilisque faxa puta in tuum
librata corpus. Quoties aut ad latus, aut pone ter-
gum ceciderint, exclama: Non decipies me, fortu-
na, nec securam aut negligentem opprimes. Scio quid
pares. alium percussisti, me petisti. Quis unquam res
suas, quasi periturus, adspexit? quis unquam no-
strum de exilio, de egestate, de luctu cogitare au-
sus est? quis non, si admoneatur ut cogitet, tanquam
dirum omen respuat, et in capita inimicorum aut
ipsius intempestivi monitoris abire illa inbeat? Non
putavi futurum. Quidquam tu putas non futurum,
quod multis scis posse fieri, quod multis vides eve-
nisse? Egregium versum et dignum, qui non e Pub-
lio exiret:

Cuivis potest accidere, quod cuiquam potest.

Ille amisit liberos: et tu amittere potes. Ille damna-
tus est: et tua innocentia sub iectu est. Hic nos error
decipit, hic effeminat, dum patimur, quae nunquam
pati nos posse praevidimus. Aufert vim praesentibus
malis, qui futura prospexit.

X. Quidquid est hoc, Marcia, quod circa nos ex
adventitio fulget, liberi, honores, opes, ampla atria,

et exclusorum clientium turba referta vestibula , clara , nobilis , aut formosa coniux , ceteraque ex incerta et mobili forte pendentia : alieni commodati que apparatus sunt. nihil horum doño datur : collatiis , et ad dominos reddituris instrumentis scena adornatur. Alia ex his primo die , alia secundo referentur : pauca usque ad finem perseverabunt. Ita non est quod nos suspiciamus , tanquam inter nosira positi : mutuo accepimus. Ususfructus noster est , cuius tempus ille arbiter muneric sui temperat : nos oportet in promtu habere , quae in incertum diem data sunt , et appellatos , sine querela reddere. Pessimi est debitoris , creditori facere convicium. Omnes ergo nostros , et quos superstites lege nascendi optamus , et quos praecedere iustissimum ipsorum votum est , sic amare debemus , tanquam nihil nobis de perpetuitate , immo nihil de diuturnitate eorum promissum fit. Saepe admonendus est animus , amet ut recessura , immo tanquam recedentia. quidquid a fortuna datum est , tanquam extemplo abiturum possideat. Rapite ex liberis voluptates , fruendos vos invicem liberis date , et sine dilatione omne gaudium haurite. nihil de hodierna die promittitur. nimis magnam ad vocationem dedi : nihil de hac hora. Festinandum est. instat a tergo mors : iam disiicitur iste comitatus : iam contubernia ista sublato clamore solventur. Rapina rerum omnium est , (miseri , nescitis ?) et fuga , vivere. Si mortuum tibi filium doles , eius temporis quo natus est , crimen est. mors enim illi nascenti determinata est. In hanc legem datus ; hoc factum ab utero statim prosequebatur. In regnum for-

tunae , et quidem durum atque invictum pervenimus , illius arbitrio digna atque indigna passuri . corporibus nostris impotenter , contumeliose , crudeliter abutetur : alios ignibus peruret , vel in poenam admotis , vel in remedium : alios vincet ; id nunc hosti licebit , nunc civi : alios per incerta nudos maria iactabit , et luctatos cum fluctibus , ne in harenam quidem aut litus explodet , sed in alicuius ventrem immensaे belluae decondet : alios morborum variis generibus emaceratos , diu inter vitam mortemque medios detinebit . Ut varia et libidinosa , mancipiorumque suorum negligens domina , et poenis et muneribus errabit . Quid opus est partes deflere ? tota vita flebilis est . Urgebunt nova incommoda , priusquam veteribus satisfeceris . Moderandum est itaque , vobis maxime , quae immoderate fertis : et in iactus , et in dolores humanum pectus dispensandum .

XI. Quae demum ista tuae publicaeque conditio-
nis oblivio est ? Mortalis nata es , mortales peperi-
sti : putre ipsa fluidumque corpus , et causis mor-
bisque repetita , sperasti tam imbecilla materia so-
lida et aeterna gestasse ? Decessit filius tuus , id est ,
decucurrit ad hunc finem , ad quem , quae feliciora
partu tuo putas , properant . Huc omnis ista quae in
foro litigat , in theatris desidet , in templis precatur
turba , dispari gradu vadit . Et quae veneraris , et quae
despicis , unus exaequabit cinis . Hoc iubet illa Py-
thicus oraculis adscripta vox , Nosce te . Quid est ho-
mo ? quodlibet quassum vas , et quodlibet fragile :
iactatu , non tempestate magna , ut dissiperis , est opus .
Ubicunque arietaveris , solveris . Quid est homo ?

imbecillum corpus, et fragile, nudum, suapte natura inerme, alienae opis indigens, ad omnem fortunae contumeliam proiectum: cum bene lacertos exercuit, cuiuslibet ferae pabulum, cuiuslibet victima, ex infirmis fluidisque contextum, et lineamentis exterioribus nitidum, frigoris, aestus, laboris impatiens: ipso rursus situ et otio iturum in tabem, alimenta metuens sua, quorum modo inopia, modo copia rumpitur: anxiae solicitaeque tutelae, precarii spiritus, et male haerentis, quem pavor repentinus adiectusve ex improviso sonus auribus gravis excutit: soli semper sibi nutrimentum vitiosum et inutile. Miramur in hoc mortem unius, qua singulis opus est? Numquid enim ut concidat, res magni molimenti est? Odor illi saporque, et lassitudo, et vigilia, et humor, et cibus, et sine quibus vivere non potest, mortifera sunt. Quocunque se movet, infirmitatis suae statim conscientium, non omne coelum ferens, aquarum novitatibus, flatuque non familiaris aurae, et tenuissimis causis atque offensionibus morbidum, putre, causarium, fletu vitam auspiciatum: cum interim quantos tumultus hoc tam contemtum animal movet? in quantas cogitationes oblitum conditionis suae venit? Immortalia, aeterna volutat animo, et in nepotes pronepotesque disponit: cum interim longa conantem eum mors opprimit: et hoc quod senectus vocatur, pauci sunt circuitus annorum.

XII. Dolor tuus, o Marcia, si modo illi ulla ratio est, utrum sua spectat incommoda, an eius qui decepsit? Utrumne amissio filio movet, quod nullas

ex illo voluptates cepisti: an quod maiores, si diutius vixisset, percipere potuisti? Si nullas te perceperisse dixeris; tolerabilius efficies detrimentum tuum. minus enim homines desiderant ea, ex quibus nihil gaudii laetitiaeque percepérunt. Si confessa fueris percepisse magnas voluptates; oportet te non de eo quod detraictum est queri, sed de eo gratias agere quod collegisti. Provenerunt enim satis magni fructus laborum tuorum ex ipsa educatione: nisi forte hi, qui catulos avesque, et frivola animorum oblectamenta, summa diligentia nutriunt, fruuntur aliqua voluptate ex visu tactuque et blanda adulazione mutorum: liberos nutrientibus, non fructus educationis, ipsa educatio est. Licet itaque tibi nihil industria eius contulerit, nihil diligentia custodierit, nihil prudentia quaesierit: ipsum quod habuisti, quod amasti, fructus est. At potuit longior esse, et maior. Melius tamen tecum actum est, quam si omnino non contigisset. quoniam si ponatur electio, utrum satius sit non diu felicem esse, an nunquam: melius est, discessura nobis bona, quam nulla contingere. Utrumne malles degenerem aliquem, et numerum tantum nomenque filii expleturum habuisse, tantae indolis, quantae tuus fuit? Iuvenis cito prudens, cito pius, cito maritus, cito pater, cito omnis officii curiosus, cito facerdos, omnia tam prope. Nulli fere et magna bona, et diurna contingunt, non durat, nec ad ultimum exit, nisi lenta felicitas. Filium tibi dii immortales non diu daturi, statim talem dederunt, qualis diu effici potest. Ne illud quidem dicere potes, electam te a diis, cui

frui non liceret filio. Circui per omnem notorum et ignotorum frequentiam oculis: occurrent tibi passi ubique maiora. Senserunt ista magni duces, senserunt principes. ne deos quidem fabulae immunes reliquerunt: puto ut nostrorum funerum levamentum esset, etiam divina concidere. Circumspice, inquam, omnes. nullam tam miseram nominabis dominum, quae non inveniat in miseriore solatium. Non, mehercule, tam male de moribus tuis sentio, vt putem posse te levius pati casum tuum, si tibi ingentem numerum lugentium produxero. malivoli solatii genus est, turba miserorum. Quosdam tamen referam: non ut scias, hoc solere hominibus accidere: ridiculum est enim, mortalitatis exempla colligere: sed ut scias fuisse multos, qui lenierunt aspera, ferendo placide. A felicissimo incipiam. L. Sylla filium amisit: nec ea res aut militiam eius, et acerrimam virtutem in hostes civesque, contudit: aut effecit, ut cognomen illud usurpasse salvo videretur, quod amissi filio assumpsit: nec odia hominum veritus, quorum malis illius nimis secundae res constabant: nec invidiam deorum, quorum illud crimen erat, Sylla tam felix. Sed istud inter res nondum iudicatas habeatur, qualis Sylla fuerit: etiam inimici fatebuntur, bene illum arma sumfisse, bene posuisse: hoc de quo agitur constabit, non esse maximum malum, quod etiam ad felicissimos pervenit.

XIII. Ne nimis admiretur Graecia illum patrem, qui in ipso sacrificio nuntiata filii morte, tibicinem tantum tacere iussit, et coronam capiti detraxit, cetera rite perfecit. Pulvillus effecit pontifex, cui

postem tenenti , et Capitolium dedicanti , mors filii nuntiata est : quam ille exaudisse dissimulans , et solemnia pontificalis carminis verba concepit , gemitu non interrupente precationem , et ad filii sui nomen , Iove propitiato . Putasse eius luctus aliquem finem esse debere , cuius primus dies , primus impetus ab altaribus publicis , et fausta nuncupatione non abduxit patrem . Dignus mehercule fuit memorabili dedicatione , dignus amplissimo sacerdotio , qui cōlere deos ne iratos quidem destitit . Idem tamen , ut rediit domum , et implevit oculos , et aliquas voces flebiles misit : et peractis , quae mos erat praestare defunctis , ad Capitolinum illum rediit vultum . Paulus circa illos nobilissimi triumphi dies , quo vincitum ante currum egit Persen , incliti regis nomen , duos filios in adoptionem dedit : quos sibi servaverat , extulit . Quales retentos putas , cum inter commodatos Scipio fuisse ? Non sine motu vacuum Paulli currum populus Romanus aspexit . concionatus est tamen , et egit diis gratias , quod compos voti factus esset . Preccatum enim se , ut si quid ob ingentem victoriam invidiae dandum esset , id suo potius , quam publico damno solveretur . Vides quam magno animo tulerit ? orbitati suae gratulatus est . Et quem magis poterat movere tanta mutatio ? solatia simul atque auxilia perdidit : non contigit tamen tristem Paullum Persi videre .

XIV. Quid nunc te per innumerabilia magnorum virorum exempla ducam , et quaeram miseris ? quasi non difficilius sit , invenire felices . Quota quaeque domus usque ad exitum omnibus partibus suis con-

sttit, in qua non aliquid turbatum sit? Unum quemlibet annum occupa: et ex eo magistratus cita. Lucium, si vis, Bibulum, et C. Caesarem. videbis inter collegas inimicissimos concordem fortunam. L. Buli, melioris quam fortioris viri, duo simul filii interfecti sunt: Aegyptio quidem militi ludibrio habitu: ut non minus ipsa orbitate, auctor eius, digna res lacrimis effet. Bibulus tamen, qui, toto honoris sui anno, ob invidiam collegae, domi latuerat, postero die quam geminum funus renuntiatum est, processit ad solita et publica officia. Quid minus poterat, quam unum diem duobus filiis dare? tam cito liberorum luctum finivit, qui consulatum anno luxerat. C. Caesar cum Britanniam peragraret, nec Oceano felicitatem suam continere posset, audivit decepsisse filiam, publica secum fata ducentem. In oculis erat iam Cn. Pompeius, non aequo lature animo quemquam aliud esse in Republica magnum, et modum impositurus incrementis, quae gravia illi videbantur, etiam cum in commune crescerent: tamen intra tertium diem imperatoria obiit munia, et tam cito dolore vicit, quam omnia solebat.

XV. Quid aliorum tibi funera Cæsarum referam? quos in hoc mihi interim videtur violare fortuna, ut sic quoque generi humano profint, ostendentes, ne eos quidem, qui diis geniti deosque genituri dicantur, sic suam fortunam in potestate habere, quemadmodum alienam. Divus Augustus amissis liberis, nepotibus, exhausta Cæsarum turba, adoptione defertam domum fulsit. Tulit tamen fortiter: tanquam eius iam res ageretur, cuius cum maxime intercerat,

de diis neminem queri. Tib. Caesar et quem genuerat, et quem adoptaverat, amisit: ipse tamen pro rostris laudavit filium, stetitque in conspectu posito corpore, interiecto tantummodo velamento, quod pontificis oculos a funere arceret, et flente populo Romano non flexit vultum: experiendum se dedit Seiano ad latusstanti, quam patienter posset suos perdere. Videsne quanta copia virorum maximorum sit, quos non excepit hic omnia prosternens casus, in quos tot animi bona, tot ornamenta publice privatimque congesta erant? Sed videlicet it in orbem ista tempestas; et sine dilectu vastat omnia, agitque ut sua. Iube singulos conferre rationem: nulli contingit impune nasci.

XVI. Scio quid dicas: Oblitus es feminam te consolari: virorum refers exempla. Quis autem dixerit naturam maligne cum muliebribus ingeniis egisse, et virtutes illarum in arctum retraxisse? Par illis, mihi crede, vigor, par ad honesta (libeat) facultas est: laborem doloremque ex aequo, si consuevere, patiuntur. In qua istud urbe, dii boni, loquimur? In qua regem Romanis capitibus Lucretia et Brutus deicerunt. Bruto libertatem debemus, Lucretiae Brutum. In qua Cloeliam, conteinto hoste et flumine, ob insignem audaciam tantum non in viros transcriptimus. Equestri insidens statuae, in sacra via, celeberrimo loco, Cloelia exprobrat iuvenibus nostris pulvinum ascendentibus, in ea illos urbe sic ingredi, in qua etiam feminas equo donavimus. Quod tibi si vis exempla referri seminarum, quae suos fortiter desideraverunt, non ostiatim quaeram: ex una

tibi familia duas Cornelias dabo. Primam Scipionis filiam , Gracchorum matrem. duodecim illa partus , totidem funeribus recognovit. et de ceteris facile est , quos nec editos , nec amissos civitas sensit. Ti. Gracchum , et Caium , quos etiam qui bonos viros negaverit , magnos fatebitur , et occisos vidiit et inse pultos. consolantibus tamen miseramque dicentibus , Nunquam , inquit , non felicem me dicam , quae Gracchos peperi. Cornelia Livium Drusum , clarissimum iuvenem , illustris ingenii , videntem per Gracchana vestigia , imperfectis tot rogationibus , intra penates interemtum suos amiserat , incerto caedis auctore : tamen et acerbam mortem filii , et inultam , tam magno animo tulit , quam ipse leges tulera t. Iam cum fortuna in gratiam Marcia , revertensis , si tela , quae in Scipiones , Scipionumque matres . ac filios exegit , quibus Caesares petiit , ne a te quidem continuit. Plena et infesta variis casibus vita est : a quibus nulli longa pax , vix induciae sunt. Quatuor liberos sustuleras , Marcia. nullum aiunt frustra caderre telum , quod in confertum agmen immissum est. Mirum est , tantam turbam non potuisse sine invidia damnore praetervehi ? At hoc iniquior fortuna fuit , quod non tantum filios eripuit , sed elegit. Nunquam tamen iniuriam dixeris , ex aequo cum potentiore dividere : duas tibi reliquit filias , et harum nepotes : et ipsum quem maxime luges , prioris oblitera , non ex toto abstulit. Habes ex illo duas filias. si male fers , magna onera : si bene , magna solatia. In hoc te perdixit , ut illas cum videris , admonearis filii , non doloris. Agricola , eversis arboribus , quas aut ventus

radicitus evulsit , aut contortus repentinio impetu
turbo perfregit , sibolem ex illis residuam foveat , et
amissarum semina statim plantasque disponit : et mo-
mento (nam ut in damna , ita ad incrementa rapidum
veloxque tempus est) adolescent amissis laetiora . Has
nunc Metilii tui filias in eius vicem substitue , et va-
cantem locum exple . Unum dolorem geminato sola-
tio leva . Haec quidem natura mortalium est , ut nihil
magis placeat , quam quod amissum est . iniquiores
sumus adversus relicta , erectorum desiderio : sed si
aestimare volueris , quam tibi valde fortuna , etiam
cum saevierit , pepercerit , scies te habere plus quam
solatia . Resoice tot nepotes , duas filias .

XVII. Dic illud quoque , Marcia : Moveret me , si
esset cuique pro moribus fortuna , nunquam mala
bonos sequerentur : nunc video , exempt⁹ discrimi-
ne , et eodem modo malos horosque iactari . Grave
est tamen , quem educaveris iuvenem , iam matri ,
iam patri praesidium ac decus , amittere . Quis negat
grave esse ? sed humanum est . Ad hoc genita es ut
perderes , ut perires , ut sperares , metueres , alios te-
que inquietares , mortem et timeres et optares , et
quod est pessimum , nunquam scires cuius esses sta-
tus . Si quis Syracusas petenti diceret : Omnia incom-
moda , omnes voluptates futurae peregrinationis tuae
ante cognosce , deinde ita naviga . Haec sunt quae
mirari possis . videbis primum ipsam insulam ab Ita-
lia angusto intercisam freto , quam continent quon-
dam cohaesisse constat : subitum illo mare irrupit , et

Hesperium Siculo latus abscidit :
deinde videbis (licet enim tibi avidissimum maris

verticem stringere) stratam illam fabulosam Charybdim, quamdiu ab austro vacat; at si quid inde vehementius spiravit, magno hiatu profundoque navigia sorbentem. Videbis celebratissimum carminibus fontem Arethusam, nitidissimi ac perlucidi ad imum stagni, gelidissimas aquas profundentem: sive illas ibi primum nascentes invenit, sive immersum terris flumen integrum subter tot maria, et a confusione peioris undae servatum, reddidit. Videbis portum quietissimum omnium, quos aut natura posuit in tutelam classum, aut adiuvit manus, sic tutum, ut ne maximarum quidem tempestatum furori locus sit. Videbis ubi Athenarum potentia fracta: ubi tot milia captivorum, ille excisis in infinitam altitudinem faxis, lautumius carcer incluserat: ipsam ingentem civitatem, et laxius turritam, quam multarum urbium fines sint: tepidissima hiberna, et nullum diem sine interventu solis. Sed cum omnia ista cognoveris, gravis et insalubris aestas hiberni coeli beneficia corrumpet. Erit Dionysius illic tyrannus, libertatis, iustitiae, legum exitium, dominationis cupidus etiam post Platonem, vitae etiam post exsilium: alios uret, alios verberabit, alios ob levem offendam iubebit detruncari: arcesset ad libidinem mares feminasque, et inter foedos regiae intemperantiae greges parum erit simul binis coire. Audisti quid te invitare possit, quid absterrere: proinde aut naviga, aut resiste. Post hanc denuntiationem, si quis dixisset intrare se Syracusas velle, satisne iustum querelam de ullo, nisi de se, habere posset, qui non incidisset in illa, sed prudens sciensque venisset? Dicit omnibus nobis natura:

Neminem decipio. tu si filios sustuleris , poteris habere formosos , poteris et deformes : et si fortasse tibi multi nascentur , esse ex illis aliquis tam servator patriae , quam proditor poterit. Non est quod desperes tantae dignationis futuros , ut nemo tibi propter illos maledicere audeat : propone tamen et tantae futuros turpitudinis , ut ipsi maledictum sit. Nihil vetat illos tibi suprema praestare , et laudari te a liberis tuis : sed sic te para , tanquam in ignem positura , vel puerum , vel iuvenem , vel senem. Nil enim ad rem pertinent anni : quoniam nullum non acerbum funus est , quod parens sequitur. Post has leges propositas , si liberos tollis , omni deos invidia liberas , qui tibi nihil spoonderunt.

XVIII. Ad hanc imaginem agedum totius vitae introitum referamus. Syracusas visere deliberanti tibi , quidquid delectare poterat , quidquid offendere , exposui : puta nascenti me tibi venire in consilium. intratura es urbem diis hominibusque communem , omnia complexam , certis legibus aeternisque devinctam , indefatigata coelestium officia volventem. Videbis illic innumerabiles stellas , miraberis uno sidere omnia impleri , solem quotidiano cursu diei noctisque spatia signantem , annuo aestates hiemesque aequaliter dividentem. Videbis nocturnam lunae successionem , a fraternis occurribus lene remissumque lumen mutuantem , et modo occultam , modo toto ore terris imminentem , accessionibus damnisque mutabilem , semper proximae dissimilem. Videbis quinque sidera diversas agentia vias , et in contrarium praecipi mundo nitentia : ex horum levissi-

mis motibus fortunae populorum dependent, et maxima ac minima perinde formantur, prout aequum iniquumve fidus incessit. Miraberis collecta nubila, et cadentes aquas, et obliqua fulmina, et coeli fragorem. Cum satiatos spectaculo supernorum in terram oculos deieceris, excipiet te alia fortuna rerum, alterque mirabilis. Hinc camporum in infinitum pateantium fusa planities; hinc montium magnis et nivalibus surgentium iugis errecti in sublime vertices: deiectus fluminum, et ex uno fonte in Orientem Occidentemque defusi amnes; et summis cacuminibus nemora nutantia, et tantum silvarum cum suis animalibus, aviumque concentu diffono. Varii urbium situs, et seclusae nationes locorum difficultate. quarum aliae se in erectos subtrahunt montes, aliae ripis, lacu, vallibus, palude circumfunduntur: adiuta cultu seges, et arbusta sine cultore fertilia, et rivorum lenis inter prata discursus, et amoeni sinus, et litora in portum recendentia, sparsae tot per vastum insulae, quae interventu suo maria distinguunt. Quid lapidum gemmarumque fulgor, et inter rapidorum cursum torrentium aurum arenis interfluens, et in mediis terris, medioque rursus mari nitentes ignium faces, et vinculum terrarum Oceanus, continuacionem gentium triplici sinu scindens, et ingenti licentia exaestuans? Videbis his inquietis, et sine vento fluctuantibus aquis immani et excedenti terrestria magnitudine animalia, quaedam gravia et alieno se magisterio moventia, quaedam velocia, concitatis perniciosa remigiis, quaedam haurientia undas, et magno praenavigantium periculo efflantia. Videbis hic

navigia, quas non movere terras quaerentia. Videbis nihil humanae audaciae intentatum, erisque et spectatrix, et ipsa pars magna conantum: disces docebisse artes, alias quae vitam instruant, alias quae ornent, alias quae regant. Sed istic erunt mille corporum et animorum pestes, et bella, et latrocinia, et venena, et naufragia, et intemperies coeli corporisque, et carissimorum acerba desideria, et mors, incertum facilis, an per poenam cruciatumque. Delibera tecum, et perpende quid velis. ut in illa venias, per ista exequendum est. Respondebis, velle te vivere? quidni? Immo, puto, ad id non accedes, ex quo tibi aliquid detrahi doles. Vive ergo ut convenit. Nemo, inquis, nos consuluit. Consulti sunt de nobis parentes nostri: qui cum conditionem vitae nosfent, in hanc nos sustulerunt.

XIX. Sed ut ad solatia veniam, videamus primum quid curandum sit, deinde quemadmodum. Movet lugentem desiderium eius, quem dilexit. Id per se tolerabile apparet. Absentes enim absfuturosque, dum viverent, non flemus, quamvis omnis usus illorum nobis et conspectus ereptus sit. Opinio est ergo, quae nos cruciat: et tanti quodque malum est, quanti illud taxavimus. In nostra potestate remedium habemus. Iudicemus illos abesse, et nosmetipsi fallamus. dimisimus illos: immo consecuturi praemisimus. Movet et illud lugentem: Non erit qui me defendat, qui a contemtu vindicet. Ut minime probabili, sed vero solatio utar: in civitate nostra plus gratiae orbitas confert, quam eripit. Adeoque senectutem solitudo, quae solebat destruere, ad potentiam dicit,

ut quidam odia filiorum simulent, et liberos eiurent, et orbitatem manu faciant. Scio quid dicas : Non movent me detimenta mea. etenim non est dignus solatio, qui filium sibi decepsisse, sicut mancipium, moleste fert : cui quidquam in filio respicere, praeter ipsum, vacat. Quid igitur te, Marcia, movet? utrum, quod filius tuus decepsit : an, quod non diu vixit? Si, quod decepsit, semper debuisti dolere : semper enim scisti mori. Cogita, nullis defunctum malis affici. illa quae nobis inferos faciunt terribiles, fabulam esse. Nullas imminere mortuis tenebras, nec carcerem, nec flumina flagrantia igne, nec oblivionis amnem, nec tribunalia, et reos, et in illa libertate tam laxa ullos iterum tyrannos. Luserunt ista poëtae, et vanis nos agitavere terribus. Mors omnium dolorum et solutio est et finis : ultra quam mala nostra non exeunt, quae nos in illam tranquillitatem, in qua antequam nasceremur iacuimus, reponit. Si mortuorum aliquis miseretur, et non natorum misereatur. Mors nec bonum nec malum est. Id enim potest aut bonum aut malum esse, quod aliquid est : quod vero ipsum nihil est, et omnia in nihilum redigit, nulli nos fortunae tradit. Mala enim bonaque circa aliquam versantur materiam. Non potest id fortuna tenere, quod natura dimisit : nec potest miser esse, qui nullus est. Excessit filius tuus terminos, intra quos servitur. Excepit illum magna et aeterna pax : non paupertatis metu, non divitiarum cura, non libidinis per voluptatem animos carpentis stimulis incessit, non invidia felicitatis alienae tangitur, nec suae

premitur, nec conviciis quidem ullis verecundae aures verberantur: nulla publica clades prospicitur, nulla privata: non solicitus futuri pendet ex eventu, semper incertiora rependent. Tandem ibi constitit, unde nil eum pellat, ubi nil terreat.

XX. O ignaros malorum suorum, quibus non mors ut optimum inventum naturae laudatur! quae sive felicitatem includit, sive calamitatem repellit, sive satietatem aut lassitudinem senis terminat, sive iuvenile aevum, dum meliora sperantur, in flore deducit, sive pueritiam ante duriores gradus revocat: omnibus finis, multis remedium, quibusdam votum, de nullis melius merita, quam de his ad quos venit antequam invocaretur. Haec servitutem invito domino remittit: haec captivorum catenas levat: haec e carcere educit, quos exire imperium impotens vetuerat. haec exsilibus in patriam semper animum oculosque tendentibus, ostendit, nihil interesse inter quos quisque iaceat. haec, ubi res communes fortunia male divisit, et aequo iure genitos alium alii donavit, exaequat omnia. haec est, quae nihil quidquam alieno fecit arbitrio. haec est, in qua nemo humilitatem suam sensit. haec est, quae nulli paruit. haec est, Marcia, quam pater tuus concupivit. Haec est, inquam, quae efficit, ut nasci non sit supplgium: quae efficit, ut non concidam adversus minas casuum, ut servare animum salvum ac potentem sui possim. Habeo quo appellam. Video istic cruces non unius quidem generis, sed aliter ab aliis fabricatas. capite quidam conversos in terram suspendere, alii per obscoena stipitem egerunt, alii brachia patibu-

lo explicuerunt. Video fidiculas, video verbera : et membris et singulis articulis singula machinamenta : sed video et mortem. Sunt istic hostes cruenti, ci-
ves superbi : sed video istic et mortem. Non est mo-
lestum servire, ubi si domini pertaesum est, licet uno
gradu ad libertatem transire. contra iniurias vitae,
beneficium mortis habeo. Cogita, quantum boni op-
portuna mors habeat, quam multis diutius vixisse
nocuerit. Si Cn. Pompeium, decus istius firmamen-
tumque imperii, Neapoli valetudo abstulisset, indi-
bitatus populi Romani princeps excescerat. At nunc
exigui temporis adiectio fastigio illum suo depulit.
Vidit legiones in conspectu suo caefas : et ex illo
proelio, in quo prima acies senatus fuit, quam in-
felices reliquiae sunt, imperatorem ipsum superfuisse!
vidit Aegyptium carnificem, et sacrosanctum vic-
toribus corpus satelliti praestitit, etiam si incolumis
fuisset poenitentiam salutis acturus. quid enim erat
turpius, quam Pompeium vivere beneficio regis?
M. Cicero si eo tempore, quo Catilinae sicas devi-
tavit, quibus pariter cum patria petitus est, conci-
disset, liberata Republica conservator eius : si deni-
que filiae suae funus secutus fuisset, etiam tunc felix
mori potuit. Non vidisset strictos in civilia capita mu-
crones : nec divisa percussoribus occisorum bona, ut
etiam de suo perirent : non hastam consularia spo-
lia vendentem : nec caedes, nec locata publice la-
trocinia, bella, rapinas, tantum Catilinarum. Mar-
cum Catonem si a Cypro et hereditatis regiae dis-
pensatione redeuntem mare devorasset, vel cum illa
pecunia, quam afferebat civili bello stipendum, non-

ne illo bene actum foret? hoc certe secum tulisset, neminem ausurum coram Catone peccare. Nunc annorum adie^ctio paucissimorum, virum libertati non suae tantum, sed publicae natum, co^egit Caesarem fugere, Pompeium sequi. Nihil ergo mali immatura mors attulit illi: omnium etiam malorum remisit patientiam. Nimis tamen cito periit, et immaturus. Primum, puta illum superfluisse: comprehende quantum plurimum procedere homini licet: quantum est? Ad brevissimum tempus editi, cito cef- furi loco, venienti in pactum hoc, prospicimus hos pitium. De nostris aetatibus loquor, quas incredibili celeritate convolvi constat, computa urbium secula. videbis quam non diu steterint, etiam quae vetustate gloriantur. Omnia humana brevia et caduca sunt, infiniti temporis nullam partem occupantia. Terram hanc cum populis, urbibusque, et fluminibus, et ambitu maris, puncti loco ponimus, ad universa referentes: minorem portionem aetas nostra quam puncti habet, si tempori comparetur omni. cuius maior est mensura quam mundi: utpote cum ille se intra huius spatium toties remetiatur. Quid ergo interest id extendere, cuius quantumcunque fuerit incrementum, non multum aberit a nihilo? uno modo multum est quod vivimus: si satis est. Licet mihi vates, et in memoriam traditae senectutis viros nomines, cententos denosque percenseas annos: cum ad omne tempus dimiseris animum, nulla erit illa brevissimi longissimique aevi differentia, si inspecio quanto quis vixerit spatio, comparaveris quanto non vixerit. Deinde non immaturus deces-

sit : vixit enim quantum debuit vivere. Nihil enim illi iam ultra supererat. Non una hominibus senectus est, ut ne animalibus quidem. intra quatuordecim quaedam annos defatigantur : et haec illis longissima aetas est, quae homini prima. dispar cuique vivendi facultas data est : nemo nimis cito moritur, qui vieturus diutius quam vixit, non fuit. Fixus est cuique terminus : manebit semper ubi positus est : nec illum ulterius diligentia aut gratia promovebit : scit libenter illum ulterius diligentiam ex consilio perdidisse. Tulit suum, - - - metasque dati pervenit *ad aevi*. Non est itaque quod sic te oneres : Potuit diutius vivere. Non est interrupta eius vita, nec unquam se annis casus interiecit. solvitur quod cuique promissum est : eunt vi sua fata, nec adiiciunt quidquam, nec ex promisso semel demunt : frustra vota ac studia sunt. Habebit quisque, quantum illi dies primus adscripsit. ex illo quo primum lucem vidit, iter mortis ingressus est, accessitque fato propior : et illi ipsi, qui adiiciebant adolescentiae anni, vitae detrahebantur. In hoc omnes errore versamur, ut non putemus ad mortem, nisi senes inclinatosque iam vergere : cum illo infantia statim, et iuventa, omnisque aetas ferat. Agunt opus suum fata: nobis sensum nostrae necis auferunt : quoque facilius obrepatur mors, sub ipso vitae nomine latet. Infantem in se pueritia convertit, pueritiam pubertas, puberitatem iuventus, iuventutem senectus absulit. Incrementa ipsa si bene computes, damna sunt.

XXI. Quereris, Marcia, non tam diu vixisse filium tuum, quam potuisset? Unde enim scis, an

diutius illi expedierit? an illi hac morte consultum sit? Quem invenire hodie potes, cuius res tam bene positae sunt et fundatae, ut nihil illi, procedenti tempore, timendum sit? Labuntur humana, ac fluunt: neque pars vitae nostrae tam obnoxia aut tenera est, quam quae maxime placet. Ideoque felicissimis optanda mors est: quia in tanta inconstantia turbaque rerum, nihil nisi quod praeteriit, certum est. Quis tibi recepit, illud pulcherrimum filii tui corpus, et summa pudoris custodia inter luxuriosae urbis oculos conservatum, potuisse ita morbos evadere, ut ad senectutem formae illaesum perferret decus?

XXII. Cogita animi mille labes. neque enim recta ingenia, qualem in adolescentia spem sui fecerant, usque in senectutem pertulerunt: sed interversa plerumque sunt. Aut sera, ecque foedior luxuria invasit, et coegerit dehonestare speciosa principia: aut in popinam ventremque praecoquis summa illis curarum fuit, quid essent, quid biberent. Adiice incendia, ruinas, naufragia, lacerationes medicorum ossa vivis legentium, et totas in viscera manus demittentium, et non simplici dolore pudenda curantium. Post haec exsilium. non fuit innocentior filius tuus, quam Rutilius. Carcerem. non fuit sapientior, quam Socrates. Voluntario vulnere transfixum pectus. non fuit sanctior quam Cato. Cum ista perspexeris, scies optime cum his agi, quos natura, quia illos hoc manebat vitae stipendium, cito in tutum recepit. Nihil est tam fallax, quam vita humana: nihil tam infidendum. non mehercule quisquam accepisset, nisi daretur insciis. itaque si felicissimum est, non nasci: proximi-

num puta , brevitate vitae defunctos , cito in integrum restitui. Propone illud acerbissimum tibi tempus , quo Seianus patrem tuum clienti suo Satrio Secundo congiarium dedit. Irascebatur illi ob unum aut alterum liberius dictum , quod tacitus ferre non potuerat , Seianum in cervices nostras nec imponi quidem , sed escendere. Decernebatur illi statua in Pompeii theatro ponenda , quod exustum Caesar reficiebat. Exclamavit Cordus , Tunc vere theatrum perire. Quis ergo non rumperetur , supra cineres Cn. Pompeii constitui Seianum , et in monumentis maximi imperatoris consecrari perfidum militem ? consecratur. Subscriptio , et acerrimi canes , quos ille , ut sibi uni mansuetos , omnibus feros haberet , sanguine humano pascebat , circumlatrare hominem , et illum imperatum , incipiunt. Quid faceret ? si vivere vellet , Seianus rogandus erat : si mori , filia. uterque inexorabilis : constituit filiam fallere. Usus itaque balneo , et quo plus virium poneret , in cubiculum se quasi gustatus contulit : et dimissis pueris , quaedam per fenestram , ut videretur edisse , proiecit : a coena deinde , quasi iam satis in cubiculo edisset , abstinuit : alteroque die , et tertio idem fecit. Quarto , ipsa infirmitate corporis faciebat indicium. Complexus itaque te , Carissima , inquit , filia , et hoc unum , tota celata vita , iter mortis ingressus sum , et iam medium fere teneo. Revocare me nec debes , nec potes. Atque ita lumen omne praecludi iussit , et se in tenebris condidit. Cognito consilio eius , publica voluptas erat , quod e faucibus avidissimorum luporum educeretur praeda. Accusatores , Seiano auctore , adeunt

consulum tribunalia : queruntur mori Cordum , interpellantes quod coegerant. adeo illis Cordus videbatur effugere. Magna res erat in quaestione , an morte rei perderentur. dum deliberatur , dum accusatores iterum adeunt , ille se absolverat. Videsne , Marcia , quanta iniquorum temporum vices ex inopinato ingruant? fles quod alicui tuorum mori necesse fuit? paene non licuit.

XXIII. Praeter hoc , quod omne futurum incertum est , et ad deteriora certius : facilius ad superos iter est , animis cito ab humana conversatione dimissis. minus enim faecis ponderisque traxerunt : antequam obducentur , et altius terrena conciperent , liberati , leviores ad originem suam revolant , et facilius , quidquid est illud , absoluti transfluunt. Nec unquam magnis ingenii cara in corpore mora est. exire atque erumpere gestiunt , aegre has angustias ferunt^{BC} , vagi per omne sublime , et ex alto assueti humana despicere. Inde est quod Plato clamat : Sapientis animum totum in mortem prominere , hoc velle , hoc meditari , hac semper cupidine ferri in exteriora tendentem. Quid tu , Marcia , cum videres senilem in iuvene prudentiam , victorem omnium voluptatum animum , emendatum , carentem vitio , divitias sine avaritia , honores sine ambitione , voluptates sine luxuria appetentem , diu tibi putabas illum sospitem posse contingere? Quidquid ad summum pervenit , ad exitum prope est. Eripit se aufertque ex oculis perfecta virtus : nec ultimum tempus exspectant , quae in primo maturuerunt. Ignis quo clarior fulsit , citius extinguitur : vivacior est , qui cum lenta difficultate

materia commissus , fumoque demersus , ex sordido lucet . eadem enim detinet causa , quae maligne alit . sic ingenia quo illustriora , eo breviora sunt . Nam ubi incremento locus non est , vicinus occasus est . Fabianus ait , quod nostri quoque parentes videre , puerum Romae fuisse , statura ingentis viri : sed hic cito decepsit ; et moriturum brevi nemo non prudens dixit . non poterat enim ad illam aetatem pervenire , quam praeceperat . Ita est iudicium imminentis exitii maturitas , et appetit finis , ubi incrementa consumta sunt .

XXIV. Incipe virtutibus illum , non annis aestimare : satis diu vixit . pupillus relictus , sub tutorum cura usque ad decimum quartum annum fuit : sub matris tutela semper . cum haberet suos penates , relinquere tuos noluit . Adolescens statura , pulchritudine , cetero corporis robore castris natus , militiam recusavit , ne a te discederet . Computa , Marcia , quam raro liberos videant , quae in diversis domibus habitant : cogita , tot illos perire annos matribus , et per solicitudinem exigi , quibus filios in exercitu habent : scies multum patuisse hoc tempus , ex quo nihil perdidisti . Nunquam a conspectu tuo recessit : sub oculis tuis studia formavit , excellentis ingenii , et aequatouri avum , nisi obstitisset verecundia , quae multorum profectus silentio pressit . Adolescens rarissimae formae , in tam magna mulierum turba viros corruptientium , nullius spei se praebuit : et cum quarundam usque ad tentandum pervenisset improbitas , erubuit , quasi peccasset , quod placuerat . Hac sanctitate morum effecit , ut puer admodum dignus sacer-

dotio videretur, materna sine dubio suffragatione : sed ne mater quidem nisi pro bono candidato valueret. Harum in contemplatione virtutum filio iungere, tanquam si nunc ille tibi magis vacet. Nunc nihil habet quo avocetur : nunquam tibi sollicitudini , nunquam moerori erit. Quod unum ex tam bono filio poteras dolere , doluisti : cetera exempta casibus , plena voluptatis sunt , si modo uti filio scis , si modo quid in illo pretiosissimum fuerit , intelligis. Imago dumtaxat filii tui periit , et effigies non simillima : ipse quidem aeternus , meliorisque nunc status est , despoliatus oneribus alienis , et sibi relictus. Haec quae vides ossa circumvoluta nervis , et obductam cutem , vultumque , et ministras manus , et cetera quibus involuti sumus , vincula animorum tenebraeque sunt. Obruitur his animus , offuscatur , inficitur , arcetur a veris et suis , in falsa coniectus : omne illi cum hac carne gravi certamen est , ne abstrahatur et sidat : nititur illo , unde dimissus est . ibi illum aeterna requies manet , e confusis crassisque pura et liquida visentem.

XXV. Proinde non est quod ad sepulcrum filii tui curras. pessima eius , et ipsi molestissima istic iacent , ossa cineresque : non magis illius partes quam vestes , aliaque tegumenta corporum. Integer ille , nihilque in terris relinquens , fugit , et totus excessit : paullumque supra nos commoratus , dum expurgatur , et inhaerentia vitia situmque omnis mortalis aevi excutit , deinde ad excelsa sublatus , inter felices currit animas , excipitque illum coetus facer , Scipiones , Catonesque , utique contemtores vitae , et mortis

beneficio liberi. Parens tuus, Marcia, illic nepotem suum, quamquam illic omnibus omne cognatum est, applicat sibi, nova luce gaudentem, et vicinorum siderum meatus docet: nec ex coniecturis, sed omnium ex vero peritus, in arcana naturae libens ducit. Utque ignotarum urbium monstratus hospiti gratus est: ita sciscitanti coelestium causas, domesticus interpres. In profunda terrarum permettere aciem iuvat: delectat enim ex alto relicta respicere. Sic itaque, Marcia, te gere, tanquam sub oculis patris filiique posita, non illorum quos noveras, sed tanto excellentiorum, et in summo locatorum: erubescet quidquam humile aut vulgare, et mutatos in melius tuos flere. In aeterna rerum per vasta et libera spatia dimissos, non illos interfusa maria discludunt, nec altitudo montium, aut imiae valles, aut incerta vada Syrtium. tramites omnia plani, et ex facilis mobiles, et expediti, et invicem pervii sunt, intermixtique sideribus.

XXVI. Puta itaque ex illa arce coelesti patrem tuum, Marcia, cui tantum apud te auctoritatis erat, quantum tibi apud filium tuum, non illo ingenio, quo civilia bella deflevit, quo proscriptentes in aeternum ipse proscriptis, sed tanto elatiore, quanto est ipse sublimior, dicere: Cur te, filia, tam longa tenet aegritudo? Cur in tanta veri ignorantia versaris, ut inique actum iudices cum filio tuo, quod in taedium versus vitae, ipse ad maiores se recepit suos? Nescis quantis fortuna procellis disturbet omnia? quam nullis benignam facilemque se praestiterit, nisi qui minimum cum illa contraxerant? Re-

gesne tibi nominem felicissimos futuros, si matu-
rius illos mors instantibus subtraxisset malis? An Ro-
manos duces, quorum nihil magnitudini deerit, si
aliquid aetati detraxeris? an nobilissimos viros cla-
risimosque ad iustum militaris gladii composita cer-
vice formatos? Respice patrem atque avum tuum.
Ille in alieni percussoris venit arbitrium. Ego nihil
in me cuiquam permisi, et cibo prohibitus ostendi,
quam magno et quam vivaci animo scripsisse. Cur
in domo nostra diutissime lugetur, qui felicissime
moritur? Coimus in unum omnes, videmusque vos
alta nocte circumdari. Nil apud vos, ut putatis, op-
rabile, nil excelsum, nil splendidum: sed humilia
cuncta, et gravia, et anxia, et quotam partem lumi-
nis nostri cernentia? Quid dicam, nulla hic arma
mutuis furere concursibus, nec classes classibus fran-
gi, nec parricidia aut singi, aut cogitari, nec fora
litibus strepere dies perpetuos: nihil in obscurio,
detectas mentes, et aperta praecordia, et in publico
in dieoque vitam, et omnis aevi prospectum, even-
tumque? Iuvabat unius seculi me facta componere,
in parte ultima mundi, et inter paucissimos gesta: tot
secula, tot aetatum contextum et seriem, quidquid
annorum est, licet visere. licet surrecta, licet
ruitura regna prospicere, et magnarum urbium lap-
sus, et maris novos cursus. Nam si potest tibi so-
latio esse desiderii tui commune fatum, nihil quo
stat loco stabit. omnia sternet, abducetque secum ve-
tustas: nec hominibus solum, (quota enim ista for-
tuitae potentiae portio est:) sed locis, sed regioni-
bus, sed mundi partibus ludet: tot supprimet mon-

tes : et alibi rupes in altum novas exprimet : maria sorbebit, flumina avertet : et commercio gentium ruperto , societatem generis humani coetusque dissolvet. Alibi hiatibus vastis subducet urbes , tremoribus quietet , et ex infimo pestilentiae halitus mittet , et inundationibus , quidquid habitatur , obducet : necabitque omne animal orbe submerso , et ignibus vastis torrebit incenderque mortalia. Et cum tempus advenierit , quo se mundus renovaturus extinguat ; viribus ista se suis caedent , et sidera sideribus incurrent , et omni flagrante materia , uno igne , quidquid nunc ex disposito lucet , ardebit. Nos quoque felices animae , et aeterna fortitiae , cum Deo visum erit iterum ista moliri , labentibus cunctis , et ipsae parva ruinae ingentis accessio , in antiqua elementa vertemur. Felicem filium tuum , Marcia , qui illa iam novit.



L. ANNAEI SENECAE
DE PROVIDENTIA
LIBER UNUS.

L. ANNAEI SENECAE
 DE PROVIDENTIA
 S I V E
 QUARE BONIS VIRIS MALA ACCIDANT
 CUM SIT PROVIDENTIA
 LIBER UNUS.

Argumentum & Ordo.

Aureus hic libellus est, & scriptum post Caligulam video ex Cap. iv. Ego mirmillonem, inquit, sub C. Caesare audivi de raritate munerum querentem. In praeterito loquitur, & de homine ac tempore, quod fuit. Puto igitur sub Claudio, statim a reditu: immo quid si haec philosophica quaedam in exilio? nam diu ibi haesit, annos circiter octo, & iuste hoc elegerit, sibi solando. Argumentum enim est, Providentiam esse: nec obstat, quod bonis mala quaedam, sed externa, obveniant. Primo igitur universe illam afferit, a mundi motu, ordine, constantia: quae omnia rectorem clamant. Deinde ad Quaeftum proprie, Quare ergo mala bonis? Ait primo, Deum amare bonos; nec imittere igitur iis mala. Inflar parentis dumtaxat castigare, & coercere. Deinde, non videri ea mala bonis: nec vinci iis, sed exerceri, & per aspera indurari. Deum velut agonothetam esse, et robustis his athletis suis deleclari. Haec ita communiter, & velut præparans, ad Cap. iii. Ab eo magis distincte quinque rationes, cur eveniant, exequi pergit. Primo, pro ipsis esse, quibus accidunt: secundo, pro universis: tertio, volentibus evenire: quarto, evenire fato & aeterna lege. Primam rationem tradit Cap. iii, iv. docetque pro ipsis esse, sicut medicina pro aegris. Indurantur etiam sic a Deo, qui se dignos producit in pugnam; atios viores, in otio & umbra habet, Secundam tradit Cap. v.

pro omnibus esse, ut viri boni, sic habiti, clament aliis & offendant non esse Bona aut Mala, quae vulgus putet. Ad vera igitur illa spectent, & illa petant, haec fugiant. Ibidem tertiam necit, Volentes excipere: nam praebent se Deo et Fato. Quarta excipit, Fatum esse, & ab aeterno constitutum, quid gaudes doleasque. Denique repetit, mala haec non esse: & Deum inducit pulcherrime adhortantem, & ad robur excitantem. Stoice in fine. Si piget & ferre taedet, quis ienet? patet ianua, exi.

I. **Q**UAESISTI a me, Lucili, quid ita, si Providentia mundus ageretur, multa bonis viris acciderent mala? Hoc commodius in contextu operis redideretur, cum praeesse universis providentiam probaremus, et interesse nobis Deum: sed quoniam a toto particulam revelli placet, et unam contradictionem manente lite integra solvere: faciam rem non difficilem, causam deorum agam. Supervacuum est in praesentia ostendere, non sine aliquo custode tantum opus stare, nec hunc siderum certum discursum fortuiti impetus esse, et quae casus incitat, saepe turbari et cito arietare: hanc inoffensam velocitatem procedere aeternae legis imperio, tantum rerum terra marique gestantem, tantum clarissimorum lumen et ex dispositione lucentium: non esse materiae errantis hunc ordinem: neque quae temere coierunt, tanta arte pendere, ut terrarum gravissimum pondus sedeat immotum, et circa se properantis coeli fugam spectet; ut infusa vallibus maria moliant terras, nec ullum incrementum fluminum sentiant; ut ex minimis seminibus nascantur ingentia. Ne illa quidem quae videntur confusa et incerta, pluvias dico nubesque, et eliforum fulminum iactus, et incen-

dia ruptis montium verticibus effusa, tremores labantis foli, et alia quae tumultuosa pars rerum circa terras movet, sine ratione, quamvis subita sint, accidunt: sed suas et illa causas habent non minus, quam quae alienis locis conspecta miracula sunt, ut in mediis fluctibus calentes aquae, et nova insularum in vasto exslientium mari spatia. Iam vero si quis observaverit nudari litora pelago in se recedente, eademque intra exiguum tempus operiri, creder caeca quadam volutatione modo contrahi undas, et introrsum agi, modo erumpere, et magno cursu repeteret sedem suam: cum illae interim portionibus crescunt, et ad horam ac diem subeunt, ampliores minoresque, prout illas lunare sidus elicuit, ad cuius arbitrium oceanus exundat. Suo ista temporis reserventur: eo quidem magis, quod tu non dubitas de providentia, sed quereris. In gratiam te reducam cum diis, adversus optimos optimis. Neque enim rerum natura patitur, ut unquam bona bonis noceant. Inter bonos viros ac Deum amicitia est, conciliante virtute. amicitiam dico? immo etiam necessitudo et similitudo: quonia in quidem bonus ipse tempore tantum a Deo differt, discipulus eius, aemulatorque, et vera progenies: quem parens ille magnificus, virtutum non lenis exactior, sicut severi patres, durius educat. Itaque cum videris bonos viros acceptosque diis, laborare, sudare, per arduum ascendere, malos autem lascivire, et voluptatibus fluere: cogita filiorum nos modestia delectari, vernularum licentia: illos disciplina tristiori conserni, horum ali audaciam. Idem tibi de-

Deo liqueat. bonum virum in deliciis non habet : experitur, indurat, sibi illum praeparat.

II. Quare multa bonis viris adversa eveniunt? Nihil accidere bono viro mali potest. Non miscentur contraria. Quemadmodum tot amnes, tantum superne deiectorum imbrium, tanta medicatorum vis fontium, non mutant saporem maris, nec remittunt quidem : ita adversarum impetus rerum viri fortis non vertit animum. Manet in statu, et quidquid evenit, in suum colorem trahit. Est enim omnibus externis potentior : nec hoc dico, non sentit illa : sed vincit, et alioquin quietus placidusque, contra incurrentia attollitur. Omnia adversa, exercitationes putat. Quis autem, vir modo, et erectus ad honesta, non est laboris appetens iusti, et ad officia cum periculo promptus ? cui non industrioso otium poena est ? Athletas videmus, quibus virium cura est, cum fortissimis quibusque configgere, et exigere ab his, per quos certamini praeparantur, ut totis contra ipsos viribus utantur. caedi se vexarique patiuntur : et si non inveniunt singulos pares, pluribus simul obiciuntur. Marcer sine adversario virtus. tunc apparent quanta sit, quantum valeat, quantumque polleat, cum quid possit, patientia ostendit. Scias licet, idem viris bonis esse faciendum, ut dura ac difficilia non reformident, nec de fato querantur. quidquid accedit, boni consulant, in bonum vertant. Non quid, sed quemadmodum feras, interest. Non vides quanto aliter patres, aliter matres indulgeant ? illi excitari iubent liberos, ad studia obeunda mature, feriantis quoque diebus non patiuntur esse otiosos, et su-

dorem illis, et interdum lacrimas, excutiunt: at matres fovere in sinu, continere in umbra volunt; nunquam flere, nunquam tristari, nunquam laborare. Patrium habet Deus adversus bonos viros animum, et illos fortiter aniat: et, Operibus, inquit, doloribus, ac damnis exagitentur, ut verum colligant robur. Languent per inertiam saginata: nec labore tantum, sed motu, et ipso sui onere deficiunt. Non fert ullum ictum illaesa felicitas. at ubi assidua fuit cum incommodis suis rixa, callum per iniurias ducit, nec ulli malo cedit: sed etiam si ceciderit, de genu pugnat. Miraris tu, si Deus ille bonorum amantissimus, qui illos quam optimos esse atque excellentissimos vult, fortunam illis cum qua exerceantur assignat? Ego vero non miror, si quando impetum capiunt dii, spectandi magnos viros, colluctantes cum aliqua calamitate. Nobis interdum voluptati est, si adolescens constantis animi irruentem feram venabulo excepit, si leonis incursum interritus pertulit: tantoque spectaculum est gratius, quanto id honestior fecit. Non sunt ista, quae possunt deorum in se vultum convertere, sed puerilia, et humanae oblectamenta levitas. Ecce spectaculum dignum; ad quod respiciat intentus operi suo Deus: ecce par Deo dignum, vir fortis cum mala fortuna compositus, utique si et provocavit. Non video, inquam, quid habeat in terris Iupiter pulchrius, si convertere animum velit, quam ut spectet Catonem, iam partibus non semel fractis, stantem nihilominus inter ruinas publicas rectum. Licet, inquit, omnia in unius ditionem concesserint, custodiantur legionibus terrae, classibus ma-

ria, Caesarianus portas miles obsideat: Cato, qua exeat, habet. Una manu latam libertati viam faciet. ferrum istud, etiam civili bello purum et innoxium, bonas tandem ac nobiles edet operas. libertatem, quam patriae non potuit, Catoni dabit. Aggredere anime diu meditatum opus; eripe te rebus humanis. Iam Petreius et Iuba concurrerunt, iacentque alter alterius manu caesi. Fortis et egregia fati conventio: sed quae non deceat magnitudinem nostram. tam turpe est Catoni, mortem ab ullo petere, quam vitam. Liquet mihi, cum magno spectasse gaudio deos, cum iam ille vir, acerrimus sui vindex, alienae saluti consulit, et instruit discedentium fugam: dum etiam studia nocte ultima tractat, dum gladium sacro pectori infigit, dum viscera spargit, et illam sanctissimam animam, indignamque quae ferro contaminaretur, manu educit. Inde crediderim fuisse parum certum et efficax vulnus. non fuit Diis immortalibus satis, spectare Catonem semel: retenta ac revocata virtus est, ut in difficiliori parte se ostenderet. Non enim tam magno animo mors initur, quam repetitur. Quidni libenter spectarent alnum suum, tam claro ac memorabili exitu evadentem? mors illos consecrat, quorum exitum et qui timent, laudant.

III. Sed iam procedente oratione ostendam, quam non sint quae videntur, mala. Nunc illud dico, ista quae tu vocas aspera, quae adversa et abominanda, primum pro ipsis esse, quibus accidunt; deinde pro universis: quorum maior diis cura est, quam singulorum. Post haec, volentibus accidere; ac dignos malo esse, si nolint. His adiiciam, fato

ista fieri , et recte eadem lege bonis evenire , qua sunt boni : persuadebo inde tibi , ne unquam boni viri miserearis. potest enim miser dici , non potest esse. Difficillimum , ex omnibus quae proposui , videtur quod primum dixi : pro ipsis esse quibus eveniunt ista , quae horremus ac tremimus. Pro ipsis est , inquis , in exsiliūm proīci , in egestatem deduci liberos , coniugem efferre , ignominia affici , debilitari ? Si miraris , hoc pro aliquo esse , miraberis quosdam ferro et igne curari , nec minus fame ac siti. Sed si cogitaveris tecum , remedii causa quibusdam et radi ossa et legi , et extrahi venas , et quaedam amputari membra , quae sine totius pernicie corporis haerere non poterant : hoc quoque patieris probari tibi , quaedam incommoda pro his esse , quibus accidunt . tam mehercules quam quaedam quae laudantur atque appetuntur , contra eos esse , quos delectaverunt : simillima cruditatibus , ebrietatibusque , et ceteris quae necant per voluptatem. Inter multa magnifica Demetrii nostri , et haec vox est , a qua recens sum. sonat adhuc , et vibrat in auribus meis. Nihil , inquit , mihi videtur infelicius eo , cui nihil unquam evenit adversi. Non licuit enim illi se experiri. Ut ex voto illi fluxerint omnia , ut ante votum : male tamen de illo dii iudicaverunt. indignus visus est , a quo vinceretur aliquando fortuna , quae ignavissimum quemque refudit. quasi dicat : Quid ego istum mihi adversarium assumam ? statim arma submittet. non opus est in illum tota potentia mea : levi comminatione pelletur. non potest sustinere vultum meum. Alius circumspiciatur , cum quo conferre possimus manum :

pudet congregdi cum homine vinci parato. Ignominiam iudicat gladiator, cum inferiore componi: et scit eum sine gloria vinci, qui sine periculo vincitur. Idem facit fortuna, fortissimos sibi pares quaerit, quosdam fastidio transit. Contumacissimum quemque et rectissimum aggreditur, adversus quem vim suam intendat. Ignem experitur in Mucio, paupertatem in Fabricio, exsilium in Rutilio, tormenta in Regulo, venenum in Socrate, mortem in Catone. Magnum exemplum, nisi mala fortuna, non inventit. Infelix est Mucius, quod dextera ignes hostium premit, et ipse a se exigit erroris sui poenas? quod Regem, quem armata manu non potuit, exusta fugat? Quid ergo? felicior esset, si in sinu amiae foveret manum? Infelix est Fabricius, quod rus suum, quantum a republica vacavit, fodit? quod bellum tam cum Pyrrho, quam cum divitiis gerit? quod ad focum coenat illas ipsas radices, et herbas, quas in agro repurgando triumphalis senex vulsit? Quid ergo? felicior esset, si in ventrem suum longinqui litoris pisces, et peregrina aucupia congereret? si conchyliis superi atque inferi maris, pigritiam stomachi naufragantis erigeret? si ingenti pomorum strue cingeret primae formae feras, captas multa caede venantium? Infelix est Rutilius, quod qui illum damnaverunt, causam dicent omnibus seculis? quod aequiore animo passus est se patriae eripi, quam sibi exsilium? Quod Sulla dictatori solus aliquid negavit, et revocatus non tantum retro cessit, sed longius fugit? Viderint, inquit, isti, quos Romae deprehendit felicitas tua. Videant largum in foro san-

guinem, et supra Servilium lacum (id enim proscriptio-
nis Sullanae spoliarium est) senatorum capita, et
passim vagantes per urbem percussorum greges : et
multa millia civium Romanorum, uno loco post fi-
dem, immo per ipsam fidem trucidata. Videant ista,
qui exsulare non possunt. Quid ergo ? felix est L.
Sulla, quod illi descendenti ad forum gladio submo-
vetur, quod capita consularium virorum patitur ap-
pendi, et pretium caedis per quaestorem ac tabulas
publicas numerat ? et haec omnia facit ille, qui le-
gem Corneliam tulit. Veniamus ad Regulum. quid
illi fortuna nocuit, quod illum documentum fidei,
documentum patientiae fecit ? Figunt cutem clavi,
et quocunque fatigatum corpus reclinavit, vulneri
incumbit, et in perpetuam vigiliam suspensa sunt
lumina. Quanto plus tormenti, tanto plus erit glo-
riae. Vis scire, quam non poeniteat hoc pretio ae-
stimasse virtutem ? Refice tu illum, et mitte in se-
natum : eandem sententiam dicet. Feliciorem ergo
tu Maecenatem putas, cui amoribus anxi, et ino-
rosae uxoris quotidiana repudia deflenti, somnus per
symphoniarum cantum, ex longinquo lene resonan-
tium, quaeritur ? Mero se licet sopiat, et aquarum
fragoribus avocet, et mille voluptatibus mentem an-
xiam fallat : tam vigilabit in pluma, quam ille in cru-
ce. Sed illi solatium est, pro honesto dura tolera-
re, et ad causam a patientia respicit : hunc volup-
tatibus marcidum, et felicitate nimia laborantem,
magis his quae patitur vexat causa patiendi. Non us-
que eo in possessionem generis humani vitia vene-
runt, ut dubium sit, an electione fati data, plures

Reguli nasci, quam Maecenates velint. Aut si quis fuerit, qui audeat dicere, Maecenatem se quam Regulum nasci maluisse: idem iste, taceat licet, nasci se Terentiam maluit. Male tractatum Socratem iudicas, quod illam potionem publice mixtam, non aliter quam medicamentum immortalitatis obduxit, et de morte disputavit usque ad ipsam? male cum illo actum est, quod gelatus est sanguis, ac paulatim frigore inducto venarum vigor constitit? Quanto magis huic invidendum est, quam illis quibus gemma ministratur, quibus exoletus omnia pati doctus, exsectae virilitatis, aut dubiae, suspensam auro nivem diluit? Hi quidquid biberint, vomitu remetientur tristes, et bilem suam regustantes: at ille, venenum laetus et libens hauriet. Quod ad Catonem pertinet, satis dictum est: summamque illi felicitatem contigisse, consensus hominum fatebitur. quem sibi rerum natura delegit, cum quo metuenda collideret. Inimicitiae potentum graves sunt? opponatur simul Pompeio, Caesari, Crasso. Grave est, a deterioribus honore anteiri? Vatinio postferatur. Grave est, civilibus bellis interesse? toto terrarum orbe pro causa bona tam infeliciter, quam pertinaciter, militet. Grave est, sibi manus asserre? faciat. Quid per hoc consequar? ut omnes sciant, non esse haec mala, quibus ego dignum Catonem putavi.

IV. Prospera in plebem ac vilia ingenia deveniunt: at calamitates terroresque mortalium sub iugum mittere, proprium magni viri est. Semper vero esse felicem, et sine morsu animi transire vitam, ignorare est rerum naturae alteram partem. Magnus

es vir : sed unde scio , si tibi fortuna non dat facultatem exhibendae virtutis ? Descendiſti ad Olympia : si nemo praeter te , coronam habes , victoriam non habes. Non gratulor tanquam viro forti , sed tanquam consulatum praeturamve adepto . honore auctus es. Idem dicere et bono viro possum , si illi nullam occasionem difficultior casus dedit , in qua una vim sui animi ostenderet. Miserum te iudico , quod nunquam fuisti miser. transiſti sine adversario vitam. Nemo sciēt , quid potueris : ne tu quidem ipſe. Opus est enim ad notitiam ſui , experimento . quod quisque poſſet , niſi tentando non didicit. Itaque quidam ultro ſe ceſſantibus malis obtulerunt , et virtuti iturae in obscurum occaſionem , per quam enitesceret , quaesierrunt. Gaudent , inquam , magni viri aliquando rebus adverſis , non aliter quam fortes milites bellis. Ego mirmillonem ſub C. Caesare de raritate munera uidi querentem : Quam bella , inquit , aetas perrit ! Avida eſt periculi virtus , et quo tendat , non quid paſſura ſit , cogitat : quoniam et quod paſſura eſt , gloriae pars eſt. Militares viri gloriantur vulneribus , laeti fluentem meliori caſu ſanguinem oſtentant. Idem licet fecerint , qui integri revertuntur ex acie , magis ſpectatur qui fauciūs redit. Ipsiſ , inquam , Deus conſulit , quos eſſe quam honestiſſimos cu- pit , quoties illis materiam praebeſt aliquid animoſe fortiterque faciendi : ad quam rem opus eſt aliqua rerum diſſiſtate. Gubernatorem in tempeſtate , in acie militem intelligas. Unde poſſum ſcire , quantum adverſus paupertatem tibi animi ſit , ſi divitiis diſſluis ? unde poſſum ſcire , quantum adverſus iug

miniam et infamiam, odiumque populare, constan-
tiae habeas, si inter plausus senescis? si te inexpug-
nabilis, et inclinatione quadam mentium pronus fa-
vor sequitur? Unde scio, quam aequo animo laturus
sis orbitatem, si, quoscunque sustulisti, vides? Au-
divi te cum alios consolareris: tunc conspexisse,
si te ipse consolatus es, si te ipse dolere vetuisses.
Nolite, obsecro vos, expavescere ista, quae dii im-
mortales velut stimulos admovent animis. Calami-
tas, virtutis occasio est. Illos merito quis dixerit mi-
seros, qui nimia felicitate torpescunt, quos velut in
mari lento tranquillitas iners detinet. Quidquid il-
lis inciderit, novum veniet. magis urgent saeva in-
expertos. grave est ferae cervici iugum. Ad suspi-
cionem vulneris tiro pallescit: audaciter veteranus
cruorem suum spectat, qui scit se saepe viciisse post
sanguinem. Hos itaque Deus, quos probat, quos
amat, indurat, recognoscit, exercet. eos autem qui-
bus indulgere videtur, quibus parcere, molles ven-
turis malis servat. Erratis enim, si quem iudicatis ex-
ceptum: veniet ad illum diu felicem sua portio.
Quisquis videtur dimissus esse, dilatus est. Quare
Deus optimum quemque aut mala valetudine, aut
aliis incommidis, afficit? Quare in castris quoque
periculosa fortissimis imperantur? Dux lectissimos
mittit, qui nocturnis hostes aggrediantur insidiis,
aut explorent iter, aut praesidium loco deiiciant.
Nemo eorum qui exeunt, dicit, Male de me impe-
rator meruit: sed, Bene iudicavit. Idem dicant qui-
cunque iubentur pati timidis ignavisque flebilis:
Digni visi sumus Deo, in quibus experiretur, quan-

tum humana natura posset pati. Fugite delicias. fugite enervatam felicitatem, qua animi permadeſcunt, nisi aliquid intervenit, quod humanae sortis admoneat, velut perpetua ebrietate sopiti. Quem specularia semper ab adflatū vindicarunt, cuius pedes inter fomenta subinde mutata tepuerunt, cuius coenationes subditus et parietibus circumfusus calor temperavit, hunc levis aura non sine periculo ſtinget. Cum omnia, quae excederunt modum, nocent; periculosissima felicitatis intemperantia est. Movet cerebrum, in vanas mentem imagines evocat, multum inter falso ac verum mediae caliginis fundit. Quidni satius fit, perpetuam infelicitatem quae advocat ad virtutem sustinere, quam infinitis atque immodicis bonis rumpi? Levior ieuno mors est: cruditate diffiliunt. Hanc itaque rationem dii sequuntur in bonis viris, quam in discipulis suis preceptores: qui plus laboris ab his exigunt, in quibus certior spes est. Numquid tu invisos esse Lacedaemoniis liberos suos credis, quorum experiuntur indeolem publice verberibus admotis? ipsi illos patres adhortantur, ut ictus flagellorum fortiter perferant, et laceros ac semianimes rogant, perseverent vulnera praebere vulneribus. Quid mirum, si dure generofos spiritus Deus tentat? nunquam virtutis molle documentum est. Verberat nos et lacerat fortuna? patiamur. non est saevitia: certamen est. quo faepius adierimus, fortiores erimus. Solidissima pars est corporis, quam frequens usus agitavit. Praebendi fortunae sumus, ut contra ipsam ab ipsa duremur. Paulatim nos sibi pares faciat. contemptum periculorum

affiduitas periclitandi dabit. Sic sunt nauticis corpora ferendo mari dura : agricolis manus tritae : ad excutienda tela militares lacerti valent : agilia sunt membra cursoribus. Id in quoque solidissimum est, quod exercuit. Ad contemnendam malorum potentiam, animus patientia pervenit : quae quid in nobis efficere possit, scies, si adspexeris, quantum nationibus nudis et inopia fortioribus, labor praestet. Omnes considera gentes, in quibus Romana pax definit : Germanos dico, et quidquid circa Istrum vagarum gentium occursat. Perpetua illos hiems, triste coelum premit, maligne solum sterile sustentat, imbreml culmo aut fronde defendunt, super durata glacie stagna persultant, in alimentum feras captant. Miseri tibi videntur? nihil miserum est, quod in naturam consuetudo perduxit. paulatim enim voluptati sunt, quae necessitate cooperunt. Nulla illis domicilia, nullae sedes sunt, nisi quas lassitudo in diem posuit; vilis, et hic quaerendus manu victus; horrenda iniqitas coeli, intecta corpora: hoc quod tibi calamitas videtur, tot gentium vita est. Quid miraris bonos viros, ut confirmentur, concuti? Non est arbor solida, nec fortis, nisi in quam frequens ventus incursat: ipsa enim vexatione constringitur, et radices certius figit. Fragiles sunt, quae in aprica valle creverunt. Pro ipsis ergo bonis viris est, ut esse interriti possint, multum inter formidolosa versari, et aequo animo ferre quae non sunt mala, nisi male sustinenti.

V. Adiice nunc, quod pro omnibus est, optimum quemque, ut ita dicam, militare, et edere operas. Hoc est propositum Deo, quod sapienti viro, ostend-

dere haec quae vulgus appetit, quae reformidat, nec bona esse nec mala: apparebunt autem bona esse, si illa non nisi bonis viris tribuerit; et mala esse, si malis tantum irrogaverit. Detestabilis erit caecitas, si nemo oculos perdiderit, nisi cui eruendi sunt. Itaque careant luce Appius et Metellus. Non sunt divitiae bonum. Itaque habeat illas et Ellius leno: ut homines pecuniam cum in templis consecraverint, videant et in fornice. Nullo modo magis potest Deus concupita traducere, quam si illa ad turpisimos desert, ab optimis abigit. At iniquum est, bonum virum debilitari, aut configi, aut alligari; malos integris corporibus solutos ac delicatos incedere. Quid porro? non est iniquum, fortes viros arma sumere, et in castris pernoctare, et pro vallo obligatis stare vulneribus: interim in urbe securos esse, percisos et professos impudicitiam? Quid porro? non est iniquum, nobilissimas virgines ad sacra facienda noctibus excitari, altissimo somno inquinatas frui? Labor optimos citat. Senatus per totum diem saepe consultur. cum illo tempore vilissimus quisque, aut in campo otium suum oblectet, aut in popina lateat, aut tenpus in aliquo circulo terat. Idem in hac magna republica fit. boni viri laborant, impendunt, impenduntur, et volentes quidem: non trahuntur a fortuna, sequuntur illam, et aequant gradus. si scissent, antecessissent. Hanc quoque animosam Demetrii fortissimi viri vocem audisse me memini: Hoc unum, inquit, dili immortales, de vobis queri possum, quod non ante mihi voluntatem vestram notam fecistis. Prior enim ad ista venissem, ad quae nunc vocatus adsum. Vul-

tis liberos sumere? illos vobis sustuli. Vultis aliquam partem corporis? sumite. Non magnam rem promitto. cito totum relinquam. Vultis spiritum? Quid ni? nullam moram faciam, quo minus recipiatis, quod dedistis. a volente feretis, quidquid petieritis. Quid ergo est? maluissem offerre, quam tradere. Quid opus fuit auferre? accipere potuistis. Sed ne nunc quidem auferetis: quia nihil eripitur, nisi retinenti. Nihil cogor, nihil patior invitus, nec servio Deo, sed assentio. eo quidem magis, quod scio omnia certa et in aeternum dicta lege decurrere. Fata nos ducunt, et quantum cuique restet, prima nascentium hora dispositit. Causa pendet ex causa, privata ac publica longus ordo rerum trahit. Ideo fortiter omne ferendum est: quia non, ut putamus, incidunt cuncta, sed veniunt. Olim constitutum est, quid gaudeas, quid fleas: et quamvis magna videatur varietate singularum vita distingui, summa in unum venit. acceptimus peritura perituri. Quid ita indignamur? quid querimur? ad hoc parati sumus. Utatur, ut vult, suis natura corporibus: nos laeti ad omnia et fortes cogitemus, nihil perire de nostro. Quid est boni viri? praebere se fato. Grande solatium est, cum universo rapi. Quidquid est quod nos sic vivere iussit, sic mori: eadem necessitate et deos alligat. irrevocabilis humana pariter ac divina cursus vehit. Ille ipse omnium conditor ac rector scripsit quidem fata, sed sequitur. semper paret, semel iussit. Quare tamen Deus tam iniquus in distributione fati fuit, ut bonis viris paupertatem, vulnera, et acerba funera adscriberet? Non potest artifex mutare materiem: haec

passa est. Quaedam separari a quibusdam non pos-
sunt, cohaerent, individua sunt. Languida ingenia;
et in somnum itura, aut in vigiliam somno similli-
mam, inertibus necuntur elementis: ut efficiatur vir-
cum cura dicendus, fortiore fato opus est. Non erit
illi planum iter: sursum oportet ac deorsum eat,
fluctuetur, ac navigium in turbido regat. contrá for-
tunam illi tenendus est cursus. Multa accident dura,
aspera, sed quae moliat et complanet ipse. Ignis au-
rum probat, miseria fortis viros. Vide quam alte
ascendere debeat virtus: scies illi non per secura va-
dendum esse.

*Ardua prima via est, & qua vix mane recentes
Enituntur equi: medio est altissima coelo:
Unde mare & terras ipsi mihi saepe videre
Fit timor, & pavida trepidat formidine peccus.
Ultima prona via est, & eget moderamine certo.
Tunc etiam, quae me subiectis excipit undis,
Ne ferar in paeceps, Tethys solet ipsa vereri.*

Haec cum audisset ille generosus adolescens, Placet,
inquit, via. escendo. est tanti per ista ire casuero. Non
desinit acrem animum metu territare:

*Utque viam teneas, nulloque errore traharis,
Per tamen adversi gradieris cornua tauri,
Aemoniosque arcus, violentique ora leonis.*

Post haec ait: *Iunge datos currus. his quibus deter-
rei me putas, incitor: libet illic stare, ubi ipse sol
trepidat. humilis et inertis est, tuta sectari: per alta
virtus it.*

VI. Quare tamen bonis viris patitur aliquid mali
 Deus fieri? ille vero non patitur. Omnia mala ab illis
 removit, scelera et flagitia, et cogitationes impro-
 bas, et avida consilia, et libidinem caecam, et alieno
 imminentem avaritiam : ipsos tuetur ac vindicat.
 Numquid hoc quoque a Deo aliquis exigit, ut bono-
 rum virorum etiam sarcinas servet? remittunt ipsi
 hanc Deo curam : externa contemnunt. Democritus
 divitias proiecit, onus illas bonae mentis existimans :
 quid ergo miraris, si id Deus bono accidere patitur,
 quod vir bonus aliquando vult sibi accidere? Filios
 amittunt viri boni. quid ni, cum aliquando et ipsi
 occidunt? In exsilio mittuntur. quidni, cum ali-
 quando ipsi patriam non repetituri relinquant? Occi-
 duntur. quidni, cum aliquando ipsi sibi manus affe-
 rant? Quare quaedam dura patiuntur? ut alios pati
 doceant. nati sunt in exemplar. Puta itaque Deum
 dicere: Quid habetis, quod de me queri possitis vos,
 quibus recta placuerunt? Aliis bona falsa circumde-
 di, et animos inanes velut longo fallacique somnio
 iusi. auro illos, argento et ebore ornavi : intus boni
 nihil est. isti, quos pro felicibus aspicitis, si non qua
 occurrunt, sed qua latent, videritis, miseri sunt,
 fordidi, turpes, ad similitudinem parietum suorum
 extrinsecus culti. Non est ista solida et sincera felici-
 tas: crux est, et quidem tenuis. Itaque dum illis licet
 stare, et ad arbitrium suum ostendi, nitent et impo-
 nunt: cum aliquid incidit, quod disturbet ac detegat,
 tunc apparent quantum altae ac verae foeditatis alienus
 splendor absconderit. Vobis dedi bona certa,
 mansura: quanto magis versaveritis, et undique in-

spexeritis , meliora maioraque. Permisit vobis, metuenda contemnere , cupiditates fastidire. non fulgetis extrinsecus : bona vestra introrsus obversa sunt. Sic mundus exteriora contemnit, spectaculo sui laetus. Intus omne posui bonum : non egere felicitate , felicitas vestra est. At multa incident tristia , horrenda, dura toleratu. Quia non poteram vos istis subducere , animos vestros aduersus omnia armavi. Ferte fortiter : hoc est , quo Deum antecedatis. ille extra patientiam malorum est , vos supra patientiam. Contemnite paupertatem : nemo tam pauper vivit , quam natus est. Contemnite dolorem : aut solvetur , aut solvet. Contemnite fortunam : nullum illi telum quo feriret animum , dedi. Contemnite mortem : quae vos aut finit , aut transfert. Ante omnia cavi , ne quis vos teneret invitatos. patet exitus. Si pugnare non vultis , licet fugere. Ideoque ex omnibus rebus , quas esse vobis necessarias volui , nihil feci facilius , quam mori. Prono animam loco posui : trahitur. Attendite modo , et videbitis , quam brevis ad libertatem , et quam expedita ducat via. Non tam longas in exitu vobis , quam intrantibus , moras posui : alioqui magnum in vos regnum fortuna tenuisset , si homo tam tarde moreretur , quam nascitur. Omne tempus , omnis vos locus doceat , quam facile sit renuntiare naturae , et munus suum illi impingere. Inter ipsa altaria et solemnes sacrificantium ritus , dum optatur vita , mortem condiscite. Corpora opima taurorum exiguo concidunt vulnere , et magnarum virium animalia humanae manus ictus impellit. tenui ferro commissura cervicis abruumpitur : et cum artculus ille , qui

caput collumque connectit, incisus est, tanta illa moles corruit. Non in alto latet spiritus, nec utique ferro eruendus est: non sunt vulnere impresso penitus scrutanda praecordia: in proximo mors est. Non certum ad hos ictus destinavi locum: quacunque pervium est. Ipsum illud quod vocatur mori, quo anima discedit a corpore, brevius est, quam ut sentiri tanta velocitas possit. Sive fauces nodus elisit; sive spiramentum aqua praeclusit; sive in caput lapsos subiacentis soli duritia comminuit; sive haustus ignis cursum animae remeantis interscidit: quidquid est, properat. Ecquid erubescitis? quod tam cito fit, timetis diu?

L. ANNAEI SENECAE
AD SERENUM
DE TRANQUILLITATE ANIMI
LIBER UNUS.

L. ANNAEI SENECAE
 AD SERENUM
 DE TRANQUILLITATE ANIMI
 LIBER UNUS.

Argumentum & Ordo.

Et hic libellus inter utiles, & materie ac tractatu insignes. Scriptus est initio redditus sui ab exsilio, cum ad Aulam, & Neroni instituendo, admotus fuit. Hoc apparet ex Capitis 1 verbis: Circumfudit me ex longo frugalitatis situ venientem multo splendore luxuria, & undique circumsonuit. Luxuriam in aula tangit, ignotam sibi antea & invisam. Ordo in scripto confusus est, immo vix est: & traiectio, aut defectus, nisi fallor, in multis apparet. Summarium tamen hoc est. Occasio scribendi a sua inconstantia, & quod animi semper pendeat, parum firmi in alterutra parte, aut quieti. Hoc ait illorum esse, qui in via sunt ad Sapientiam; sed nondum pervenerunt, nec fructum eius gustant, Tranquillitatem. O magnum bonum! & quid ea est? describit. Quomodo perveniam? Inconstantiam fugiendo. Quid igitur ea? & hanc graphicè describit. Ea pellitur variis remedii. primum Occupatione: eaque vel Publica, si tempora & indoles tua ferent: vel Privata, ut in optimis studiis meditationibusque versere. Non tamen subito a Republica fugiendum: multas eius partes esse, & unam aliquam licere amplecti. Haec usque ad Cap. IV. Tum addit, Si ad negotia imus, tria consideranda: Nos ipsos, Negotium, Homines quorum causa, auctor cum quibus, attitamus. In Nobis, aequalandas Vires, quid & quatenus possimus, neque ultra tendamus. In Negotiis, an nos iis pares? item an non catena eorum sit, & longius ducent. regressus semper liberos haberidos. In hominibus, an digni illi

L. Ann. Seneca, Vol. I.

Q

labore nostro, & temporis impendio? non sunt autem Vani, Ambitiosi, nec in seria ulla re occupati. Deinde Cap. vii parum cohaerenter addit, Amicum in primis fidum tranquillitatē & oblectamento facere: sed qui ingenio tristi non sit, & omnia accusanti. Iterum non optimus textus, & Cap. viii de Patrimoniorum modo, ea nec magna, nec nulli Tranquillitatē apta; sed media: & quae parcimonia producantur. Luxus autem vitandus, etiam in utilibus vitae instrumentis, ut Bibliotheca & libris. Post haec etiam saltus, Cap. x, & Molesias in omni vita intervenire: sed Consuetudine molliri, tum Adspectū alienae fortis, quae saepe deterior. Item Cupiditates non longe mittendas, sed ad propinquā, aut facilia prehendi. Atque haec Proficieni & Tironi praecepit: nam Sapienti non opus, qui pugnat, immo vincit omnem fortunam. Quam talem & talcm praeccogitat, & ipsa praevisione mollit aut frangit. Haec adasque Cap. xii. Ab eo alia tractatiuncula, Non esse in Supervacuis laborandum, neque (quantum potest) in Alienis. Democriti coeleste praeceptum inculcat: Nec privatim, nec publice, multa agi. Iam Cap. xiv a Levitate arcet, itemque Pertinacia: id est, neque assidue in vita mutare: nec si male elegeris, praefracte inhaerere. Omnia autem aequo, ac paene hilari oculo adspicere. Quid enim vita, nisi nimis? Postremo Simulatio (Cap. xv) fugienda, & anxia sui compositio: simplicitas assumatur, & interdum hilaritas, atque etiam convivia aut liberalior potus. Mergit hoc curas, & animum liberat atque attollit. In fine claudit, dixisse se, Quae Tueri Tranquillitatem possint, quae Restituere: ex quibus videoas partitionem quae fuit, sed mehercules nunc non exstat. Itaque ut multa Senecas, in partibus laudatum opusculum est; ordo universi labat. atque id iniuria temporum, aut exscriptorum.

I. INQUIRENTI mihi in me quaedam vitia apparebant, Seneca, in aperto posita, quae manu prendrem, quaedam obscuriora, et in recessu, quaedam non continua, sed ex intervallis redeuntia: quae vel

molestissima dixerim, ut hostes vagos, et ex occasionibus assilientes, per quos neutrum licet, nec tanquam in bello paratum esse, nec tanquam in pace securum. Illum tamen habitum in me maxime deprehendo (quare enim non verum ut medico fatear?) nec bona fide liberatum iis, quae timebam et oderam, nec rursus obnoxium. In statu ut non pessimo, ita maxime querulo et moroso positus sum : nec ae-groto, nec valeo. Non est quod dicas, o innuum virtutum tenera esse principia, tempore ipsis duramentum et robur accedere. Non ignoro, etiam quae in speciem laborant, dignitatem dico, et eloquentiae famam, et quidquid ad alienum suffragium venit, mora convalescere : et quae veras vires parant, et quae ad placendum fuco quodam subornantur, exspectant annos, donec paulatim colorem diuturnitas ducat : sed ego vereor, ne consuetudo, quae rebus affert constantiam, hoc vitium in me altius figat. Tam honorum, quam malorum, longa conversatio amorem induit. Haec animi inter utrumque dubii, nec ad recta fortiter, nec ad prava vergentis, infirmitas qualis sit, non tam semel tibi possum, quam per partes ostendere. Dicam quae accident mihi : tu morbo nomen invenies. Tenet me summus amor parcimoniae, fateor. placet non in ambitionem cubile compositum, non ex arcula prolata vestis, non mille ponderibus aut tormentis splendere cogentibus pressa : sed domestica, et vilis; nec servata, nec sumenda sollicite. Placet cibus, quem nec parent familiae, nec spectent : non ante multos imperatus dies, nec multorum manibus ministratus, sed

parabilis facilisque, nihil habens accersiti pretiosissime, ubilibet non defuturus, nec patrimonio gravis, nec corpori, nec redditurus qua intraverat. Placet minister incultus et rufus vernula: argentum grave rustici patris, sine ullo opere et nomine artificis; et mensa non varietate macularum conspicua, nec per multas elegantium dominorum successiones civitati nota: sed in usum posita, quae nullius convivae oculos nec voluptate moretur, nec accendat invidia. Cum bene ista placuerunt, praefixit animum apparatus alicuius paedagogii, diligentius quam in tralatu vestita, et auro culta mancipia, et agmen servorum nitentium. Iam domus etiam qua calcatur, pretiosa, et divitiis per omnes angulos dissipatis, tecta ipsa fulgentia, et affectator comesque patrimoniorum pereuntium populus. Quid perlucentes ad imum aquas, et circumfluentes ipsa convivia, quid epulas loquar, scena sua dignas? Circumfudit me ex longo frugalitatis situ venientem, multo splendore luxuria, et undique circumsonuit. Paulum titubat acies: facilius adversus illam animum, quam oculos attollo. Recedo itaque non peior, sed tristior: nec inter illa frivola mea tam altus incedo, tacitusque morsus subit, et dubitatio, numquid illa meliora sint. nihil horum me mutat, nihil tamen non concutit. Placet vim praeceptorum sequi, et in medium ire Rempublicam: placet honores fascesque, non purpura aut virgis adductum capessere, sed ut amicis propinquisque, et omnibus civibus, omnibus deinde mortalibus paratior utiliorque sim, proprius compositus. Sequor Zenonem, Cleanthem, Chry-

sippum : quorum tamen nemo ad Rem publicam accessit , nemo non misit. Ubi aliquid animum , insolitus arietari , percussit , ubi aliquid occurrit , aut indignum (ut in omni vita humana multa sunt) aut parum ex facili fluens , aut multum temporis res non magno aestimanda poposcerunt , ad otium convertor , et quemadmodum pecoribus , fatigatis quoque , velocior domum gradus est : placet intra parietes suos vitam coercere. Nemo ullum auferat diem , nihil dignum tanto impendio redditurus. sibi ipse animus haeret , se colat , nihil alieni agat , nihil quod ad iudicem spectet : ametur expers publicae privataeque curae tranquillitas. Sed ubi lectio fortior erexit animum , et aculeos subdiderunt exempla nobilia : profilire libet in forum , commodare alteri vocem , alteri operam , et si nihil profuturam , tamen conaturam prodesse : alicuius coercere in foro superbiam , male secundis rebus elati. In studiis puto mehercule melius esse res ipsas intueri , et harum causa loqui , ceterum verba rebus permittere , ut qua duxerint , hac inelaborata sequatur oratio. Quid opus est seculis duratura componere ? Vis tu non id agere , ne te posteri taceant ? morti natus es. minus molestiarum habet funus tacitum. Itaque occupandi temporis causa , in usum tuum , non in praeconium , aliquid simplici stylo scribe. minore labore opus est studentibus in diem. Rursus ubi se animus cogitationis magnitudine levavit , ambitiosus in verba est , altiusque ut spirare , ita eloqui gestit , et ad dignitatem rerum exit oratio : oblitus tum legis pressio risque iudicii , sublimis feror , et ore iam non meo.

Ne singula diutius persequar, in omnibus rebus haec me sequitur bonaे mentis infirmitas: cui ne paulatim defluam vereor, aut quod est solicitius, ne semper casuо similis pendeam, et plus fortasse sit, quam quod ipse provideo. Familiariter enim domestica aspiciimus, et semper iudicio favor officit. Puto multos potuisse ad sapientiam pervenire, nisi putassent se pervenisse: nisi quaedam in se dissimulassent. Non est enim quod nos magis aliena iudices adulazione perire, quam nostra. Quis sibi verum dicere ausus est? quis non inter laudantium blandientiumque positus greges, plurimum tamen sibi ipse assentatus est? Rogo itaque, si quod habes remedium, quo hanc fluctuationem meam sistas, dignum putas me, qui tibi tranquillitatem debeam. Non esse periculosos motus animi, nec quidquam tumultuosи afferentes, scio. ut vera tibi similitudine id de quo queror exprimam, non tempestate vexor, sed nausea. Detrahe ergo quidquid hoc est mali, et succurre in conspectu terrarum laboranti.

II. Quaero mehercule iamdudum, Serene, ipse tacitus, cui talem affectum animi similem putem. nec ulli proprius admoverim exemplo, quam eorum qui ex longa et gravi valetudine expliciti, motiunculis, levibusque interim offensis perstringuntur, et cum reliquias effugerint, suspicionibus tamen inquietantur, medicisque iam sani manum porrigunt, et omnem calorem corporis sui calumniantur. Horum, Serene, non parum sanum est corpus, sed sanitati parum assuevit: sicut est quidam tremor etiam tranquilli maris, aut lacus, cum ex tempestate requie-

vit. Opus est itaque non illis durioribus, quae etiam transcurrimus, ut alicubi obstes tibi, alicubi irascaris, alicubi instes gravis; sed illud quod ultimum venit, ut fidem tibi habeas, et recta ire via te credas, nihil avocatus transversis multorum vestigiis, passim discurrentium, quorundam circa ipsam errantium viam. Quod desideras autem, magnum et sumum est, Deoque vicinum, non concurti. Hanc stabilem animi sedem Graeci Εὐποίησι vocant, de qua Democriti volumen egregium est: ego Tranquillitatem voco. nec enim imitari, et transferre verba ad illorum formam necesse est: res ipsa, de qua agitur, aliquo signanda nomine est, quod appellationis Graecae vim debet habere, non faciem. Ergo quaerimus: quomodo animus semper aequalis, secundoque cursu eat, propitiusque sibi sit, et sua laetus adspiciat: et hoc gaudium non interrumpat, sed placido statu maneat, nec attollens se unquam, nec deprimens. Id Tranquillitas erit. Quomodo ad hanc perveniri possit, in universum quaeramus: sumes tu ex publico remedio, quantum voles. Totum interim vitium in medium protrahendum est: ex quo cognoscet quisque partem suam: simul tu intelliges, quanto minus negotii habeas cum fastidio tui, quam hi quos ad professionem speciosam alligatos, et sub ingenti titulo laborantes, in sua simulatione pudor magis, quam voluntas tenet. Omnes in eadem causa sunt, et hi qui levitate vexantur, ac taedio, assiduaque mutatione propositi, quibus semper magis placet quod reliquerunt: et illi, qui marcent et oscitantur. Adiice illos, qui non aliter, quam quibus difficilis somnus est,

versant se, et hoc atque illo modo componunt, donec quietem lassitudine inveniant: statum vitae suae formando subinde, in eo novissime manent, in quo illos non mutandi odium, sed senectus ad novandum pigra deprehendit. Adiice et illos, qui non constantia in vita parum leves sunt, sed inertia. Viyunt, non quomodo volunt, sed quomodo cooperunt. Innumerabiles deinceps proprietates sunt, sed unus effectus vitii, displicere sibi. Hoc oritur ab intemperie animi, et cupiditatibus timidis, aut parum prosperis, ubi aut non audent, quantum concupiscunt, aut non consequuntur, et in spem toti prominent, semper instabiles mobilesque. quod necesse est accidere pendentibus ad vota sua. Omni vita pendent, et inhonesta se ac difficilia docent, coguntque: et ubi sine praemio labor est, torquet illos irritum dedecus, nec dolent prava, sed frustra voluisse. Tunc illos et poenitentia coepti tenet, et incipiendi timor, subrepitque illa iactatio animi, non invenientis exitum, quia nec cupiditatibus suis imperare, nec obsequi possunt; et cunctatio vitae parum se explicantis, et inter destituta vota torpentis animi situs. Quae omnia graviora sunt, ubi odio infelicitatis operosa ad otium perfugerunt, et ad secreta studia, quae pati non potest animus ad civilia erectus, agendique cupidus, et natura inquietus, parum scilicet in se solatiorum habens: ideoque detractis oblationibus, quas ipsae occupationes discurreribus praebent, domum, solitudinem, parietes non fert, invitus adspicit se sibi relictus. Hinc illud est taedium, et displicantia sui, et nusquam residentis animi voluntatio, et otii sui

tristis atque aegra patientia : utique ubi causas fateri pudet , et tormenta introrsus egit verecundia , in angusto inclusae cupiditates , sine exitu , se ipsae strangulant. Inde moeror marcorque , et mille fluctus mentis incertae , quam inchoata habent suspensam , deplorata tristem : inde ille affectus otium suum detestantium , querentiumque nihil ipsos habere quod agant , et alienis incrementis inimicissima invidia. Alit enim livorem infelix inertia : et omnes destrui cupiunt , quia se non potuerunt provehere : et ex hac deinde aversatione alienorum processuum , et suorum desperatione , obirascens fortunae animus , et de seculo querens , et in angulos se retrahens , et poenae incubans suaे , dum taedet sui , pigetque. Natura enim humanus animus agilis est , et pronus ad motus. grata omnis illi excitandi se abstrahendique materia est , gratior pessimis quibusque ingeniis , quae occupationibus libenter deteruntur. Ut ulcera quaedam nocituras manus appetunt , et tactu gaudent , et foedam corporum scabiem delestant , quidquid exasperat : non aliter dixerim his mentibus , in quas cupiditates velut mala ulcera eruperunt , voluptati esse laborem vexationemque. Sunt enim quaedam , quae corpus quoque nostrum cum quodam dolore delectant : ut versare se , et mutare nondum sessum latus , et alio atque alio positu ventilari. Qualis ille Homericus Achilles est , modo pronus , modo supinus , in varios habitus se ipse componens. quod proprium aegri est , nihil diu pati , et mutationibus ut remediis uti. Inde peregrinationes suscipiuntur vagae , et litora pererrantur , et modo mari se , modo terra

experitur semper praesentibus infesta levitas. Nunc Campaniam petamus. iam delicata fastidio sunt : inculta videantur. Bruttios et Lucanos saltus perse- quamur. Aliquid tamen inter deserta amoeni requiriatur , in quo luxuriosi oculi longo locorum horrentium squalore releventur. Tarentum petatur, laudatusque portus , et hiberna coeli mitioris , et tecta vel antiquae satis opulenta turbae. Iam flectamus cursum ad urbem. nimis diu a plausu et fragore aures vacaverunt : iuvat iam et humano sanguine frui. Aliud ex alio iter suscipitur , et spectacula spectaculis mutantur : ut ait Lucretius ,

Hoc se quisque modo semper fugit.

Sed quid prodest , si non effugit ? sequitur se ipse , et urget gravissimus comes. Itaque scire debemus , non locorum vitium esse quo laboramus , sed nostrum. Infirmi sumus ad omne tolerandum , nec laboris patientes , nec voluptatis , nec nostrae , nec ullius rei diutius. Hoc quosdam egit ad mortem , quod propria faepe mutando , in eadem revolvebantur , et non reliquerant novitati locum. Fastidio illis esse coepit vita , et ipse mundus : et subit illum rabidarum deliciarum : Quousque eadem ?

III. Adversus hoc taedium quo auxilio putem utendum , quaeris. Optimum erat (ut ait Athenodorus) : actione rerum et Reipublicae tractatione , et officiis civilibus se detinere. nam ut quidam sole , et exercitatione , et cura corporis , diem educunt , athletisque utilissimum est , lacertos suos , roburque cui se unidicaverunt , maiore temporis parte nutrire : ita nobis

animum ad rerum civilium certamen parantibus, in opere esse, non longe pulcherrimum est? Nam cum utilem se efficere civibus mortalibusque propositum habeat, simul et exercetur et proficit, qui in mediis se officiis posuit, communia privataque pro facultate administrans. Sed quia in hac, inquit, tam infana hominum ambitione, tot calumniatoribus in deterius recta torquentibus, parum tuta simplicitas est, et plus futurum semper est quod obstat, quam quod succedat, a foro quidem et publico recedendum est: sed habet, ubi se etiam in privato laje explicet magnus animus. nec ut leonum animaliumque impetus caveis coercetur: sic hominum, quorum maxime in seducendo actiones sunt. Ita tamen delituerit, ut ubicunque otium suum absconderit, prodesse velit ex singulis et universis, ingenio, voce, consilio. Nec enim is solus Reipublicae prodest, qui candidatos extrahit, et tuetur reos, et de pace belloque censet: sed qui iuventutem exhortatur, qui in tanta bonorum praceptorum inopia, virtute instruit animos, qui ad pecuniam luxuriamque cursu ruentes prensat ac retrahit, et si nihil aliud, certe moratur, in privato publicum negotium agit. An ille plus praestat, qui inter peregrinos et cives, aut urbanus praetor adeuntibus assessoris verba pronuntiat: quam qui docet quid sit iustitia, quid pietas, quid patientia, quid fortitudo, quid mortis contemptus, quid deorum intellectus, quam gratuum bonum sit bona conscientia? Ergo si tempus in studia conferas, quod subduxeris officiis, non deserueris, nec munus detracteris. Neque enim ille solus militat, qui in acie stat, et cornu

dextrum laevumque defendit : sed et qui portas tuer-
tur , et statione minus periculosa , non otiosa tamen
fungitur , vigiliusque servat , et armamentario pree-
st. quae ministeria quamvis incruenta sint , in nume-
rum stipendiorum veniunt. Si te ad studia revocave-
ris , omne vitae fastidium effugeris : nec noctem fieri
optabis taedio lucis , nec tibi gravis eris , nec aliis
supervacuus : multos in amicitiam attrahes , affluet-
que ad te optimus quisque. Nunquam enim quamvis
obscura virtus latet , sed mitit sui signa. quisquis dig-
nus fuerit , vestigiis illam colliget. Nam si omnem
conversationem tollimus , et generi humano renun-
tiamus , vivimusque in nos tantum conversi ; seque-
tur hanc solitudinem , omni studio carentem , inopia
rerum agendarum. Incipiems aedificia alia ponere ,
alia subvertere , et mare submovere , et aquas contra
difficultates locorum ducere , et male dispensare tem-
pus , quod nobis natura consumendum dedit. Alii par-
ce illo utimur , alii prodige : alii sic impendimus , ut
possimus rationem reddere : alii , ut nullas habeamus
reliquias. Quare nihil turpius est , quam grandis natu-
senex , qui nullum aliud habet argumentum , quo se
probet diu vixisse , praeter aetatem. Mihi , carissime
Serene , nimis videtur submisiss temporibus se Athe-
nodorus , nimis cito refugisse. Nec ego negaverim ali-
quando cedendum : sed sensim relato gradu , et salvis
signis , salva militari dignitate. Sanctiores tutioresque
sunt hostibus suis , qui in fidem cum armis veniunt. Hoc
puto virtuti faciendum , studiosoque virtutis. si pree-
valebit fortuna , et praecidet agendi facultatem ; non
statim aversus inermisque fugiat , latebras quaerens ,

quasi ullus locus sit, in quo non possit fortuna persequi: sed parcus se inferat officiis, et cum dilectu inveniat aliquid, in quo utilis civitati sit. Militare non licet? honores spectet. privato vivendum est? sit orator. silentium indicetum est? tacita advocatione cives iuvet. periculum etiam ingressu forum est? in domibus, in spectaculis, in conviviis, bonum contubernalem, amicum fidelem, temperantem convivam agat. Officia si civis amiserit, hominis exerceat. Ideo magno animo nos non unius urbis moenibus clausimus, sed in totius orbis commercium emisimus, patriamque nobis mundum professi sumus: ut liceret latiore virtuti campum dare. Praeclusum tibi tribunal est, et rostris prohiberis, aut comitiis? respice post te, quantum latissimarum regionum patet, quantum populorum. nunquam tibi ita magna pars obstruetur, ut non maior relinquatur. Sed vide, ne totum istud vitium tuum sit. non vis enim nisi consul, aut prytanes, aut ceryx, aut sues administrare Rempublicam. Quid si militare nolis, nisi imperator, aut tribunus? etiam si alii primam frontem tenebunt, te fors inter triarios posuit: inde voce, adhortatione, exemplo, animo milita. Praecisis quoque manibus ille in proelio invenit, quod partibus conferat: qui stat tantum, et clamore iuvat. Tale quidam facies, si a prima te Reipublicae parte fortuna submoverit; siles tamen, clamore iuves: si quis fauces oppresserit; siles tamen, et silentio iuves. Nunquam inutilis est opera civis boni. auditu enim, visu, vultu, nutu, obstinatione tacita, incessuque ipso prodest. Ut salutaria quaedam, citra gustum tac-

tumque, odore proficiunt : ita virtus utilitatem etiam ex longinquo et latens fundit , sive spatiatur et se utitur suo iure ; sive precarios habet accessus , cogiturque vela contrahere ; sive otiosa mutaque est , et angusto circumscripta , sive adaperta ; in quocunque habitu est , prodest . Quid ? tu parum utile putas exemplum bene quiescentis ? Longe itaque optimum est miscere otium rebus , quotiens actuosa vita impedimentis fortuitis , aut civitatis conditione prohibetur . Nunquam enim usque eo interclusa sunt oimnia , ut nulli actioni honestae locus sit . Numquid potes inventire urbem miseriorem , quam Atheniensium fuit , cum illam triginta tyranni divellent ? mille trecentos cives , optimum quemque , occiderant : nec finem ideo faciebat , sed irritabat se ipsa saevitia . In qua civitate erat Ariopagos , religiosissimum iudicium , in qua senatus populusque senatus similis : coibat quotidie carnificum triste collegium , et infelix curia tyrannis angusta . Poteratne illa civitas conquiescere , in qua tot tyranni erant , quot satellites essent ? Ne spes quidem illa recipienda libertatis animis poterat offerri : nec ulli remedio locus apparebat , contra tantam viam malorum . unde enim miserae civitati tot Harmodios ? Socrates tamen in medio erat , et ligentes patres consolabatur , et desperantes de Republica exhortabatur , et divitibus , opes suas metuentibus , exprobrabat seram periculosae avaritiae poenitentiam ; et imitari volentibus magnum circumferebat exemplar , cum inter triginta dominos liber incederet . Hunc tamen Athenae ipsae in carcere occiderunt : et qui tuto insultaverat

agmini tyrannorum, eius libertatem libertas non tulit: ut scias et in afflita Republica esse occasionem sapienti viro ad se proferendum, et in florenti ac beata, pecuniam, invidiam, mille alia vitia inermia regnare. Utcunque ergo se Respublica dabit, utcunque fortuna permittet, ita aut explicabimus nos, aut contrahemus: utique movebimus, nec alligati metu torpebimus. Immo ille vir fuerit, qui periculis undique imminentibus, armis circa et catenis frequentibus, non alliserit virtutem, nec absconderit. Non enim debet; cernulare se voluit nec obruere. Ut opinor, Curius Dentatus aiebat, Malle esse se mortuum, quam vivere. Ultimum malorum est, ex vivorum numero exire, antequam moriaris. Sed faciendum erit, si in Reipublicae tempus minus tractabile incideris, ut plus otio ac literis vindices: nec aliter quam in periculosa navigatione, subinde portum petas: nec exspectes donec res te dimittant, sed ab illis te ipse disiungas.

IV. Inspicere autem debemus primum nosmetip-sos, deinde quae aggredimur negotia, deinde eos quorum causa, aut cum quibus agendum est. Ante omnia, necesse est se ipsum aestimare: quia fere plus nobis videmur posse, quam possimus. Alius eloquentiae fiducia prolabitur: alius patrimonio suo plus imperavit, quam ferre possit: alius infirmum corpus laborioso oppresit officio. Quorundam parum idonea est verecundia rebus civilibus, quae firmam frontem desiderant: quorundam contumacia non facit ad aulam. quidam non habent iram in potestate: et illos ad temeraria verba quaelibet indig-

natio effert. quidam urbanitatem nesciunt continere, nec periculis abstinent salibus. Omnibus his utilior negotio quies est. ferox impatiensque natura, irritamenta nociturae libertatis evitet.

V. Aestimanda sunt deinde ipsa, quae aggredimur, et vires nostrae cum rebus, quas tentaturi sumus, comparandae. Debet enim semper plus esse virium in vectore, quam in onere. necesse est opprimant onera, quae ferente maiora sunt. Quaedam praeterea non tam magna sunt negotia, quam fecunda, multumque negotiorum serunt. et haec refugienda sunt, ex quibus nova occupatio multiplexque nascetur. Nec accedendum eo, unde liber regressus non sit : his admovenda manus est, quorum finem aut facere, aut certe sperare possis. Relinqua-
da, quae latius actu procedunt, nec ubi proposue-
ris, desinunt.

VI. Hominum utique delectus habendus est : an digni sint, quibus partem vitae nostrae impendamus, an ad illos temporis nostri iactura perveniat. Qui-
dam enim ultro officia nostra nobis imputant. Athenodorus ait, ne ad coenam quidem se iturum ad eum, qui sibi nil pro hoc debiturus sit. Puto intelligis, multo minus ad eos iturum ; qui cum amicorum officiis parem mensam faciunt, qui fercula pro congiariis numerant : quasi in alienum honorem intemperantes sint. Deme illis testes spectatoresque, non delectabit popina secreta. Considerandum est, utrum natura tua agendis rebus, an otioso studio contemplationique aptior sit : et eo inclinandum, quo te vis ingenii refert. Isocrates Ephorum iniecta manu a fo-

ro subduxit, utiliorem componendis monumentis historiarum ratus. Male enim respondent coacta ingenia. reluctante natura irritus labor est.

VII. Nihil tamen aequa oblectaverit animum, quam amicitia fidelis et dulcis. Quantum bonum est, ubi sunt praeparata pectora, in quae tuto secretum omnne descendat, quorum conscientiam minus quam tuam timeas, quorum sermo sollicitudinem leniat, sententia consilium expediat, hilaritas tristitiam disipet, conspectus ipse delectet? Quos scilicet vacuos, quantum fieri poterit, a cupiditatibus, eligimus. Serpunt enim vitia, et in proximum quemque transiliunt, et contactu nocent. Itaque, ut in pestilenta curandum est, ne corruptis iam corporibus et morbo flagrantibus assideamus, quia pericula trahemus, afflatuque ipso laborabimus: ita in amicorum legendis ingenii dabimus operam, ut quam minime inquinatos assumamus. Initium morbi est, aegris sana miscere. Nec hoc praeceperim tibi, ut neminem nisi sapientem sequaris, aut attrahas. ubi enim istum invenies, quem tot seculis quaerimus? pro optimo est minime malus. Vix tibi esset facultas delectus felioris, si inter Platonas et Xenophontas, et illum Socratici foetus proventum bonos quaereres: aut si tibi potestas Catoniana fieret aetatis, quae plerosque dignos tulit, qui Catonis seculo nascerentur, sicut multos peiores, quam unquam alias, maximorumque molitores scelerum. Utraque enim turba opus erat, ut Cato posset intelligi. habere debuit et bonos, quibus se approbaret: et malos, in quibus vim suam experiretur. Nunc vero in tanta

bonorum egestate, minus fastidiosa fiat electio. Praecipue tamen vitentur tristes, et omnia deplorantes, quibus nulla non causa in querelas placet. Constat illi licet fides et benevolentia, tranquillitati tamen inimicus est comes perturbatus, et omnia gemens.

VIII. Transeamus ad patrimonia, maximam humanarum aerumnarum materiam. Nam si omnia alia quibus angimur, compares, mortes, aegrotationes, metus, desideria, dolorum laborumque patientiam, cum iis quae nobis mala pecunia nostra exhibit; haec pars multum praegravabit. Itaque cogitandum est, quanto levior dolor sit, non habere, quam perdere: et intelligemus, paupertati eo minorem tormentorum, quo minorem damnorum esse materiam. Erras enim, si putas animosius detrimenta divites ferre. maximis minimisque corporibus par est dolor vulneris. Bion eleganter ait, Non minus molestum esse calvis, quam comatis, pilos velli. Idem scias licet de pauperibus locupletibusque, par illis esse tormentum. utrisque enim pecunia sua obhaesit, nec sine sensu revelli potest. Tolerabilius autem est, ut dixi, faciliusque, non acquirere, quam amittere: ideoque laetiores videbis, quos nunquam fortuna respexit, quam quos deseruit. Vedit hoc Diogenes, vir ingentis animi, et effecit ne quid sibi eripi posset. Tu istud paupertatem, inopiam, egestatem voca, et quod voles ignominiosum securitati nomen impone: putabo hunc non esse felicem, si quem mihi alium inveneris, cui nihil pereat. Aut ego fallor, aut regnum est, inter avaros, circumscriptores, latrones, plagiarios, unum esse, cui noceri non possit. Si quis de felicitate Dioge-

nis dubitat, potest idem dubitare et de deorum immortalium statu, an parum beate degant, quod illis non praedia, nec horti sint, nec alieno colono rura pretiosa, nec grande in foro foenus. Non te pudet, quisquis divitiis adstupes? respice agendum mundum: nudos videbis deos, omnia dantes, nihil habentes. Hunc tu pauperem putas, an diis immortalibus similem, qui se fortuitis omnibus exuit? Feliciorem tu Demetrium Pompeianum vocas, quem non pudit locupletiorem esse Pompeio? Numerus illi quotidie servorum, velut imperatori exercitus, referebatur, cui iam dudum divitiae esse debuerant, duo vicarii, et cella laxior. At Diogeni servus unicus fugit, nec eum reducere, cum monstraretur, tanti putavit. Turpe est, inquit, Manen sine Diogene posse vivere, Diogenem sine Mane non posse. Videatur mihi dixisse: Age tuum negotium, fortuna. nihil apud Diogenem iam tuum est. Fugit mihi servus? immo liber abiit. Familia vestiarium petit, viciumque: tot ventres avidissimorum animalium tuerendi sunt: emenda vestis, et custodienda rapacissimae manus, et flentium detestantiumque ministriis utendum. Quanto ille felicior, qui nihil ulli debet, nisi, cui facillime negat, sibi? Sed quoniam non est tantum roboris nobis, angustanda certe sunt patrimonia, ut minus ad iniurias fortunae simus expositi. Habiliora sunt corpora in bello, quae in arma sua contrahi possunt, quam quae superfunduntur, et undique magnitudo sua vulneribus obiecit. Optimus pecuniae modus est, qui nec in paupertatem cadit, nec procul a paupertate discedit.

IX. Placebit autem haec nobis mensura, si prius parcimonia placuerit: sine qua nec ullaes opes sufficiunt, nec ullaes non satis patent: praesertim cum in vicino remedium sit, et possit ipsa paupertas in divitias se, advocata frugalitate, convertere. Assuecamus a nobis removere pompam, et usus rerum, non ornamenta metiri. Cibus famem domet, potio sitim, libido qua necesse est fluat. Discamus membris nostris inniti: cultum victumque non ad nova exempla componere, sed ut maiorum suadent mores. Discamus continentiam augere, luxuriam coercere, gulam temperare, iracundiam lenire, paupertatem aequis oculis adspicere, frugalitatem colere, etiamsi nos pudebit desideriis naturalibus parvo parata remedia adhibere: spes effraenatas, et animum in futura eminentem velut sub vinculis habere, id agere, ut divitias a nobis potius quam a fortuna petamus. Non potest, inquam, tanta varietas et iniqüitas casuum ita depelli, ut non multum procellarum irruat magna armamenta pudentibus: cogendae in arctum res sunt, ut tela in vanum cadant. Ideoque exilia interim calamitatesque in remedium cessere, et levioribus incommodis graviora sanata sunt, ubi parum audit praecepta animus, nec curari mollius potest. Quid ni consulitur, si et paupertas et ignomina, et rerum eversio adhibetur? malo malum opponitur. Assuecamus ergo coenare posse sine populo, et servis paucioribus serviri, et vestes parare in quod inventae sunt, habitare contractius. Non in cursu tantum circique certamine, sed in his spatiis vitae interius flectendum est. Studiorum quoque,

quae liberalissima impensa est, tamdiu rationem habeo, quamdiu modum. Quo mihi innumerabiles libros et bibliothecas, quarum dominus vix tota vita sua indices perlegit? Onerat discentem turba, non instruit: multoque satius est paucis te auctioribus tradere, quam errare per multos. Quadringenta milia librorum Alexandriae arserunt, pulcherrimum regiae opulentiae monumentum. alius laudaverit, sicut Livius, qui elegantiae regum curaeque egregium id opus ait fuisse. Non fuit elegantia illud, aut cura, sed studiosa luxuria. immo ne studiosa quidem: quoniam non in studium, sed in spectaculum comparaverunt: sicut plerisque, ignaris etiam servilium literarum, libri non studiorum instrumenta, sed coenationum ornamenta sunt. Paretur itaque librorum quantum satis sit, nihil in apparatus. Honestius, inquis, in hos impensas, quam in Corinthia pictasque tabulas effuderim. Vitiosum est ubique, quod nimium est. Quid habes cur ignoscas homini armaria cedro atque ebore aptanti, corpora conquirenti aut ignotorum auctorum, aut improbatorum, et inter tot millia librorum oscitanti, cui voluminum suorum frontes maxime placent, titulique? Apud desidiosissimos ergo videbis, quidquid orationum historiarumque est, et tecto tenus exstructa loculamenta, iam enim inter balnearia et thermas, bibliotheca quoque, ut necessarium domus ornamenum expolitur. Ignoscerem plane, si e studiorum nimia cupidine oriatur: nunc ista exquisita, et cum imaginibus suis descripta sacrorum opera ingeniorum, in speciem et cultum parietum comparantur.

X. At in aliquod genus vitae difficile incidisti, et tibi ignorantι vel publica fortuna, vel privata laqueum impegit, quem nec solvere possis, nec abrumperē. Cogita compeditos primo aegre ferre onera, et impedimenta crurum: deinde ubi non indignari illa, sed pati proposuerunt, necessitas fortiter ferre docet; consuetudo facile. Invenies in quolibet genere vitae oblectamenta, et remissiones, et voluptates, si nolueris malam putare vitam potius, quam invidiosam facere. Nullo melius nomine de nobis natura meruit, quam quid cum sciret, quibus aerumnis nasceremur, calamitatum mollimentum consuetudinem invenit, cito in familiaritatem gravissima adducens. Nemo duraret, si rerum adversarum eandem vim assiduitas haberet, quam primus iectus. Omnes cum fortuna copulati sumus. aliorum aurea catena est, et laxa: aliorum arcta et sordida. Sed quid refert? eadem custodia universos circumdedit: alligatique sunt etiam qui alligaverunt. nisi tu forte leviorem in sinistra catenam putas. Alium honores, alium opes vinciunt: quosdam nobilitas, quosdam humilitas premit: quibusdam aliena supra caput imperia sunt, quibusdam sua: quosdam exilia uno loco tenent, quosdam sacerdotia. Omnis vita servitium est. Assuescendum itaque conditioni suae, et quam minimum de illa querendum: et quidquid habet circa se commodi, apprehendendum est. Nihil tam acerbum est, in quo non aequius animus solatium inventat. Exiguæ saepe areae in multos usus describentis arte patuere, et quamvis angustum pedem dispositio fecit habitabilem. Adhibe rationem difficultatibus:

possunt et dura molliri, et angusta laxari, et gravia scite ferentes minus premere. Non sunt praeterea cupiditates in longinquum mittendae, sed in vicinum illis egredi permittamus, quoniam includi ex toto non patiuntur. Relictis his, quae aut non possunt fieri, aut difficulter possunt, prope posita, spei que nostrae alludentia sequamur: sed sciamus, omnia aequa levia esse, extrinsecus diversas facies habentia, introrsus pariter vana. Nec invideamus alius stantibus: quae excelsa videbantur, praerupta sunt. Illi rursus, quos sors iniqua in ancipiti posuit, tutiores erunt superbiam detrahendo rebus per se superbis, et fortunam suam quam maxime poterunt, in planum deferendo. Multi quidem sunt, quibus necessario haerendum sit in fastigio suo, ex quo non possunt, nisi cadendo descendere: sed hoc ipsum testentur, maximum onus suum esse, quod aliis graves esse cogantur, nec sublevatos se, sed suffixos: iustitia, mansuetudine, humana lege, et benigna manu, praeparent multa ad sequiores casus praefidia, quorum spe securius pendeant. Nihil tamen aequè hos ab his animi fluctibus vindicaverit, quam semper aliquem incrementis terminum figere: nec fortunae arbitrium desinendi dare, sed se ipsos, multo quidem citra extrema, hortentur consistere. Sic et aliquae cupiditates animum acuent, sed finitiae: non in immensum incertumque producent.

XI. Ad imperfectos et mediocres, et male sanos, hic meus sermo pertinet, non ad sapientem. Huic non timide, nec pedetentim ambulandum est. tanta enim fiducia sui est, ut obviam fortunae ire non du-

bitet, nec unquam loco illi cessurus sit: nec habet
ubi illam timeat: quia non mancipia tantum, posse-
fionesque, et dignitatem, sed corpus quoque suum,
et oculos, et manum, et quidquid est cariorem vi-
tam facturum, seque ipsum inter precaria numerat,
vivitque ut commodatus sibi, et reposcentibus sine
tristitia redditurus. Nec ideo est vilis sibi, quia scit se
suum non esse: sed omnia tam diligenter faciet, tam
circumspecte, quam religiosus homo sanctusque so-
let tueri fidei commissa. Quandocunque autem red-
dere iubebitur, non queretur cum fortuna: sed dicet,
Gratias ago pro eo quod possedi, habuique. Magna
quidem res tuas mercede colui: sed quia imperas,
cedo gratus libensque. si quid habere me tui volue-
ris, etiam nunc servabo: si aliud placet, ego vero
factum signatumque argentum, domum, familiamque
meam reddo, restituo. Appellaverit natura, quae
prior nobis credidit, et huic dicemus, Recipe ani-
mum meliorem quam dedisti: non tergiversor, nec
refugio. paratum habes a volente, quod non sentienti
dedisti aufer. Reverti unde veneris? quid grave est?
male vivet, quisquis nesciet bene mori. Huic itaque
primum rei premium detrahendum est, et spiritus in-
ter vilia numerandus. Gladiatores (ait Cicero) invi-
sos habemus, si omni modo vitam impetrare cu-
piunt: favemus, si contemtum eius prae se ferunt.
idem evenire nobis scias. saepe enim causa moriendi
est, timide mori. Fortuna illa quae ludos sibi facit,
Quo, inquit, te reservem, malum et trepidum ani-
mal? eo magis convulnaberis et confodieris, quia
nescis praebere iugulum. At tu et vives diutius, et

morieris expeditius, qui ferrum non subducta cervice, nec manibus oppositis, sed animose recipis. Qui mortem timebit, nihil unquam pro homine vivo faciet. at qui scit, hoc sibi cum conciperetur, statim condicatum, vivet ad formulam: et simul illud quoque eodem animi robore praestabit, ne quid ex his quae eveniunt, subitum sit. Quidquid enim fieri potest, quasi futurum prospiciendo, malorum omnium impetus mollet. qui ad praeparatos exspectantesque nihil afferunt novi, securis, et beata tantum spectantibus, graves eveniunt. Morbus enim, captivitas, ruina, ignis, nihil horum repentinum est. Sciebam in quam tumultuosum me contubernium natura clusisset. totiens in vicinia mea conclamatum est, totiens praeter limen immaturas exsequias fax cereusque praecessit: saepe altius ruentis aedificii fragor sonuit: multos ex his quos forum, curia, sermo, mecum contraxerat, nox abstulit, et vincetas ad sodalitium manus copulatas intercidit. Mirer aliquando ad me pericula accessisse, quae circa me semper erraverunt? Magna pars hominum est, quae navigatura, de tempestate non cogitat. Nunquam me in bona re mali pudebit auctoris. Publius tragicis comicisque vehementior ingenii, quotiens mimicas ineptias, et verba ad summam caveam spectantia reliquit, inter multa alia cothurno, non tantum sipario, fortiora, et hoc ait:

Cuivis potest accidere, quod cuiquam potest.

Hoc si quis in medullas demiserit, et omnia aliena mala, quorum ingens quotidie copia est, sic adsperixerit, tanquam illis liberum et ad se iter sit; multo

ante se armabit , quam petatur. Sero animus ad periculorum patientiam post pericula instruitur. Non putavi hoc futurum. nunquam hoc eventurum credidisse. Quare autem non? Quae sunt divitiae , quas non egestas , et fames , et mendicitas a tergo sequatur? Quae dignitas , cuius non praetextam , et augurale , et lora patricia , et fordes comitentur , et exportatio , et notae , et mille maculae , et extrema contemtio? Quod regnum est , cui non parata sit ruina , et proculatio , et dominus , et carnifex? nec magnis ista intervallis divisa , sed horae momentum interest inter solium et aliena genua. Scito ergo , omnem conditionem versabilem esse; et quidquid in illum incurrit , posse in te quoque incurrere. Locuples es? numquid ditior Pompeio? cui cum Caius vetus cognatus , hospes novus , aperuisset Caesaris domum , ut suam cluderet , defuit panis et aqua : cum tot flumina possideret in suo orientia , et suo cadentia , mendicavit stillicidia : fame ac siti periit , in paliatio cognati , dum illi hères publicum funus esurienti locat. Honoribus summis functus es? numquid aut tam magnis , aut tam insperatis , aut tam universis , quam Seianus? Quo die illum senatus deduxerat , populus in frusta divisit : in quem quidquid congeri poterat , dii hominesque contulerant , ex eo nihil superfuit , quod carnifex traheret. Rex es? non ad Croesum te mittam , qui rogum suum et escendit iussus , et extingui vidit , factus non regno tantum , sed etiam morti suae superstes : non ad Iugurtham , quem populus Romanus intra annum quam timuerat , spectavit. Ptolemaeum Africæ regem , Arme-

niae Mithridatem, inter Caianas custodias vidimus. alter in exsilium missus est : alter ut meliori fide mittetur, optabat. In tanta rerum, sursum ac deorsum euntium, versatione, si non quidquid fieri potest, pro futuro habes, das in te vires rebus adversis, quas infregit, quisquis prior vidit. Proximum ab his erit, ne aut in supervacuis, aut ex supervacuo laboremus : id est, ne aut quae non possumus consequi, concupiscamus : aut adepti, cupiditatum vanitatem nostra rum sero, post multum pudorem, intelligamus. id est, ne aut labor irritus sine effectu sit, aut effectus labore indignus. Fere enim ex his tristitia sequitur, si aut non successit, aut successus pudet.

XII. Circumcidenda est concursatio, qualis est magnae parti hominum, domos, et theatra, et fora pererrantium. Alienis se negotiis offerunt, semper aliquid agentibus similes. Horum si aliquem exuentem de domo interrogaveris, Quo tu? quid cogitas? respondebit tibi, Non mehercule scio : sed aliquos videbo, aliquid agam. Sine proposito vagantur, quaerentes negotia : nec quae destinaverunt, agunt, sed in quae incurrerunt. Inconsultus illis vanusque cursus est, qualis formicis, per arbusta repentibus ; quae in summum cacumen, deinde in imum inanes aguntur. His plerique similem vitam agunt, quorum non immerito quis inquietam inertiam dixerit. Quorundam, quasi ad incendium currentium, misereri : usque eo impellunt obvios, et se aliosque praecipitant : cum interim cucurrerint, aut salutaturi aliquem non resalutaturum, aut funus ignoti hominis prosecuti, aut iudicium saepe litigantis, aut sponsalia

saepe nubentis , et lecticam affectati , quibusdam locis et ipsi tulerint. deinde domum cum supervacua redeuntes laffitudine , iurant nescisse se ipsoſ , quare exierint , ubi fuerint , postero die erraturi per eadem illa vestigia. Omnis itaque labor aliquo referatur , aliquo respiciat. Non industria , inquietos et insanos , falsae rerum imagines agitant. nam ne illi quidem sine aliqua ſpe moventur , proritat illos alicuius rei species , cuius vanitatem capta mens non coarguit. Eodem modo unumquemque ex his , qui ad augendam turbam exeunt , inanes et leves cauſae per urbem circumducunt , nihilque habentem in quo laboret , lux orta expellit : et cum multorum fruſtra liminibus illis nomenclatores persalutavit ; a multis exclusis , neminem ex omnibus difficultius domi , quam ſe , convenit. Ex hoc malo dependet illud taeterimum vitium , auscultatio , et publicorum secretorumque inquisitio , et multarum rerum ſcientia , quae nec tuto narrantur , nec tuto audiuntur. Hoc fecutum puto Democritum , ita coepiffe : Qui tranquille volet vivere , nec privatim agat multa , nec publice : ad supervacua ſcilicet referentem. Nam ſi necessaria ſunt , et privatim , et publice , non tantum multa , ſed innumerabilia agenda ſunt : ubi vero nullum officium ſolemne nos citat , inhibenda actiones ſunt.

XIII. Nam qui multa agit , ſaepe fortunae potestatem ſui facit: quam tutiſſimum eſt raro experiri , ceterum ſemper de illa cogitare , et ſibi nihil de fide eius promittere. Navigabo , niſi ſi quid inciderit : et praetor fiam , niſi ſi quid obſtiterit : et negotiatio mihi repondebit , niſi ſi quid intervenerit. Hoc eſt ,

quare sapienti nihil contra opinionem dicamus accidere. non illum casibus hominum exceperimus, sed erroribus: nec illi omnia ut voluit cedunt, sed ut cogitavit. in primis autem cogitavit, aliud posse propositis suis resistere. Necessa est autem levius ad animum pervenire destitutae cupiditatis dolorem, cui successum non utique promiseris.

XIV. Faciles etiam nos facere debemus, ne nimis destinatis rebus indulgeamus. transeamus in ea, in quae nos casus deduxerit: nec mutationes aut consilii aut status pertimescamus: dummodo nos levitas, inimicissimum quieti vitium, non excipiat. Nam et pertinacia necessa est anxia et misera sit, cui fortuna saepe aliquid extorquet: et levitas multo gravior, nusquam se continens. Utrumque infestum est tranquillitati, et nihil mutare posse, et nihil pati. Utique animus ab omnibus externis in se revocandus est. sibi confidat, se gaudeat, sua suspiciat: recedat, quantum potest, ab alienis, et se sibi applicet, damna non sentiat, etiam adversa benigne interpretetur. Nunniato naufragio, Zeno noster, cum omnia sua audiret submersa, iubet, inquit, me fortuna expeditius philosophari. Minabatur Theodoro philosopho tyrannus mortem, et quidem infsepultam. Habes, inquit, cur tibi placeas: hemina sanguinis in tua potestate est. nam quod ad sepulturam perrinet, o te ineptum, si putas interesse, supra terram, an infra putrescam. Canus Iulius, vir in primis magnus, cuius admirationi ne hoc quidem obstat, quod nostro seculo natus est, cum Caio diu altercatus, postquam abeunti Falaris ille dixit, Ne forte inepta spe

tibi blandiaris, duci te iussi: Gratias, inquit, ago, optime princeps. Quid senserit, dubito: multa enim occurunt mihi. Contumeliosus esse voluit, et ostendere quanta crudelitas esset, in qua mors beneficium erat? An exprobravit illi quotidiam dementiam? agebant enim gratias, et quorum liberi occisi, et quorum bona ablata erant. An tanquam libertatem libenter accepit? Quidquid est, magno animo respondebit. Dicit aliquis: Potuit post haec iubere illum Caius vivere. Non timuit hoc Canus. rota erat Caii in talibus imperiis fides. Credisne, illum decem medios usque ad supplicium dies sine ulla sollicitudine exegisse? verisimile non est, quae vir ille dixerit, quae fecerit, quam in tranquillo fuerit. Ludebat latrunculis, cum centurio, agmen periturorum trahens, illum quoque excitari iubet. Vocatus, numeravit calculos, et sodali suo, Vide, inquit, ne post mortem meam mentiaris te vicisse. Tum annuens centurioni, Testis, inquit, eris, uno me antecedere. Lusisse tu Canum illa tabula putas? illusit. Tristes erant amici, talem amissuri virum. Quid moesti, inquit, estis? Vos quaeritis, an immortales animae sint: ego iam sciam. nec desit in ipso veritatem fine scrutari, et ex morte sua quaestionem habere. Prosequebatur illum philosophus suus: nec iam procul erat tumulus, in quo Caesari Deo nostro fiebat quotidianum sarcum. Quid, inquit, Cane, nunc cogitas? aut quae tibi mens est? Observare, inquit Canus, proposui illo velocissimo momento, an sensurus sit animus, exire se. promisitque, si quid explorasset, circumsturum amicos, et indicaturum quis esset animarum

status. Ecce in media tempestate tranquillitas : ecce animus aeternitate dignus , qui fatum suum in argumentum veri vocat : qui in ultimo illo gradu positus , exeuntem animam percontatur : nec usque ad mortem tantum , sed aliquid etiam ex ipsa morte dis- cit: Nemo diutius philosophatus. sed non raptim relinquetur magnus vir , et cum cura dicendus. dabi- mus te in omnem memoriam , clarissimum caput , Caianae cladis magna portio.

XV. Sed nihil prodest privatae tristitiae causas abie- cisse. Occupat enim nonnunquam odium generis hu- mani , et occurrit tot scelerum felicium turba, cum cogitaveris, quam sit rara simplicitas , quam ignota innocentia , et vix unquam , nisi cum expedit , fides , et libidinis lucra damnaque pariter invisa, et am- bitio usque eo iam se suis non continens terminis , ut per turpitudinem splendeat. Agitur animus in noc- tem, et velut eversis virtutibus, quas nec sperare licet, nec habere prodest , tenebrae oboriuntur. In hoc itaque flectendi sumus, ut omnia vulgi vitia non invisa nobis , sed ridicula videantur : et Democri- tum potius imitemur, quam Heraclitum. Hic enim quoties in publicum processerat , flebat : ille ride- bat. huic omnia quae agimus , miseriae ; illi ineptiae videbantur. Elevanda ergo omnia , et facili animo ferenda. humanius est deridere vitam , quam deplo- rare. Adiice , quod de humano quoque genere me- lius meretur qui ridet illud , quam qui luget. Ille et ^{et} spei bonaे aliquid relinquit : hic tamen stulte deflet, quae corrigi posse desperat : et universa contempla- tus, maioris animi est , qui risum non tenet , quam

qui lacrimas, quando levissimum affectum animi movet, et nihil magnum, nihil severum, nec serium quidem, ex tanto apparatu putat. Singula, propter quae laeti ac tristes sumus, sibi quisque proponat, et sciāt verum esse, quod Bion dixit, Omnia hominum negotia similia initiis esse, nec vitam illorum magis sanctam aut severam esse, quam conceptus inchoatorum. Sed satius est, publicos mores et humana vitia placide accipere, nec in risum, nec in lacrimas excidere. Nam alienis malis torqueri, aeterna miseria est : alienis delestari malis, voluptas inhumana. sicut illa inutilis humanitas, flere, quia aliquis filiam efferat, et frontem suam fingere. In suis quoque malis id agere te oportet, ut dolori tantum des quantum poscit ratio, non quantum consuetudo. Plerique enim lacrimas fundunt, ut ostendant : et toties sicclos oculos habent, quoties spectator defuit : turpe iudicantes, non flere, cum omnes faciant. Adeo penitus hoc se malum fixit, ex aliena opinione pendere, ut in simulationem etiam simplicissima res, dolor, veniat. Sequitur pars, quae solet non immerito contristare, et in sollicitudinem adducere, ubi honorum exitus mali sunt. Ut Socrates cogitur in carcere mori, Rutilius in exilio vivere, Pompeius et Cicero cienibus suis praebere cervicem : Cato ille, virtutum viva imago, incumbens gladio, simul de se ac de Republica palam facere. Necesse est torqueri, tam iniqua praemia fortunam persolvere. et quid sibi quisque nunc speret, cum videat pessima optimos pati? Quid ergo est? vide quomodo quisque illorum tulerit : et si fortes

fuerunt, ipsorum illos animos desidera; si mulierbiter et ignave periere, nihil periit. Aut digni sunt, quorum virtus tibi placeat: aut indigni, quorum desideretur ignavia. Quid enim est turpius, quam si maximi viri timidos fortiter moriendo faciunt? Laudemus toties dignum laudibus, et dicamus: Tanto fortior, tanto felicior! humanos effugisti casus, livorem, morbum: existi ex custodia: non tu dignus mala fortuna diis visus es, sed indignus in quem iam aliquid fortuna posset. Subducentibus vero se, et in ipsa morte ad vitam respectantibus, manus iniiciendae sunt. Neminem flebo laetum, neminem flentem. ille lacrimas meas ipse abstersit: hic suis lacrimis effecit, ne ullis dignus sit. Ego Herculem fleam, quod vivus uritur; aut Regulum, quod tot clavis configitur; aut Catonem, quod vulnera sua fortiter tulit? Omnes isti levi temporis impensa invenierunt, quomodo aeterni fierent: ad immortalitatem moriendo venerunt. Est et illa sollicitudinum non mediocris materia, si te anxie componas, nec ulli simpliciter ostendas: qualis multorum vita est, ficta, et ostentationi parata. Torquet enim assidua observatio sui, et deprehendi aliter, ac solet, metuit: nec unquam cura solvimus, ubi toties nos aestimari putamus, quoties aspici. Nam et multa incident, quae invitatos denudent: et ut bene cedat tanta sui diligentia, non tamen iucunda vita, aut secura est, semper sub persona viventium. At illa quantum habet voluptatis, sincera et per se ornata simplicitas, nihil ostendens moribus suis? Subit tamen et haec vita contemptus periculum, si omnia omnibus patent. sunt enim

qui fastidian, quidquid proprius adierunt. Sed nec virtuti periculum est, ne admota oculis revilescat: et satius est simplicitate contemni, quam perpetua simulatione torqueri. Modum tamen rei adhibeamus. multum interest, simpliciter vivas, an negligenter. Multum et in se recedendum est. conversatio enim dissimilium, bene composita disturbat, et renovat affectus, et quidquid imbecillum in animo, nec percuratum est, exulcerat. Miscenda tamen ista, et alternanda sunt, solitudo et frequentia. Illa nobis faciet hominum desiderium, haec nostri: et erit altera alterius remedium. odium turbae sanabit solitudo, tandem solitudinis turba. Nec in eadem intentione aequaliter retinenda mens est, sed ad iocos revocanda. Cum pueris Socrates ludere non erubescet: et Cato vino laxabat animum, curis publicis fatigatum: et Scipio triumphale illud et militare corpus movit ad numeros; non molliter se infringens, ut nunc mos est etiam incessu ipso ultra muliebrem molliitem fluentibus; sed ut illi antiqui viri solebant, inter lusum ac festa tempora, virilem in modum tripudiare, non facturi detrimentum, etiam si ab hostibus suis spectarentur. Danda est remissio animis: meliores acrio-resque requieti surgent. Ut fertilibus agris non est imperandum: cito enim exhaustet illos nunquam intermissa fecunditas: ita animorum impetus assiduis labor frangit. Vires recipient paulum resoluti et remissi. Nascitur ex assiduitate laborum, animorum hebetatio quaedam, et languor: nec ad hoc tanta hominum cupiditas tenderet, nisi naturalem quandam voluptatem haberet lusus iocusque: quorum fre-

quens usus, omne animis pondus, omnemque vim eripiet. Nam et somnus refectioni necessarius est: hunc tamen si per diem noctemque continues, mors erit. Multum interest, remittas aliquid, an solvas. Legum conditores festos instituerunt dies, ut ad hilaritatem homines publice cogerentur: tanquam necessarium laboribus interponentes temperamentum. Et magni, ut dixi, viri quidam sibi menstruas certis diebus ferias dabant: quidam nullum non diem inter et otium et curas dividebant. qualem Pollio-nem Afinium, oratorem magnum, meminimus: quem nulla res ultra decimam retinuit. ne epistles quidem post eam horam legebat, ne quid novae curae nasceretur: sed totius diei lassitudinem duabus illis horis ponebat. Quidam medio die interiunxerunt, et in postmeridianas horas aliquid levioris operae distulerunt. Maiores quoque nostri novam relationem, post horam decimam, in senatu fieri vetabant. Miles vigilias dividit, et nox immunis est ab expeditione redeuntium. Indulgendum est animo: dandumque subinde otium, quod alimenti ac virium loco sit: et in ambulationibus apertis vagandum, ut coelo libero et multo spiritu augeat attollatque se animus: Aliquando vectatio iterque, et mutata regio, vigorem dabunt, convictusque et liberalior potio: nonnunquam et usque ad ebrietatem veniendum, non ut mergat nos, sed ut deprivat. Eluit enim curas, et ab imo animum moveret: et ut morbis quibusdam, ita tristitiae medetur: Liberque non ob licentiam linguae dictus est inventor vini, sed quia liberat servitio curarum animum,

et asserit, vegetatque et audaciorem in omnes conatus facit. Sed ut libertatis, ita vini salubris moderatio est. Et Solonem, Arcesilaumque induluisse vino credunt. Catoni ebrietas obiecta est : facilius efficiet, quisquis obiecerit, hoc crimen honestum, quam turpem Catonem. Sed nec saepe faciendum est, ne animus malam consuetudinem ducat : et aliquando tamen in exultationem libertatemque extrahendus, tristisque sobrietas removenda paulisper. Nam, sive Graeco poëtae credimus, aliquando et insanire iucundum est : sive Platonis, frustra poëticas fores compos sui pepulit : sive Aristoteli, nullum magnum ingenium sine mixtura dementiae fuit. Non potest grande aliquid et supra ceteros loqui, nisi mota mens. Cum vulgaria et solita contempsit, instinctuque sacro surrexit excelsior, tunc demum aliquid cecinit grandius ore mortali. Non potest sublime quidquam et in arduo positum contingere, quamdiu apud se est. Desciscat oportet a solito, et efferatur, et mordet at fraenos, et rectorem rapiat suum : eo que ferat quo per se timuisset escendere. Habes, Serene carissime ; quae possint tranquillitatem tueri, quae restituere, quae surrepentibus vitiis resistant. Illud tamen scito, nihil horum satis esse validum, rem imbecillam servantibus, nisi intenta et assidua cura circumeat animum labentem.

L. ANNAEI SENECAE
DE CONSTANTIA
SAPIENTIS
LIBER UNUS.

L. ANNAEI SENECAE
 DE CONSTANTIA
 SAPIENTIS
 SIVE
 QUOD IN SAPIENTEM NON CADIT INIURIA
 LIBER UNUS.

Argumentum & Ordo.

Magni animi, magni ingenii, atque etiam eloquii hoc scriptum: uno verbo, inter optima. Editum sub tempus prioris illius puto de Tranquillitate: cui vulgo etiam iungunt, male. Diversum argumentum est, & tali serie. Orditur a Stoicorum laude, quorum Paradoxum tractat, Sapientem non affici iniuria. Quid ergo? aiebat Serenus: non Cato contumeliis affectus, verberibus, & spūtis? Ab hac obiectione ingreditur in materiam: &, Non affectus est tamen iniuriis, inquit: fuit enim Sapiens, atque in Sapientem iniuria non cadit. Quod tamen ea mente dici ait, non ut non fiat, sed ut non admittat. Tangi potest iniuria, sed non laedi: a te esse, in illo non esse. Haec pulcherrime exsequitur ad Cap. iv. Dividit deinde dicenda in duas partes, idque a discrimine iniuriae & Contumeliae. Priore, negat illam cadere in Sapientem; posteriore, nec istam. De iniuria, haec sunt argumenta. Sapiens nullius mali patiens: at malum est Iniuria. Secundum, Iniuria detrahit & deminuit: Sapienti nihil eripitur. habet in se uno omnia reposita, & firmiter, ut Stilpo. Tertium, Fortis ab infirmitate non laeditur: non ergo a Malitia Virtus. Hic obicitur, Atqui Socrates nonne iniuria damnatus? Ita, sed sine sua iniuria. Illi intulerunt, ipse non accepit: sed sapientia reciecit. Sicut venenum mihi das, ego antidoto vim

eius infringi : scelus tu facis , ego non patior . Quartum argumentum , iniuria cum Injustitia mixta est : non haec cadit in Sapientem : minime ergo illa . Quintum , Sapienti nemo prodest : ergo nec laedit . Sextum , Iniuria a Spe aut metu est : Sapiens neutro eorum tangitur . Septimum ultimumque , Iniuriam nemo immotus accipit : non movetur Sapiens . Atque hic conclusio prioris partis , & adhortatio ad dogma animis accipiendum . Altera erat de Contumelia , quam explicat Cap . x quid propriet ; & tum a Sapiente arcet . Primo , quia Sapiens magnitudinem suam novit : non ergo contumelia ad eum pertinet ; quae nomen & rem habet a contemtu . Secundo , Superbi & insolentes inferunt contumeliam : ipse tales spernit : itaque & ab iis istam . Tertio , Nemo maiorem melioremque contemnit : is est Sapiens . Ergo in se diuersa ridet , ut in conviviis ioculos puerorum . Sed quid ? fert igitur haec omnia Sapiens ? non castigat aut compescit ? immo facit interdum : sicut illos ipsos pueros solemus : non quia malum ille accepit , sed quia hi fecerunt . Atque hanc tenus (ad Cap . xiv) in solam Contumeliam , aut Iniuriam : iam mixtim utramque refutat . Hoc argumento , Securitas propria est Sapientis : non est , si alterutram accipit , aut potest accipere . Simile & Epicurei dicunt : et si minus fortiter . Denique levia pleraque , quibus vulgus offenditur , suadet reciicere , & ridere ne ridearis . Conclusio , Quomodo eunii ad Sapientiam , Quomodo qui pervenit , serendae iniuria ? Illi , cum morsu aliquo animi , & adhuc pugna ; huic , sine alterutro , & viator iam agit ante se utramque & triumphat . Ego itero , magni animi scriptum est : robur ab eo , in temporum hac hominumque quotidiana militia , capiamus .

TIANTUM inter Stoicos , Serene , et ceteros sapientiam professos interesse , quantum inter feminas et mares , non immerito dixerim : cum utraque turba ad vitae societatem tantundem conferat ; sed altera pars ad obsequendum , altera imperio nata sit .

Ceteri sapientes molliter et blande, ut fere domesti ci et familiares medici, aegris corporibus, non qua optimum et celerrimum est medentur, sed qua licet: Stoici virilem ingressi viam, non ut amoena ineuntibus videatur curae habent, sed ut quam primum nos eripiant, et in illum editum verticem edificant, qui adeo extra omnem teli iactum surrexit, ut supra fortunam emineat. At ardua per quae vocamur, et confragosa sunt. Quid enim plano aditur excelsum? Sed ne tam abrupta quidem sunt, quam quidam putant. prima tantum pars faxa rupesque habet, et invii speciem: sicut pleraque ex longinquo speculantibus abscissa et connexa videri solent, cum aciem longinquitas fallat. Deinde propius adeuntibus eadem illa, quae in unum congesserat error oculorum, paulatim adaperiuntur: tum illis, quae praeципitia ex intervallo apparebant, redit lene fastigium. Nuper cum incidisset mentio M. Catonis, indigne ferebas (sicut es iniuritatis impatiens) quod Catonem aetas sua parum intellexisset, quod supra Pompeios et Caesares surgente, infra Vatinios posuisset: et tibi indignum videbatur, quod illi dissuasuro legem, toga in foro esset erepta, quodque a Rostris usque ad arcum Fabianum, per seditiosae factionis manus tractus, voces improbas, et sputa, et omnes alias insaniae multitudinis contumelias pertulisset. Tunc ego respondi, habere te quod Reipublicae nomine movereris, quam hinc P. Clodius, hinc Vatinius, ac pessimus quisque venundabat, et caeca cupiditate corrupti, non intelligebant, se, dum vendunt, et venire.

II. Pro ipso quidem Catone securum te esse iussi. Nullum enim sapientem nec iniuriam accipere, nec contumeliam posse. Catonem autem certius exemplar sapientis viri nobis deos immortales dedisse, quam Ulyssem et Herculem prioribus seculis. Hōs enim Stoici nostri sapientes pronuntiaverunt, invictos laboribus, centemtōres voluptatis, et victores omnium terrarum. Cato cum feris manus non contulit, quas consecutari venatoris agrestisque est: nec monstra igne ac ferro persecutus est, nec in ea tempora incidit, quibus credi posset coelum unius humeris inniti, excussa iam antiqua credulitate, et seculo ad summam perducto solertiam. Cum ambitu congressus, multiformi malo, et cum potentiae imensa cupiditate, quam totus orbis in tres divisus satiare non poterat, adversus vitia civitatis degenerantis, et pessum sua mole fidentis, stetit solus, et cadentem Rempublicam, quantum modo una retrahi manu poterat, retinuit: donec vel abreptus, vel abstractus, comitem se diu sustentatae ruinae dedit: simulque extincta sunt, quae nefas erat dividi. Neque enim Cato post libertatem vixit, nec libertas post Catonem. Hinc tu putas iniuriam fieri potuisse a populo, quod aut praeturam illi detraxit, aut togam? quod sacrum illud caput purgamentis oris aspersit? Tutus est sapiens, nec ulla affici aut iniuria, aut contumelia potest.

III. Videor mihi intueri animum tuum incensum, et effervescentem. paras acclamare: Haec sunt quae auctoritatem praeceptis vestris detrahant. magna promittis, et quae ne optari quidem, nedum credi pos-

sint : deinde ingentia locuti , cum pauperem negastis esse sapientem , non negatis solere illi et servum , et vestem , et te^ctum , et cibum deesse ; cum sapientem negastis insanire , non negatis et alienari , et parum sana verba emittere , et quidquid vis morbi cogit , audere ; cum sapiente^m negastis servum esse , iidem non itis infitias , et venum iturum . et imperata facturum , et domino suo servilia praefiturum ministeria. Ita, sublato alte supercilio, in eadem quae ceteri , descenditis , mutatis rerum nominibus. Tale itaque aliquid et in hoc esse suspicor , quod prima specie pulchrum atque magnificum est : nec iniuriam nec contumeliam accepturum esse sapientem. Multum autem interest , utrum sapientem extra indignationem , an extra iniuriam ponas. Nam si dicis illum aequo animo laturum , nullum habet privilegium. contigit illi res vulgaris , et quae discitur ipsa iniuriarum assiduitate , patientia. Si negas accepturum iniuriam , id est , neminem illi tentaturum facere ; omnibus relictis negotiis , Stoicus fio. Ego vero sapientem non imaginario honore verborum exornare constitui , sed eo loco ponere , quo nulla permittatur iniuria. Quid ergo ? nemo erit qui lacefat , qui tentet ? Nihil in rerum natura tam sacrum est , quod sacrilegum non inveniat : sed non ideo divina minus in sublimi sunt , si existunt , qui magnitudinem , multum ultra se positam , non icturi appetant. Invulnerabile est , non quod non feritur , sed quod non laeditur. Ex hac tibi nota sapientem exhibeo. Numquid dubium est , quin certius robur sit , quod non vincitur , quam quod non laceffitur ? cum

dubiae sint vires inexpertae : ac merito certissima firmitas habeatur, quae omnes incursus respuit. Sic tu sapientem melioris scito esse naturae, si nullius illi iniuria nocet, quam si nulla sit. Et illum fortem virum dicam, quem bella non subigunt, nec admota vis hostilis exterret: non cui pingue otium est, inter desides populos. Huiusmodi igitur sapientem nulli esse iniuriae obnoxium. Itaque non refert, quam multa in illum coniiciantur tela, cum sit nulli penetrabilis. Quomodo quorundam lapidum inexpugnabilis ferro duritia est, nec secari adamas, aut caedi, vel deteri potest, sed incurrentia ultiro retundit: quemadmodum quaedam non possunt igne consumi, sed flamma circumfusa, rigorem suum habitumque conservant: quemadmodum proiecti in altum scopuli mare frangunt, nec ipsi ulla saevitiae vestigia, tot verberati seculis ostentant: ita sapientis animus solidus est, et id roboris collegit, ut tam tutus sit ab iniuria, quam illa quae retuli.

IV. Quid igitur? non erit aliquis qui sapienti facere tentet iniuriam? Tentabit, sed non perventuram ad eum. Maiore enim intervallo a contactu inferiorum abductus est, quam ut ulla vis noxia usque ad illum vires suas perferat. Etiam cum potentes, et imperio editi, et consensu servientium validi, nocere ei intendent: tam citra sapientem omnes eorum impetus deficient, quam quae nervo tormentisve in altum exprimuntur, cum extra visum exsisterunt, citra coelum tamer fleantur. Quid? tu putas, cum stolidus ille rex multitudine telorum diem obscurasset, ullam sagittam in Solem incidisse?

se? aut demissis in profundum catenis Neptunum potuisse contingi? Ut coelestia humanas manus effugiunt, et ab his qui templaque diruunt, aut simulacra conflant, nihil divinitati nocet: ita quidquid sit in sapientem proterve, petulanter, superbe, frustra tentatur. At satius erat, neminem esse qui facere vellet. Rem difficilem optas humano generi, innocentiam. Et non fieri, eorum interest qui facturi sunt, non eius qui pati, ne si fiat quidem, non potest. Immo nescio, an magis vires sapientia ostendat tranquillitatis inter lacessentia: sicut maximum argumentum est imperatoris armis virisque pollentis, tuta securitas et in hostium terra. Dividamus, si tibi videtur, Serene, iniuriam a contumelia. prior illa natura gravior est: haec levior, et tantum delicatis gravis: qua non laeduntur, sed offenduntur. Tanta est tamen animorum dissolutio et vanitas, ut quidam nihil acerbius putent. Sic invenies servum, qui flagellis quam colaphis caedi malit, et qui mortem ac verbera tolerabiliora credat, quam contumeliosa verba. Ad tantas ineptias perventum est, ut non dolore tantum, sed doloris opinione vexemur: more puerorum, quibus metus incutit umbra, et personarum deformitas, et depravata facies; lacrimas vero evocant nomina parum grata auribus, et digitorum motus, et alia, quae impetu quodam erroris improvi di resuunt.

V. Iniuria propositum hoc habet, aliquem malo afficere: malo autem sapientia non relinquit locum. Unum enim malum illi est turpitudo: quae intrare eo, ubi iam virtus honestumque est, non potest:

iniuria ergo ad sapientem non pervenit. Nam si iniuria alicuius mali patientia est, sapiens autem nullius mali est patiens, nulla ad sapientem iniuria pertinet. Omnis iniuria deminutio eius est, in quem incurrit. nec potest quisquam iniuriam accipere sine aliquo detimento vel dignitatis, vel corporis, vel rerum extra nos positarum : sapiens autem nihil perdere potest: omnia in se reposuit, nihil fortunae credit, bona sua in solido habet, contentus virtute, quae fortuitis non indiget. Ideoque nec augeri, nec minui potest. nam in summum perducta, incrementi non habent locum. Nihil eripit fortuna, nisi quod dedit: virtutem autem non dat: ideo nec detrahit. Libera est, inviolabilis, immota, inconcussa; sic contra casus indurat, ut nec inclinari quidem, ne dum vinci possit. Adversus apparatus terribilium, rectos oculos tenet, nihil ex vultu mutat, sive illi dura, sive secunda ostentantur. Itaque nihil perdet, quod perire sensurus sit. Unius enim in possessione virtutis est, ex qua depelli nunquam potest: ceteris precario utitur. quis autem iactura movetur alieni? Quodsi iniuria nihil laedere potest ex his quae propria sapientis sunt, quia virtute sua salva sunt: iniuria sapienti non potest fieri. Megaram Demetrius ceperat, cui cognomen Poliorcetes fuit. ab hoc Stilpon philosophus interrogatus, numquid perdidisset, Nihil, inquit: omnia namque mea mecum sunt. Atqui et patrimonium eius in praedam cesserat, et filias rapuerat hostis, et patria in alienam ditionem venerat, et ipsum rex circumfusus viatoris exercitus armis ex superiore loco rogitabat. Ille viatoriam illi

excussum, et se, urbe capta, non invictum tantum, sed indemnem esse testatus est. habebat enim secum vera bona, in quae non est manus inieccio. At ea quae dissipata et direpta ferebantur, non iudicabat sua, sed adventitia, et nutum fortunae sequentia: ideo non ut propria dilexerat. Omnium enim extrinsecus affluentium lubrica et incerta possessio est. Cogita nunc, an huic sur, aut calumniator, aut vicinus impotens, aut dives aliquis regnum orbae senectutis exercens, facere iniuriam possit, cui bellum et hostis ille, egregiam artem quassandarum urbium professus, eripere nihil potuit. Inter micantes ubique gladios, et militarem in rapina tumultum, inter flamas et sanguinem stragemque impulsae civitatis, inter fragorem templorum super deos suos carentium, uni homini pax fuit. Non est itaque quod audax iudices promissum: cuius tibi, si parum fidei habeo, sponsorem dabo. Vix enim credis tantum firmitatis in hominem, aut tantam animi magnitudinem cadere. sed si prodit in medium, qui dicat:

VI. Non est, quod dubites, an tollere se homo natus supra humana possit, an dolores, damna, ulcerationes, yulnera, magnos motus rerum circa se frementium securus adspiciat, et dura placide ferat, et secunda moderate: nec illis cedens, nec his fretus, unus idemque inter diversa sit, nec quidquam suum nisi se putet esse, ea quoque parte qua melior est. En adsum hoc vobis probaturus, sub isto tot civitatum eversore, munimenta incussu arietis labefieri, et turrium altitudinem cuniculis ac latentibus fossis repente residere, et aequaturum editissimas arces

aggerem crescere : at nulla machinamenta posse reperiri, quae bene fundatum animum agitent. Erep-
si modo e ruinis domus, et incendiis undique relu-
centibus, flamas per sanguinem fugi. Filias meas
qui casus habeat, an peior publico, nescio. Solus,
et senior, et hostilia circa me omnia videns, tamen
integrum incolunemque esse censum meum profi-
teor; teneo, habeo quidquid mei habui. Non est quod
me victimum, victoremque te credas. vicit fortuna tua
fortunam meam. Caduca illa, et dominum mutantia,
ubi sint nescio : quod ad res meas pertinet, mecum
sunt, mecum erunt. Perdiderunt isti divites patri-
monia ; libidinosi amores suos, et magno pudoris
impendio dilecta scorta; ambitiosi curiam, et forum,
et loca exercendis in publico vitiis destinata ; foe-
neratores perdiderunt tabellas suas, quibus avaritia
falso laeta, divitias imaginatur : ego quidem omnia
integra illibataque habeo. Proinde istos interroga
qui flent, qui lamentantur, strictis gladiis nuda pro
pecunia corpora opponunt, qui hostem onerato si-
nu fugiunt. Ergo ita habe, Serene, perfectum illum
virum, humanis divinisque virtutibus plenum, ni-
hil perdere. Bona eius solidis et inexsuperabilibus
munitis praecincta sunt. Non Babylonios illi mu-
ros contuleris, quos Alexander intravit : non Car-
thaginis aut Numantiae moenia, una manu capta :
non Capitolium, arcemve; habent ista hostile ve-
stigium. Illa quae sapientem tuentur, a flamma et ab
incursu tuta sunt : nullum introitum praebent, ex-
celsa, inexpugnabilia, diis aequa.

VII. Non est quod dicas, ita ut soles, hunc fa-

pientem nostrum nusquam inveniri. Non fingimus istud humani ingenii vanum decus, nec ingentem imaginem falsae rei concipimus; sed qualem confirmamus, exhibuimus, et exhibebimus. Raro forsitan, magnisque aetatum intervallis invenitur. neque enim magna, et excedentia solitum ac vulgarem modum, crebro gignuntur. ceterum hic ipse M. Cato, a cuius mentione haec disputatio processit, vereor ne supra nostrum exemplar sit. Denique validius debet esse quod laedit, eo quod laeditur. non est autem fortior nequitia virtute. non potest ergo laedi sapiens. Iniuria in bonos nisi a malis non tentatur: bonis inter se pax est: mali tam bonis perniciosi quam inter se. Quodsi laedi nisi infirmior non potest: malus autem bono infirmior est: nec iniuria bonis, nisi a dispari, verenda est: iniuria in sapientem virum non cadit. Illud enim iam non es admonendus, neminem bonum esse nisi sapientem. Si iniuste, inquis, Socrates damnatus est, iniuriam accepit. Hoc loco intelligere nos oportet, posse evenire, ut faciat aliquis iniuriam mihi, et ego non accipiam: tanquam si quis rem quam e villa mea surripuit, in domo mea ponat: ille furtum fecerit, ego nihil perdiderim. Potest aliquis nocens fieri, quamvis non nocuerit. Si quis cum uxore suo tanquam aliena concubat, adulter erit, quamvis illa adultera non sit. Aliquis mihi venenum dedit, sed vim suam remixtum cibo perdidit: venenum illud dando, scelere se obligavit, etiamsi non nocuit. Non minus latro est, cuius telum opposita veste elusum est. Omnia scelerata etiam ante effectum operis, quantum cul-

pae satis est, perfecta sunt. Quaedam eius conditionis sunt, et hac vice copulantur, ut alterum sine altero esse possit, alterum sine altero non possit. Quod dico, conabor facere manifestum. Possum pedes movere, ut non curram: currere non possum, ut pedes non moveam. possum, quamvis in aqua sim, non natare: si nato, non possum in aqua non esse. Ex hac forte et hoc est, de quo agitur. si iniuriam accepi, necesse est factam esse. si est facta, non est necesse accepisse me. Multa enim incidere possunt, quae submoveant iniuriam. Ut intentam manum deiicere casus potest, et emissa tela declinare: ita iniurias quaecunque potest aliqua res depellere, et in medio intercipere, ut et factae sint, nec acceptae.

VIII. Praeterea nihil iniustum iustitia pati potest: quia non coëunt contraria: iniuria autem non potest fieri. nisi iniuste: ergo sapienti iniuria non potest fieri. Nec est quod mireris, si nemo potest illi iniuriam facere, nec prodeesse quidem quisquam potest. et sapienti nihil deest, quod accipere possit loco muneris: et malus nihil potest tribuere sapienti. Habere enim prius debet, quam dare: nihil autem habet, quod ad se transferri sapiens gavisurus sit. Non potest ergo quisquam aut nocere sapienti, aut prodeesse: quemadmodum divina nec iuvari desiderant, nec laedi possunt. sapiens autem vicinus proximusque diis consistit, excepta mortalitate, similis Deo. Ad illa nitens pergensque excelsa, ordinata, intrepida, aequali et concordi cursu fluentia, secura, benigna, bono publico natus, et sibi et aliis salutaris, nihil humile concupiscet, nihil flebit, qui

rationi innixus, per humanos casus divino incedet animo. Non habet ubi accipiat iniuriam. ab homine me tantum dicere putas? nec a fortuna quidem: quae quotiens cum virtute congressa est, nunquam par recessit. Si maximum illud, ultra quod nihil habent iratae leges, aut saevissimi domini minantur, in quo imperium suum fortuna consumit; aequo placidoque animo accipimus, et scimus mortem malum non esse, ob hoc ne iniuriam quidem: multo facilius alia tolerabimus, damna, dolores, ignominias, locorum commutations, orbitates, discidia. quae sapientem, etiamsi universa circumveniant, non mergunt; nedum ad singulorum impulsus moereat. Et si fortunae iniurias moderate fert; quanto magis hominum potentium, quos scit fortunae manus esse?

IX. Omnia itaque sic patitur, ut hiemis rigorem, ut intemperantium coeli, ut servores morbosque, et cetera forte accidentia. Nec de quoquam tam bene iudicat, ut illum quidquam putet consilio fecisse: quod in uno sapiente est, aliorum omnium non consilia, sed fraudes, et insidiae, et motus animorum inconditi sunt: quos casibus adnumerat. Omne autem fortuitum citra nos saevit, et iniuriatur. Illud quoque cogitat, iniuriarum latissime patere materiam illis, per quae periculum nobis quaesitum est: ut accusatore submisso, aut criminazione falsa, aut irritatis in nos potentiorum motibus, quaeque alia inter togatos latrocinia sunt. Est et illa iniuria frequens, si lucrum alicui excussum est, aut praemium diu captatum; si magno labore affectata hereditas

aversa est, et quaestuosae domus gratia erepta. haec effugit sapiens, qui nescit nec in spe, nec in metu vivere. Adiice nunc, quod iniuriam nemo immota mente accipit, sed ad sensum eius perturbatur: caret autem perturbatione vir erectus: moderator sui, altae quietis et placidae. Nam si illum tangit iniuria, et movet, et impedit. caret autem ira sapiens, quam excitat iniuria species: nec aliter careret ira, nisi et iniuria, quam scit sibi non posse fieri. Inde tam erectus laetusque est, inde continuo gaudio elatus, adeo ad offensiones rerum hominumque non contrahitur, ut ipsa illi iniuria usui sit, per quam experimentum sui capit, et virtutem tentat. Faveamus, obsecro vos, huic proposito, aequisque et animis et auribus assimus, dum sapiens iniuria excipitur: nec quidquam ideo petulantiae nostrae, aut rapacissimis cupiditatibus, aut caecae temeritati superbiaeque derrahitur. Salvis vitiis vestris, haec sapienti libertas quaeritur. non ut vobis facere non liceat iniuriam, agimus; sed ut ille omnes iniurias in altum dimitat, patientiaque se ac magnitudine animi defendat. Sic in certaminibus sacris plerique vicere, caedentium manus obstinata patientia fatigando. Ex hoc puta genere sapientem eorum, qui exercitatione longa ac fideli, robur perpetiendi lassandique omnem inimicam vim consecuti sunt.

X. Quoniam priorem partem percurrimus, ad alteram transeamus: qua iam quibusdam propriis, plerisque vero communibus contumeliam refutabimus. Est minor iniuria, quam queri magis quam exequi possumus, quam leges quoque nulla dignam

vindicta putaverunt. Hunc affectum movet humilitas animi, contrahentis se, ob factum dictumque in honorificum. Ille me hodie non admisit, cum alios admitteret: sermonem meum aut superbe aversatus est, aut palam risit: et non in medio me lecto, sed imo collocavit: et alia huius notae. Quae quid vocem, nisi querelas nauseantis animi, in quas fere delicati et felices incident? non vacat enim haec notare, cui peiora instant. Nimio otio ingenia natura infirma et muliebria, et inopia verae iniuriae lascivientia, his commoventur, quorum pars maior constat vitio interpretantis. Itaque nec prudentiae quidquam in se esse, nec fiduciae ostendit qui contumelia afficitur. non dubie enim contemptum se iudicat: et hic morsus non sine quadam humilitate animi evenit, supprimenis se ac descendantis. Sapiens autem a nullo contemnitur, magnitudinem suam novit: nullique tantum de se licere renuntiat sibi: et omnes has quas non miserias animorum, sed molestias dixerim, non vincit, sed ne sentit quidem. Alia sunt quae sapientem feriunt, etiamsi non pervertunt: ut dolor corporis, et debilitas, aut amicorum liberorumque amissio, et patriae bello flagrantis calamitas. Haec non nego sentire sapientem. nec enim lapidis illi duritiam ferrive asserimus. nulla virtus est, quae non sentias, perpeti.

XI. Quid ergo est? Quosdam ictus recipit: sed receptos evincit, sanat, et comprimit. haec vero minora ne sentit quidem, nec adversus ea solita illa virtute utitur dura tolerandi: sed aut non annotat, aut digna risu putat. Praeterea, cum magnam par-

tem contumeliarum superbi insolentesque faciant, et male felicitatem ferentes: habet quo istum affectum inflatum respuat, pulcherrimam virtutem omnium, animi sanitatem, magnitudinemque illa quidquid huiusmodi est, transcurrit, ut vanas somniorum species, visusque nocturnos, nihil habentes solidi atque veri. Simul illud cogitat, omnes inferiores esse, quam ut illis audacia sit, tanto excelsiora despiciere. Contumelia a contemptu dicta est: quia nemo, nisi quem contempsit, tali iniuria notat. nemo autem maiorem melioremque contemnit, etiamsi facit aliquid quod contemnentes solent. Nam et pueri os parentum feriunt, et crines matris turbavit lacervitque infans, et sputo aspersit, aut nudavit in conspectu suorum tegenda, et verbis obscenioribus non pepertit: et nihil horum contumeliam dicimus, quare? quia qui fecit, contemnere non potest. Eadem causa est, cur nos mancipiorum nostrorum urbanitas, in dominos contumeliosa, delectet: quorum audacia ita demum sibi in convivas ius facit, si coepit a domino. Ut quisque contemptissimus, et ludibrius est, ita solutissimae linguae est. Pueros quidem in hoc mercantur procaces, et eorum impudentiam aciunt, et sub magistro habent, qui probra meditate effundant: nec has contumelias vocamus, sed argutias.

XII. Quanta autem dementia est, iisdem modo delectari, modo offendri: et rem ab amico dictam maledictum vocare: a servulo, ioculare convicium? Quem animum nos adversus pueros habemus, hunc sapiens adversus omnes, quibus etiam post iuven-

tam canosque puerilitas est. An quidquam isti profecerunt, quibus animi mala sunt, autem in maius errores, qui a pueris magnitudine tantum formaque corporum differunt. ceterum non minus vagi incertique, voluptatum sine dilectione appetentes, trepidi, et non ingenio, sed formidine quieti? Non ideo quidquam inter illos puerosque interesse quis dixerit, quod illis talorum nucumque et aeris mutui avaritia est; his auri argentique et urbium. quod illi inter ipsos magistratus gerunt, et praetextam fascesque ac tribunal imitantur; hi eadem in campo foroque et in curia serio ludunt. illi in litoribus arenae congestu simulacra domuum excitant; hi ut magnum aliquid agentes, in lapidibus ac parietibus, et tectis moliendis occupati, ad tutelam corporum inventa, in periculum verterunt. Ergo par pueris, longiusque progressis, sed in alia maioraque error est. Non immerito itaque horum contumelias sapiens, ut iocos, accipit: et aliquando illos, tanquam pueros, malo poenaque admonet, et afficit: non quia accepit iniuriam, sed quia fecerunt, et ut desinant facere. Sic enim et pecora verbere domantur: nec irascimur illis, cum sessorem recusaverint: sed comepescimus, ut dolor contumaciam vincat. Ergo et illud solutum scies, quod nobis opponitur. Quare si non accepit iniuriam nec contumeliam sapiens, punit eos qui fecerunt? non enim se ulciscitur, sed illos emendat.

XIII. Quid est autem, quare hanc animi firmatatem non credas in virum sapientem cadere, cum tibi in aliis idem notare, sed non ex eadem cau-

sa liceat? Quis enim phrenetico medicus irascitur? quis febricitantis et a frigida prohibiti, maledicta in malam partem accipit? Hunc affectum adversus omnes habet sapiens, quem adversus aegros suos medicus: quorum nec obscoena, si remedio egent, contrectare, nec reliquias et effusa intueri designatur, nec per furorem saevientium excipere convicia. Scit sapiens, omnes hos qui togati purpuratique incedunt, valentes coloratosque male sanos esse: quos non aliter videt, quam aegros intemperantes. Itaque ne succenset quidem, si quid in morbo petulantius ausi sunt adversus medentem, et quo animo honores eorum nihilo aestimat, eodem parum honorifice facta. Quemadmodum non placet sibi, si illum mendicus coluerit; nec contumeliam iudicabit, si illi homo plebis ultimae salutanti mutuam salutationem non reddiderit: sic nec se suspiciet quidem, si illum multi divites suspexerint. scit enim illos nihil a mendicis differre, immo miseriiores esse. illi enim exiguo, hi multo egent. Et rursum non tangetur, si illum rex Medorum, Attalusve Asiae, salutantem silentio ac vultu arroganti transferit. scit statum eius non magis habere quidquam invidendum, quam eius cui in magna familia cura obtigit, aegros infanosque compescere. Num moleste feram, si mihi non reddiderit nomen aliquis ex his, qui ad Castoris negotiantur, nequam mancipia ementes vendentesque, quorum tabernae pessimorum servorum turba refertae sunt? non, ut puto. quid enim is boni habet, sub quo nemo nisi malus est? Ergo ut huius humanitatem inhumanitatemque negligit, ita et

regis. Habes sub te Parthos, Medos, et Bactrianos : sed quos metu contines, sed propter quos remittere arcum tibi non contigit, sed postremos, sed vanales, sed novum aucupantes dominium. Nullius ergo movebitur contumelia : omnes enim inter se differunt : sapiens quidem pares illos, ob aequalem stultitiam, omnes putat. Nam si semel se dimiserit eo, ut aut iniuria moveatur, aut contumelia ; non poterit unquam esse securus : securitas autem proprium bonum sapientis est. Nec committet, ut vindicando sibi contumeliam factam, honorem habeat ei qui fecit. necesse est enim, a quo quisque contemni moleste fert, suspici gaudeat.

XIV. Tanta quosdam dementia tenet, ut contumeliam sibi posse fieri putent a muliere. Quid refert, quantum habeat, quot lexicarios, quam oneratas aures, quam laxam sellam ? aequa impudens animal est, et nisi scientia accessit ac multa eruditio, ferum, cupiditatum incontinens. Quidam se a cinerario impulsos moleste ferunt, et contumeliam vocant ostiarii difficultatem, nomenclatoris superbiam, cubicularii supercilium. O quantus inter ista risus tollendus est, quanta voluptate implendus animus, ex alienorum errorum tumultu, contemplanti quietem suam ! Quid ergo ? sapiens non accedet ad fores, quas durus ianitor obsidet ? Ille vero, si res necessaria vocabit, experietur, et illum, quisquis erit, tanquam canem acrem, obiecto cibo leniet : nec indignabitur aliquid impendere, ut limen transeat, cogitans et in pontibus quibusdam pro transitu dari. Itaque illi quoque, quisquis erit, qui hoc salutatio-

num publicum exercet, donabit: scit emere venalia. Ille pusilli animi est, qui sibi placet, quod ostiario libere respondit, quod virgam eius fregit: quod ad dominum accessit, et petiit corium. Fecit se adversarium qui contendit, et ut vincat, par fuit. At sapiens colaphis percussus, quid faciet? quod Cato, cum illi os percussum esset: non excanduit, non vindicavit iniuriam: nec remisit quidem, sed factam negavit. Maiore animo non agnovit quam ignorisset. Non diu in hoc haerebimus. quis enim necit, nihil ex his quae creduntur bona aut mala, ita videri sapienti, ut omnibus? Non respicit quid homines turpe iudicent, aut miserum: non it qua populus: sed ut sidera contrarium mundo iter intendunt, ita hic adversus opinionem omnium vadit.

XV. Definite itaque dicere: Non accipiet ergo sapiens iniuriam si caedetur? si oculus illi eruetur? non accipiet contumeliam, si obscoenorum vocibus improbis per forum agetur? si in convivio regis, recumbere infra mensam, vescique cum servis ignominiosa officia sortitis iubebitur? si quid aliud ferre cogetur eorum, quae excogitari pudori ingenuo molesta possunt? In quantumcunque ista vel numero, vel magnitudine creverint, eiusdem naturae erunt. Si non tangent illum parva, ne maiora quidem: si non tangent pauca, ne plura quidem. Sed ex imbecillitate vestra conieeturam capit is gentis animi: et cum cogitas, quantum putetis vos pati posse, sapientis patientiae paulo ulteriore terminum ponitis. At illum in aliis mundi finibus sua virtus collocavit, nihil vobiscum communę habentem. Quare

etsi aspera , et quantumcunque toleratu gravia sint , audituque et visu refugienda, non obruetur eorum coetu : et qualis singulis , talis universis obfistet. Qui dicit, illud tolerabile sapienti , illud intolerabile , et animi magnitudinem intra certos fines tenet : male agit. vincit nos fortuna , nisi tota vincatur. Nec putates istam Stoicam esse duritiam. Epicurus, quem vos patronum inertiae vestrae assumitis , putatisque mollia ac desidiosa praecipere , et ad voluptates ducentia , Raro , inquit , sapienti intervenit fortuna. Quam paene emisit viri vocem ! Vis tu fortius loqui , et illam ex toto submovere ? Domus haec sapientis angusta , sine cultu , sine strepitu , sine apparatu , nullis observatur ianitoribus , turbam vaenali fastidio digerentibus : sed per hoc limen vacuum , et ab ostiariis liberum , fortuna non transit. scit non esse illic sibi locum , ubi sui nihil est. Quodsi Epicurus quoque , qui corpori plurimum indulxit , adversus iniurias exsurgit : quid apud nos incredibile videri potest , aut supra humanae naturae mensuram ? Ille ait iniurias tolerabiles esse sapienti , nos iniurias non esse.

XVI. Nec est , quod dicas hoc naturae repugnare. Non negamus rem incommodam esse , verberari et impelli , et aliquo membro carere : sed omnia ista negamus iniurias esse. non sensum illis doloris detrahimus : sed nomen iniuriae , quod non potest recipi virtute salva. Uter verius dicat , videbimus : ad contemptum quidem iniuriae uterque consentit. Quaeris quid inter duos intersit ? Quod inter gladiatores fortissimos. quorum alter premit vulnus , et stat in gradu , alter respiciens ad clamantem populum , signifi-

cat nihil esse, et intercedi non patitur. Non est, quod putes magnum, quo dissidemus. Illud quo de agitur, quod unum ad nos pertinet, utraque exempla hortantur: contemnere iniurias, et quas iniuriarum umbras ac suspiciones dixerim, contumelias ad quas despiciendas non sapienti opus est yiro, sed tantum considente, qui sibi possit dicere: Utrum merito mihi ista accidunt, an immerito? Si merito, non est contumelia, iudicium est. si immerito: illi qui iniusta facit, erubescendum est. Et quid est illud, quod contumelia dicitur? in capitibus mei levitatem iocatus est, et in oculorum valetudinem, et in crurum gracilatem, et in staturam. Quae contumelia est, quod apparet, audire? Coram uno aliquid dictum ridemus, coram pluribus indignamur: et eorum aliis libertatem non relinquimus, quae ipsis in nos dicere assuevimus. Iocis temperatis delectamur, immodicis irascimur.

XVII. Chrysippus ait quendam indignatum, quod illum aliquis Vervecem marinum dixerat. In senatu flentem vidimus Fidum Cornelium, Nasonis generum, cum illum Corbulo Struthiocamelum depilatum dixisset. Adversus alia maledicta, mores et vitam convulnerantia, frontis illi firmitas constitit: adversus hoc tam absurdum lacrimae prociderunt. tanta animorum imbecillitas est, ubi ratio discessit. Quid, quod offendimur, si quis sermonem nostrum imitatur, si quis incessum, si quis vitium aliquod corporis aut linguae exprimit? quasi notiora illa fiant alio imitante, quam nobis facientibus. Senectutem quidam inviti audiunt, et canos, et alia, ad quae voto pervenitur. Paupertatis maledictum quosdam perus-

fit: quam sibi obiecit, quisquis abscondit. Itaque materia petulantibus et per contumeliam urbanis detrahitur, si ultiro illam et prior occupies. nemo aliis risum praebuit, qui ex se cepit. Vatinium hominem natum et ad risum, et ad odium, scurram fuisse venustum ac dicacem, memoriae proditum est. in pedes suos ipse plurima dicebat, et in fauces concisas: sic inimicorum, quos plures habebat quam morbos, et in primis Ciceronis urbanitatem effugit. Si ille hoc potuit duritia oris, qui assiduis conviciis depudere didicerat: cur is non possit, qui studiis liberalibus, et sapientiae cultu, ad aliquem profectum pervenerit? Adiice, quod genus ultionis est, eripere ei qui fecit, contumeliae voluptatem. Solent dicere: Miserrum me, puto non intellexit! adeo fructus contumeliae in sensu et indignatione patientis est. Deinde non deerit illi aliquando parem invenire, qui te quoque vindicet.


XVIII. C. Caesar inter cetera virtus, quibus abundabat, contumeliosus mirabiliter ferebatur omnibus aliqua nota feriendis, ipse materia risus benignissima. Tanta illi palloris insaniam testantis foeditas erat, tanta oculorum sub fronte anili latentium torvitas, tanta capitis destituti, et emendicatis capillis aspersi deformitas. adiice obsecram setis cervicem, et exilitatem crurum, et enormitatem pedum. Immensum est, si velim singula referre, per quae in patres avosque suos contumeliosus fuit, per quae in universos ordines: ea referam, quae illum exitio dederunt. Asiaticum Valerium in primis amicis habebat, ferocem virum, et vix aequo animo alienas contu-

melias laturum. Huic in convivio, id est, in concione, voce clarissima, qualis in concubitu esset uxor eius, obiecit. Dii boni, hoc virum audire, Principem scire, et usque eo licentiam pervenisse, ut non dico consulari, non dico amico, sed tantum marito Princeps et adulterium suum narret, et fastidium? Chaereae, tribuno militum, sermo non pro manu erat, languidus sono, et infracta voce suspicitor. Huic Caius signum petenti modo Veneris, modo Priapi dabat: aliter atque aliter exprobrans armato mollitiam. Haec ipse perlucidus, crepidatus, armillatus. Coëgit itaque illum uti ferro, ne saepius signum peteret. Ille primus inter coniuratos manum sustulit: ille cervicem medium uno iectu decidit: plurimum deinde undique publicas ac privatas injurias ulciscentium gladiorum ingestum est. sed primus vir fuit, qui minime visus est. At idem Caius omnia contumelias putabat, et sicut ferendarum impatiens, faciendarum cupidissimus. Iratus fuit Herennio Macro, quod illum Caïum salutaverat: nec impune cessit primipilario, quod Caligulam dixerat. Hoc enim in castris natus, et alumnus legionum vocari solebat, nullo nomine militibus familiarior unquam factus: sed iam Caligulam convictum et probrum iudicabat cothurnatus. Ergo hoc ipsum solatio erit, etiamsi nostra facilitas ultionem omiserit, futurum aliquem, qui poenas exigat a procace, et superbo, et iniurioso: quae vitia nunquam in uno homine, et in una contumelia consumuntur. Respiciamus eorum exempla, quorum laudamus patientiam: ut Socratis, qui comoediarum publicatos in

se et spectatos sales, in partem bonam accepit, risusque non minus, quam cum ab uxore Xanthippe immunda aqua perfunderetur. Antistheni mater barbara et Thressa obiiciebatur: respondit, et deorum matrem Idaeam esse.

XIX. Non est in rixam colluctationemque veniendum. procul auferendi pedes sunt: et quidquid horum ab imprudentioribus fiet (fieri autem nisi ab imprudentibus non potest) negligendum. Et honores et iniuriae vulgi, in promiscuo habendi sunt: nec his dolendum, nec illis gaudendum. Alioquin multa, timore contumeliarum aut taedio, necessaria omittemus: et publicis privatisque officiis, aliquando etiam salutariibus, non occurremus, dum muliebris nos cura angit, aliquid contra animum audiendi: aliquando etiam obirati potentibus, detegemus hunc affectum intemperanti libertate. Non est autem libertas, nihil pati. Fallimur. libertas est, animum supponere iniuriis, et eum facere se, ex quo solo sibi gaudenda veniant: exteriora deducere a se, ne inquieta agenda sit vita, omnium risus, omnium linguas timenti. Quis est enim, qui non possit contumeliam facere, si quisquam potest? Diverso autem remedio utetur sapiens, affectatorque sapientiae. Imperfectis enim, et adhuc ad publicum se iudicium dirigentibus, hoc proponendum est, inter iniurias ipsos contumeliasque debere versari. Omnia leviora accident exspectantibus. quo quisque honestior genere, fama, patrimonio est, hoc se fortius gerat: memor, in prima acie altos ordines stare, contumelias, et verba probrosa, et ignominias,

et cetera de honestamenta, velut clamorem hostium ferat, et longinqua tela, et saxa sine vulnere circa galeas crepitantia. Iniurias vero, ut vulnera, alia armis, alia pectori infixa, non deiectus, ne motus quidem gradu, sustineat. Etiamsi premeris et infesta vi urgeris, cedere tamen turpe est: assignatum a natura locum tuere. Quaeris quis hic sit locus? viri. Sapienti aliud auxilium est huic contrarium. Vos enim rem geritis: illi parta victoria est. Ne repugnate vestro bono, et hanc spem, dum ad verum pervenitis, alite in animis: libentesque meliora excipite, et opinione ac voto iuvate. Esse aliquem invictum, esse aliquem in quem nihil fortuna possit, e Republica humani generis est.



PA Seneca, Lucius Annaeus
6661 L. Annaei Senecae philosophi
A2 Opera Ed. accurata
1782
v.1

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

